

dogm.

Kant

872^m - 1



**CORPVS
DOCTRINAE
EVANGELICO-
LVTHERANAE**

OMNIA CONTINENS

QVÆ

**DE REBVS FIDEI
THEOLOGIAE CVLTORI SCITV
NECESSARIA SVNT.**

PARS PRIOR.


AVCTORE

**M. MICH. RANFTIO,
V. D. M.**

Cum Censura et Approbatione Incl. Fac. Theol. Lips.

**L I P S I A E,
APVD JOH. SAM. HEINSII HAEREDES.
M DCC LIV.**

225 C.



V I R O

ILLVSTRISSIMO ATQVE EXCELLENTISSIMO

D O M I N O

CHRISTIANO GOTTLIEB,

S. R. I.

C O M I T I

DE HOLZENDORF,

**DYNASTAE IN BAERNSTEIN, ROTH-
WERNSDORF ET STRASGRAEBGEN etc.**

**SERENISSIMI AC POTENTISSIMI
POLONIARVM REGIS ET ELECTORIS SAXO-
NIAE CONSILIARIO ACTVALI INTIMO,
RERVMQVE ECCLESIASTICARVM ET
CONSISTORIALIVM IN TERRIS
SAXONICIS
PRAESIDI GRAVISSIMO.**

**DOMINO AC MAECENATI
MEO INDVLGENTISSIMO.**

THE CITY

THE LIBRARY

OF THE

CITY OF NEW YORK

ASTOR LENOX TILDEN FOUNDATION

DEPARTMENT OF THE CITY

OF THE CITY OF NEW YORK

LIBRARY

ASTOR LENOX TILDEN FOUNDATION

LIBRARY

ASTOR LENOX TILDEN FOUNDATION

LIBRARY

ASTOR LENOX TILDEN FOUNDATION

LIBRARY

ASTOR LENOX TILDEN FOUNDATION

THE CITY OF NEW YORK

LIBRARY

ILLVSTRISIME
EXCELLENTISSIMEQVE
COMES,

DOMINE GRATIOSISIME

gnoscas peregrino, VIR
ILLVSTRISIME,

qui ausus est, opellam hanc TVO
Excellentissimo Nomini dedicare.
Meritorum TVORUM ampli-
tudo summaque TVA diligentia in

ecclesiam remque publicam Saxoni-
cam in tanta ubique versantur cele-
britate, ut nefas foret, si ii, qui in
vicinia excelsas animi **DVI** dotes
admirantur, debitas earum laudes
alto silentio præterire velint. Hisce
ego præ cæteris me annumerandum
puto, cum Saxonia Electorali nata-
les, studia, munera, fortunam, fa-
miliam et quicquid salutis meæ con-
ducat, debeam. Sub gloriosis enim
auspiciis utriusque Potentissimi et
Benignissimi **AVGVSTI** in Mis-
sina Electorali natus et educatus,
literisque tam humanioribus quam
acade-

academicis imbutus, ad munera sacra promotus et innumeris aliis beneficiis cumulatus sum. Horum memoriam nulla unquam delibabit oblivio, etsi abhinc aliquot annis in regione vivam, in qua sub moderamine Optimi et Felicissimi Principis alius forsitan patriam suam facile ex animo evelleret. At mihi Saxonia Electoralis semper dulce manebit natale solum, cujus respectu in Principatu Altenburgensi nunquam desinam peregrinus esse. Non igitur miraberis, DOMINE ILLVSTRISIME, conatum

3 meum,

meum, nec me absque consilio egisse
judicabis, quod librum hunc **TIBI**
consecrauerim. Veneror in **TVA**
Excellentissima Persona ipsum
PRINCIPEM, in cujus sinu
quondam non modo literis incubui,
sed etiam munere sacro functus sum.
TIBI omnis cura in rebus eccle-
siasticis et academicis demandata
est. Hinc non majus patrocinium
opusculum meum, universam Evan-
gelico-Lutheranam doctrinam con-
tinens, assequi potest, quam quod
sub alis tanti **PROTECTORIS**
inveniet, qui nomine **Potentissimi**
Regis

Regis et Electoris sui omnia, quæ
ad statum religionis et ecclesiæ in
terris Saxoniciis spectant, summa
auctoritate moderatur. TIBI
itaque, COMES ILLUSTRIS-
SIME, me, meumque librum &
totam meam familiam demississime
commendo, Deum indefinenter roga-
turus, ut TE, firmissimum ecclesiæ
patriæque columnen, ac verum Saxo-
nici Zionis Palladium, cum tota
illustrissima gente HOLTZEN-
DORFIANA, sua virtute ad
tantum dignitatis fastigium evecta,
constanter sospitem ac incolumem
præ-

*praestet, nec meritorum TVORVM
magnitudinem ac splendorem ulla
unquam seculorum caligine obrui
sinat. Ex humillima mente hac
optat et precatur*

ILLVSTRISIME

A C

EXCELLENTISSIME COMES,

DOMINE GRATIOSISSIME,

TVAE ILLVSTRISSIMAE EXCELLENTIAE

*Gros-Stechavia
in Princ. Altenburg,*

ipsis Id. Maji

1754.

*devotissimus Cultor & apud Deum
deprecator.*

M. MICHAEL RANFT.



BENEVOLE LECTOR!

Non librorum eget ecclesia, qui sanctissimæ fidei dogmata satis aperte planeque explicant. Vix unquam plus operæ studiique consumserunt Theologi in interpretandis fidei articulis, quam nostro tempore, quo omnia literis mandare solemus. Non solum multorum veterum Theologorum Systemata in nostris manibus versantur, sed tot novi quoque dantur Auctores, qui fidei & religionis nostræ evangelicæ doctrinam tradunt, ut totus quasi Theologiæ thesaurus exhaustus videatur. Et quanquam non omnes libri, qui de rebus fidei agunt, æquali pretio digni habeantur, plurimi eorum tamen a doctissimis Theologis summa diligentia elaborati sunt. Quidam ex his sanctissimam doctrinam in compendium redegerunt, quidam in toto suo ambitu exposuerunt. Nonnulli veterum Theologorum ordinem

P R Æ F A T I O.

dinem ac methodum imitati sunt, alii vero non solum novam methodum, eamque mathematicam, elegerunt, sed etiam sacra Theologiæ capita ad Augustanæ Confessionis aut totius Symbolici corporis ductum explicuerunt. Quidam usi sunt lingua vernacula, quidam vero latina. Omnes autem magni nominis viri sunt, qui vel sacrorum munerum dignitate, vel ingenii excellentia literarumque Theologicarum cognitione inclaruerunt. Audax igitur forte *TIBI, BENEVOLE LECTOR*, videbor, meque temeritatis argues, hunc edidisse librum. Supervacaneum habebis hunc laborem, nec a me aliquid lectu dignum expectabis. Non solum jam multos extare libros, dices, qui Theologiæ summam satis luculenter exponunt, sed in omnibus Academiis etiam dari publicos ecclesiæ doctores, qui voce ac calamo divinam veritatem magno applausu profiteantur, ejusque difficiliora capita & explicent & vindicent.

Ego ipse, *BENEVOLE LECTOR*, libenter fateor, me haud magni nominis Theologum esse. At mihi tamen locum non denegabis inter tales verbi divini ministros, qui in sacrarum literarum studiis continuo se occupatos præbent & operam dant, ut & alios
de

P R Æ F A T I O.

de iis erudiant. Hac de causa opusculum hoc literis mandavi. Id vero in eorum inprimis usum me scripsisse velim credas, qui finitis studiis Academicis rure se continent & vel munus ecclesiasticum adspirant, vel eodem jam funguntur, Theologiæ vero capita repetere volunt. Titulus & methodus aliquid novi præ se ferunt, doctrinam ipsam vero in libro contentam neutiquam novam habebis. Suspende autem tamdiu iudicium *TUUM* de hoc qualicunque ingenii fructu, usque dum totum perlegeris librum. Invenies in eo nihil quidem, quod orthodoxiæ adversatur, singulares tamen observationes & quæstiones, hic illic interspersas, deprehendes, quæ *TIBI* nec nauseam nec molestiam creabunt. Fortasse etiam approbabis singularem libri huius methodum, brevitatem & perspicuitatem. Titulum *Corporis Doctrinæ* fert, quia omnia continet, quæ in ecclesia Evangelico-Lutherala de rebus fidei scitu credituque necessaria sunt. Divisum est totum opus in certos libros, & quilibet liber iterum in certa capita, ut eo distinctius omnia, quæ ad singulos fidei articulos spectant, pertractentur. Summam adhibui diligentiam, ut conquisitis argumentis, ex Scriptura S. & sobria Philosophia petitis, omnia, quæ scripsi, confirmem, & quæ obscura sint,


* 3

P R Æ F A T I O.

sint, perspicua reddam. Noli vero, *BENEVOLE LECTOR*, perperam interpretari, me non totum opus una in lucem dedisse. Hujus argumenti libri facile nauseam creant iis, qui non magnos sumtus pro istis impendere volunt, antequam de eorum præstantia & dignitate satis certi sunt. Distinxi propterea opusculum hoc in *duas partes*, quarum *Prior* jam in hisce paginis Tuo se sistit conspectui. Eos inprimis continet fidei articulos, qui ad Theologiam in specie sic dictam, nec non ad Anthropologiam & Christologiam spectant. *Posterior Pars* illos fidei articulos tradet, qui ad Sotiologiam pertinent. Non tempus accurate definire possum, quando hæc *Altera Pars* in publicum proditura sit. Certus tamen esto, me in ejus elaboratione jam omnem curam & diligentiam impendere eoque niti, ut tota *altera Pars* intra anni spatium prelo subjici & in lucem edi queat. Interim *TIBI* hanc *Primam* opusculi mei *Partem* commendatam habeas. Spe gloriæ non intumescō, sed lætabor, si *TIBI* commentariolum hoc non plane displiceat. Vale & fave studiis meis.

AUTOR.

CON-



CONSPECTUS HUIUS PRIORIS PARTIS.

PROLEGOMENA.

De Theologia & Religione.

- Cap. I. De Theologia in genere.
 II. De Theologia subjective sumta.
 III. De Theologia objective sumta.
 IV. De Theologia Naturali.
 V. De Theologia Revelata.
 VI. De Articulis Fidei.
 VII. De Religione.

LIBER I.

De Scriptura Sacra.

- Cap. I. De Scriptura S. & Revelatione Divina in genere.
 II. De Causis Divinis Scripturæ S.
 III. De Auctore & Scriptoribus Scripturæ S.
 IV. De Θεωπνευσία Scripturæ S.
 V. De Codice Scripturæ S.
 VI. De Textu Scripturæ S.
 VII. De Integritate Scripturæ S.
 VIII. De Versionibus Scripturæ S.
 IX. De Auctoritate Scripturæ S.
 X. De Veritate Scripturæ S.
 XI. De externis Scripturæ S. criteriis.
 XII. De internis Scripturæ S. criteriis.
 XIII. De Canone Scripturæ S.
 XIV. De Libris Canonicis Scripturæ S.

- Cap. XV. De Efficacia Scripturæ S.
 XVI. De Perfectione Scripturæ S.
 XVII. De Perspicuitate Scripturæ S.
 XVIII. De Sensu Scripturæ S.
 XIX. De Lectione Scripturæ S.
 XX. De Interpretatione Scripturæ S.

LIBER II.

DE DEO.

SECTIO I.

De DEO in genere.

- Cap. I. De Existentia Dei.
 II. De Nominibus Dei.
 III. De Essentia Dei.
 IV. De Attributis Dei in genere.
 V. De Perfectione & Bonitate Dei.
 VI. De Gloria & Beatitudine Dei.
 VII. De Unitate Dei.
 VIII. De Simplicitate Dei.
 IX. De Infinitate & Immensitate Dei.
 X. De Omnipræsentia Dei.
 XI. De Æternitate Dei.
 XII. De Vita Dei.
 XIII. De Intellectu Dei.
 XIV. De Scientia Dei.
 XV. De Sapientia Dei.
 XVI. De Voluntate Dei in genere.
 XVII. De Libertate Dei.
 XVIII. De Efficacia voluntatis Dei.
 XIX. De Decretis Dei.
 XX. De Amore Dei.

Cap.

- Cap. XXI. De Justitia Dei.
 XXII. De Sanctitate Dei.
 XXIII. De Veracitate Dei.
 XXIV. De Omnipotentia Dei.

SECTIO II.

De Deo Unitrino in specie.

- Cap. I. De Mysterio Trinitatis in genere.
 II. De Personis Deitatis in genere.
 III. De trium Deitatis Personarum reali differentia & essentiae unitate.
 IV. De Patre, prima Deitatis persona.
 V. De Filio, secunda Deitatis persona.
 VI. De Deitate Filii Dei in specie.
 VII. De Spiritu S. tertia Deitatis persona.
 VIII. De divinis actibus, proprietatibus & notionibus personalibus, quibus tres Deitatis personae inter se distinguuntur.
 IX. De Generatione Patris & Filii in specie.
 X. De Processione Spiritus S. in specie.

LIBER III.

DE CREATIONE ET PROVIDENTIA.

SECTIO I.

De Creatione.

- Cap. I. De Creatione in genere.
 II. De Creatore.
 III. De Mundo in genere.
 IV. De Tempore & Principio mundi.
 V. De Ordine creationis.
 VI. De Modo creationis.

- Cap. VII. De Materia prima mundi.
 VIII. De Cœlo & Sideribus,
 IX. De Terra & Mari.
 X. De Animalibus.

SECTIO II.

De Providentia.

- Cap. I. De Providentia in genere.
 II. De Providentia Dei generali.
 III. De Providentia Dei speciali & specialissima.
 IV. De Conservatione Dei.
 V. De Gubernatione Dei & ejus concursu ad
 causas secundas.
 VI. De Fortuna & Fato.
 VII. De Concursu Dei morali.
 VIII. De Terminò vitæ.

LIBER IV.

DE ANGELIS.

SECTIO I.

De Angelis in genere.

- Cap. I. De Existentia angelorum.
 II. De Essentia & Natura angelorum.
 III. De Origine angelorum.
 IV. De Excellentia angelorum.
 V. De Numero & Ordine angelorum.
 VI. De Intellectu angelorum.
 VII. De Voluntate angelorum.
 VIII. De Potentia angelorum.
 IX. De Apparitione angelorum.
 X. De Statu gratiæ angelorum.

SECTIO

SECTIO II.

De Angelis bonis.

- Cap. I. De angelorum Confirmatione in bono.
 II. De Officiis angelorum bonorum in genere.
 III. De Officiis angelorum bonorum, quæ Deo
 & Christo immediate præstant.
 IV. De Officiis angelorum bonorum circa ho-
 mines in genere.
 V. De Officiis angelorum bonorum, quæ spe-
 ciatim triplici hominum statui præstant.
 VI. De Cultu angelorum bonorum.

SECTIO III.

De Angelis s. Spiritibus malis.

- Cap. I. De Lapsu malorum spirituum.
 II. De Nominibus, Numero & Ordine malo-
 rum spirituum.
 III. De Intellectu & Cognitione malorum spi-
 rituum.
 IV. De Voluntate malorum spirituum.
 V. De Potentia malorum spirituum.
 VI. De Operationibus malorum spirituum or-
 dinariis.
 VII. De Magia diabolica.
 VIII. De Obsessionibus malorum spirituum.
 IX. De Spectris s. Apparitionibus malorum spi-
 rituum.
 X. De Judicio & Damnatione malorum spi-
 rituum.

LIBER V.

DE HOMINE.

SECTIO I.

De Hominis Natura & Constitutione.

Cap. I. De Homine in genere.

II. De Creatione & Propagatione hominis.

III. De Corpore hominis.

IV. De Anima hominis.

V. De Vinculo unionis inter animam & corpus.

SECTIO II.

De Imagine Divina.

Cap. I. De Origine & Subjecto imaginis divinæ.

II. De Forma & Natura imaginis divinæ.

III. De Scientia & Sapientia originali.

IV. De Justitia & Sanctitate originali.

V. De Immortalitate originali.

VI. De Statu integritatis & Paradiso.

VII. De Jactura & Reliquiis imaginis divinæ.

VIII. De Conscientia.

SECTIO III.

De Lapsu hominum.

Cap. I. De Auctore lapsus.

II. De Permissione divina lapsus.

III. De Occasione lapsus.

IV. De Forma lapsus.

V. De Imputatione lapsus.

VI. De Effectibus lapsus.

SECTIO



SECTIO IV.

De Morte Temporalis.

Cap. I. De Morte in genere.

II. De Autore mortis.

III. De Causis mortis.

IV. De Forma mortis.

V. De Necessitate mortis.

VI. De Utilitate mortis.

VII. De Statu animarum post mortem.

VIII. De Statu corporum post mortem.

LIBER VI.

DE PECCATO.

SECTIO I.

De Peccato in genere.

Cap. I. De Natura peccati.

II. De Norma peccati.

III. De Malo peccati.

IV. De Poena peccati.

V. De Auctore & Causis peccati.

VI. De Subiecto peccati.

VII. De Sede peccati.

VIII. De Culpa peccati.

IX. De Statu peccati.

SECTIO II.

De Peccato Originali.

Cap. I. De Peccato originali in genere.

II. De Forma peccati originalis.

Cap.

- Cap. III. De Subjecto peccati originalis.
 IV. De Peccato Originali in Intellectu.
 V. De Peccato Originali in Voluntate.
 VI. De Peccato Originali in Carne.
 VII. De Libero Arbitrio ejusque defectu in
 rebus spiritualibus.
 VIII. De Tenacitate & Propagabilitate peccati
 originalis.

SECTIO III.

De Peccatis Actualibus.

- Cap. I. De Peccatis Actualibus in genere.
 II. De Causis peccatorum actualium internis.
 III. De Causis peccatorum actualium externis.
 IV. De Subjecto peccatorum actualium.
 V. De Discrimine peccatorum actualium.
 VI. De Gradibus peccatorum actualium.
 VII. De Peccatis mortalibus & venialibus.
 VIII. De Statu excoecationis & indurationis.
 IX. De Peccato in Spiritum S.

LIBER VII.

DE CHRISTO.

SECTIO I.

De Persona Christi.

- Cap. I. De Persona Christi in genere & ejus missione.
 II. De Jesu Nazareno, quod verus fuerit Mes-
 sias s. Christus.
 III. De Christi duplici natura in genere.

Cap.

Cap. IV. De Christi humana natura in specie.

V. De Unione duarum Christi naturarum.

VI. De Communicatione & Communionē naturarum in Christo.

VII. De Communicatione Idiomatum.

VIII. De Primo communicationis idiomatum genere.

IX. De Secundo communicationis idiomatum genere.

X. De Tertio communicationis idiomatum genere.

SECTIO II.

De duplici Statu Christi.

Cap. I. De diverso Christi statu in genere.

II. De statu Exinanitionis Christi in genere.

III. De statu Exaltationis Christi in genere.

IV. De Incarnatione Christi.

V. De Conceptione Christi.

VI. De Nativitate Christi.

VII. De Christi Educatione & vitæ cursu.

VIII. De Passione Christi.

IX. De Morte Christi.

X. De Sepultura Christi.

XI. De Reviviscentia Christi.

XII. De Descensu Christi ad inferos.

XIII. De Resurrectione Christi.

XIV. De Ascensione Christi in coelos.

XV. De Sessione Christi ad dextram Patris.

SECTIO

SECTIO III.

De Triplici Officio Christi.

Cap. I. De Officio Christi in genere.

II. De Unctione Christi.

III. De Officio Christi prophetico in genere.

IV. De Administratione officii prophetici.

V. De Doctrina Christi summi Prophetæ.

VI. De Miraculis Christi.

VII. De Officio Christi sacerdotali in genere.

VIII. De Sacrificio Christi.

IX. De Intercessionem Christi.

X. De Officio Christi Regio.

XI. De Triplici Regno Christi.

SECTIO IV.

De Redemptione Christi.

Cap. I. De Redemptione hominum in genere.

II. De Subiecto redemptionis Christi.

III. De Forma redemptionis Christi s. Satisfactione.

IV. De Satisfactione Christi activa.

V. De Satisfactione Christi passiva.


VI. De Merito Christi s. Effectu redemptionis.





PROLEGOMENA.
DE
THEOLOGIA ET RELIGIONE

CAPUT I.
DE
THEOLOGIA IN GENERE.



VOX ΘΕΟΛΟΓΙΑ a voce ΘΕΟΛΟΓΟΣ derivatur, significat λόγον περὶ τῷ Θεῷ, h. e. *sermonem de Deo*, & est a Scriptura S. quæ λόγος τῷ Θεῷ ἴ. *sermo ipsius Dei* est, probe discernenda.

Apud veteres Græcos vocabantur sacerdotes & poëtæ *Theologi*, quia de genealogiis Deorum occupabantur & facta eorum exponebant.

Vox *Theologia* in Scriptura S. non occurrit, sed tantum vox *Theologus*, & quidem in inscriptione Apocalypseos, ubi Johannes dicitur

Θεολόγος, quia præ aliis sacris Scriptoribus divinitatem Christi demonstravit.

Patres Græci inde occasionem sumserunt, totam doctrinam de Deo rebusque divinis *Theologiam* vocandi. Fecit hoc & *Clemens Alexandrinus* & *Iustinus Martyr*, quorum prior Ἐπιδρομὴν τῆς Θεολογίας dixit, quod Latini *Cursum Theologicum* nominant.

Patres Græci interdum etiam *Theologiam* in sensu specialiori opponunt *Oeconomiae*, quando per *illam* doctrinam de divina Christi natura, per *hanc* vero doctrinam de humana ejus natura intelligunt.

In sacris literis οἰκονομία comprehendit omnia, quæ Deus in hominum salutem decrevit, patefecit & effecit, Eph. III, 2.

Theologia varia in Scriptura S. habet nomina. In V. T. plerumque dicitur חכמה, *sapientia*, in N. T. vero γνῶσις σωτηρίας, Luc. I, 77. σοφία Θεῶ ἐν μυστηρίῳ, 1 Cor. II, 7. λόγος σοφίας, 1 Cor. XII, 8. ἐπίγνωσις ἀληθείας τῆς κατ' εὐσέβειαν, Tit. I, 1. & ὑποϋπῶσις ἐγχεινόντων λόγων, 2 Tim. I, 13.

Theologiam qui tractat, *Theologus* vocatur, quæ vox non quemcunque rerum sacrarum cultorem significat, qualis omnis homo esse debet, sed hominem, qui habitum sibi acquisivit, de Deo rebusque divinis ratiocinandi & judicandi, Hebr. V, 14.

Vox *Theologia* partim *objective* f. *abstractive*, partim *subjective* f. *concretive* sumitur. Objective

ctive sumitur, quatenus Theologia extra hominis mentem, subjective vero, quatenus intra ejus mentem locum habet.

Objective Theologia doctrina est de Deo rebusque divinis, *subjective* vero habitus cognoscendi Deum resque divinas.

Respectu principii distinguitur utraque Theologia in *Naturalem & Revelatam*.

C A P U T II.

DE THEOLOGIA, SUBJECTIVE
S U M T A.

Theologia *subjective* f. *concretive sumta* recte per *habitum* definitur, quia consideratur hic, quatenus in homine, tanquam suo subiecto, est.

Habitus idem est ac *facilitas agendi per crebrum exercitium acquisita*. Jure hinc dicitur Theologia *σερεὰ τροφή τῶν διὰ τὴν ἐξιν τὰ αἰσθητήρια γεγυμνασμένα ἐχόντων πρὸς διάκρισιν καλῆ τε καὶ κακῆ*, Hebr. V, 14. Est enim habitus, qui circa exercitatas sentiendi facultates versatur ad dijudicandum, quid bonum vel malum sit.

Potest etiam *scientia* vocari, quæ habitus est, ea, quæ ad certam doctrinam spectant, recte cognoscendi. Probe distinguenda itaque est Theologia ab aliis habitibus, qui magis ad corpus, quam ad mentem spectant. Est enim habitus tantum cognoscendi.

Acquisitio hujus habitus non est mere naturalis, quia spirituales exercitationes requirit, quales sunt *oratio, meditatio & tentatio*. Deficiunt enim hominis menti vires propriæ ad cognoscendum ea, quæ spiritualia sunt, 1 Cor. II, 14. Interim naturalis aptitudo non excludenda est, ad quam ingenium, judicium & memoria pertinent, quæ hominem ad cognoscendas divinas veritates easque docendas & vindicandas idoneum reddunt.

Patet exinde, quod ea *Theologia* tantum sit *vera* dicenda, quæ in homine illuminato datur. Est enim habitus mentis *Θεόσδολος*, s. *divinitus* acquisitus. Omnis itaque Gentilium & Philosophorum, qua talium, nec non hæreticorum sic dicta *Theologia* magis *Ματαιολογία*, quam vera *Theologia* vocanda est. Potest enim *Theologia* proprie non esse, nisi *ὀρθὴ καὶ ἀληθὴς*, h. e. *recta & vera*, uti Clemens Alexandrinus istam nominat.

Respectu *subjecti* distinguitur *Theologia* in *ἀρχέτυπον* & *ἐκτυπον*.

Theologia ἀρχέτυπος ea cognitio est, quam Deus de se ipso habet, 1 Cor. II, 10. Act. XV, 18. Ita vocatur, quia non ab alia cognitione, tanquam causa exemplari dependet, sed potius omnis alius cognitionis, quæ in angelis & hominibus de Deo rebusque divinis datur, (& quæ propterea *ἐκτύπος* dicitur), forma & exemplar est. Exprimit enim hæc ideas *Theologiæ ἀρχετύπου*, per se incomprehensibilis, 1 Tim.

1 Tim. VI, 16. in verbo divino revelatas, Deut. XXIX, 29.

Communicata est Theologia ἀρχέτυπος cum Christo homine per unionis personalis gratiam, Matth. XI, 27. Col. II, 3.

Theologia ἐκτύπος in angelis est vel intuitiva, Matth. XVIII, 10. vel experimentalis, 1 Petr. I, 11. 12. Eph. III, 10. Illa concreata, hæc vero acquisita est.

Theologia ἐκτύπος in hominibus post lapsum est vel *viæ*, vel *patriæ* s. viatorum & comprehensorum, quæ distinctio ex 1 Cor. IX, 24. 2 Cor. V, 6. 8. & Phil. III, 12. 13. desumpta est, ubi de duplici hominum statu respectu hujus & futuræ vitæ agitur.

Theologia *viæ* est ea, quam homines in hac vita habent & alias Hodosophia nominatur, Theologia *patriæ* vero ea, quam electi habebunt in cœlesti patria, 2 Cor. V, 7. 1 Cor. XIII, 12. Illa est imperfecta, hæc vero perfecta, 1 Cor. XIII, 10. quæ propterea etiam Theologia *visionis* appellatur, quia omnia tunc exactissime & oculatissime cognoscemus, 1 Cor. XIII, 12. 1 Joh. III, 2.

Est Theologia ἐκτύπος in hominibus tam ante lapsum quam post lapsum vel *naturalis* vel *revelata*. Ante lapsum *naturalis* erat concreata, Col. III, 10. quæ tamen non adeo perfecta erat, ut non per experientiam & divinam revelationem augeri potuisset, Gen. II, 16. 17.

CAPUT III.

DE THEOLOGIA OBJECTIVE

SUMMA.

Theologia objective s. abstractive sumta est doctrina de Deo rebusque divinis.

Respectu modi proponendi dividitur in *catechetica* & *acroamaticam* s. *exotericam* & *systematicam*.

Theologia catechetica circa præcipua tantum divinæ doctrinæ capita versatur, ita, ut rudiores de iis capiant, quantum ad consequendam vitam æternam necesse habent; *acroamatica* vero circa omnia versatur, quæ ad doctrinam de Deo rebusque divinis spectant, ita quidem, ut idoneos reddat, qui eam tractent, ad docendum, confirmandum & defendendum, quæcunque ex Scriptura S. didicerint.

Respectu modi tractandi *Theologia Acroamatica* distinguitur in *dogmaticam*, *polemicam*, *moralem*, *exegeticam*, *casuisticam*, *homileticam*, *paracleticam* & *historicam*.

Theologia Dogmatica etiam *Thetica* & *Positiva* dicitur a *ponendo*, quia fundamentum salutis ponit. Nomen ex architectura desumptum est, 1 Cor. III, 10. 11. Nonnulli istud a thesibus & positionibus veritatum divinarum derivant, quibuscum occupata est.

Theologia Polemica divinas veritates a corruptelis hæreticorum & aliorum adversariorum vindicat.

Theo-

Theologia Moralis easdem ad sanctimoniam vitæ applicat.

Theologia Exegetica istas ex ipsis Scripturæ S. fontibus eruit. Vocatur propterea etiam *hermeneutica*, quia regulas Scripturam S. explicandi suppeditat.

Theologia Casuistica ex veritatibus divinis casus conscientiæ dubios enucleat & solvit.

Theologia Homiletica istas in formam sermonis, in concione publica habendi, redigit.

Theologia Paracletica istas ad solatium in omnibus ærumnis & miseriis accommodat.

Theologia Historica s. *Historia Ecclesiastica* earum sortem per omnia tempora exponit.

Datur insuper etiam *Theologia Symbolica*, quo nomine *Theologia Dogmatica* insignitur, quatenus ex libris ecclesiæ symbolicis hauritur & ad eorum ordinem & ductum tractatur.

CAPUT IV.

DE

THEOLOGIA NATURALI.

T*heologia Naturalis* nomen habet a *natura*, quia 1) residuum in nobis lumen naturæ principium ejus est, & 2) viribus intellectus & voluntatis naturalibus acquiri potest. Si objective sumitur per *doctrinam*, si subjective, per *habitu* definitur.

Lumen natura est concreata facultas hominis, certas veritates per se non modo cognoscendi,

sed quoque de iisdem ratiocinandi. Per lapsum primorum parentum istud non quidem extinctum, at valde tamen debilitatum est.

Quatenus itaque naturæ lumen hominibus concreatum est, *Theologia Naturalis* Deum quidem auctorem habet, at ea tamen non propterea habitus *Θεόσδεας* dici debet, quia non divinitus, sed tantum per vires naturales, valde tamen debilitatas & peccaminosas, acquiritur.

A *Theologia Gentili* probe distinguenda est *Theologia Naturalis*, quia per se vera, etsi valde imperfecta & ad consequendam salutem æternam non sufficiens est. Ignorat enim non modo plurima fidei dogmata, sed proponit etiam admodum obscure & dubitanter, quæ aliquo modo cognoscit. Versatur præcipue circa veritates generales de Dei existentia, essentia, operibus & cultu, nec non de animæ immortalitate.

Est vel *ἐμφυλος* f. *infit*, Rom. II, 14. 15. vel *ἐπίκτητος* f. *acquisita*, Rom. I, 20. Illam conscientia docet, Rom. II, 15. hæc vero partim ex auditu, Jos. IX, 9. 24. partim ex intuitu & consideratione creaturarum, Rom. I, 20. Act. XIV, 15. Hiob. XII, 7 - 9 hauritur.

Pugnat itaque *atheismus* cum *Theologia Naturali*. Est iste vel *theoreticus*, vel *practicus*. Ille est malitiose affectata persuasio, quod non sit Deus, hic vero talis vivendi ratio, quasi non sit
fit

fit Deus, qui malum puniat & bonum remuneretur.

Ufus Theologiæ Naturalis est, ut nos ducat ad Theologiam Revelatam, quæ in illius supplementum nobis data est.

Ex hisce patet, quod Theologia Naturalis non solum habitus sit cognoscendi Deum ex viribus naturalibus, sed etiam doctrina de Deo rebusque divinis, quatenus ex lumine naturæ hæc nobis innotescunt.

C A P U T V.

D E

THEOLOGIA REVELATA.

Prinzipium Theologiæ Revelatæ est *revelatio divina*, quæ vel *mediata* vel *immediata* est.

Immediata revelatio fuit, quæ Patriarchis & Prophetis in V. T. nec non Apostolis in N. T. ad docendum & scribendum verbum Dei facta est, *mediatam* vero dicimus eam revelationem, quam instinctu divino Prophetæ & Apostoli literis consignarunt.

Pro diversa revelationis ratione, diversoque revelatarum rerum genere multiplex quoque est *Theologia Revelata*. Est vel *Paradisiaca*, vel *Patriarchalis*, vel *Mosaica*, vel *Prophetica* vel *Apostolica* s. *Christiana*, quatenus scilicet cognitio rerum divinarum partim primis parentibus in statu integritatis, partim Patriarchis ante & post diluvium, partim Mosi in deserto, partim Prophetis

phetis in terra Canaan, partim Apostolis temporibus Christi innotuit. Omnis tamen vera est, quia non solum veracem Deum autorem habet, sed etiam modo fide dignissimo revelata fuit.

Datur etiam *Theologia falsa & erronea*, quæ æque, ac vera, *Revelata* dicitur. Vitium vel in ipsa revelatione, vel in modo, quo homo res revelatas accipit, quærendum est.

Revelatio debet esse genuina & vere divina, si principium veræ Theologiæ eam nominare volumus.

In N. T. clauso Scripturæ S. canone immediata revelatio prorsus cessavit. Quomodo autem in V. T. facta sit, suo loco ostendemus. Interim cum multi nostris temporibus de divinis revelationibus gloriantur, quæ nil nisi ludibria vel diaboli vel corruptæ Phantasiæ sunt, non mirandum est, si datur *Theologia Revelata*, quæ falsa & erronea est, qualem omnis generis *Fanatici & Mubamedani* habent.

Multi vel revelatas veritates male interpretantur, vel iis humanas traditiones & doctrinas addunt, quas inter se ita commiscent, ut systema inde enascatur, quod totum erroribus scatet.

Prius faciunt omnes *hæretici*, posterius vero *Pontificii*.

Vera itaque *Theologia Revelata* ea tantum est, quæ non alias admittit doctrinas, quam quæ ex genuina revelatione divina, literis sacris consignata, petuntur & inter se ita cohærent, ut

ut fundamentum salutis æternæ per fidem in Christum consequendæ non modo non offendant, sed etiam quovis modo suffulciant & corroborent.

Salus hæc *finis* totius Theologiæ Revelatæ *ultimus* est, isque *externus*, ab *interno*, qui in studio cognoscendæ veritatis divinæ consistit, probe distinguendus.

Objectum materiale Theologiæ Revelatæ sunt omnes res & veritates, quas Deus ad consequendam salutem æternam nobis revelavit. Versantur istæ circa *credenda* & *agenda*.

Credenda alias vocantur *dogmata fidei*, quia fidem vel constituunt, vel supponunt, vel consequuntur. Solemus etiam ista ob connexionem, quam inter se habent, appellare *articulos fidei*.

Agenda sunt *dogmata morum*, de quibus in Theologia morali agitur.

CAPUT VI.

DE ARTICULIS FIDEI.

F*ides*, quæ creditur, est complexus veritatum divinarum, quas credere debemus. Non aliter inter se coherant, quam articuli in corpore. Ortum inde est nomen *articulorum fidei*, sub quibus dogmata intelliguntur, quæ doctrinam fidei constituunt.

Fundamentum hujus fidei est Scriptura S. Eph. II, 20. Continet omnes veritates a Deo revelatas.

latas. Summa ejus est doctrina de gratia Dei per Christi meritum hominibus acquisita & in certo ordine per fidem applicanda. Dicitur propterea doctrina hæc *fundamentum salutis*, & quidem *dogmaticum*, Joh. XX, 31. a fundamento salutis *reali & substantiali*, quod est ipse Christus, 1 Cor. III, 11. Act. IV, 12. valde distinguendum.

Quæcunque dogmata ad hoc fundamentum pertinent, dicuntur *articuli fundamentales*, quorum nexus *analogia fidei* appellatur.

Paulus hujus analogiæ mentionem facit Rom. XII, 6. ubi προφητείαν κατὰ τὴν ἀναλογίαν τῆς πίστεως poscit. Per προφητείαν intelligit donum interpretandi Scripturam S. & per πίσιν doctrinam fidei.

Comparatur analogia fidei cum *ædificio* 1 Cor. III, 10 sq. item cum *corpore & catena*, quia divinæ veritates arctissimum inter se nexum habent.

Non autem omnis, analogiæ fidei conformis, explicatio Scripturæ S. vera est, sed ea tantum, quæ criteria veri sensus habet. Quæcunque vero explicatio dicti alicujus biblici analogiæ fidei repugnat, falsa est.

Analogia fidei fundamentum est totius systematis Theologici. Est vero *Systema Theologicum* complexus omnium veritatum theologicarum, quatenus inter se ita cohærent, ut una alterius rationem in se contineat.

Quod

Quod contra analogiam fidei est, dicitur *heresis*.

Articuli fidei fundamentales dividuntur in *primarios & secundarios*.

Primarii sunt dogmata, quæ ad salutem summe necessaria sunt & fidem salvificam constituunt. Hæc nec negari, nec ignorari debent.

Secundarii vero articuli fundamentales ea sunt dogmata, quæ non quidem ipsam fidem salvificam constituunt, eam tamen vel præcedunt, vel consequuntur. Hæc certo modo quidem ignorare, neutiquam vero negare possumus.

Dantur etiam articuli fidei, quos *non-fundamentales* dicimus, quia doctrinam fidei plane non tangunt, ideoque certo modo & ignorari & negari possunt. De iis notandum est, 1) quod in certis casibus nobis ignorantia eorum damnum pariat, quapropter etiam tollenda est, 2) quod negatio eorum non cum contemptu revelationis divinæ, nec cum pravo affectu conjuncta esse debeat, ne jacturam fidei faciamus, & 3) quod ad causam semper respicere debeamus, cur hanc vel illam doctrinam non-fundamentalem vel approbemus vel negemus. Dabo exemplum. Si doctrinam de propagatione animæ per traducem ex hac causa meam facerem, ut eo melius materialitatem & mortalitatem animæ probem, sententiam meam cum errore fundamentali conjungerem & sic ad fundamentum fidei alliderem.

Inter

Inter *ignorantiam* & *negationem* magnum est discrimen. Illa est actus intellectus, hæc vero actus voluntatis.

Ignorantia non debet esse malitiosa & affectata s. vincibilis, sed simplex & invincibilis.

Distinguendus etiam est status quietis a statum tentationis & contradictionis. In illo magis ignorari possunt certæ doctrinæ divinæ, quam in hoc.

Respicendum quoque est ad subjectum. Cui-dam enim plus datum est cognoscere, quam alteri.

C A P U T VII.

DE RELIGIONE.

Religio & Theologia ita inter se differunt, ut prior nitatur posteriori, tanquam suo principio.

Qualis itaque Dei rerumque divinarum cognitio est, talis etiam est cultus ejus.

Religio est determinatus Deum colendi modus. Determinatio fit per Theologiam & fundatur cognitione omnium, quæ Theologia docet. Hinc involvit cultus Dei cognitionem Dei.

Nomen *religionis* a vinculo pietatis desumptum est, quia Deus ea hominem quasi constringit & ad se religat. Est vero *pietas* habitus colendi Deum.

Cum homo ad gloriam Dei creatus sit & propterea non modo rationem, sed etiam imaginem

ginem divinam acceperit, ad religionem naturaliter obligatur, Rom. I, 21. Non igitur religio in hominum arbitrio posita est. Primum potius decalogi præceptum nos ad eam quam maxime obstringit.

Religio tam multiplex est, quam ipsa Theologia.

Est itaque vel *Naturalis* vel *Revelata*, & hæc iterum pro diversitate principii cognoscendi vel *Gentilis*, vel *Mubamedana*, vel *Judaica*, vel *Christiana*.

Religio Gentilis est vel *mythica* s. fabulosa, vel *philosophica*, vel *civilis*. Prima nititur figmentis poetarum, altera opinionibus ex principiis corruptæ rationis haustis & ultima superstitione plebis, astra idolaque colentis.

Religio Mubamedana fundatur figmentis cujusdam falsi doctoris, nomine Muhamed s. Mahometh, qui sub titulo *Coran* s. *Alcoran* omnes suas doctrinas, quas a Deo accepisse falso gloriatus est, in corpus congeffit.

Religio Judaica nititur revelatione divina, patriarchis & prophetis in V. T. facta. Erat olim vera & divina, sed simul temporaria, Jer. III, 16. Dan. IX, 24. & ad christianismum pedagogica, Gal. III, 24. ideoque multo imperfectior & inferior *religione christiana*, 2 Cor. III, 7 sq. 18. Hæc ex Judaica quidem orta est, Joh. IV, 22. eam tamen non juxta se patitur, quia Messiae adventus statum ecclesiæ valde mutavit & veræ religioni per novas revelationes,
quæ

quæ partim immediate a Christo, partim mediate per Apostolos factæ sunt, Hebr. I, 2. aliam formam dedit, Jer. XXXI, 31 sq. Hebr. VIII, 8 sq. Gal. III, 23 sq. c. IV, 1 sq. Joh. IV, 23.

Christi temporibus *religio Judaica* per traditiones Phariseorum aliorumque Judaicorum doctorum valde corrupta erat. Hisce corruptelis hodierni Judæi non modo adhuc præfracto animo insistant, sed quoque systema suæ Theologiæ multo pluribus traditionibus, quas in sic dicto *Talmude* collegerunt, auxerunt. Tota hinc eorum religio nunc falsa & erronea est.

Religio Naturalis ea est, quam Theologia naturalis docet. In cultu Dei consistit, quatenus ex lumine naturæ nobis cognitio tam ipsius Dei, quam modi, quo colendus sit, innotescit. Neutiquam vero ad consequendam salutem æternam sufficit. Qui ad ductum ejus vivit & istam ad salutem æternam sufficientem esse putat, *Naturalista*, ejus vero religio *Naturalis* vocatur. Species ejus est *Deismus*, secundum quem vivitur ad ductum solius rationis, Deusque & Scriptura S. fusque deque habentur.

Sola itaque *religio Christiana* est vera & salutaris religio. Fundatur revelatione divina, quatenus non modo per Prophetas in V. T. sed etiam per Apostolos in N. T. literis consignata est, versaturque circa credenda & agenda.

Duo continet ista, 1) veram Dei cognitionem & 2) rectum ejus cultum. Nosse primum debe-

debemus, quem colimus. Cognitio igitur Dei præcedit & cultus ejus sequitur.

Cognitio Dei est opus intellectus & cultus opus voluntatis. Prior alias etiam *sapientia* vocatur, Prov. XVI, 16. Sir. I, 5. Jac. I, 5. quæ in sensu latiori totam Theologiam comprehendit.

Cultus a colendo nomen habet, quod idem significat ac honorare. In honore Dei itaque totus consistit Dei cultus.

Honor hic in Scriptura S. plerumque כבוד f. δόξα dicitur, quæ in omnibus actionibus ultimus noster debet esse finis, Pf. CXV, 1. 1 Cor. X, 31.

Partes hujus honoris sunt *reverentia, fiducia & dilectio*, quippe in quibus summa primi decalogi præcepti, quod de cultu, soli Deo præstando, agit, consistit, uti recte B. LUTHERUS in *Catechismo minori* indicat, quando ad questionem: quæ sit hujus præcepti sententia? respondet: *Debemus Deum supra omnia timere, diligere & ei confidere.*

Fiducia operatur tranquillitatem animi, patientiam & preces; *reverentia* timorem & laudem Dei, nec non gratias ipsi habendas, & denique *dilectio* propensionem cordis & obsequium. Hæc omnia sunt partes veri Dei cultus, quæ, si cum recta Dei cognitione jungimus, formam veræ religionis Christianæ constituunt.

Non omnes, qui nomen Christi profitentur, veram etiam Christi doctrinam sequuntur.

Pars I.

B

tur.

tur. Dantur enim *variae sectae* inter Christianos, quarum quaelibet se veram habere religionem gloriatur. Sed quæ sint genuina veritatis ejus criteria, suo loco docebimus.



LIBER I.

DE

SCRIPTURA SACRA.

CAPUT I.

DE

SCRIPTURA S. ET REVELATIONE DIVINA IN GENERE.

T*heologia Revelata* requirit principium cognoscendi. Hoc est id, quod rationem ejus, quod cognoscendum est, continet.

Non aliud *Theologia Revelata* principium cognoscendi habere potest, quam *revelationem divinam* s. manifestum verbum Dei.

Verbum Dei est revelata Dei voluntas de omnibus, quæ ad Deum recte colendum & salutem æternam consequendam homini scitu necessaria sunt.

Si voluntas hæc divina immediate hominibus cognita redditur, dicitur *revelatio immediata*, si vero mediate id fit, *mediata* nuncupatur.

Imme-

Immediata revelatio hominibus fiebat partim *interne*, partim *externe*.

Interne fiebat, quando sine externis signis aut symbolis voluntas Dei intellectui humano cognita reddebatur. Hoc factum est Prophe- tis & Apostolis, de futuris vaticinantibus, 2 Petr. I, 21. Jer. I, 9. Matth. X, 19.

Externe fiebat sub certis signis aut symbolis, quæ modo imaginationi, modo externis sen- sibus objiciebantur.

Imaginationi imprimebatur revelatio *externe* tam per somnia divina, quam per visiones ec- staticas. Per *somnia divina* id fiebat, cum dor- mientes vel nudam vocem Dei audirent, Gen. XXXI, 24. Hiob. IV, 12. 13. vel simul certas imagines viderent, Gen. XXVIII, 12 sq. c. XL, 25. Dan. II, 19. Matth. I, 20. c. II, 13. 19. Act. XVI, 9. per *visiones ecstáticas* autem istud fiebat, cum vigilantium phantasiæ varii visus obveni- rent, ex quibus voluntas divina conjecturari poterat, Ezech. I, 4. c. XXXVII, 1 - 10. c. XL. Jes. VI. Dan. X, 4 sq. Act. X, 10 sq. 2 Cor. XII, 2 sq.

Sensibus externis fiebat revelatio 1) per *varias apparitiones*. Sic apparuit in V. T. ipse *Filius Dei* & quidem non modo in assumpta humana figura, Gen. XVIII, 2 sq. c. XIX, 1 sq. c. XXXII, 24 sq. Jos. V, 13 sq. sed etiam sub aliis speciebus, e.g. in ignea flamma, Exod. III, 2 & in columna nubis & ignis, Exod. XIII, 21. 22. Ps. LXXVIII, 14. 1 Cor. X, 4. Apparuerunt etiam *angeli*, Gen. XVI,

XVI, 7 sq. c. XXI, 17. c. XXXII, 1 sq. 2 Chron. XXII, 16 sq. Jud. XIII, 3 sq. Dan. VIII, 16 sq. c. IX, 21. Luc. I, 11 sq. 26 sq. Act. X, 3 sq. Huc spectant quoque omnes aliæ divinæ visiones; Exod. XXXIV, 5 sq. 1 Reg. XIX, 11. 2 Reg. II, 11. *Apparitiones vero mortuorum hominum, quæ talium, cum spectro Endoræo 1 Sam. XXVIII, 14. jure meritoque secundum Luc. XVI, 30. 31. rejiciuntur.*

Fiebat etiam revelatio sensibus externis 2) *per divinam vocem*, quæ præter naturæ ordinem in aëre formabatur & articulate audiebatur. Exempla occurrunt Gen. III, 8. Exod. III, 4. Num. XII, 6. Exod. XIX, 3. c. XXXIV, 6. Act. IX, 4. Matth. III, 17. c. XVII, 5. Joh. XII, 28. 1 Sam. XXIII, 9. Deut. V, 23. 26. Huc autem non trahenda est Fabula Judaica de *בת קול* *f. filia vocis*, quam Scriptura S. ignorat.

Fiebat etiam revelatio 3) *per certam scripturam*, Exod. XXXII, 15. 16. c. XXXIV, 28. Deut. IV, 13. c. X, 4. Dan. V, 5. 25 sq. 4) *per Urim & Thumim*, Exod. XXVIII, 30. 1 Sam. XXVIII, 6. quod vero tantum usque ad captivitatem babilonicam, ipsis testibus Judæis, duravit; 5) *per sortem*, Jos. VII, 14 sq. 1 Sam. XIV, 40 sq. Act. I, 26. & denique 6) *per sermones Christi*, Filii Dei incarnati, temporibus N. T. Hebr. I, 2. Joh. I, 18. quapropter Paulus testatur, Deum ultimum *per Filium* ad nos locutum esse, postquam olim *πολυμερῶς καὶ πολυτρόπως* ad Patriarchas & Prophetas locutus esset, Hebr. I, 1. 2.

Post

Post constitutum canonem N. T. nullæ im-
mediatæ revelationes divinæ amplius expe-
ctandæ sunt, Apoc. XXII, 18. Hebr. I, 2. Lo-
cus autem Joh. XVI, 12. respectum habet ad
ea, quæ Christus post resurrectionem locuturus
erat, Joh. XX, 30. 31.

Non alia itaque nobis jam restat *revelatio di-
vina*, quam *mediata*, quæ est Scriptura Sacra.

Verbum Dei & *Scriptura S.* differunt ut genus
& species; certo modo etiam, ut materia &
forma, aut ut contentum & continens.

Verbum Dei est vel *internum* vel *externum*.
Internum verbum sunt conceptus divini, per se
considerati, & hoc est ipse Deus; *externum*
vero *verbum* sunt conceptus divini, quatenus
per certa signa, qualia sunt literæ, hominibus
innotescunt, & hoc est Scriptura S. quæ pro-
pterea neutiquam ipse Deus dicenda est.

Verbum Dei est vel ἑγγράφον vel ἄγρατον.
Illud est ipsa Scriptura S. hoc vero id, quod pa-
tribus tam antediluvianis quam postdiluvianis
usque ad Mosem ex divina revelatione innotuit.
Non modo hodierni Judæi, sed etiam Pontificii
traditiones suas falso *verbum Dei ἄγρατον* no-
minant.

CAPUT II.]

DE

CAUSIS DIVINIS SCRIPTURÆ S.

Φιλανθρωπία primaria causa fuit, cur Deus
Scripturam S. consignare jussit. Voluit,

B 3

ut

ut omnes homines ad salutiferam veritatis cognitionem pervenirent, 1 Tim. II, 4.

Verbum Dei ἀγασθον durabat per duo, & quod excurrit, millenaria post conditum mundum, quia propter longævitatē Patriarcharum veritas divina facile ore propagari potuit, aucto autem genere humano & abbreviato vitæ humanæ cursu sapiens Deus satius esse duxit, literis mandare, quæ homines ex ejus consilio scire debent. Litera enim scripta manet.

Deus ipse initium scribendi fecit per consignationem decem præceptorum, ut eo firmitus ferventur, Exod. XXX, 18.

Oralis propagatio veritatis facillime naufragium facere potest. Si itaque divina veritas facta tectaue conservari debuit, opus fuit, ut literis consignetur.

Poposcit hoc 1) imbecillitas humanæ memoriæ, 2) hominum proclivitas ad errandum, 3) eorum studium novaturiendi, 4) gravitas rerum, 5) difficultas discendi, 6) major commoditas in omnibus necessitatis casibus ad divina consilia confugiendi, & 7) cessatio extraordinarii doni Prophetici in Ecclesia. Accedit 8) conservatio Historiæ sacrae, statum Ecclesiæ delineantis & 9) monstratio harmoniæ tam divinarum prædictionum earumque impletionis, quam sacrorum typorum & anti-typorum, quæ non melius, quam per verbum scriptum fieri potuit.

Testan-

Testantur suo exemplo omnes populi de necessitate, sacras leges & doctrinas literis consignandi, cum arcana religionis suæ certis libris retulerint. Ejusmodi libri sunt hodiernorum Judæorum *Talmud*, Muhamedanorum *Coran* & Malabarorum *Wedam*. Cur non etiam populus Dei & Christiana Ecclesia *Sacram Scripturam* haberet?

Recte hinc Evangelista Lucas ex instinctu divino commendat Theophilo suo *Scripturam*, ceu optimum cognoscendi principium, Luc. I, 34. Christus vero in conflictu suo cum Satana, Matth. IV, 4. 7. 10. Pharisæis, Luc. X, 26. & Sadducæis, Matth. XXII, 29. non ad traditiones viva voce propagatas, sed ad *Scripturam* provocat, nosque omnes ad scrutandam eam valde instigat, Joh. V, 39.

CAPUT III.

DE

AUCTORE ET SCRIPTORIBUS
SCRIPTURÆ SACRÆ.

Autor Scripturæ S. est ipse *Deus*. Continet enim verbum ejus, hominibus per se incognitum. Paulus propterea id nominat λόγια τῆς Θεῆς, f. *eloquia Dei*, Rom. III, 2. Est opus ad extra, ut in scholis loqui solemus, & dicitur λόγος προφορικὸς, ut a λόγῳ ὑποστατικῷ distinguatur, qui est ipse Filius Dei, Joh. I, 1.

Immediate Deus tantum decem legis moralis præcepta, Exod. XXIV, 12. c. XXXI, 18. c. XXXIV, 1. Deut. V, 22. *mediate* vero omnem reliquam scripturam literis consignavit, 2 Petr. I, 21.

Homines, qui Scripturam S. literis consignarunt, dicuntur *Sancti*, non respectu naturæ suæ, sed respectu muneris. Erant enim vel Prophetæ vel Apostoli.

Prophetæ proprie appellantur ii Scriptores, qui ante incarnationem Christi verbum Dei literis mandaverunt & propterea ad V. T. referuntur; *Apostoli* vero ii, qui mox post Christi ascensionem in cœlos Dei verbum consignaverunt & ad N. T. numerantur. Posteriores erant partim ex numero duodecim, Matth. X, 1 sq. Luc. VI, 13 sq. partim ex numero septuaginta discipulorum Christi, Luc. X, 1. Act. I, 21. 22. quibus *Paulus* annumerandus est, qui extra ordinem ad munus Apostoli a Christo post adscensionem ejus vocatus est, Act. IX, 6. 15.

Scriptores V. T. erant partim *proprie sic dicti Prophetæ*, qui a Deo speciatim ad annuncian- dum verbum ejus mittebantur, quales fuerunt Moses, Exod. III, 10. 15. Samuel, 1 Sam. III, 10. 11. 19 sq. Gad, Nathan, Ahia, Semaja, Oded, Jehu Ben Hanani & Chosai, 2 Chron. XXXIII, 19. item Jesaias, Jeremias, Hefekiel f. Ezechiel, Hoseas, Joël, Amos, Obadias, Jonas, Micha, Nahum, Habacuc, Zephania, Haggæus, Zacharias & Malachias: partim *im- proprie*

proprie sic dicti Prophetæ, quibus extra ordinem Deus verbum suum revelavit, quales fuerunt Josua, David, Aflaph, Salomo, Hiob, Esra, Nehemia, Mardochai & Daniel. Omnes generatim dicuntur *Prophetæ* s. interpretes voluntatis divinæ, quia de Messia partim expressis verbis, partim per typos & allegorias testimonia dederunt, Act. X, 43.

Scriptores N. T. dividuntur in Apostolos proprie sic dictos, quales fuerunt Matthæus, Johannes, Petrus, Jacobus, Judas & Paulus; & in *apostolicos viros*, qui munus Apostolorum quidem obierunt, sed non immediate a Christo ad illud vocati sunt. Tales fuerunt Marcus & Lucas.

Scriptorum sacrorum *sinceritas* pluribus infra demonstrabitur. Etsi vero in consignanda Scriptura S. nec falli nec fallere potuerint, tamen eorum donum infallibilitatis extra actum Θεοπνευσίας extendendum non est, quia in suis propriis rebus & negotiis omnino & falli & fallere potuerunt, ut Nathan, 2 Sam. VII, 3. & Petrus Gal. II, 11 sq. suis exemplis probant.

CAPUT IV.

DE

ΘΕΟΠΝΕΥΣΙΑ: SCRIPTURÆ S.

Modus, quo Deus in consignandis literis sacris usus est, dicitur Θεοπνευσία s. *divina inspiratio*. Nomen hoc desumptum est ex

B 5

ver-

verbis Pauli, 2 Tim. III, 16. ubi omnem scripturam θεόπνευστον, h. e. a Deo inspiratam, vocat. Est vox specialis & propria, quæ non de alia re usurpari potest. Significat actum, quo Deus immediate verbum suum sanctis hominibus ad literis consignandum in mentem dedit.

Excitavit autem Deus sanctos homines ad scribendum non modo *externe* per expressum mandatum, Exod. XXXIV, 27. Jer. XXX, 2. Jes. XXX, 8. Hab. II, 2. Apoc. I, 11. 19. & per suppeditatas occasiones; sed eos etiam *interne* ad istud impulit, 2 Petr. I, 21. eorumque cogitationes & affectus ad consignandas res revelatas accommodavit.

Spiritui S. inprimis adscribitur θεοπνευσία, quia ad opus sanctificationis pertinet, quod Spiritui S. proprium est. Recte hinc non solum David id, quod locutus est, 2 Sam. XXIII, 2. sed etiam Christus id, quod Apostoli locuturi erant, Spiritui S. attribuit, Matth. X, 20. Joh. XVI, 13.

Petrus de Prophetis dixit, eos φερομένους s. agitados esse a Spiritu S. 2 Petr. I, 21. Zach. VII, 12. & Paulus de se ipso testatus est, quod loquatur verbis, quæ doceat Spiritus S. 1 Cor. II, 13. ubi simul notandum est, quod h. l. vox *loqui* non excludat *scriptionem*. Loqui enim interdum idem significat ac *scribere*, Act. III, 24.

Distingui autem debet inter *revelationem* & *inspirationem*. Revelatio notat quamcunque rei alicujus incognitæ manifestationem, *inspiratio* vero

vero singularem modum, quo aliquid cum certa determinatione tam rerum quam verborum intellectui humano cognitum redditur. Versatur igitur *inspiratio* non modo circa res incognitas, sed etiam cognititas, *revelatio* vero tantum circa incognitas. Non omnia, quæ Deus revelavit, etiam ad scribendum inspiravit, Apoc. X, 4. nec omnia, quæ Prophetæ & Apostoli scripserunt, iis revelata sunt. *Res gestas* partim per divinam revelationem, partim per propriam experientiam didicerant, eas tamen non nisi inspirante Spiritu S. literis mandarunt.

Inspiravit Deus 1) *conceptus rerum* f. res ipsas, quatenus cognoscendæ sunt, 2) *ordinem rerum*, & 3) *signa rerum*, f. verba & literas, Pf. XLV, 2. Jes. LI, 16. Matth. X, 19. 20. 1 Cor. II, 13.

Deus in inspiratione *συγκατάβασις* aliqua usus est. Accommodavit enim se scriptorum sacrorum ingenio indolique & temperamento, unde diversitas styli in Scriptura S. orta est. Illustrari potest exemplo organi musici, quod per unum eundemque flatum varios sonos edit.

Accommodavit se etiam Deus ad materiam rei. Alius hinc datur loquendi modus in libris historicis, alius in libris metricis, alius in libris prophetis & alius in libris epistolicis.

CODICE SCRIPTURÆ SACRÆ.

Scriptura S. vocatur *Codex* respectu externæ formæ, in quam libri sacri redacti sunt. Constituunt volumen, quod vulgo *Biblia* appellamus. Occurrit vox hæc 2 Tim. IV, 13. ubi Paulus mentionem facit τῶν βιβλίων, quæ Timotheum afferre jubet. Meretur Scriptura S. nomen hoc, quia quasi liber librorum est, f. liber, qui ob præstantiam suam κατ' ἐξοχήν sic dicendus est. Germani nomen hoc in suam linguam retulerunt, quando die *Bibel* vocant, quod Hebræi מקרא f. *lecturam* nominant.

In sacris V. T. literis plerumque occurrunt nomina תורה f. *lex*, עדות f. *testimonium*, & פקודים vel מצות f. *præcepta Domini*, Ps. XIX, 8. 9. Quæ nomina in N. T. exprimuntur per γραφήν, Gal. IV, 30. & γραφάς, Joh. V, 39. unde etiam vox *Scriptura* in Ecclesia Latina orta est.

Hæc omnino *sancta*, *sacra* & *divina* dicitur propter ejus finem, originem & doctrinam.

Alias quidem textus authenticus dici solet *Codex sacer*. Quia vero infra de illo speciatim acturi sumus, jam sub nomine hoc tantum de *Scriptura S.* agimus, quatenus ex certis libris sacris constat, in unum volumen congestis.

Primus, qui in Ecclesia libros divinos in unum volumen congeffit, est *Efra*, ultimus inter sacros V. T. Scriptores, qui simul ductu Spiritus S. Codices sacrarum literarum MStos emendavit, & recentiora locorum nomina substituit iis. Num vero simul autor fuerit divisionis Codicis Hebræi hodiernæ, non liquet, etli id verisimile sit.

Valet divisio hæc adhuc in Ecclesia. Secundum eam constat Codex V. T. ex tribus partibus, quæ sunt 1) תורה, f. *Pentateuchus*, qui quinque libros Moſis continet; 2) נביאים, f. *Propheta*, sub quibus non modo vaticinia trium majorum Prophetarum, Jesaïæ, Jeremiæ & Hefekielis, duodecimque minorum, sed etiam libri Josuæ, Judicum, Samuelis & Regum, quos Judæi priores Prophetas vocant, intelliguntur; & 3) כתובים, f. *Hagiographa*, quæ reliquos libros sacros comprehendunt, inter quos Psalmi, Proverbia Salomonis & liber Jobi primum locum tenent. Hos sequuntur Canticum canticorum, liber Ruth, Threni Jeremiæ, Coheleth & libri Estheræ, Danielis, Efræ, Nehemiæ & Chronicorum. Priores dicuntur *metrici*.

In Ecclesia Christiana divisio librorum biblicorum paululum mutata est. Libri non modo in capita & paragraphos discissi, sed etiam in *Vetus* & *Novum Testamentum* divisi sunt. Ad *Vetus* pertinent, quos Codex Hebræus continet, ad *Novum* vero ii, qui post adventum Christi scripti sunt.

Libri

Libri Veteris Testamenti constant ex duabus partibus, quarum prior continet non solum Pentateuchum, sed etiam libros historicos, scilicet Josuæ, Judicum, Ruth, Samuelis, Regum & Chronicorum libros, item libros Esræ, Nehemiæ, Estheræ, Jobi & Psalmorum, nec non Salomonis Proverbia, Ecclesiasten & Canticum canticorum. Partem V. T. *posteriores* constituunt Prophetæ, inter quos etiam Daniel post Ezechielem relatus est, nec non liber Threnorum Jeremiæ, qui vaticinio ejus additus est. Appendicis loco sequuntur *libri Apocryphi*.

Ordo *librorum Novi Testamenti* ita se habet, ut quatuor Evangelia Matthæi, Marci, Lucæ & Johannis primum locum teneant, deinde Acta Apostolorum & Epistolæ Pauli, Petri, Johannis, Jacobi & Judæ sequantur, Apocalypsis vero Johannis totam Scripturam sacram claudat.

Quilibet liber Scripturæ S. tam Veteris quam Novi Testamenti dividitur in *capita*, quæ non divinæ, sed humanæ originis sunt. Adscribuntur vel *Hugoni*, Episcopo Barcinonensi, vel *Stephano Longthono*, Anglo, quorum uterque Seculo XIII floruit. Distinctio in versiculos per accentum Silluk in Codice Hebræo semper locum habuit, divisio vero textus Hebræi in *Paraschas* & *Haphtharas* s. Sectiones a Judæis facta est. Sunt autem pensa hebdomadaria lectionum eorum.

Tex-

Textus Græci distinctio in versiculos *Robertum Stephanum*, doctum typographum Parisiensem, autorem habet, qui An. 1559 Genevæ mortuus est.

CAPUT VI.

DE

TEXTU SCRIPTURÆ SACRÆ.

T*extum* dicimus externam scripturæ materiam a texendo, quia id, quod in mente habemus, per literas quasi conteximus. Omnis itaque scriptura est quasi textura, quæ ex verbis & phrasibus constat & mentem Scriptoris exprimit.

Ad textus considerationem pertinent lingua, literæ, puncta, verba, phrasæ & stylus. Uti vero quodlibet horum ad exprimendum Scriptoris sensum aliquid confert, ita etiam unumquodque eorum ad Scripturæ S. materiam divinitus inspiratam referendum est.

Lingua Scripturæ S. authentica in libris V. T. est Hebræa, in libris N. T. vero Græca. Frustra Jo. Harduinus evincere studuit, linguam N. T. authenticam fuisse latinam.

Lingua Hebræa non modo sanctorum virorum, per quos Deus locutus est, sed etiam populi istius, ad quem in primis verba fecit, vernacula fuit. Constat ex literis & punctis, utrisque a Deo inspiratis.

Puncto-

Punctorum inspirationem divinam multi in dubium vocant. Inventum Judæorum Tiberienſium eſſe dicunt. Sed errant. Ex Maſora enim patet, jam temporibus Eſdræ adfuiſſe puncta. Sine iis Codex Hebræus exanime quaſi cadaver, & tota Scriptura hieroglyphica foret. Chriſtus clare indicat Matth. V, 18. puncta divinæ originis eſſe. B. Lutherus ad negandam punctorum Θεοπνευσίαν ab Elia Levita, Judæo Germanico, deceptus eſt.

Dantur quidem multi Codices V. T. non punctati, & quidem jam temporibus ante Chriſtum, ſed fuerunt Apographa, intra privatos parietes deſcripta & retenta, quæ ab exemplari publico, arcæ ſacræ incluſo, probe diſtinguenda ſunt. Hoc ſolum erat genuinum ἀντίγραφον, quod omnino punctatum fuit, & quamquam id periit, exemplaria tamen, ad iſtud punctata, ſatis multa remanſerunt.

Poſito etiam, literarum & punctorum, quibus hodie utimur, formam eſſe Chaldaicam, inter ipſas tamen literas & puncta, quæ omnino divinæ originis ſunt, & eorum characteres, qui humanum inventum eſſe poſſunt, diſtinguendum eſt. Huius ſententiæ etiam ex noſtratibus Theologis ii ſunt, qui docent, puncta non reſpectu ſcriptionis, ſed tantum reſpectu pronunciationis ſuis conſonantibus cœva eſſe.

Intercurrunt in textu Hebræo quædam Chaldaica loca, e. g. Gen. XXXI, 47. Jer. X, 11. Dan.

Dan. II, 4 sq. usque ad c. VIII. & Efr. IV, 8 sqq. usque ad c. VI, 18. nec non c. VII, 11-26. Nec defunt in eo *idiotismi Arabici*, inprimis in libro Jobi. Ad quaestionem autem, cur hoc factum sit, respondemus, Deum sine dubio peregrini idiomatis verba textui Hebræo in eum finem inferere voluisse, ut indicet, nullam linguam præ altera per se sanctam esse, seque in usurpandis linguis ad statum populi, ad quem locutus fuerit, accommodasse.

Linguam Græcam inprimis ad consignandum verbum suum in N. T. elegit, quia 1) tunc temporis in omnibus regionibus, ubi Evangelium doceri debebat, usitatissima, plurimarumque gentium vernacula, & 2) ad exprimendam scriptoris mentem maxime idonea erat.

Propter *Hebraismos*, qui in textu N. T. Græco occurrunt, dictio non dici debet impura, etsi virorum sanctorum modus loquendi ab ordinaria Græcorum dialecto paululum differat. Dicitur hic modus loquendi propterea a quibusdam *lingua Hellenistica* ab Hellenistis, qui natione Judæi, lingua vero Græci fuerunt. Orti autem sunt Hebraismi in libris N. Test. quia 1) res in iis occurrentes Hebraicæ originis sunt, 2) Scriptores sacri de gente Judæorum fuerunt, quibus lingua Hebræa vernacula fuit, 3) versio Codicis Hebræi LXXviralis s. Alexandrina Græca per profelytos apud Judæos tantam auctoritatem nacta est, ut in synagogis & alia occasione eam legerint, &

4) textus biblicus majorem dignitatem per certos idiotismos impetravit.

Quod autem scriptores sancti propter majorem perspicuitatem peregrinas voces usurpaverint, iis non vitio vertendum est, quia probatissimi auctores profani idem fecerunt. Hac de causa non modo voces *Syro-Chaldaicae*, sed etiam *latinae* hic illic in sacris literis occurrunt.

Solæcismi & *barbarismi* non sine blasphemia a quibusdam Criticis Scripturae S. tribuuntur, quos tamen potius idiotismos dicere debemus.

Num *Evangelium Matthæi* & *Epistola ad Hebræos* in lingua Hebræa, *Epistola ad Romanos* vero in latina primum consignata fuerit, in medio relinquitur. Hoc tamen certo certius est, textum Græcum in hisce scriptis, sive sit originalis, sive ex alia lingua translatus, revera Θεόπνευστον esse.

Stylus Scripturae S. quidem diversus est pro rerum indolisque scriptorum varietate, totus tamen ita comparatus, ut præcipua verborum dignitas & summa Auctoris majestas ubique exinde eluceat.

Ordo textus non Θεόπνευστος est, sed ab iis originem habet, qui singulas libri partes, haud uno tempore literis consignatas, in volumen s. מגילה collegerunt. Exorta inde est inversio rerumque gestarum, quam aliqui hic illic in Scriptura S. observant, quæ autem non Deo, sed iis, qui vaticinia prophetica in unum volumen collegerunt, tribui debet.

CAPUT

CAPUT VII.

DE

INTEGRITATE SCRIPTURÆ
SACRÆ.

Integritas Scripturæ S. nominatur etiam perfectio partium, quæ ad numerum librorum & integritatem textus respectum habet.

Potuerunt viri Θεόπνευστοι aliquod scribere, quod non Θεόπνευστον fuit. Id si periit, integritati Scripturæ S. damnum non affert, quia in scriptura nunquam fuit.

Allegantur in sacris literis sequentes libri, quos deperditos nominamus, nempe:

1. *Vaticinium Henochi*, Ep. Jud. v. 14.
2. *Liber fæderis*, Exod. XXIV, 7.
3. *Liber bellorum Domini*, Num. XXI, 14.
4. *Liber iustorum*, Jos. X, 13. 2 Sam. I, 18.
5. *Liber juris regii*, 1 Sam. X, 25.
6. *Liber sententiarum & cantionum Salomonis*, 1 Reg. IV, 32.
7. *Chronica Salomonis*, 1 Reg. XI, 41.
8. *Chronica Regum Israël & Judæ*, 1 Reg. XIV, 19. c. XV, 7 &c.
9. *Liber Nathanis & Gad*, 1 Chron. XXX, 29.
10. *Liber Abiæ & Iddonis*, 2 Chron. XIX, 29.
11. *Liber Semajæ*, 2 Chron. XII, 15.
12. *Liber Jehu*, 2 Chron. XX, 34.
13. *Liber Jesaiæ de Ufia & Hiskia*, 2 Chron. XXVI, 22. c. XXXII, 32.

14. *Liber Chozai*, 2 Chron. XXXIII, 19.
15. *Threni Jeremiæ de morte Josiæ*, 2 Chron. XXXV, 25.
16. *Chronica Regum Medorum & Persarum*, Esth. VI, 1. c. X, 2.
17. *Liber Domini*, Jes. XXXIV, 16.
18. *Liber Jeremiæ de excidio Hierosolymæ*, Jer. XXXVI, 6. 23.
19. *Epistola Pauli tertia ad Corinthios*, 1 Cor. V, 9.
20. *Epistola Pauli ad Laodicenses*, Col. IV, 16.

Quidam horum librorum nunquam extiterunt, e. g. *vaticinium Henochi*, quod Judas vel ex traditione vel ex inspiratione allegavit; item *Epistola Pauli tertia ad Corinthios*, quæ ea ipsa est, in qua illius mentionem fecit; nec non *Epistola ad Laodicenses*, quæ prior ad Timotheum est, quam Paulus Laodicea misit. Quidam ex istis libris licet extiterint, nunquam tamen sacri fuerunt, e. g. *Chronica Regum Medorum & Persarum*. Quidam forsitan adhuc supersunt, sed sub alio nomine, e. g. *liber fæderis*, nec non *libri Nathanis, Gadi, Abiæ, Jeddonis, Chozai &c.* Quidam, etsi sacri fuerint, non tamen inter *θεοπνεύστους* & canonicos referri debent, cujus generis libri Apocryphi sunt.

Omnes libros vere *θεοπνεύστους* & quos canonicos esse voluit Deus, usque ad nostra omnino tempora conservavit, textusque integritatem ab omni corruptione custodivit.

Inte-

Integritas textus probatur ex Matth. V, 18. ubi ne quidem Jota, nec apex interiturus dicitur.

Masora Codicis Hebræi quasi sepimentum fuit. A מָסָר, h. e. *tradidit & docuit*, nomen accepit. Est priscorum Hebræorum Critica S. in qua omnia, quæ ad genuinam textus Hebræi lectionem pertinent, sollicitè annotarunt & observarunt.

Huc spectat etiam distinctio lectionis in Keri & Chetibh. *Chetibh* est lectio ordinaria in textu authenticò expressa, *Keri* vero est certarum vocum lectio diversa, ad marginem textus a Masoretis posita, cum vel de integritate istarum vocum in textu dubitaverint, vel pia mente aptiores iis substituerint.

Distinguendum est inter σφάλματα, quæ ex librariorum incuria & hæreticorum malitia in textum originale irreperunt, & inter totius Codicis per omnia exemplaria corruptionem. Posteriores negamus, priora vero, quæ ex collatione plurium exemplarium facile emendari possunt, concedimus.

Distinguendum etiam est inter *fontes* & *versiones*. Cum interpretes Codicis sacri in translatione errare potuerint, textus authenticus non ex versionibus, sed versiones ex textu authenticò dijudicari debent.

Ab allegatione locorum V. T. in libris N. T. a textu originali aliena ad probandam textus authenticì corruptionem non valet consequen-

tia. Facta enim est illa non secundum textum authenticum, sed secundum versionem LXXviralem, quæ ab illo differt. Christus & Apostoli in commodum ethnicorum præcipue eam voluerunt citare, quia lingua Græca maxime apud illos cognita & usitata fuit. Licet vero hæc citatio locorum V. T. in N. T. θεόπνευτος sit, non tamen propterea ipsa versio LXXviralis canonice auctoritatis est.

CAPUT VIII.

DE

VERSIONIBUS SCRIPTURÆ S.

Cum non omnes homines linguam Script. S. authenticam calleant, Scriptura S. tamen ab omnibus legenda sit, *versiones* ejus in alias linguas magnam omnino utilitatem habent, quæ tamen non plenaria, ut ipsi fontes, sed tantum hypothetica authenticia gaudent, & quidem *non nisi* respectu rerum & sensus, neutiquam vero respectu verborum, utpote quæ non θεόπνευστα, sed humana sunt. Omnis enim homo mendax est & ad errandum proclivis, Rom. III, 4. Ps. LXII, 10. Ps. CXVI, 11.

Præcipuæ sacrarum literarum *versiones*, quæ aliquam præ cæteris auctoritatem in Ecclesia obtinuerunt, sunt LXXviralis Græca, vulgata latina & Lutheri Germanica, de quibus singulatim hic aliqua attulisse juvabit.

Versio Græca dicitur *LXXviralis*, quia per septuaginta & duos interpretes, natione Judæos, concinnata est, & quidem Alexandriæ sub Ptolomæi Philadelphi, Regis Ægypti, auspiciis, quapropter etiam *Alexandrina* vocatur. Est inter omnes Græcas antiquissima. Tantæ olim fuit auctoritatis, ut non sine luminis divini afflatu consignata esse diu credita sit. Prisci Christiani Hebrææ linguæ ignari maximi eam habuerunt, quia frequenter istam in N. T. allegatam inveniebant. Est autem a sanctis scriptoribus ejus allegatio in usum profelytorum facta, qui Hebraica legere nequibant, Græcam vero versionem jam in manibus habebant. Sunt ad hunc usque diem aliqui, ægre qui ferunt, ut inique de ea sentiatur. At quis dubitet, eam multifariam a textu Hebræo aberrare? Non mirum hoc est, cum non modo Codex, quo interpretes in vertendo textu Hebræo usi sunt, non punctatus fuerit, sed etiam autographum citius perierit, quam in hominum manus apographa ejus venirent. Innumeris igitur depravationum periculis exposita fuit. *Origenes*, cum versionem hanc simul cum aliis versionibus Græcis juxta se positis ediderit, auctor est Bibliorum tetraplorum, hexaplorum & octoplorum.

Versio latina, vulgo *Vulgata* dicta, Hieronymo adscribitur, qui tamen tantum certas sacri Codicis partes transtulit, quarum textus vero non cum apographis, quæ adhuc extant, concordat.

cordat. Augustinus *de doctr. christ. lib. 2, c. 11.* jam suo tempore dixit, latinos Scripturæ S. interpretes non numerari posse. Verisimile hinc est, vulgatam versionem ex multis aliis compositam esse, & quidem ab homine, qui jam Pontificiorum erroribus infectus fuit. Aberrat ea non modo valde a textu authentico, sed in multis etiam locis accommodata est ad dogmata Pontificia. Romana Ecclesia eam ideo pro authentica & tam probata versione habet, ut nemo istam ullo modo rejicere debeat. Sed neutiquam majoris valoris est, quam alia versio biblica, imo ne quidem tanti, quia jure meritoque multis aliis postponi potest, quas tamen ipsi Papicolæ rejiciunt & condemnant, pro sola sua latina versione dimicantes. Non volunt perpendere verba Pauli improbantis usum linguæ ignotæ coram cœtu sacro, 1 Cor. XIV, 16.

Versio Lutheri Germanica prima fuit in hac lingua. Inter maxima beneficia divinæ numeranda est, quæ salutiferæ Reformationi Ecclesiæ debemus. Lingua latina antea sola erat apud cultum divinum in usu. Cum vero plurimis hominibus & ipsis clericis incognita esset, tanta cæcitas rerumque sacrarum ignorantia hominum mentes occupavit, ut major esse non potuerit. Egregia itaque lux iis a Luthero accensa est, cum non solum linguæ latinæ usum in cultu divino publico abrogaret, sed etiam Scripturam S. ex ipsis fontibus in vernaculam

culam transferret. Initium an. 1522 cum libris N. T. fecit, quos excepit an. 1523. Pentateuchus. Hunc secuti sunt cæteri libri V. T. singulatim primum editi. Tandem an. 1534 tota biblia Germanica lucem adspexerunt. Versio hæc in Ecclesia nostra tanti habetur, ut omnibus aliis, quæ posthinc factæ sunt, jure præferatur. Auctoritatem libri Symbolici nacta est fere in tota Evangelico - Lutherana Ecclesia, & quanquam non ab omnibus mendis libera sit, nemo tamen inique de ea judicare, nec in habendo publico Dei cultu istam seponere debet. Interim neutiquam textui avthentico æquiparanda, nedum præferenda est, quia tantum versio est, cujus auctor nunquam originalis scripti verum sensum in translatione satis exhaurire potest. Lector saltem de genuino sensu non certus esse potest, priusquam versionem cum avthentico & originali textu contulit. Manet itaque textus avthenticus versionum judex, quapropter nemo theologiæ deditus esse potest, qui non illam intelligat.

Pentateuchus Samaritanus non ad versiones biblicas referri debet, quia ipse textus Hebræus est Samaritanis literis conscriptus. Scatet erroribus, quia non ubique bona fide scriptus est.

Addere hic aliquid lubet de *Paraphrasibus Chaldaicis, Targumim* a Judæis dictis. Tres imprimis celebrantur Chaldaici interpretes, *Onkelos, Jonathan & Josephus luscus*, quorum priores Christo coævi fuerunt, ultimus vero se-

culo post Christum natum quarto vixit. *Onkelos* solius pentateuchi, *Jonathan* vero tam pentateuchi quam aliorum Prophetarum, & *Iosephus* hagiographorum paraphrasin dedit. Jure dicuntur *paraphrases*, quia non nudæ versiones sunt. Quanti eas faciant Judæi, ex eo apparet, quod *Onkelosum* paraphrasin suam ex traditione Moſis conſcripiſſe, *Jonathanem* vero ſuam ab Haggæo, Zacharia & Malachia Prophetis accepiſſe aſſerant. Sed jure rident Chriſtiani aſſertionem hanc, eſſi peritiores ex iis juſtum paraphraſibus hiſce decernant pretium, quia in Exegeſi ſacra non leves nobis interdum ferunt ſuppeditas.

CAPUT IX.

DE

AUCTORITATE SCRIPTURÆ
SACRÆ.

Auctoritas & dignitatem & poteſtatem comprehendit: *dignitatem*, ut magni faciamus id, quod auctoritatem habet, *poteſtatem* vero, ut obſequium eidem præſtemus. Nomen habet ab *auctore*. Quo major igitur & dignior iſte eſt, eo major etiam eſt auctoritas iſtius rei, quæ ab eo venit.

Scriptura S. Deum habet auctorem: hinc maxima quoque inter omnes libros gaudet auctoritate. Habet & ſummam dignitatem & ſum-

summam potestatem: *summam dignitatem*, ut maximi eam faciamus, omnemque ei fidem tribuamus, *summam vero potestatem*, ut omne obsequium ei præstemus & pro sola norma habeamus. Sequitur exinde, *duplicem dari auctoritatem* Scripturæ S. scilicet *motivam* & *normativam*. *Motiva* est, quæ nos ad magni faciendam illam & fidem ei præstandam commovet, *normativa* vero, quæ alias etiam *canonica* dicitur, ea est, de qua infra agetur.

Distinguitur alias etiam inter *auctoritatem* Scripturæ S. *historicam* & *normativam*. Prior est universalis per totam Scripturam & spectat ad fidem rerum historicam, posterior vero est particularis & spectat ad normam fidei & vitæ. Non enim omnia in Scriptura S. imitanda, nec omnia ad imitandum a Deo inspirata sunt, quia verba & facta in ea occurrunt, quæ tantum historicam fidem habent, ab *auctoritate* Scripturæ S. *motiva* f. *historica* dependentem.

Hæc *auctoritas*, quam Græci *Αὐθεντία* vocant, a solo Deo est, Hof. XII, 11. *Ecclesia* quidem *σῶλος καὶ ἐδραίωμα* f. *columna* & *stabilimentum* veritatis dicitur, 1 Tim. III, 15. sed non nisi in sensu politico, neutiquam vero in usu architectonico. Dat *Ecclesia* quidem Scripturæ S. testimonium, non vero auctoritatem. Prophetæ enim & Apostoli sunt tantum testes, præcones & custodes ejus, Rom. III, 2.

CAPUT X.

DE

VERITATE SCRIPTURÆ S.

Ut de summa Scripturæ S. auctoritate certissimus, necesse est, ut testimonia colligamus, quibus *veritatem Scripturæ Sacræ* confirmemus.

Est Scriptura S. omnino *verum Dei verbum*, literis mandatum, ad cognoscendum, quæ discere & credere debemus.

Testimonium de Scripturæ S. veritate est vel *internum* vel *externum*. *Internum* est a Spiritu S. I Joh. V, 6, 9. *externum* vero petitur vel ab hominibus vel a criteriis ipsius Scripturæ S. insitis.

Ethnicis convertendis est quidem *testimonium hominum* de Scriptura S. *primum*, sed non *primarium*. Δὲι μανθάνοντα πιστεύειν, dixit propterea Aristoteles in *Elench. Soph. c. 2.* h. e. *discientem oportet credere*. Illustrari potest exemplo mulieris Samaritanæ, cujus testimonio cum incolæ urbis credere inciperent, ad audiendum Jesum ipsum se conferebant, quo audito dicebant ad eam: *nunc non amplius propter tua verba credimus, quia ipsi audivimus & cognovimus, quod hic sit vere servator ille mundi, Christus*, Joh. IV, 42.

Et si autem Scripturæ S. veritas ex Scriptura S. probetur, non tamen circulus vitiosus est. Non enim idem per idem, quatenus idem, pro-

probatur, quia varia in illa occurrunt, nec non locus loco testimonium dat.

Et si quoque idem per idem probetur, non tamen vitiosum esset, quia Deus *αὐτόπιστος* est, qui nullo hominum testimonio indiget, Joh. V, 34. Scriptura S. vero principium probandi primum est.

Datur duplex probandi circulus, vitiosus & probatus. *Circulus vitiosus* est petitio principii, aut ignoti per æque ignotum probatio. *Circulus probatus* vero, qui Græce *κυκλοδείξις* s. *probatio circularis* dicitur, nil aliud est, quam regressus a cognitione rei confusa ad distinctam.

Testimonia, quæ divinam Scripturæ S. veritatem probant, gignunt & fidem divinam & fidem humanam. *Fides divina* est, quando propter internum Spiritus S. testimonium credimus, Scripturam S. esse verum Dei verbum, nobis revelatum, *fides vero humana*, quando idem credimus propter Scripturæ S. criteria & Ecclesiæ hominumque testimonia.

Testimonium Ecclesiæ non cum Calvinianis plane respuere debemus, etsi testimonium Spiritus S. internum primum sit & multum prævaleat. Est enim ad fidem humanam unice necessarium, ad fidem divinam vero conditio sine qua non: Fide divina *per* testimonium, fide vero humana *propter* testimonium Ecclesiæ credimus.

Fides humana gignitur partim ex criteriis Scripturæ Sacræ insitis, partim ex testimonio
nio

nio tam miraculorum quam hominum & Ecclesiæ.

Criteria Scripturæ S. insita sunt vel externa vel interna. *Externa* sunt antiquitas, scriptorum ἀξιολογία, utilitas, vaticiniorum complementum & ad nostra usque tempora conservatio; *interna* vero: styli præstantia, doctrinæ rerumque contentarum tam harmonia, quam veritas & sanctitas, mysteriorum sublimitas & denique consolationum suavitas. De hisce omnibus in sequentibus capitibus speciatim agemus.

Testimonium miraculorum est quidem divinum, at tantum externum testimonium, quapropter non aliam etiam quam humanam gignit fidem. Sunt autem *miracula* operationes Dei, quæ extra ordinem naturæ in regno potentiae fiunt ad confirmandam Prophetarum Apostolorumque divinam missionem & doctrinam.

Testimonium Ecclesiæ est id, quod doctores ecclesiastici verbis & scriptis suis omni tempore dederunt Scripturæ S. Pontificii, qui quasi in Pontificis maximi, ceu infallibilis Ecclesiæ suæ capitis, verba jurant, plus huic testimonio tribuunt, quam ipsius Spiritus S. testimonio interno, cum tamen non aliam, quam humanam gignat fidem.

Nec hic prætereunda sunt *testimonia aliorum hominum* extra Ecclesiam viventium, quæ de rebus in Scriptura S. contentis in scriptis eorum passim occurrunt.

Ad

Ad confirmandam fidem humanam multum omnino contribuunt. Huc pertinent vaticinia Sibyllarum de Christo apud Lactantium, & quæ de Christo & Mose Justinus & Tacitus testantur, nec non quæ Fl. Josephus in *Antiquitatibus Judaicis* L. XVIII. c. 4. de Christo habet.

Omnia argumenta, fidem humanam gignentia, nobis erga Scripturam S. reverentiam imprimunt, nosque ad legendam illam commovent, quæ lectio posthinc medium fit, quo Spiritus S. suum *testimonium internum* nobis inspirat. Et hoc solum istud est, quod fidem divinam parit.

Debet autem *Lectio Scripturæ S.* cum decenti reverentia, attentione, reflexione, oratione & studio obsequii institui. Alias non inde oritur testimonium *Spiritus S.* qui ad capiendum sensum vires suppeditat, ad assensum intellectum commovet, voluntatem ad obtemperandum subigit, animum de divinitate doctrinæ convincit, convictionem hanc in nobis contra objectiones Satanæ, mundi & carnis confirmat & tandem dulcedine verbi animam ita mulcet, ut acquiescat & in eo delectetur.

CAPUT XI.

DE

EXTERNIS SCRIPTURÆ S. CRITERIIS.

Criteria *Scripturæ S.* sunt affectiones, quæ ei propriæ sunt & ad ejus dignitatem spectant.

Sunt

Sunt vel *externa* vel *interna*. *Externa* ab externis Scripturæ S. circumstantiis, *interna* vero ab intrinseca ejus constitutione petuntur.

Externorum criteriorum Scripturæ S. quinque potissimum sunt, scilicet ejus 1) antiquitas, 2) scriptorum ἀξιολογία, 3) utilitas, 4) vaticiniorum complementum & 5) conservatio ad nostra usque tempora.

Antiquitas tribuenda est Scripturæ S. præ omnibus libris, qui unquam lucem adspexerunt, & quidem non modo propter rerum materiam & ejus ætatem, sed etiam propter literarum monumenta.

Ante Mosem nemo aliquid literis mandavit. Nec extat præter Scripturam S. antiquius scriptum, quod de genuinis mundi & hominum primordiis agat, nec datur liber in antiquiore lingua consignatus, quam Codex Hebræus. Quantum vero hoc ad ejus dignitatem & præstantiam faciat, docet Aristoteles in *Metaph. L. I. c. 3.* ubi τιμωτάτων ἢ maxime æstimandum dicit id, quod παροβύτατον ἢ antiquissimum est.

Quæritur: an Ecclesia sit antiquior Scriptura Sacra? Si de scriptionis actu vox Scripturæ sumitur, concedimus, si vero de rebus contentis, negamus.

Scriptorum ἀξιολογία ex sequentibus potissimum patet momentis, nempe 1) quod fuerint homines, quorum non modo virtus & vitæ integritas, sed etiam animi simplicitas & candor satis constat, 2) quod ex consignatione sacrarum

crarum literarum nullum fructum ceperint, 3) quod propria sua vitia & peccata in iis non celaverint, & 4) quod non vanam quæſiverint gloriam, cum non suo, ſed ſolius Dei nomine ſcripſerint & ne quidem ſemper ſui nominis mentionem fecerint.

Ipfæ diſcrepantiæ circumſtantiarum, quæ hic illic in Scriptura S. occurrunt, egregium dant teſtimonium de Scriptorum ſacrorum ἀξιοπiςία, quia exinde patet, ſe invicem non exſcripſiſſe.

Utilitas Scripturæ S. tanta eſt, & tam univerſalis, ut reſpectu illius non alius liber ei æquiparandus ſit. Quisque in ea pro ſuo ſtatu & guſtu invenit, quod & prodeſſe poteſt & delectare. Scriptura S. non modo præcipua enarrat facta Dei & hominum abhinc condito mundo, docetque viam ſalutis æternæ proximam, ſed excellentiſſimas quoque vivendi regulas ſuppeditat, ad humanitatem & bonos mores optime informat, probatiſſimis exemplis erudit, validiſſime a facinoribus abſterret & tanto verborum apparatu lectorum animos captat, ut aſſenſum eidem denegare nequeant. Ad cujuſvis commodum & ingenium ſeſe accomodat ſanctiſſimo modo, neminemque ſinit abire ineruditum.

Vaticiniorum complementum inter præſtantiſſima ſacrarum literarum criteria numerandum eſt. Cum enim Scriptura S. plena ſit vaticiniorum de adventu Meſſiæ & fatiſ Eccleſiæ populique Judaici, Jeſ. XLII, 9. c. XLVI, 10. ſane aucto-

ritas ejus maximum acciperet detrimentum, si non vaticinia ista eventu comprobentur. Verum satis constat, quam egregia omnia impleta sint, quæ in sacris literis prædicta sunt, Act. III, 18. 1 Sam. III, 19. 2 Reg. X, 10. Haud parum hoc confert ad probandam Scripturæ S. auctoritatem divinam, quia homines futura contingentia certo & infallibiliter nec præscire nec prædicere possunt.

Idem fere præstat *Scripturæ S. ad nostra usque tempora conservatio*, inprimis si expendimus obstacula illa, quæ doctrinæ in Scriptura S. contentæ inter maximas testium veritatis persecutiones & temporum difficultates tam ex parte hominum convertendorum, quam ex parte callidorum & potentium adversariorum facta sunt. Mirum in modum per omnia secula incolumis conservata est Scriptura S. Ipsæ inferorum portæ adversus eam non prævalere potuerunt, Matth. XVI, 18.

CAPUT XII.

DE

INTERNIS SCRIPTURÆ SACRÆ CRITERIIS.

I*nterna Scripturæ S. criteria* ea sunt, quæ ab intrinseca ejus constitutione derivantur. Sex eorum jam supra numeravimus, quæ ita sequuntur: 1) styli præstantia, 2) doctrinæ & rerum contentarum harmonia, 3) veritas, 4) san-

4) sanctitas, 5) myfteriorum fublimitas & 6) confolationum fuavitas.

Styli præſtantia ab aliis etiam *ſtyli ſimplicitas* nuncupatur. Conjuncta eſt cum gravitate, ſolo Deo digna. Tradit enim Scriptura S. res maximi ponderis & momenti ſine ullo verborum fucō & lenocinio. Quæ credenda ſunt docendo, & quæ agenda aut omittenda ſunt, præcipiendo aut prohibendo, & quidem ſumma cum auctoritate ſine ullo perſonarum reſpectu proponit. Deus ipſe plerumque in ea inducitur loquens, nec non teſtificans, ſe ipſum eſſe, qui hic cum hominibus agat. Dictio propterea gravis eſt & ad inſinuandum ſe animis valde accommodata.

Harmonia doctrinæ rerumque contentarum mirifice ſe cognoscendam præbet, ſi perpendimus varietatem Scriptorum, ingenio, educatione & morum diſſimilitudine, nec non locorum ac temporum intervallis longiſſime a ſe invicem ſejunctorum, & occasione, ſecum invicem animi ſenſa, literis mandanda communicandi deſtitutorum, qui tamen omnes in materia tam gravi ac ſublimi, ad ſalutem hominum æternam ſpectante, tam egregie ubique conſpirant, ut unus tantum fuiſſe videatur, qui ſcripſit. Quis non exinde Deum cognosceret autorem, qui ſcriptoribus inſpiraverit res literis exprimendas? Locus locum illuſtrat & ad alterum provocat. Quæ interdum inter ſe pugnare videntur loca obſcuriora & difficiliora,

non ideo revera cum illis pugnant, quia doctorum interpretum opera facili negotio conciliari possunt. Moses & Christus semper conveniunt, & quæ in scriptis N. T. occurrunt, in V. T. jam vel præfigurata vel prædicta sunt, Act. III, 24. c. X, 43. Nec aliæ, quam apparentes in sacris literis dantur contradictiones.

Veritatem Scripturæ S. nemo in dubium vocabit, qui jam dictam harmoniam ejus, vaticiniorumque complementum, nec non historiæ Judaicæ convenientiam cum aliorum Scriptorum monumentis secum ponderat, doctrinamque ipsam perpendit, quæ mera dogmata fidei & morum continet, naturæ hominum consentanea, nec Deo indigna. Excedunt interdum quidem rationis captum, non tamen eidem contradicunt. Sunt *πάσης ἀποδοχῆς ἄξια*, h. e. omni acceptione digna, 1 Tim. IV, 9. Alliciunt assensum & non sine præfractō animo iis resisti potest. Rectissime igitur a Christo tota Scriptura S. dicitur *ἀλήθεια*, s. *veritas*, Joh. XVII, 17. quia nullius veræ falsitatis & contradictionis argui potest. Ad captum humani intellectus sese interdum quidem Deus in ea accommodavit, sed non qua erroneus, sed qua debilis est.

Sanctitas tribuitur Scripturæ S. quatenus non modo sanctissimum Deum autorem habet, sed quoque nil continet, quod non ad Dei essentiam, voluntatem, opera & beneficia attineat.

Tra-

Tradit quidem facta facinororum hominum & quæ natura nobis turpia esse vult, sed tam caste & circumspecte, ut neminem, nisi qui instar aranearum ex quolibet flore venena capit, offendant. Finem, quo tendit Scriptura, sanctum dicere debemus, perinde ac argumentum ejus ipsum. Omnia in ea ad divini nominis gloriam & hominum salutem æternam spectant.

Mysteriorum sublimitas itidem ad criteria Scripturæ S. interna pertinet. Nam sicut omnes populi in eo consentiunt, quod religio non possit esse sine mysteriis fidei, ita Scriptura S. omnibus omnino aliis ejusmodi libris palmam in eo præripit, quod non modo plurima habeat mysteria fidei, sed quæ etiam sublimissima, sanctissima & Deo dignissima sunt. Optime inter se concordant, analogiæ fidei non repugnant & quamvis rationis nostræ captum excedant, eidem tamen non contradicunt. Egregium de Dei altissimi sapientia, omnipotentia & benevolentia testimonium dant, ipsumque eo magis adorabilem reddunt, nec non timorem ejus nostramque pietatem promonent. Rectissime hinc cum Paulo arcana hæc nominare possumus ὁμολογουμένως μεγάλα μυστήρια τῆς εὐσεβείας, h. e. *secundum omnium consensum magna pietatis mysteria*, 1 Tim. III, 16.

Consolationum suavitas eo magis ad criteria Scripturæ S. interna referenda est, quo clarius nobis in ea ostenditur fons & conditio omnium

nostrarum afflictionum calamitatumque, quibus in hac vita multifariam premimur. Si Scriptura S. ad omnia utilis esse dicitur, 2 Tim. III, 16. nobis omnino etiam solatia dabit, quæ ad erigendum afflictum animum necessaria sunt. Scripta in eum finem est, ut, teste Paulo, per patientiam & consolationem ejus spem habeamus, Rom. XV, 4. Omnes homines id experti sunt, qui in suis miseriis ad Scripturam S. & verbum Dei confugerunt, Psalm. XCIV, 19. Ps. CXIX, 92. Jes. XXXVIII, 17. 2 Cor. I, 5. Tantum enim consolationis thesaurum continet, ut non detur afflictionum genus, contra quod non ex eo medicina paretur.

C A P U T XIII.

D E

CANONE SCRIPTURÆ S.

C*anon* idem significat ac norma s. regula. Sumta est hæc vox ex Ps. XIX, 5. ubi legimus, quod in omnem terram exiverit קַיִן i. e. *canon* s. regula verbi divini. LXX interpretes ibi forsitan legerunt קַיִן, quia per φθόγγον reddiderunt. Hanc vocem postea Paulus, qui hujus versionis usum apud ethnicos bene novit, Rom. X, 18 retinuit, alibi vero, e. g. Gal. VI, 16. Phil. III, 16. 2 Cor. X, 13. voce κανὼν usus est.

Canon itaque *Scripturæ S.* idem est ac qualitas normativa, secundum quam Scriptura S. facultate

tate pollet, fidem vitamque nostram ad certas regulas ordinandi. Est enim nobis in normam infallibilem data, a qua nec dextrorsum nec sinistrorsum deflectere debemus, Deut. V, 32. c. XXVIII, 14. Jos. I, 7. 8. Prov. IV, 27. Jes. XXX, 21. Habet hanc auctoritatem a solo Deo, quia non modo ejus veram voluntatem continet, sed etiam ab eo inspirata & revelata est. Recte igitur dicitur omnium credendorum & agendorum ad salutem *norma* unica & infallibilis, & quidem *normans*, a *norma* *normata* distinguenda, quam constituunt libri Ecclesiæ Symbolici, qui non absolute, sed certo respectu nomen normæ merentur, quatenus scilicet cum Scriptura S. conveniunt. Occurrunt quidem nonnulla in sacris literis, quæ non directe ad fidem & vitam pertinent, indirecte tamen. Facile autem ab iis discernenda sunt, quæ ad illam spectant directe. *Πᾶσα γραφὴ ὁφέλιμος* 2 Tim. III, 16. Si Scriptura S. unica & infallibilis credendorum & agendorum norma est, norma etiam est in decidendis controversiis circa credenda & agenda, Jes. VIII, 19. 20. Luc. XVI, 29. Utilis enim est *πρὸς ἐλεγχον*, 2 Tim. III, 16. Neutiquam tamen propterea judex controversiarum Theologicarum proprie talis, qui semper persona est, dici debet. Hoc est solus Spiritus S. Joh. XVI, 8. 13. Act. XV, 28: qui per Scripturam S. ceu vocem suam, res controversas generaliter decidit, Jes. VIII, 19. 20. Pf. CXLIX, 9. Joh. XII,

XII, 48. Hebr. IV, 12. & posthæc specialiter sententiam suam per ecclesiæ ministros applicat, Act. XV, 2. Mal. II, 7. Hi enim sunt, qui gregem Christi pascunt, Act. XX, 28. 1 Pet. V, 2. exercitatos sensus habent, Hebr. V, 14. & verbum Dei recte dividere debent, 1 Tim. II, 15.

Est autem *ratio decidendi* non pro ipsa norma decidendi habenda, quia tantum instar instrumenti est, quo ecclesiæ ministri, dum in decidendis controversiis versantur, utuntur.

Pontificii summum suum Pontificem pro unico & infallibili controversiarum iudice agnoscunt. Probare id student 1) ex Matth. XXIII, 2. ubi tamen non cathedra Moysis localis, sed vocalis s. doctrina, intelligitur. Provocant etiam 2) ad Matth. XVI, 19. ubi autem non clavis scientiæ, uti c. XXIII, 13. fit, sed clavis potestatis indicatur. Provocant porro 3) ad Matth. XVI, 18. ubi vero non Petri persona, sed ejus confessio fundamentum Ecclesiæ dicitur; distinguendum etiam est inter *πέτραι* & *πέτρον*: illa est Christus, hic vero omnis fidelis confessor. Provocant denique 4) ad infallibilitatem Ecclesiæ, quæ tamen non nisi hypothetica est; nec non 5) ad Pontificem summum V. T. qui autem non interpret legis, sed typus Christi fuit.

LIBRIS CANONICIS SCRIPTURÆ
SACRÆ.

Quia Scriptura S. auctoritatem suam Canonicam a solo Deo habet, nec omnes libri, in volumine Bibliorum sacrorum occurrentes, a Deo inspirati sunt, orta inde est *distinctio* inter *Libros Canonicos* & *Apocryphos*, quæ admodum antiqua est. *Athanasius* distinxit inter libros *κατανοισμένους* & *ἀκατανοίτους*, h. e. canoni adscriptos & extra canonem constitutos. Strictius iste accepit vocem hanc, quam alii primitivæ Ecclesiæ patres, qui ipsum Catalogum librorum sacrorum appellaverunt *Canonem*.

Requiruntur autem ad verum Canonem *duo*, scilicet 1) *divina inspiratio* & 2) *divina canonisatio* s. ad perpetuum totius Ecclesiæ usum consecratio. Ut vero de cujuslibet libri biblici *θεοπνευσία* & canonisatione certi evadamus, attendendum est ad criteria, ex quibus utrumque cognosci potest.

Criteria hæc sunt vel *generalia* vel *specialia*.

Generalia ad totam Scripturam S. tam Veteris quam Novi Testamenti, specialia vero tantum vel ad libros V. T. vel ad libros N. T. spectant.

Criteria librorum canonicorum *generalia* sunt,
1) quod non nisi divinas contineant veritates,
2) non cum alio libro Canonico pugnent,

3) divinam originem per internam convictio-
nem suam & virtute indicent, 4) in lingua
vel Prophetica vel Apostolica consignati & de-
nique 5) ab Ecclesia in Canonem recepti sint.

Uti vero Scriptura S. respectu ætatis & di-
vini fœderis in *Vetus & Novum Testamentum* di-
viditur, ita quoque dantur *criteria specialia*, ex
quibus cujuslibet libri & quidem utriusque Te-
stamenti Canonicus valor cognosci potest.

Criteria specialia librorum Canonicorum V. T.
sunt, a) quod scripti sint ab aliquo Propheta
divinitus inspirato, Eph. II, 2c. Luc. XVI, 29.
c. XXIV, 27. Act. X, 43. c. XXVI, 22. Rom. I, 2.
b) quod consignati sint in lingua Hebræa, quæ
omnium antiquissima & Prophetis consueta fuit,
c) quod de Christo & futuro statu N. T. aliqua
prædicant, Act. X, 43. d) quod in Scriptis
N. T. allegentur & e) quod testimonium ha-
beant veteris Ecclesiæ Judaicæ, quæ Mosis &
Prophetarum *αὐτόγραφα* vidit, legit & co-
gnovit.

Hisce criteriis gaudent omnes V. T. libri,
qui in lingua Hebræa adhuc extant & a nobis
supra nominati sunt. Sed observandum hic
est, 1) quod quilibet liber biblicus non omnia
criteria pari gradu habeat, 2) quod liber libro
testimonium det & sic defectum criteriorum
compenset, & 3) quod nonnulli libri V. T. de
Christo & statu N. T. tantum per Genealo-
giam Christi & varios typos testentur. Hoc
primum posito non habemus, cur de librorum
Ruth,

Ruth, Estheræ, Esræ & Nehemiæ, nec non Cantici Canticorum divina & canonica avthentia dubitemus.

Criteria librorum Canonorum N. T. sunt a) quod ab Apostolo vel Evangelista divinitus inspirato scripti sint, Eph. II, 20. b) quod in lingua Græca Apostolis consueta consignati sint, c) quod doceant, Jesum esse Christum, Dei Filium, qui nos redemerit, Joh. XX, 31. & d) quod habeant testimonium primitivæ Ecclesiæ Christianæ, quæ αὐτόγεαφα vidit, legit & cognovit.

Hæc criteria omnes habent isti libri, qui in Codice Biblico occurrunt & ad Novum Testamentum referuntur. Constant ex quatuor Evangeliiis, ex Actis Apostolicis, ex certis Apostolorum Epistolis & ex Apocalypsi Johannis. Cæteri libri omnes, qui viris Apostolicis tribuuntur, rejiciendi sunt, quia criteriis Θεοπνευστίας tam generalibus quam specialibus carent. Catalogum eorum vide in *Fabricii Codice Apocrypho N. T.* Hic Auctor recensuit etiam in alio libro, quem *Codicem Pseudepigraphum V. T.* dixit, libros spurios & suppositios, quos plebs superstitiosa & ex parte malitiosa viris sanctis in V. T. affinxit.

Dantur quidem aliqua N. T. scripta, de quorum avthentia a quibusdam olim dubitatum est, sed hodie non amplius in controversiam deducitur res hæc. Referuntur huc *Epistola Jacobi, posterior Epistola Petri, Epistola secunda & tertia*

tertia Johannis, Epistola Judæ, Epistola ad Hebræos & Apocalypsis Johannis. Eusebius, in primis is est, qui canonisationem horum Scriptorum dubiam reddidit in *Hist. Eccles. Lib. II. c. 23. Lib. III, c. 25. & Lib. VI. c. 25.* sed idem simul alibi expresse testatur, quod fere in omnibus Ecclesiis publice lectitentur, nec non inter libros omnium consensu probatos numerentur. Vide ejus *Hist. Eccl. Lib. II. c. 23. & Lib. III, 25.*

Dividuntur ideo libri Canonici N. T. in *πρωτοκανονικούς & δευτεροκανονικούς* s. *Canonicos primi & secundi ordinis.* Ad priores referuntur ii libri, de quorum *θεοπνευσία* nunquam in Ecclesia dubitatum est, ad posteriores vero ii, qui paulo serius unanimi consensu in Canonem recepti sunt.

Libri V. T. ejusdem valoris & necessitatis apud Christianos sunt, ac libri N. T. Joh. V, 39. Rom. XV, 4. Act. XVIII, 24. 25. Sociniani & Anabaptistæ objiciunt locum Hebr. VIII, 6. At in eo non de scriptis N. T. sed de fœdere, de quo in istis agitur, sermo est, cujus respectu omnino differentiam inter scripta V. & N. T. concedimus, scriptisque N. T. præ illis aliquam prærogativam tribuimus.

Libri, qui dictis criteriis destituuntur & variis erroribus scatent, jure meritoque a veris Canonicis separantur. Vocantur *Apocryphi* s. *absconditi*, quia ob defectum *αὐθεντίας* ad probandam veritatem divinam non merentur in medium proferri. Ad V. T. quidem referuntur, quia ante Christi nativitatem a piis Judæis

lite-

literis consignati sunt, sed non ad Canonem Scripturæ S. pertinent. Numerant istos quidem ad eum certi doctores primitivæ & imprimis Africanæ Ecclesiæ, quod etiam in Concilio Carthaginensi III. approbatum est: sed distinguendum est inter *laxiorem* & *strictiorem* Scripturæ S. canonem. Canon strictior, qui in Concilio Laodicensi, Seculo IV. habito, stabilitus est, tantum proprie sic dictos libros Canonicos continet, ad canonem laxiorem vero certi patres Africanæ Ecclesiæ etiam libros apocryphos retulerunt.

Non opus est, ut hosce *libros Apocryphos* recenseamus, cum nomina eorum jam satis consent. Appendicis loco illi in Bibliis Germanicis annexi sunt libris V. T. Canonicis, quia omnino usum suum habent. Causæ vero, cur non ad proprie dictos libros Canonicos eos referre possimus, sunt a) quia post tempora Prophetarum originem ceperunt, b) non in lingua Hebræa extant, c) multa falsa & contradictoria continent, d) ab Ecclesia Judaica non in canonem recepti sunt, quippe cui credita fecerunt omnia eloquia Dei, Rom. III, 2. e) vaticiniis de Christo carent, f) a Christo & Apostolis in N. T. non allegantur & denique g) a primitiva Ecclesia Christiana pro Canonicis non habiti sunt, prout ex Concilio Laodicensi & ex testimoniis Melitonis, Hieronymi & Athanasii, quorum temporibus nondum in Catalogo Canonorum librorum extiterunt, satis patet. In-

Interim in Ecclesia Christiana jure leguntur,
 1) quia bonas morum doctrinas continent,
 2) Statum Ecclesiæ & Reipublicæ Judaicæ post
 captivitatem babylonicam exponunt, & 3)
 multas veritates divinas κατ' ἀνθρώπων con-
 firmant.

Judæi ex iis solos *Libros Maccabæorum* admit-
 tunt, non tamen ut canonicos, sed tantum ut
 historicos libros, Pontificii vero omnes pro
 canonicis habent.

CAPUT XV.

DE

EFFICACIA SCRIPTURÆ S.

Efficacia Scripturæ Sacræ duplex est, vel natu-
 ralis vel supernaturalis.

Naturalis eadem est, quæ alias etiam verbo
 humano adscribitur. Sicut enim humani ora-
 tores stupendos interdum effectus verborum
 suorum lenocinio producere possunt, ita etiam
 Scripturæ S. talis virtus non deneganda est,
 cum stylus ejus ita comparatus sit, ut nil ei de-
 ficiat, quod Rhetorica ad demonstrandum &
 persuadendum requirit.

Sed hæc naturalis efficacia non sufficit. Ac-
 cedere debet *supernaturalis*, quæ prorsus divina
 est & omnem hominem, qui non malitiose
 repugnat, afficit & ad pœnitentiam & obse-
 quium incitat.

Jure

Jure meritoque hinc comparatur verbum Dei cum *semine*, Luc. VIII, 11. *igne*, Jer. V, 14. *malleo*, Jer. XXIII, 29. *pane*, Deut. VIII, 3. *cibo*, 1 Cor. III, 2. *gladio ancipite*, Hebr. IV, 12. *tonitru*, Ps. LXVIII, 34. & *pluvia*, *niveque*, terram humectante, Jes. LV, 10. 11. Hof. VI, 3.

Palmaria loca, quæ efficaciam verbi divini probant, sunt in genere Psalmi XIX, XXIX & CXIX. in specie vero sequentia dicta: 1) Joh. VI, 63. ubi Christus dicit: *verba, quæ loquor, sunt spiritus & vita*, h. e. operantur spirituales cogitationes, propensiones & affectus; 2) Hebr. IV, 12. ubi *ζῶν καὶ ενεργῆς*, h. e. *vivum & operans* appellatur verbum Dei; & 3) Rom. I, 16. ubi vocatur *δύναμις*, s. *potentia* aut *virtus Dei salvifica*. Confer etiam 1 Cor. I, 18. & c. II, 4. 5.

Efficacia hæc supernaturalis a) intima cordis penetrat, Act. II, 37. Hebr. IV, 12. b) omnia occulta in eo detegit, 1 Cor. XIV, 24. 25. c) intellectum illuminat, Ps. XIX, 9. d) cor mutat, Ezech. XI, 19. e) fidem accendit, Rom. X, 17. f) homines regenerat, 1 Petr. I, 23. & convertit, Jer. XXVI, 3. c. XXXI, 18. g) viam salutis monstrat, Ps. CXIX, 105. 2 Petr. I, 19. h) totum hominem sanctificat, Joh. XVII, 17. i) eum contra insidias & impetus hostium corroborat, 1 Joh. II, 14. k) in omnibus calamitatibus erigit & consolatur, Ps. CXIX, 50. 92. l) ægrotos & vulneratos sanat, Ps. CVII, 20. Sap. XVI, 12. Jer. VIII, 22. & denique m) animam salvificat, Jac. I, 21. Rom. I, 16. 1 Cor. I, 21.

Effi-

Efficaciam verbi divini supernaturalem interdum etiam *impii* sentiunt. Exemplo nobis sunt *Pharisei*, quorum intellectum ita cepit verbum Christi, ut obmutescerent, Matth. XXII, 46. Huc pertinet etiam *Felix*, quem verbum Dei perterritum reddidit, Act. XXIV, 25. nec non *Abab* & *Herodes*, quos ad obsequium perduxit, 1 Reg. XXI, 27. Marc. VI, 20.

Quilibet in *semet ipso* efficaciam verbi divini sentire potest. Infit enim virtus ejus non πρὸς ἑτέρον, sed tantum πρὸς ἑαυτὸν valet. Testantur hoc suo exemplo discipuli Christi, Joh. VI, 68. auditores Petri, Act. II, 37. discipuli Emauntici, Luc. XXIV, 32. eunuchus reginæ Candacis, Act. VIII, 28. 37. Lydia, Act. XVI, 14. 15. Samaritani, Joh. IV, 42. & Thessalonicenses, 1 Thess. II, 13.

Est autem efficacia verbi divini *resistibilis*, Act. VII, 54. Qui igitur eam in se ipso experiri vult, ad lectionem aut auscultationem ejus sine præjudiciis accedat, Luc. XVIII, 34. c. XXIV, 25. Matth. XVI, 21. 22. nec rerum terrenarum curam ac voluptatem carnis foveat, 1 Cor. II, 14. Docent hoc exempla Felicis, Act. XXIV, 25. 26. & Agrippæ, Act. XXVI, 28.

Adscribenda est efficacia verbi divini Deo & Spiritui S. *principaliter*, Scripturæ S. vero & verbo ipsi ὡργανισῶς s. *instrumentaliter*. Deus propterea dicitur per verbum operari, 1 Thess. II, 13. & Spiritus S. verbo nos docere, 1 Cor. II, 3. 1 Thess. I, 5. Recte hinc Scriptura S. vocari

cari potest *instrumentum*, quod tamen non mere passivum, sed *cooperativum* est. Rom. I, 16. Joh. VI, 63.

Ad quæstionem: *num verbum Dei dicendum sit essentialis Dei virtus?* respondemus negando. Id enim si affirmemus, verbum Dei ipse Deus foret.

Si porro quæritur: *num verbum Dei etiam extra usum vim & efficaciam habeat?* respondemus distinguendo inter actum primum & secundum. In actu primo omnino eam habet, uti semen, panis & medicamentum, non vero in actu secundo, qui legitimum usum requirit. Sicut enim granum tritici cum omni sua interna virtute nullam efficaciam præstat, nisi cum terra misceatur, Marc. IV, 28. ita etiam verbum Dei, nisi cum fide audiatur vel legatur, non effectum habet, Hebr. IV, 2. Appellatur propterea λόγος ἐμψυτος, Jac. I, 21. comparaturque cum pane & cibo, qui efficaciam suam in corpore non præstare possunt, nisi per coctionem in ejus succum & sanguinem convertantur.

Exinde patet, quod Scriptura S. & verbum Dei cum *Hermanno Ratbmanno* & *Fanaticis* non vocari debeat *litera mortua*. Est enim quasi semen per se efficax & suam semper præstat virtutem, si modo assistente Spiritus S. gratia attente legitur, Act. VIII, 28. legitime auscultatur, 1 Thess. II, 13. & in bonum cor spargitur, Luc. VIII, 8. 15.

Pars I.

E

CAPUT

PERFECTIONE SCRIPTURÆ
SACRÆ.

Scriptura S. *duplici modo* dici potest *perfecta*, 1) respectu partium s. librorum ad Canonem pertinentium, & 2) respectu doctrinæ. De priori perfectione egimus Cap. VII. posterior vero est hujus loci.

Opponitur tota doctrina de hac perfectione Scripturæ S. a) *Enthusiastis*, qui novas revelationes poscunt, & b) *Pontificiis*, qui traditiones ei addunt.

Scriptura S. non omnia, quæ Christus, Prophetæ & Apostoli docuerunt, continet, sed tantummodo ea, quæ ad adæquatam fidei & vitæ normam pertinent. Nec omnes circumstantiæ in historiis biblicis narrantur, sed eæ tantum, quæ ad scopum & Dei finem intentum spectant. Deus enim per Prophetas, nec non Christus ipse in statu exinanitionis multo plura ad homines locutus est, quam Deo placuit literis mandare, Joh. XX, 30. 31. Non itaque Scriptura S. absolute & simpliciter, sed respectu finis perfecta dicenda est. Omnia enim continet, quæ Deus nos scire voluit. Quod non explicite de credendis & agendis docet, id implicite docet, facileque per bonam consequentiam ex ista erui potest.

Nomi-

Nominatur propterea perfectio hæc a Theologis etiam *sufficiencia*, quia Scriptura S. ea omnia continet, quæ ad consequendum finem a Deo intentum sufficiunt.

Sufficiencia hæc s. *Perfectio* Scripturæ S. probatur a) ex locis: Deut. IV, 2. Prov. XXX, 6. Apoc. XXII, 18. 19. in quibus nobis interdicitur, ei aliquid vel addere, vel detrahare; b) ex Psalm. XIX, 8. ubi expresse vocatur perfecta; c) ex Gal. I, 8. ubi Paulus diras illi imprecatur, qui aliter evangelizet, quam evangelizatum sit; & d) ex 2 Tim. III, 15-17. ubi idem Apostolus Timotheo suo Scripturam S. commendat tanquam scriptum, quod hominem ad salutem instruere & ad omne bonum opus idoneum reddere queat.

Enthusiastæ impugnant perfectionem Scripturæ S. novas quærendo revelationes divinas, quæ tamen ob signato Canone Scripturæ S. prorsus cessarunt. Ultimum enim non modo per Christum Deus ad nos locutus est immediate, Hebr. I, 1. sed ad solam quoque Scripturam S. in rebus salutis æternæ ablegamur, Joh. V, 39. Nullum quoque usum novæ revelationes habere possunt, cum nec nova doctrina proponenda sit, Gal. I, 8. nec Scripturæ S. aliquid addi debeat, Apoc. XXII, 18. 19. nec eadem luce clariori indigeat, Ps. CXIX, 105. Ps. XIX, 9. 2 Petr. I, 19. nec alia doctrina maiorem efficaciam habere possit, Rom. I, 16. Quin dicam de defectu fundamenti,

menti, nos de veritate novarum revelationum convincendi.

Pontificii Scripturam S. nominant quidem normam credendorum, sed tantum partialem, non vero totalem. Addunt ideo ei *traditiones*, quas verbum Dei ἀγχαφον dicunt. Sunt istæ varii generis. Referri enim huc non modo possunt Conciliorum Decreta & patrum primitivæ Ecclesiæ Dicta, sed etiam Pontificum placita, Scholasticorum theoremata & Monachorum somnia. Provocant ad Joh. XVI, 12. nec non ad 1 Cor. XI, 34. & 2 Theff. II, 15; sed loca hæc non probant, quod probare debent. Distinguendum enim est inter Ecclesiam plantatam & plantandam. Non ad illam, sed ad hanc spectant traditiones, quia in ista canon Scripturæ S. nondum clausus fuit. Valet hic, quod Christus ad Phariseos olim dixit: *Quare vos transgredimini mandatum Dei propter traditiones vestras?* Matth. XV, 3. item: *frustra me colunt, quia doctrinas docent, quæ nil nisi mandata humana sunt*, Matth. c. l. v. 9. Jes. XXIX, 13.

Ad Deut. IV, 2. objiciunt Papicolæ, locum hunc tantum ad legem ceremonialem spectare. Sed respondemus, sensum ejus omnino directum esse ad totam Scripturam S. quia scripta Mo-
sis tunc temporis non modo totam revelationem divinam constituebant, sed quoque prima quasi lineamenta subsequentium revelationum continebant, ita, ut Prophetæ & Apostoli nil novi dixe-

dixerint, sed id, quod jam a Mose dictum fuit, pluribus exposuerint, & pro ratione temporis ad Statum Ecclesiæ accommodaverint, Act. XXVI, 22.

Locum Apoc. XXII, 18. 19. itidem Pontificii ad solam Apocalypsin restringunt. Sed cum Deus librum hunc inter Canonicos Scripturæ S. ultimum esse voluerit, interdictione hac quasi totum Scripturæ S. Canonem obsignavit.

Distinguunt quidem Pontificii inter *additamenta perficientia & corrumpentia*, quorum ultima tantum a Deo interdicta esse statunt. Sed cum omnia additamenta supponant imperfectionem, ea quoque hic non locum habere possunt. Lædunt enim honorem Dei, qui, cum verbum suum ad illuminandum intellectum nostrum dederit, infirmitatis arguendus foret, si ad consequendum finem hunc requirantur additamenta, ex ingenio humano enata ac profecta.

CAPUT XVII.

DE

PERSPICUITATE SCRIPTURÆ

SACRÆ.

Perspiciuitas ea est cujuscunque scripti boni proprietas, secundum quam sensum verborum ejus facile assequi possumus. Tribuenda est Scripturæ S. in omnibus, quæ creditu factuque ad salutem necessaria sunt. Cum lu-

mine propterea Scriptura S. comparatur, Pf. XIX, 9. Pf. CXIX, 105. 2 Petr. I, 19. Prov. VI, 23. 2 Cor. IV, 4.

Distinguitur autem inter *perspicuitatem rerum* & *verborum*. Posterior semper adest, non vero prior. Continet enim Scriptura S. res divinas, mysteria fidei & vaticinia de futuris, quæ omnia nobis ob imbecillitatem mentis satis obscura sunt, Interim tamen clavis verbis & perspicuo stylo proferuntur. Vocavit hoc B. Lutherus *claritatem externam* s. *grammaticam*, quæ ad omnes lectores æqualiter spectat, ita, ut etiam impius & irreginitus sensum literalem capere queat. Inculcat Paulus talem claritatem verborum omnibus Ecclesiæ Doctoribus, si non in aërem loqui velint, 1 Cor. XIV, 9. Ejusmodi perspicuitatem intelligit etiam Moses, quando de verbo Dei dicit, *prope id esse in ore ac corde populi*, i. e. verbum Dei non ex inanibus, sed prægnantibus & ex ore hominum quasi depromptis vocibus & phrasibus compositum esse, ita, ut a quolibet facile intelligi possit, Deut. XXX, 14.

Dantur quidem aliqua in Scriptura S. loca, quæ minus perspicua sunt, verum non ipsi Scripturæ, sed hominum intellectui defectus perspicuitatis adscribendus est. Nam non omnibus datum est donum interpretandi, 1 Cor. XII, 8 - 10. c. XIII, 9. Dantur etiam ἀμαθεῖς καὶ ἀσύνετοι, 2 Petr. III, 16. nec non, quibus tenuitas ætatis, imbecillitas mentis & ignorantia

rantia linguæ impedimento est, quo minus Scripturæ S. sensum perspiciant. Habet quoque perspicuitas sacrarum literarum suos gradus, dum locus locum claritate superat.

Distinguendum igitur est inter *perspicuitatem objectivam* & *subjectivam*. Prior in Scriptura S. ipsa; posterior vero in homine quærenda est. Illa semper adest, non vero hæc. Causa ex 2 Cor. IV, 3. 4. patet, ubi diabolus reproborum hominum mentes ita excœcare dicitur, ut non videant clarissimam Evangelii lucem.

Perspicuitas Scripturæ S. neutiquam excludit *lumen Spiritus S. supernaturale*, utpote quod notitiam nostram, quam ex ea haurimus, salutarem s. spiritualem reddit. Vocatur ejusmodi notitia 1 Joh. V, 6. *spiritus*, & opponitur literæ, 2 Cor. III, 6. Acquiritur vero hæc notitia spiritualis per illuminationem Spiritus S. 2 Cor. IV, 6. Eph. I, 18. 1 Cor. II, 12 - 16. precibus exorandam, Sap. IX, 10. Jac. I, 5. Joh. XIV, 26. Eph. I, 17. Ps. LI, 12. Ps. CXIX. 18.

Ad perspicuitatem Scripturæ S. multum quoque faciunt *regulæ hermeneuticæ*, de quibus infra agemus.

Distinguitur etiam inter Scripturæ S. *facunditatem* & *ambiguitatem*. Prior admittenda est, posterior vero inter vitia sermonis & styli refertur. Est autem *facunditas* ea scripti affectio, qua paucis multa sibi invicem subordinata vel connexa

proferuntur. Fœcunditas autem hæc, si Scripturæ S. tribuitur, non ita intelligenda est, ut primum a Deo intentum sensum ab accessorio non discernere queamus. Male igitur agunt, qui verba Scripturæ S. in varios, a se invicem diversos, nec inter se connexos, sensus flectunt.

Maxime impugnant perspicuitatem Scripturæ S. Pontificii, qui omne, quod obscurum in ea esse judicant, arbitrio Pontificis, summi sui divinarum rerum moderatoris, subjiciunt, quia Scripturæ S. prophetia non res sit *ιδίας ἐπιαισεως*, h. l. propriæ explicationis, 2 Petr. I, 20. Opponunt 1) locum Ps. CXIX, 18. Sed David h. l. orat, non ut legi divinæ, sed sibi lucem accendat Deus. Opponunt 2) locum 1 Cor. XIII, 12. Sed distinguendum est inter obscuritatem per se & comparative talem. Opponunt 3) *δυσνόητα* in Epistolis Pauli, de quibus quæritur Petrus, 2 Petr. III, 16. Sed ea non respectum habent ad Epistolas Pauli ipsas, sed tantum ad res in iis contentas. Opponunt 4) locum Dan. XII, 4. Sed agitur ibi tantum de vaticiniis, quæ post complementum longe plenius intelligenda forent. Opponunt 5) locum Luc. XXIV, 27. Sed Christus discipulos Emaunticos ibi tantum a præjudiciis Judaicis liberat, quæ impediebant, quo minus verba Christi clarissima de morte & resurrectione ejus intelligerent, Luc. XVIII, 34. Opponunt denique 6) locum Act. VIII, 30. 31. Sed eunuchus ibi
non

non de verborum claritate, sed de vaticinii complemento, quod se ignorare ait, loquitur. Claudimus Caput hoc verbis *B. Gerhardi in Conf. Cath. Lib. II. Art. I. c. III. p. 209.* ita scribentis: *nul-
lus est fidei articulus, nullum vitæ præceptum, quod
non alicubi verbis propriis, clavis & perspicuis in
Scriptura proponatur.* Merentur etiam hic verba
B. Augustini allegari, quæ *Lib. II. de Civ. Dei c. 9.*
hujus tenoris occurrunt: *magnifice & salubriter
Spiritus S. ita Scripturas Sanctas modificavit, ut locis
apertioribus fami occurreret, obscurioribus autem
fastidia detergeret.* Nihil enim fere de illis obscu-
ritatibus eruitur, quod non plenissime dictum alibi
reperiatur.

CAPUT XVIII.

DE

SENSU SCRIPTURÆ SACRÆ.

Sensus h. l. est id, quod per verba & literas
significatur. Proprie unicus tantum datur
literarum & verborum sensus, qui dicitur li-
teralis. Aristoteles propterea in *Metaphys. L.*
III. c. 4. dixit: τὸ μὴ ἓν τι σημαίνειν, ὁδὲν ἓς τι ση-
μαίνειν, h. e. non unum quid significare, nihil est si-
gnificare. Attamen cum multa non tam per
verba quam per figuras in dictione significari
soleant, duplex datur sensus literalis, scilicet sim-
plex & compositus.

Simplex est, quando verba non alium, quam
proprium, significatum admittunt, *compositus*

E 5

vero,

vero, quando propria verborum significatio simul figuratum & parabolicum significatum includit. Si e. g. Christus dixit: *hoc si in viridi ligno sit, quid non in arido fiet?* Luc. XXIII, 31. verba hæc sensum compositum habent. Proprie de ligno viridi & arido agunt. Cum vero Salvator iisdem parabolice velit judicia Dei indicare, quæ gens Judaica sibi per cædem personæ suæ contractura sit, in proprio verborum significatu figuratus simul sensus latet. Et hic itidem literalis dicendus est.

Solet propterea inter *sensum literæ* & *literalem* distingui. *Sensus literæ* est sensus grammaticus, aut iste, quem supra simplicem nominavimus, *sensus literalis* vero est sensus logicus, aut iste, quem homo in verbis & literis suis intendit. Intentio enim loquentis & scribentis est quasi anima sensus literalis.

Ex hisce patet, quid de sensu Scripturæ S. judicandum sit, de quo in Ecclesia multum disputatur. *Stylus Scripturæ S.* conformis est non solum indoli linguæ Hebrææ, sed etiam modo loquendi, qui apud gentes versus orientem habitantes, quæ sublimem & figuratam dictionem amant, in consuetudine est. Accedit, quod Scriptura S. contineat res divinas per se sublimes, nec non multa myſteria & vaticinia, quæ omnia supra hominum captum sunt. Ansam hoc dedit perversis & insipientibus hominibus, sensum Scripturæ S. multifariam detorquendi & verbis significatum affin-

affingendi, qui intentioni Spiritus S. prorsus repugnat.

Ut ex tricis nos expediamus, primum ponimus, quod Scriptura S. unicum tantum habeat sensum, grammaticæ scilicet & logice literalem. Quia vero iste interdum ad varias res & personas ductu ipsius Spiritus S. pertinet, *sensus mysticus* inde ortus est, qui est attentionia sensus literalis ad aliud, quod Spiritus S. iisdem verbis simul indicare voluit. Sensus mysticus igitur non est sensui literali contrarius, sed in eo inclusus. Exemplum præbet historia de æneo serpente Num. XXI. Omnia verba in illa suum habent sensum literalem, etsi serpens hic æneus aliud quid simul indicet secundum Christi interpretationem, Joh. III, 14. Et hoc est, quod sensum mysticum vocamus.

Notandum hic quoque est, quod sensus mysticus non ab hominum, sed ipsius Spiritus S. interpretatione dependeat. Nullibi ideo in sacris literis sensum mysticum quærere debemus, nisi ipse Spiritus S. nobis eum indicat. Hic enim optimus verborum suorum interpretes est.

Adscribunt etiam quidam Theologi sensui Scripturæ S. aliquam *fecunditatem*, qua unus sensus plures respectus, pluresque rei modos sibi subordinatos habet, e. g. Joh. I, 29. ubi vox *ἀγνῶν*, quæ de agno Dei usurpatur, non modo portandi, sed etiam tollendi & auferendi actum indicat.

Oppo-

Opponitur interdum sensui literali *sensus spiritualis*, qui autem a literali aliter non diversus esse debet, quam respectu efficaciam, quam Spiritus S. in cordibus hominum, si sacras literas attente legunt, operatur. Salutaris tunc redditur sensus literalis; alias manet nobis mere literalis s. historicus, aut naturalis, cui spiritualis jure opponitur.

Pontificii quadruplicem sensum Scripturæ S. statuunt, *literalem, metaphoricum s. tropologicum, allegoricum & anagogicum*. Verum tres ultimi non sunt tres distinctæ species sensus, sed potius unius sensus diversæ accommodationes.

Quæritur hic: *quid de consequentiis Theologicis sentiendum sit?* Intelligimus per eas conclusiones, quæ ex dictis biblicis deducuntur. Si secundum regulas hermenevticas istæ fiunt, pro verbo Dei omnino habendæ sunt. Nam posito principio, ponitur etiam principiatum. Sunt autem ejusmodi consequentiæ ad normam credendorum & agendorum non absolutæ, sed tantum conditionatæ necessitatis.

Distingui etiam debent a *piis meditationibus* circa unum vel alterum Scripturæ S. locum factis, quæ non ad normam pertinent, etsi per se utiles & bonæ sint.

CAPUT XIX.

DE

LECTIONE SCRIPTURÆ S.

Cum Scriptura S. omnia, quæ homines tam credere quam agere debent, contineat, omni-

omnino etiam *ab omnibus legenda est*. Dicitur enim ad quævis officia præstanda utilis, 2 Tim. III, 16. 17. nec non eum in finem scripta esse, ut fidem salutaremque cognitionem Christi exinde hauriamus, Joh. XX, 31. Deus ideo per eam *πᾶσι πανταχῶς* præcipit, ut resipiscant, Act. XVII, 30.

Quis igitur non legere cupiat librum tam sanctum & salutarem? Deus saltem ab omnibus hominibus lectionem ejus poscit, Deut. VI, 6. c. XXXI, 11. 12. Jes. XXXIV, 16. Christus idem postulat, Joh. V, 39. Luc. XVI, 29. 31.

David beatum prædicat, qui in meditatione legis s. *Scripturæ S.* diu noctuque occupatur, Ps. I, 2. & Paulus laudat omnes, qui cum Berrhoënsibus in studio legendarum scrutandarumque sacrarum literarum diligenter versantur, Act. XVII, 11.

Scripturam S. autem ab omnibus legendam esse, probari potest 1) ex Praxi Ecclesiæ Judaicæ, Deut. XXXI, 11. 12. Luc. XVI, 29. Act. XIII, 27. 2) ex Praxi primitivæ Ecclesiæ Christianæ, Act. XVII, 10. 11. 2 Tim. III, 14. 15. 3) exemplo eunuchi reginæ Candacis, cui Philippus lectionem Scripturæ S. non interdixit, Act. VIII, 30. 4) ex inscriptionibus epistolarum Paulinarum ad omnes Christianos directis, & 5) ex necessitate probandi spiritus, num ex Deo sint, 1 Joh. IV, 1. Loca vero Luc. VIII, 10. & Mal. II, 7. hic nil in contrarium probant.

Debet

Debet autem lectio & auditio Scripturæ S. fieri *cum attentione*, Hebr. II, 1. 2 Petr. I, 19. nec non *ex studio veritatis*, Act. XXIV, 24. c. XXV, 22. Luc. VIII, 12. & *sine præjudiciis*, Luc. XVIII, 34. c. XXIV, 25.

Pontificii non promiscue omnibus hominibus lectionem Scripturæ S. concedunt, sed potius eam laicis interdiciunt, quia plus detrimenti, quam emolumenti inde habeant & tantopere per eandem peccent, ut ad tribunal inquisitionis accersiri mereantur.

Argumenta, quibus sententiam suam tuentur, sequentia sunt: 1) ex Scriptura S. nasci hæreses: sed distinguitur inter occasionem præbitam & sumtam; 2) laicos per ejus lectionem scandalizari: sed discrimen est inter scandalum datum & acceptum; Castis quoque omnia sunt casta, Tit. I, 15. 3) Scripturam S. a laicis non intelligi, Act. VIII, 30. 31. sed distinguendum est inter intelligentiam vocum & rerum, quæ ultimæ interdum doctissimis clericis obscuræ sunt; 4) judicium de sacris rebus ad clericos pertinere: sed distinguimus inter judicium propheticum & discretivum, 1 Joh. IV, 1. 5) Judæos hodiernos ex lectione Scripturæ S. non illuminari nec converti: sed legunt ii tantum Scripturam V. T. & propter tegumentum Moisaicum s. præjudicia sua Judaica non videre possunt, 2 Cor. III, 15.

Interim non quævis Lectio Scripturæ S. unicuique promiscue commendanda est, sed ratione

tione ætatis, intellectus, profectuum & vitæ generis jure meritoque aliquod discrimen locum habere potest.

Tota quidem Scriptura utilis est in omnibus casibus, sed non singulis hominibus & omni tempore. Est enim utilitatis universæ: hinc in ea quilibet in qualibet re aliquid pro se invenit, quod tamen non omnibus conducit, nec omni tempore. Homo provectioris ætatis & qui facultatem judicandi exercitam habet, totam Scripturam S. sine offendiculo legere potest, Hebr. V, 13. 14.

CAPUT XX.

DE

INTERPRETATIONE SCRIPTURÆ
SACRÆ.

Interpretatio Scripturæ S. est modus eruendi genuinum ejus sensum. Agitur de ea præcipue in Theologia Exegetica, quæ regulas & adminicula docet, quibus in interpretanda Scriptura S. utendum est.

Aliquid ut hic de interpretatione sacrarum literarum addamus, sciendum est, quod Scriptura S. optime se ipsam explicet. Ad finem & circumstantias Scriptoris respiciendum est, si genuinum textus sensum eruere volumus, non neglectis tamen mediis hermenevticis. In primis analogiam Scripturæ S. secundum quam Scri-

Scriptura S. sibi nunquam vere contradicit, ante oculos habere debemus. Est quasi filum Ariadnæum, quo optime ex labyrintho venire possumus, in quem homines cum perversis & paradoxis suis Scripturæ S. explicationibus facile incidunt.

Scripturam per Scripturam omnino explicandam esse, probamus 1) ex eo, quod non *ἰδίας ἐπιλύσεις* esse dicatur 2 Petr. I, 20. h. e. non ita comparata est, ut quisque ex proprio arbitrio eam interpretari vellet ac posset, sed requiruntur interpretationis subsidia recte adhibenda. 2) Quod omnis Scripturæ S. interpretatio debeat esse *ἀνάλογος πίσει*, i. e. conformis fidei, Rom. XII, 6. 3) quod *πνευματικὰ πνευματικῶς* comparanda sint, 1 Cor. II, 13. 4) quod Scriptura S. ipsa nobis suppeditet media sese interpretandi; & 5) quod alias *ἀμαθεῖς καὶ ἀσκήρητοι* ea, quæ difficilia sunt, facile detorturi sint, 2 Petr. III, 16.

Scriptura S. se ipsam explicat *vel actualiter* per subjunctam explicationem, e. g. Joh. II, 21. Apoc. V, 8. Luc. VIII, 11. *vel virtualiter* per media hermenevtica a verborum significato, linguæ indole, dictionis genere, verborum contextu, locis parallelis, analogia fidei, occasione Scriptoris, scopo textus & aliis circumstantiis ad exegetin sacram spectantibus desumpta.

Multum quoque, imo plurimum, ad erudendum Scripturæ S. sensum genuinum confert *illuminatio Spiritus S.* qua omnis gaudere potest, qui ex studio veritatis & sine præjudiciis ad Scripturam S. accedit.



LIBER II.

DE DEO.

Cum DEUS non modo secundum sua essentialia attributa, sed etiam secundum Trinitatis mysterium ab omnibus, qui debito modo eum colere volunt, cognoscendus sit, optime tota de DEO doctrina in *duas Sectiones* dividitur, quarum prior *de DEO in genere*, posterior vero *de Trinitatis mysterio*, seu *DEO unitrino in specie*, agit.

SECTIO I.

DE

DEO IN GENERE.

CAPUT I.

DE EXISTENTIA DEI.

DEUM *existere*, nemo negat, nisi insipiens, Pf. XIV, 1. Pf. LIII, 2. Prima id veritas est, quam natura ipsa nos docet. Sicut in-

Pars I. F fanti

fanti ingenita est propensio cognoscendi matrem, etsi non distinctam de ea habeat ideam, ita in omnibus hominibus naturaliter latet propensio cognoscendi Deum, quam frustra suppressere student perversissimi athei.

Multi hinc negant, dari veros atheos, quos *theoreticos* nominamus & *practicis* opponimus. Intelliguntur autem per priores ejusmodi homines, qui aperte existentiam Dei negant, per posteriores vero, qui optant, non dari Deum, aut ita vivunt, quasi non existat Deus, qui bona opera remuneretur, mala vero puniat. Attamen cum post lapsum non tam absurda & monstrosa excogitari queat hypothesis, ad quam assumendam mens humana non proclivis sit, neutiquam dubitare debemus, quosdam semper inter homines dari, qui ex perversitate animi existentiam Dei negent. Eorum numerus major foret, si timor pœnæ non plurimos vetet, penetralia cordis aperire & sententiam suam execrabilem in lucem dare.

Præcipui *fontes atheismi* sunt 1) *fastus*, quo se multo sapientiores habent aliis & ad superstiosam plebem referunt omnes, qui doctrinæ Clericorum fidem dant & metu iræ pœnæque Dei trepidant. 2) *Epicureismus*, secundum quem ductum naturæ cœciter sequuntur, omnibusque voluptatibus indulgent, minime curantes res extra sensus positas, nec reformidantes statum post mortem futuramque æternitatem, Hiob. XXI, 13. & denique 3) affectatum flu-

studium, cuncta ad principium rationis sufficientis reducendi, nilque credendi, nec assumendi, quod non methodo mathematica demonstrari possit, Rom. I, 22.

Athei difficulter armis ex Theologia & sobria Philosophia desumtis vincuntur. Supervacaneum est, cum iis de veritate disputare, quia argumenta, quæ corrupta ratio & natura suppeditant, in certamine contra divinam veritatem iis plus valent, quam quæ ex Scriptura S. & dictamine rectæ rationis petuntur. Sunt enim tales veritatis hostes plerumque tam præfracti animi, ut obstinate negent, quod validissimis argumentis eorum intellectui objicitur.

Athei regressum causarum & effectuum in infinitum statuunt, & quidem duplicem, regressum per lineam rectam & regressum per circumulum. Prior est, quando ab effectui ad causam indefinenter concludunt, posterior vero, quando statuunt, ens sui ipsius causam & effectum simul esse posse, remque producentem a re producta iterum productum iri. Utrumque absurdum est.

Scholastici *triplici via* nos ad existentiam Dei ducunt, quarum primam *causalitatis*, alteram *eminentiæ* & tertiam *negationis viam* nominant. Via hæc triplex parum differt a tribus classibus, in quas Theologi nostri argumenta pro existentia Dei distribuere solent, quarum alia est metaphysica, alia physica, alia historica.

Ad *classē metaphysicā* pertinent argumenta, quæ a necessitate & natura ipsius Dei petuntur. Existit Deus absolute necessario, quia ens est, quod non aliter possibile est, quam quod existat. Existit per essentiam suam, quia a se ipso est. Notitia existentiae ejus omnibus intelligentibus creaturis a natura ingenita est. Cum enim extra Deum nil sit, quod non ab eo sit & ad ejus cultum sese obligatum cognoscat, connata hominibus sunt certa cognitionis Dei principia, quibus ad quærendum colendumque Deum excitantur.

Naturalis hæc notitia Dei est vel insita vel acquisita. Insitam dicimus eam propensionem, quam omnes homines naturaliter ad cognoscendum & colendum Deum habent. Quorum cordibus inscripta est cognitio legis, Rom. II, 14. 15. illorum cordibus etiam inscripta est cognitio legislatoris. Ipsi Ethnici insitam hanc notitiam Dei agnoscunt. Inter alios magnus ille Philosophus CICERO *Lib. I. de natur. Deorum* dixit: *in omnium animis Deorum notionem ipsa natura impressit.*

Notitia Dei naturalis *acquisita* ea est, quæ per ratiocinia, a causis metaphysicis petita, acquiritur. Vel *vulgaris* est vel *exactior* s. *erudita*. Illa venit ab institutione, hæc vero a ratiocinatione. Illa in omnibus hominibus, qui rationis usu gaudent, hæc vero tantum in Philosophis s. viris eruditis datur. Argumenta, quibus in ratiocinatione utuntur, suppeditat Metaphy-

taphyfica, quæ causarum nexum & subordinationem, entium naturam, rerum contingentium non cœcam fortem, mundi intelligibilis arcana, spirituum myſteria, nec non cauſæ rerum primæ neceſſitatem docet. Hæc omnia occaſionem dant viris eruditis & philoſophis, ita ratiocinandi, ut inde notiſſimam Dei naturalem vel acquirant vel acquiſitam confirment.

Classis phyſica continet argumenta, quæ contemplatio hujus univerſi ſuppeditat, cujus natura, ordo, corruptibilitas, ſtructura, conſervatio, mutabilitas & occultæ qualitates, nec non rerum creatarum mirifica origo, propagatio & μεταστροφῶσις nos de exiſtentia Dei, ſummi omnium rerum moderatoris, certos reddunt. Teſtantur hoc non modo Scriptores divini, ſed etiam profani, inter quos Cicero primum meretur locum. Adhiberi tamen debet rectus rationis uſus, ſine quo id non cognoscitur, quod Univerſum hoc nobis cognoscendum præbet. Recte hinc Paulus ſcripſit: τὰ ἀόρατα τῆ θεᾶς ἀπὸ κτίσεως κοσμοῦ τοῖς ποιήμασι νοούμενα καὶ θεωρεῖται, h. e. *Deus inviſibilis ex creatione mundi ejusque operibus intellectus cognoscitur*, Rom. I, 20.

Qui negant, exiſtentiam Dei ex libro naturæ probari poſſe, provocant 1) ad Pſalm. XIV, 1. Sed diſtinguitur inter ignorantiam ſimplicis intelligentiæ & pravæ diſpoſitionis; 2) ad Eph. II, 12. Sed diſtinguitur inter cognitionem generalem & ſpecialem, & 3) ad Gal.

IV, 8. sed distinguitur inter cognitionem Dei ipsam & ejus applicationem.

Ad Classē historicam referimus argumenta, quæ a consensu populorum & testimoniis hominum sumuntur.

Omni in re, dixit Cicero, *consensio omnium populorum lex naturæ putanda est.* Cum igitur in toto terrarum orbe non detur gens tam immanis atque barbara, quam non imbuerit aliqua Dei opinio, imo ipsi Hottentotti, qui tamen inter omnes populos minimum humanitatis habent, aliquem Dei cultum præstent, nemo dubitabit, hominibus innatam esse de Deo ideam. Non mirum itaque est, veteres Athenienses coluisse θεὸν ἀγνώστον, dum per naturam ipsis omnino constitit, dari Deum, Act. XVII, 23. Testimonium Scripturæ S. ipsum apud eos, qui alias doctrinæ Christi non fidem dant, aliquid valere potest, cum antiquissimus sit liber, qui inter homines reperitur.

CAPUT II.

DE

NOMINIBUS DEI.

Nomina sunt notiones rerum. Habet enim nomen a noscendo originem.

Triplicem nomina habent usum: 1) exprimunt aliquo modo essentiam rerum, 2) discernunt inter se res, & 3) indicant rerum proprietates. Exinde sequitur, naturam Dei per nomina

mina exprimi, ipsum Deum ab omnibus aliis substantiis per ea discerni, & quidem eo magis, cum Ipse, qui se omnium optime novit, sibi eadem in verbo suo imposuerit. Per se autem nullum datur Dei nomen, quod pro captu nostro totam Dei naturam perfecte exprimat, Gen. XXXII, 29. Jud. XIII, 18. Prov. XXX, 4. Est enim Dei essentia nobis incomprehensibilis; hinc etiam ex divinis nominibus tantum improprias de ipso concipere possumus ideas, quæ unius vel alterius attributi divini indolem ac naturam indicant.

Judæi decem numerant *nomina Dei*. Tria derivant ab *Esse*: nempe Jehova, Jah & Jiheje; tria a *Præesse*: scilicet Schaddai, Adonai & Jehovah Zebaoth; tria a *Posse*: nempe El, Elohim & Eloah; & unum ab *Eminentia*: scilicet Eljon s. Excelsus.

Nos *nomina Dei* distinguimus in *essentialia* & *personalia*; priora iterum in *propria* & *figurata*. Figurata sunt vel *metonymica*, e. g. fortitudo, auxilium &c. vel *metaphorica*, e. g. lux, sol &c.

Hic de *nominibus tantum Dei essentialibus* agimus, quæ sunt Jehova, Jah, Adonai, El, Elohim, Schaddai, Θεός, κύριος & δεσπότης, de quibus omnibus singulatim nunc aliqua dicemus.

Jehova, יהוה, est inter nomina divina primum & præcipuum, quia istud Deus sibi soli vindicat, Exod. III, 14. Jes. XLII, 8. Jer. XXXIII, 2. Vult, suum nomen proprium esse, quod non alii substantiæ tribuendum sit. Habet

præfixam literam Jod, quæ plerumque formativa nominis proprii est, & caret numero plurali. Non admittit demonstrativum, nec ul-
lum suffixum. Nunquam ponitur in statu re-
giminis. Tribuitur etiam Deo in Scriptura
S. non aliter, quam sicut nomen proprium,
Exod. XV, 3. Amos. V, 8. c. IX, 6. Psalm.
LXXXIII, 19. Jes. XXXVII, 20. Neh. IX, 6.

Compositum est ex hisce verbis, יהוה אשר
יהוה, h. e. *sum*, (f. *ero*,) *qui sum*, (f. *ero*,) Exod.
III, 14. quæ idem significant, ac ὁ ὢν, καὶ ὁ ἦν,
καὶ ὁ ἐρχόμενος, uti Christus se nominat, Apoc.
I, 4. Significat itaque *Jehova* Ens omnibus vi-
cissitudinibus temporum superius f. Ens perfe-
ctissimo modo & absolute necessario existens.
Plato, *Philo* & *Damascenus* Deum propterea τὸν
ὄντα nominant; a *Junio* vocatur αὐτῶν, a *SCA-*
LIGERO αὐταὐτός & a *MICH. WALTHERO*
αὐταυτότατος. Idem fere indicare vult *SIRA-*
CIDES, quando Deum appellat τὸ πᾶν, c.
XLV, 29.

Indicat igitur nomen *Jehovah* 1) eum, qui
essentiam suam a se ipso habet, quapropter
etiam *primus* dicitur, Jes. XLIV, 6. 2) qui non
contingenter, sed necessario existit, 3) qui nil
nisi essentia est, & 4) qui omnibus rebus essen-
tiam dat, Apoc. IV, 11.

Qui nomen *Jehovah* non volunt esse nomen
Dei proprium, provocant 1) ad Ps. XXIV, 10.
& Jes. VI, 3. ubi legitur *Jehovah Zebaoth*: sed
ex locis Ps. LXXXIX, 9. Jer. XV, 16. & Hof.
XII,

XII, 6. patet, phrasin hanc esse ellipticam & supplendam esse per vocem DEI; 2) ad Num. X, 35. at hic non arcam, sed Deum, arcæ quasi insidentem, Moses alloquitur. Confer Ps. CXXXII, 8. 3) ad Exod. III, 2. at h. l. non creatus, sed increatus angelus fœderis intelligitur; 4) ad Gen. XXII, 14. at nomen Jehovah h. l. non in sensu simplici, sed composito accipitur, uti etiam fit Exod. XVII, 15. Jud. VI, 24. Jer. XXXIII, 16. & Ezech XLVIII, 35.

Nomen Jehovah tanquam Dei nomen proprium jam primis Patriarchis cognitum fuit, Gen. IV, 1. c. XV, 8. c. XVIII, 13. c. XXII, 14. Locus vero Exod. VI, 3. interrogative verti potest ita: *Et nomen meum Jehovah nonne illis etiam manifestatum fuit?*

Non autem est nomen per se ineffabile, quia constat suis consonantibus & vocalibus. A Judæis propter nomen *Jovis*, quod ab iis ad ethnicos pervenisse multis visum est, lege sancitum est, ne quis mortalium amplius extra templum nomen Jehovah, prout scribatur, effari audeat. Verum cum Deus 1) literas & puncta hujus nominis nobis revelaverit, 2) usum ejus legitimum commendaverit, Deut. VI, 13. c. X, 8. c. XXI, 5. 3) per illud jurare jusserit, Deut. V, 13. c. X, 20. & 4) fideles olim hoc nomine Deum compellaverint, pronunciatio ejus omnino licita est. In locis Exod. XX, 7. & Lev. XXIV, 11. 16. non nominis Jehovah pronunciatio & usus legitimus, sed tantum abusus & profanatio

ejus interdicatur. Judæi provocant ad Exod. III, 15. ubi legunt *לְעֶלְמָם*, *ad occultandum*. Sed textus h. l. corruptus est. Legi potius debet *לְעֶלְמָם*, *in eternum*.

Nomen *Jah* est vox primitiva & cum nomine Jehovah conjungitur Jes. XXVI, 4. Ps. LXVIII, 5. Construitur plerumque in Psalmis cum voce *הלל*, unde *Hallelu - Jah* idem significat ac *laudate Dominum*. Est itaque nomen soli Deo proprium.

Nomen *Adonai*, *אֲדֹנָי*, a radice *אָדָן*, *robustus fuit, fulcivit & sustentavit*, derivatur. Significat igitur fortem & potentem Dominum, nec non sustentatorem & moderatorem omnium rerum, Col. I, 17. Hebr. I, 3. Judæi per illud pronunciant nomen Jehovah, quod pro ineffabili habent. Adjectiva litera *י* non est suffixum *meus*, sed *heemanticum*, Jes. VIII, 5 sq. Ezech. XVIII, 25. 29.

Nomen *El*, *אֵל*, a *אֵלִים* derivatur, quod *fortitudinem* significat. Exprimit igitur infinitam Dei fortitudinem & potestatem, quapropter plerumque per *Deum fortem* interpretari solent Philologi. Reperitur non modo cum suffixo *י*, Ps. XXII, 2. Ps. LXVIII, 25. Jes. XLIV, 17. sed etiam cum aliis suffixis. Si verus Deus falsis Diis opponitur, dicitur *אֵלֵי אֱלֹהִים*, *Deus Deorum*, Dan. XI, 36. Improperie tribuitur etiam creaturis.

Nomen *Eloah* & in plurali *Elohim*, Chaldaice vero *Elah* Dan. II, 28. & *Elaha* Esr. IV, 24. exprimit

primit naturam Dei. Derivatur ab Arabico *אלה*, *servire & colere*. Significat igitur numen religioso cultu prosequendum. Ob aliquam honoris similitudinem tribuitur improprie & *δευτέρας* etiam angelis, Ps. VIII, 6. Ps. XCVII, 7. nec non magistratibus, Exod. XXI, 6. Ps. LXXXII, 1. ex abusu vero idolis, Exod. XXIII, 24. c. XXXII, 4. Jud. XVI, 23. 24. Habet autem vox Elohim non modo significationem singularem, quando de vero Deo in tribus personis uno usurpatur, sed etiam pluralem, quia non caret singulari ejusdem significationis, Deut. XXXII, 17. Habac. III, 3. Ps. XVIII, 32. Ps. L, 22. & passim in Libro Jobi.

Nomen *Schaddai*, *שַׁדַּי* s. *El Schaddai*, Gen. XVII, 1. derivatur ab Arabico *שַׁדַּד*, *potentem esse*, & quidem ita, ut omnia devastare queat. Designat itaque *Dominum potentissimum*, qui non modo omnia producere, sed etiam destruere potest. Qui nomen hoc ex præfixo *ש* & *דַּי*, *sufficiens*, componunt, interpretantur per *Sufficientissimum*, & qui a *שָׁדַי* h. e. *mammis* derivant, intelligunt per nomen illud *Deum benignissimum*. Sed prima Etymologia verisimilima est.

Græcum nomen *Θεός*, quod quoque Latini suum fecerunt, non tam dignitatis, quam naturæ divinæ nomen est, unde abstractum *Θεότης* s. *Deitas & Divinitas* divinam naturam & essentiam significat. Originem habet vel *ἀπὸ τῆς θεᾶς*, h. e. *a contemplando*, Hebr. IV, 13. vel

vel ἀπὸ τῆς θεῖν, h. e. a *ponendo*, vel ἀπὸ τῆς θέειν, h. e. a *currendo*, vel ἀπὸ τῆς αἰθεῖν, h. e. ab *urendo*, vel ἀπὸ τῆς δειν, h. e. a *movendo*, Act. XVII, 28. vel a δέος, *timor*, unde pavor Isaaci, f. is, quem Isaacus timet, Gen. XXXI, 42. originem habet. Respectu hujus Etymologiæ valent verba Petronii: *primos in orbe Deos fecit timor*.

Vocem vero θεός omnino nomen naturæ esse, exinde quoque patet, quod Scriptura S. θεόν, vere talem, a θεοῖς λεγομένοις f. Diis, nomine talibus, distinguat, 1 Cor. VIII, 5. Gal. IV, 8.

Nomen κῑρῐος a κυρεῖν, *sancire* vel *ratum facere*, derivatur. Significat igitur Dominum summa auctoritate præditum. In Græca lingua per hanc vocem plerumque nomen Jehova exprimitur. Alii nomen hoc a κύρειν deducunt, quod apud veteres Græcos idem significat ac ὑπάγειν. Vide PEARSONII *Expos. Symb. Apost.* p. 261.

ΔΕΣΠΟΤΗΣ vocatur Deus Luc. II, 29. Act. IV, 24. 2 Tim. II, 21. 2 Petr. II, 1. Jud. v. 4. quæ vox proprie herum absolutum & independentem designat.

Particulæ *meus, tuus, noster, vester* &c. nec non personæ, quæ nominibus divinis Elohim & θεός in Scriptura S. adjiciuntur, non imminuunt, sed potius augent & confirmant summam Dei auctoritatem, quia fiduciam indicant, quam fideles in vero Deo collocant. Hi enim solum Deum verum invocant & in eo solo confidunt, Matth.

Matth. IV, 7. c. XXII, 37. Rom. I, 8. 1 Cor. I, 4. c. XIV, 18. 2 Cor. XII, 21. 2 Theff. I, 11. 12. Hac ratione summum Numen vocatur *Deus Abrahami, Isaaci & Jacobi*, Matth. XXII, 32. Marc. XII, 25. nec non *Deos patrum*, Act. III, 13. Huc spectant etiam verba Thomæ ad Christum: *Mi Domine & mi Deus!* Joh. XX, 28.

C A P U T III.

D E

E S S E N T I A D E I.

E*ssentiam* nominant Philosophi id, quod rationem in se habet istius rei, quæ ad ejus naturam pertinet.

De Essentia igitur Dei non adæquata dari potest definitio, quia natura divina & quicquid ad eam spectat, nobis in hac vita non satis cognitum est. Ex parte tantum res divinas hic cognoscimus, 1 Cor. XIII, 9. 10. Dicitur hinc Deus in luce habitare, ad quam nemo accedere potest, 1 Tim. VI, 16.

Essentiam itaque Dei non aliter describere possumus, quam per ejusmodi prædicatum, quod summam ejus perfectionem indicat & ipsum ab omnibus aliis rebus per excellentiam distinguit. Ejusmodi prædicatum omnia includere debet attributa divina s. proprietates, quas ad intelligendam Dei essentiam pro diversitate operationum ejus de ipso prædicare solemus.

Essen-

Essentia divina in Scriptura S. dicitur $\Theta\epsilon\acute{o}\varsigma$, a Ψ est, Prov. VIII, 14. item $\Theta\epsilon\acute{o}\tau\eta\varsigma$, Rom. I, 20. $\Theta\epsilon\acute{o}\tau\eta\varsigma$, Col. II, 9. $\Theta\epsilon\acute{\iota}\alpha$ $\Phi\acute{\upsilon}\sigma\iota\varsigma$, Gal. IV, 8. & $\mu\epsilon\tau\Theta\eta$ $\Theta\epsilon\acute{o}$, Phil. II, 6. Ipse vero Deus nomen $\tau\acute{\epsilon}\varsigma$ $\acute{\alpha}\lambda\eta\theta\acute{\epsilon}\varsigma$ h. e. *veri* habet, Joh. XVII, 3. quatenus scilicet omne id est & habet, quod secundum nostrum concipiendi modum ad ens perfectissimum pertinet, & quatenus in Deo omnia optime conveniunt.

Prædicatum generale, per quod Essentia hæc Dei optime describitur, est *Ens spirituale independentens*. Omnia exinde fluunt attributa, quæ summam ejus perfectionem & singularem individuumque ejus naturam indicant. Alias etiam *Ens primum* s. summum & perfectissimum, nec non *Intellectus infinitus* vocatur.

Deum omnino *Ens spirituale* esse, ipse Christus docet dicendo: *Deus est spiritus*, Joh. IV, 24.

Spiritus est substantia incorporea, intellectu & voluntate libera prædita. Quanquam autem Deus infinite major & excellentior sit omnibus aliis spiritibus, revera tamen Spiritus est, qui materia, corpore & figura expers est, & tam intellectu quam voluntate in sensu eminentissimo gaudet.

Tribuuntur quidem Deo in Scriptura S. corpus & membra, sed non propterea credere debemus cum Anthropomorphitis & Audæanis, eum habere subtile corpus, aut hominem etiam respectu corporis ad imaginem Dei creatum esse. Loquitur Scriptura S. de Deo $\acute{\alpha}\nu\theta\rho\omega\pi\omicron\tau\alpha\theta\acute{\omega}\varsigma$, quod

quod Θεογενῆς interpretandum est. Accommodat se Deus hoc loquendi modo ad captum intellectus nostri. Recte hinc *Glassius in Rhet. sacr.* scripsit: *Deus non habet membra carnea, sed tantum membrorum istorum perfectiones & quidem excellentissimo modo.*

Apparitiones Dei in V. T. sub specie humana de Filio Dei intelligendæ sunt, qui ad tempus humanam formam assumpsit & futuram suam humanitatem præfiguravit.

Deus, tanquam spiritus, omnino etiam *invisibilis* est, Exod. XXXIII, 20. Joh. I, 18. 1 Tim. VI, 16. Hebr. XI, 27.

Est quoque, tanquam Spiritus, spirituali modo & toto animo colendus, Joh. IV, 24. Ipsi ethnici hoc cognoverunt, quando scripserunt: *Pura Deus mens est, pura vult mente vocari.*

Est autem Deus non solum Spiritus, sed etiam *Ens Independentens*. Independentia hæc duo includit: 1) *quod sit a se ipso*: non quidem *positive*, quasi sit sui ipsius causa, quod apertam contradictionem in se habet, sed *negative*, quatenus non ab alio productus est, neque causam efficientem, five materiale, five formalem, five finalem habet; nec non 2) *quod sit omnium entium primum*, Jes. XLI, 4. c. XLIV, 6. c. XLVIII, 12. Apoc. I, 8. non quidem respectu ordinis, sed a) *absolute*, quatenus aliud ens prius esse nequit, omneque ens præexistens & coexistens excludit, & b) *effective*, quatenus aliarum rerum omnium causa & principium est.

CAPUT

ATTRIBUTIS DEI IN GENERE.

A*tributa Dei sunt qualitates essentiae divinae, quibus Deus se creaturis suis diversimode manifestat. Nomen habent ab attribuendo, quia Deo attribuuntur, s. de eo praedicantur. Alias etiam proprietates vocantur.*

Sunt nil nisi ipsa Dei essentia, diverso respectu considerata. Non differunt inter se realiter, sed tantum secundum nostrum concipiendi modum. Non sunt accidentia, quae ab essentia separari possunt. Non competunt in Deum tantum in concreto, sed etiam in abstracto. Non admittunt gradus intensificationis aut remissionis, sed sunt infinitae perfectionis. Neutiquam quoque secum invicem pugnant, sed optimam inter se harmoniam habent.

De attributis Dei valet dictum: *Nihil est in Deo, quod non sit ipse Deus.*

Attributa Dei sunt vel *generalia* vel *specialia*. *Generalia* sunt, quae ad totius essentiae divinae constitutionem spectant, e.g. perfectio, bonitas, gloria & beatitudo; *specialia* vero, quae tantum ad intellectum & voluntatem ejus, aut ad singularem aliquam operationem respectum habent.

Dividuntur porro attributa Dei in *negativa* & *positiva*. *Negativa* remonent a Deo, quod imperfectionem in se habet, qualia sunt unitas, simpli-

simplicitas, immutabilitas &c. *positiva* vero certitas in Deo constituunt perfectiones, cujus generis sunt sapientia, veracitas, sanctitas, omnipræsentia &c.

Dividuntur quoque in *communis* & *propria*. *Communia*, quæ alii *adjunctiva* nominant, sunt, quæ certo modo in creaturis etiam dantur, e.g. vita, justitia, potentia, benignitas, amor &c. *propria* vero, quæ quoque *subjectiva* dicuntur, sunt ea, quæ nulli creaturæ tribui possunt, e.g. æternitas, immensitas, omnipræsentia &c.

Attributa Dei distinguuntur denique in *ἐνεργητικά* s. *actiosa* & in *ἀνεργητικά* s. *quiescentia*. Priora etiam *externa* & *transeuntia*, posteriora vero *interna* & *immanentia* appellantur. Per illa intelliguntur ea attributa, quæ respectu creaturarum per certas sese exerunt operationes, cujus generis sunt sapientia, justitia, veracitas, omnipotentia &c. per hæc vero illa, quæ respectu creaturarum non per certas operationes sese exerunt, e.g. simplicitas, unitas, æternitas &c.

C A P U T V.

D E

PERFECTIONE ET BONITATE

D E I.

Duo hæc attributa conjungenda sunt, quia generaliter omne id comprehendunt, quod in Deo excellens & perfectum est.

Pars I.

G

Per-

Perfectio in sensu strictiori illud attributum Dei generale est, quo omnes possibiles perfectiones propriissime & in summo gradu possidet Deus ita, ut in eo nec augeri, nec minui possint, Matth. V, 48.

Respectu hujus attributi Deus non modo nulla re indiget, Jes. XL, 14. Rom. XI, 34. 35. sed suis etiam creaturis omne id est, quod necesse habent. *Omnisufficientiam* hoc dicere possumus, quia Deus non modo sibi, Ps. L, 9-13. Act. XVII, 25. sed etiam omnibus creaturis, Act. XVII, 28. Ps. CXLV, 16. inprimis fidelibus tam sufficiens est, ut in eo solo acquiescant, Ps. LXXIII, 25. 26. Ps. XC, 2. Ps. XVI, 5. Ps. XXIII, 1. Jes. XXV, 9. Rom. VIII, 31.

Summum bonum hinc dici meretur Deus, & quidem non solum respectu sui ipsius, sed etiam respectu suarum creaturarum & fidelium. Respectu sui ipsius summum bonum vocatur, Matth. XIX, 17. Luc. XVIII, 19. quatenus nempe omnes perfectiones in se habet, quarum capax esse potest essentia ejus; respectu creaturarum vero, quatenus omnis bonitatis & felicitatis earum causa & autor est; & denique respectu fidelium, quatenus in eo solo acquiescunt & delectantur illi.

A bono derivatur *Bonitas*. Hæc Deo itidem tanquam attributum generale adscribitur. Differt a *Perfectione* non nisi respectu relationis ad voluntatem ejus, secundum quam non modo se ipsum sed etiam suas creaturas amat. Quia
infra

infra plura de amore Dei dicentur, de bonitate ejus hic paucula tantum in genere proferemus.

Bonitas Dei est vel essentialis vel moralis. Bonitas Dei essentialis consistit in conformitate essentialis ejus cum ipsius voluntate, bonitas vero moralis in ejus promptitudine benefaciendi s. bonitatem suam inter suas creaturas distribuendi. Deus itaque bonus dicitur, 1) absolute, Matth. XIX, 17. Luc. XVIII, 19. 2) relative, Ps. XXV, 8. Ps. LXXXVI, 5. 15. & 3) effective, Gen. I, 31. Jac. I, 17. Multi propterea nomen germanicum Gott a gut, h. e. bonus, derivant.

Totam terram bonitatis divinæ plenam vocat David, Ps. XXXIII, 5. Ps. CXIX, 64. fateaturque, eam expandi super omnes cœlos, Ps. XXXVI, 6. Ps. LVII, 11. duraturamque esse in æternum, Ps. CXXXVI.

Hanc bonitatem nominat Paulus *εὐδοσίαν* ἡ ἀγαπᾶς s. benevolam voluntatis propensionem, Eph. I, 5.

C A P U T VI.

D E

GLORIA ET BEATITUDINE

D E I.

Gloria & Beatitudo sunt attributa Dei, quæ ad generalia referuntur, quia ad totam Deitatem spectant.

G 2

Glo-

Gloria Dei duplex est, vel absoluta vel relativa.

Absoluta Dei gloria consistit in complexu omnium ejus perfectionum, quatenus secundum eas super omnia erectus est & nihil sui simile habet, Hebr. I, 3. Dicitur illa alias etiam *Majestas Dei*.

Hæc Majestas s. gloria Dei vocatur *relativa*, quatenus ab intelligentibus creaturis agnoscitur, Jes. VI, 3. Num. XI, 21. Cum vero agnitio hæc pro intellectus nostri modulo gradus suos habeat, gloria Dei non solum major & minor esse, sed etiam augeri & minui potest, 1 Sam. IV, 22. Rom. I, 23. Hoc autem de *gloria Dei absoluta* dici nequit, quippe quæ immutabilis est ac æterna, 1 Petr. V, 10.

Ad *gloriam Dei* pertinet 1) infinitæ essentiæ & attributorum ejus excellentia, quapropter *Deus gloria*, Act. VII, 2. *Rex gloria*, Ps. XXIV, 8. *Pater gloria*, Eph. I, 17. & *Dominus gloria*, 1 Cor. II, 8. vocatur; 2) eminentiæ hujus splendor, Luc. II, 9. Act. IX, 3. Hebr. I, 3. 3) ejusdem eminentiæ agnitio, Exod. XVI, 17. c. XXXIII, 18-23. Joh. I, 14. & 4) agnitæ eminentiæ manifestatio ejusdemque celebratio, quæ non modo a Deo ipso fit, Jes. XLII, 8. c. LX, 1. Hagg. II, 8. Joh. II, 11. sed etiam ab angelis, Jes. VI, 3. Luc. II, 14. Apoc. VII, 12. ab hominibus, Ps. XXXIV, 4. Luc. I, 46. & ab electis, Apoc. IV, 10. 11. c. XV, 3.

Beatitudo, quam Paulus Deo tribuit, 1 Tim. I, 11. c. VI, 15. significat statum ejus, secundum quem

quem non modo expers est omnis sensus ingrati & doloris, sed etiam se ipso ita fruitur, ut in hac fruitione constanter & immutabiliter acquiescat, eaque infinite lætetur. Patet exinde, quod Deus in beatitudine sua nulla re indigeat & æque beatus fuerit ante, quam post conditum mundum.

Ad hanc sui ipsius fruitionem pertinet 1) omnis mali absentia & 2) omnis boni præsentia. *Malum est vel turpe vel triste.* Utrumque a Deo remotum est, 1 Joh. I, 5. Præsentia omnis boni conjuncta est cum sui ipsius agnitione & suavi delectatione, Ps. XVI, 11. Reddit simul rationales creaturas sui ipsius fruitionis s. beatitudinis participes, ut ex Ps. IV, 7. 8. & Ps. XXXVI, 9. 10. conjicere licet.

Deus ob hanc beatitudinem suam nullis *affectibus animi* commovetur, neque proprie loquendo, hominum peccatis contristatur, sed semper idem est & manet. Adscribuntur quidem ei in sacris literis affectus & commotiones animi, nec non dolor & sensus ingrati, sed fit hoc *ἀνθρώπων παθῶς* & improprie, ut homines eo majorem exinde capiant timorem atque reverentiam erga Deum, sibi que magis caveant, ipsum peccatis suis offendere.

CAPUT VII.

DE

UNITATE DEI.

Si Deus ens summum & perfectissimum est, non nisi *unus* esse potest. Produnt hic ethnici rationis suæ tenebras, cum tot finxerint Deos, quot Romana Ecclesia jam Sanctos veneratur.

Est autem *unus* tantum *verus Deus*, cui non alium æquiparare possumus. Hic est ille Dominus Deus noster, de quo populus Israël audiebat, quod sit unus, Deut. VI, 4. Præter eum non alius datur, Deut. IV, 35. 1 Cor. VIII, 4. Jes. XLIV, 6. c. XLV, 5. 14. Marc XII, 32. Dicitur propterea *μόνος ἀληθῆς Θεός*, i. e. solus verus Deus, Joh. XVII, 3. Eph. IV, 6. 1 Tim. II, 5. Ipse Diabolus de hac veritate non dubitat, Jac. II, 19.

Non est in Deo *unitas speciei*, quæ plura individua admittit, nec *unitas partium*, sicuti corpus & anima unum hominem constituunt, nec *unitas subjecti & accidentis*, uti creati spiritus habent, qui cum sua essentia certa conjungunt accidentia, sed *unitas* prorsus *singularis & transcendentalis*.

Distinguitur hæc unitas in *absolutam & exclusivam*. *Absoluta* est, qua Deus non dividi potest, uti in sequenti capite pluribus docebimus; *exclusiva* vero, qua Deus omnes species & omnia individua excludit; quæ unitas proprie

prie hujus loci est. Non tamen tollit ista 1) pluralitatem nominum, nec 2) pluralitatem attributorum, nec 3) pluralitatem personarum.

Sociniani errant, quando non modo contendunt, plures esse posse Deos, sed etiam fingunt, Deum verum partim dependentem, partim independentem esse. Provocant ad 1 Cor. VIII, 5. ubi tamen de falsis diis tantum sermo est.

Errant etiam *Calixtus* & ejus aſſecſæ *Regiomontani*, qui Deum in V. T. tanquam *μονοπόσατον*, in N. T. vero tanquam *τρισυπόσατον* cognitum fuiſſe perhibent. Sed unus idemque Deus omni tempore fuit. Nec aliter in V. T. agnitus & adoratus eſt, quam in N. T. eſſi in hoc myſterium Trinitatis magis manifeſtatum ſit, quam in illo.

Si unus Deus eſt, unice etiam coli debet, Deut. VI, 13. 14. Matth. IV, 10.

CAPUT VIII.

D E

SIMPLICITATE DEI.

Cum Deus ens primum & a ſe exiſtens ſit, quod nec oriri nec interire ullo modo queat, ens omnino etiam *ſimplex* & *incorporeum* eſſe debet. Nuncupatur Deus propterea *ſpiritus* in ſenſu eminentiori; item *ero*, *qui ero*, Exod. III, 14.

Simplicitas Dei non modo excludit omnem extensionem & compositionem ex partibus corporeis, sed etiam eam compositionem, quam in mente fingimus respectu materiæ & formæ, aut respectu substantiæ & accidentis, quia veritas, sapientia, amor &c. in Deo non accidentia sunt, sed ad ipsam ejus essentiam pertinent. Valde hinc differt simplicitas Dei a simplicitate spirituum, utpote in quibus omnino dantur accidentia. Vocatur propterea simplicitas Dei *absoluta*, spirituum vero simplicitas *determinata & dependens*.

Propter hanc simplicitatem Deus non modo *invisibilis* dicitur Exod. XXXIII, 20, 23. Joh. I, 18. Rom. I, 20. 1 Tim. I, 17. c. VI, 16. sed etiam incorruptibilis, Rom. I, 23. 1 Tim. I, 17. neque pingi, aut sub imagine aliqua adorari vult, Exod. XX, 4. Jes. XL, 18. Omnes vero, quæ in Scriptura S. occurrunt, repræsentationes invisibilis Dei, sunt figuræ hieroglyphicæ, quæ per similitudinem generalem aliquid repræsentant.

Patet exinde, cur Deus sub figura aliqua in mente ficta non adorari nec invocari velit. Est enim species idololatriæ. Aliter autem cum Christo comparatum est. Istum sub quavis figura, in qua se manifestavit, in mente nobis repræsentare possumus, quando adorationis cultum ei præstamus.

Sociniani objiciant contra simplicitatem Dei,
 1) Deum constare ex tribus personis: at non
 sunt tres essentiae; Deus quidem trinus, non
 vero triplex est; 2) Deum ex substantia & ac-
 cidentibus s. relationibus constare: at distin-
 guendum est inter relationes prædicamentales
 & transcendentales; illæ sunt accidentia, hæ
 vero tantum modi; modus autem non acci-
 dens, sed affectio entis est; 3) in Deo dari
 multitudinem attributorum, adeoque etiam
 compositionem: at multitudo hæc non est rea-
 lis, sed idealis; attributa quoque non sunt in
 Deo accidentia.

VORSTIUS in *Tract. de Deo* p. 191 sq. ad istos eos-
 dem se sociat, dum respectu personarum, decre-
 torum, potentiae activæ & passivæ, nec non ma-
 teriæ & formæ compositionem in Deo fingit,
 quod etiam certo modo *Arminiani* faciunt, sim-
 plicitatem Dei vellicantes. Vide *Exam. cens.*
c. 2. p. 41.

Omnibus hisce adversariis respondemus di-
 stinguendo inter compositionem idealem &
 realem. Valet hic quoque canon; *Quicquid in*
Deo est, est ipse Deus; qui tamen ita limitari de-
 bet, ut non id, quod secundum nostrum con-
 cipiendi modum Deo tribuitur, Deum ipsum
 esse dicamus. Distinguendum enim est inter
 rem ipsam & nostram concipiendi modum.

CAPUT IX.

DE

INFINITATE ET IMMENSITATE DEI.

Infinitas Deo adscribitur, quatenus perfectiones ejus nullos limites habent, ita, ut nec augeri, nec minui, nec ullo modo circumscribi possint. Tribuitur ea tam essentiae, quam attributis ejus, quia non peculiare attributum est, sed commune, quod simul ad alia attributa positiva se extendit, ita, ut non modo essentia, sed etiam scientia, bonitas & potentia ejus *infinita* dici queat.

Vocatur Deus propterea *magnus*, Jer. X, 6. Ps. CXXXV, 5. Ps. CXLV, 3. Ps. CXLVII, 5. Hiob. XXXVI, 26. Efr. V, 8. eique talis magnitudo adscribitur, quæ ineffabilis & inexplorabilis, Ps. CXLV, 3. Hiob. XI, 8. 9. nullique similis est, Exod. XVIII, 11.

Vocatur etiam ob infinitatem suam *altissimus*, Gen. XIV, 22. Ps. LXXXIII, 19. Ps. XCII, 9. & qui habitat in summa altitudine, Jes. XXXIII, 5. Ps. CXIII, 5.

Immensitas illud Dei attributum est, quo infinite omnia implet & cuique spatio interminate præexistit, Jer. XXIII, 24. Hiob. XI, 8. 9. Eph. I, 23.

Duplex datur *spatium*, vacuum & locus. *Vacuum* est, ubi creatura existere potest, *locus* vero, ubi creatura vere existit. Respectu vacui
Deus

Deus dicitur *immensus*, respectu autem loci *omnipræsens*.

Secundum immensitatem suam omni possibili spatio præexistit, & quidem nec per *multiplicationem*, quia unus est, nec per *divisionem*, quia simplicissimus est, nec per *circumscriptionem*, quia infinitus est. Est itaque Deus non modo totus in toto mundo & in qualibet ejus parte, nullique spatio inclusus, nec ullo spatio exclusus, sed totus etiam extra & supramundum.

Num Deus etiam in iis sit spatiis. quæ in mente fingimus? quæstio inanis est, si id, quod in mente fingitur, non idem, ac possibile esse, significat

Deus *immensus* est non *extensive*, ut aer, non *inclusive*, ut cælum, non *commixtive* ut effluvia atmosphæræ, non *diffusive* ut mare, sed per ubi-
tatem interminabilem.

VORSTIUS errat, quando Deum non per essentiam, sed tantum per potentiam & operationem immensum esse contendit.

C A P U T X.

D E

OMNIPRÆSENTIA DEI.

O*mnipræsentia* est species immensitatis. Deus secundum eam omni creaturæ coexistit.

Immensitas in Deum absolute convenit & ab æterno est, nec non de Deo abstractive dicitur: *omnipræsentia* vero certum respectum ha-

bet, in tempore coepit & tantum concretive de Deo dicitur.

Si nulla unquam creatura extitisset, aut omnia in nihilum redderentur, Deus tamen immensus, non vero omnipræsens nuncupandus foret.

Quicquid vel sensibus externis percipimus, vel per intellectum interne sentimus, nobis *præsens* esse dicitur. Priori modo corpus & materia, posteriori vero spiritus & res idealis nobis præsens est.

Neuter modus ad præsentiam Dei quadrat. Cum enim Deus propter immensitatem nullibi localiter habitet, ejus præsentia etiam prorsus singularis & magis impropria, quam propria est. Deus non est in *loco*, etsi sit, ubi locus est. Corpora *circumscriptive* & spiritus *indefinite* in loco sunt, Deus vero *repletive*, ita tamen, ut quidem ubique adsit, non vero ulli rei insit eique permisceatur.

Triplici respectu Deus omnipræsens dicitur, 1) respectu cognitionis per præsentiam visionis, Ps. CXXXIX, 1-4. 2) respectu operationis per præsentiam operativam, Act. XVII, 25. 27. 28. & 3) respectu substantiæ per præsentiam substantialem, Jer. XXIII, 23. 24. Ps. CXXXIX, 7-12. Proprie una eademque est omnipræsentia. Dum enim Deus substantialiter omni creaturæ præsens est, omnia quoque cognoscit & quidem non sine operatione, quia summum, quod omnia moderatur, Numen nunquam otiosum esse potest. Jure

Jure meritoque igitur omnipræsentia Dei definitur per *adessentiam operativam*, quia duo includit 1) *ἀδιασσίαν*, qua Deus a nullo loco distat, & 2) *ἐνέργειαν*, qua nullibi otiosus est. Alii nominant hæce partes substantialem Dei propinquitatem & efficacem ejus operationem.

Dividitur etiam *omnipræsentia Dei* in generalem & specialem, f. absolutam & modificatam. *Generalis* f. *absoluta*, qua Deus omnibus creaturis æquali modo præsens est, *specialis* vero f. *modificata*, qua tantum hominibus, & quidem vel secundum gratiam vel iram specialiter propinquus est, Pf. XXXIV, 19. Pf. CXLV, 18. Jef. LV, 6. Jer. XXIII, 23. Phil. IV, 5.

Propinquitas hæc divina habet sua intervalla. Dicitur enim Deus ab iis, qui non in fide & pietate constantes sunt, recedere, ad eos vero accedere vel redire, qui sese convertunt. Per *ἀνθροπονράθειαν* hoc de Deo dicitur, quia Deus per se immutabilis est. Manifestat præsentiam suam hominibus ita, ut ad statum & vitæ genus cujusvis hominis quasi accommodata esse videatur. Vult enim per eam homines eo deducere, ut vel resipiscant, vel vitam suam ad Dei voluntatem semper componant. A piis hominibus Deus non recedit, Jos. I, 5. Jef. LIV, 10. sed tantum ab impiis, Jef. LIX, 2. Hof. IX, 12. Rex Saulus hoc præ aliis expertus est, 1 Sam. XXVII, 15.

Specialem Dei appropinquationem ad homines Scriptura S. *visitationem* nominat. Dicitur enim

enim Deus invisere & pios & impios. *Pios* invisit, quando gratiam, beneficentiam & auxilium iis præstat. Sic invisit Saram, cum in senectute gravidam redderet, Gen. XXI, 1. populum Israëliticum, cum suspiria ejus in Ægypto exaudiret, Exod. III, 16. terram Canaan, cum eam fœcundaret, Ps. LXV, 10. & Judæos, cum promissum Messiam iis mitteret, Luc. I, 68. c. VII, 16. c. XIX, 44. *Impios* vero invisit Deus, quando judicia sua & justas pœnas in iis exequitur, Exod. XX, 5. c. XXXII, 34. Lev. XXVI, 16. Jes. XIII, 11. c. XXVI, 21. Jer. IX, 9. Hof. IV, 9.

Hæc Dei visitatio vocatur alias etiam *adventus*, qui respectu piorum ipsam gratiæ & beneficentiæ divinæ exhibitionem, respectu impiorum vero iræ divinæ & justitiæ vindictivæ executionem significat. De priori agitur Exod. XX, 24. de posteriori vero Jes. III, 14. Matth. XXIV, 27.

Præsentia Dei specialissima diverse se habet pro diverso statu eorum, qui eadem gaudent. *Humanæ Christi naturæ* præsens est Deus per unionem personalem, Col. II, 9. *fidelibus* per spiritum inhabitantem, Rom. VIII, 14-17. *Prophetis* per singularem revelationem, 1 Petr. I, 11. *electis* per manifestationem gloriæ & majestatis suæ, Jes. LXVI, 1. & *dammatis* in inferno per manifestationem justitiæ suæ vindictivæ, Ps. CXXXIX, 8. 2 Thess. I, 9.

Multum inter Theologos disputatum est de *specialissima Dei approximatione ad substantiam fidelium*, quam Christus indicare videtur dicendo: *veniemus ad eos & mansionem ibi faciemus*, Joh. XIV, 23.

Sed verba hæc ad metaphoricæ referenda sunt locutiones, quibuscum Deus ad nos quasi descendit, & verbis humanis mysteria sua cœlestia exponit. Non enim proprie motus localis in Deum convenit, quia immensus est. Diversos igitur præsentia divinae gradus non per diversas approximationes essentia divinae, sed per diversas operationes Dei, qui per immensitatem essentia suæ æqualiter & semper præsentissimus est, describere debemus. Sic Deus apud fideles est in omnibus periculis, Jes. XLI, 10. c. XLIII, 2. Ps. XCI, 15. in arduis negotiis, Exod. III, 12. in carceribus, XXXIX, 21. in persecutionibus, Ps. XLVI, 6. & in ipsa morte, Ps. XXIII, 4.

C A P U T XI.

D E

Æ T E R N I T A T E D E I.

Æternitas est vel *fixa* vel *successiva*.

Æternitas fixa est ea duratio, quæ non modo sine initio & sine fine, sed etiam sine omni successione & vicissitudine est.

Æternitas successiva est duratio, quæ quidem non finem habet, sed tamen perpetuis successibus obnoxia est.

Sug-

Successio autem est, ubi unum sequitur alterum.

Prior æternitas excludit omne tempus, *posterior* vero sese ad tempus accommodat, quamdiu istud existit. *Prior* est absoluta, *posterior* vero determinata. *Prior* est necessaria, *posterior* vero accidentalis. *Prior* nullam status mutationem admittit, *posterior* vero mutationi status obnoxia est.

Si igitur quærimus: *quæ æternitas Deo tribuenda sit?* facile conjici licet, non successivam, sed fixam Deo adscribendam esse. Est enim sine principio & sine fine, & quidem necessario & absolute. Est etiam nulli successioni aut vicissitudini obnoxius. Est quoque supra & extra tempus, utpote quod determinata duratio est, quæ initium & finem habet, statumque eorum, qui in ea vivunt, variat & mutat.

Dantur quidem in Dei æternitate successiones, quæ autem non intrinsecæ, sed extrinsecæ sunt, & ad ipsam æternitatis formam non pertinent. Deus quidem omnibus temporibus coexistit, non vero in sua æternitate tempus ipsum s. successionum, qua talium, ordinem admittit.

Probatur hæc æternitas Dei ex Psalm. CII, 28. ubi in oppositione ad cælum & terram Deus perstare aut unus idemque semper esse & manere dicitur.

Probatur porro ex Ps. XC. 2 & 4. ubi non modo ante conditum mundum jam Deus ab æterno in æternum fuisse fertur, sed etiam
asse-

afferitur, quod mille anni apud eum sint uti dies præterlapsa, ad indicandum, quod apud Deum nulla dentur temporum intervalla, sed coram eo omnium seculorum tempus quasi sit unum tantum *ἀδιαίρετον νῦν*, s. indiscretum momentum.

Probatur quoque ex Jes. LVII, 15: ubi Deus inhabitare & possidere æternitatem dicitur; item ex Apoc. I, 11. & Jes. XLIV, 6: ubi primus & ultimus, *α* & *ω* vocatur.

Probatur ex Apoc. I, 4. 8. c. XI, 17. & c. XVI, 5: ubi appellatur is, qui est, qui erat & qui futurus est; ex Ps. IX, 8: ubi in æternum mansurus & ex Gen. XXI, 33. & Jes. XL, 28. ubi Deus æternitatis nominatur.

Probatur denique ex 1 Tim. I, 17. Jer. X, 10. & Dan. VI, 26. ubi æternitatis regnique nunquam interituri rex nuncupatur. Hæc fixa æternitas soli Deo omnique, quod in Deo est, propria est. Hinc etiam Patris generatio & Spiritus S. processio æterna est, etsi utraque semper consummata sit habenda.

Errant, qui vel cum VORSTIO locum, vel cum MOSCOROVIO materiam primam & lucem inaccessibleem, vel cum WEIGELIO mundum perhibent esse coæternum. Extra Deum nil est, quod non in tempore cœperit.

Multum quidem nostris temporibus a Philosophis disputatum est de mundi æterni possibilitate; sed jure inter inanes quæstiones referatur, quia omnis possibilitas rei talem auctorem

supponit, qui voluntatem & potentiam habet determinatam. Cum vero Deus omne, quod creare voluit, ex liberrima & absoluta voluntate per omnipotentiam suam revera creaverit, non dari potest res divina possibilis. Possibilitas enim non, nisi in nostra mente, existit. Mens vero hominis quomodo fingere, aut sibi repræsentare possit aliquid, quod suum captum superet?

Vox æternus in Scriptura S. multis quidem tribuitur rebus, sed fit improprie. Usurpatur enim de duratione non definita, e. g. Gen. XIII, 15. Lev. XXV, 30. nec non de interrupto ætatis tempore, Exod. XXI, 6.

Si spiritibus & animabus hominum, nec non vitæ cœlesti & statui damnationis Matth. XXV, 46. æternitas tribuitur, talis intelligitur, quam supra *successivam* nuncupavimus, quæ initium quidem, non vero finem habet & perpetuis successione obnoxia est.

C A P U T XII.

D E

V I T A D E I.

Vita cujusvis entis in subsistentia sui ipsius consistit. Præstat se per actuositatem s. operationes suas.

Ens materiale operatur vegetative & sensitive, *ens spirituale* vero rationaliter & intellectualiter.

Vita

Vita itaque Dei primario ipsa ejus essentia est, quatenus scilicet per se subsistit, sequē ipsam certo modo movet, secundario vero indicat ejus operationem immanentem, ab essentia sua dependentem.

Vita igitur Dei ab ejus essentia non distincta est, quia omne id, quod in Deo est, ipse Deus est. Quando itaque Deus per vitam suam jurat, Ezech. XXXIII, 6. Deut. XXXII, 40. idem est, ac si per se ipsum juret, 1 Reg. XVII, 1.

Vita hæc Dei est a se ipso, quia Deus ens independens est. Dicitur enim expresse vitam habere ἐν ἑαυτῷ, i. e. in se ipso, Joh. V, 26.

Vita Dei est infinita & æterna, Deut. XXXII, 40. Tribuitur propterea Deo immortalitas & quidem talis, quæ ipsi soli propria est, 1 Tim. VI, 16.

Vita Dei nil in se habet compositi. Est enim Deus non modo spiritus, sed etiam ens simplicissimum. Jure meritoque hinc opponitur deastris, Act. XIV, 15. Ps. XLII, 3. Ps. CXV, 3 - 9. Jer. X, 3 - 5.

Vita Dei est fons omnis alius vitæ, quia omnia ab ipso originem habent ac dependent, Act. XVII, 25. 28. Hoc autem non in sensu Fanticorum intelligi debet, qui rerum creatarum originem in divina essentia ponunt.

Deus propterea in sensu eminentissimo & κατ' ἐξοχὴν Vivus vocatur, Gen. XVI, 14. Jos. III, 10. Ps. XLII, 3. Ps. LXXXIV, 3. Jes. XXXVII, 4. Act. XIV, 15.

Sicut vero Spiritus vitam suam cogitando & volendo præstat, ita quoque Deo non potest non & intellectus & voluntas tribui, de quibus nunc specialiter acturi sumus.

CAPUT XIII.

DE

INTELLECTU DEI.

Deus omnino *intellectum* habet, Jes. XL, 28. Hic intellectus in Scriptura S. plerumque *mens* s. *voûs*, interdum etiam *cor* vocatur.

Est autem *intellectus* facultas cogitandi s. aliquid sibi distincte repræsentandi. Cum igitur Deus sit ens infinitum, facultas hæc quoque in eo infinita est.

Intellectus itaque *Dei* est facultas, omnia sibi uno actu distinctissime repræsentandi.

Quod in mente repræsentatur, sunt *ideæ*, quæ non modo præsentem esse, sed etiam percipi debent. Duo igitur intellectus involvit, 1) *idearum præsentiam* & 2) earundem *perceptionem*.

Substantia finita non per se habet ideas. Oriuntur istæ per sensuum usum. Idearum igitur præsentia in tali substantia non accidentalis & determinatâ est. Cum Deo autem hac in re aliter comparatum est. Sicut omnia coram oculis ejus nuda & resupina sunt, Hebr. IV, 13: ita etiam res jam in mente ejus existunt, antequam vere existunt. Est igitur *idearum præsentia*

sentia in Deo essentialis & absoluta, quia imago rei prius in mente ejus est, quam res ipsa.

Homines sine ratiocinatione, qua ideas juxta se ponunt & ex earum collatione veritatem eliciunt, non aliam quam obscuram & confusam habent rerum cognitionem. In divino vero intellectu *idearum perceptio* nullos habet limites. Est distinctissima, perfectissima & infallibilis. Omnia uno intuitu Deus in intellectu suo percipit, nec aliquam ratiocinationem aut aliud adminiculum ad percipiendum ideas necesse habet, Rom. XI, 33. vocatur propterea *Deus scientiarum*, 1 Sam. II, 3. comparaturque cum luce, 1 Joh. I, 5.

Intellectus igitur Dei jure meritoque dici potest 1) *immensus*, quia intelligentiæ ejus non est terminus, Ps. CXLVII, 5. 2) *independens*, quia omnia a se ipso cognoscit & nullius consilio indiget, Rom. XI, 34. 3) *simplicissimus*, quia uno actu sine ratiocinatione omnia intuetur, 4) *immutabilis*, quia semper idem est ac manet, nec ejus cognitioni unquam aliquid accrescit aut decrescit, 5) *infinite*, quia ipsam suam infinitam essentiam percipit, 6) *purissimus*, quia sensualem figuratamque rerum repræsentationem non necesse habet, & 7) *imperfscrutabilis*, quia effectus ejus nostrum mentis captum superant, Rom. XI, 33. Jes. XL, 28.

Respectu hujus intellectus Deo adscribitur & *scientia* & *sapientia*, de quibus nunc in duobus capitibus agemus.

SCIENTIA DEI.

S*cientia Dei* ab intellectu ejus proprie non differt, quia facultas & actus in ente simplicissimo unum idemque sunt. In creatura actus quidem sequitur facultatem, at non tamen a facultate ad actum valet consequentia. Cum Deo autem prorsus aliter comparatum est. Quod intelligere potest, revera etiam intelligit.

Et hæc intelligentia est id, quod *scientiam* nominare solemus. Est repræsentatio rei in mente, quæ per ideas fit. In Dei mente omnia perfectissime repræsentantur. Jure meritoque hinc Deo *omniscientia* adscribitur, 1 Joh. III, 20. Hebr. IV, 13. Ps. CXXXIX, 1-4. 1 Sam. II, 3. Sir. XXIII, 28. 29.

Multum itaque *scientia Dei* a scientia humana, tam respectu objecti, quam respectu modi differt.

Respectu *modi* Deus uno eoque simplicissimo actu omnia per se immediate sine specie intelligibili aut præmissa ratiocinatione cognoscit, Hebr. IV, 13. Deus igitur, proprie loquendo, non habet ideas seu cogitationes, etsi eadem illi tribuantur, Ps. CXXXIX, 17. Jes. LV, 8. Jer. XXIX, 11. Omnia enim nuda & resupina coram ipso sunt.

■ Quamquam vero *scientia Dei* per se simplicissima sit, diverso tamen respectu dici potest & *generalis* & *specialis*: *generalis*, quando omnes crea-

creaturas; *specialis* vero, quando imprimis fideles novit, 2 Tim. II, 19. Distingui etiam potest in scientiam *theoreticam* & *practicam*. *Theoretica* est, quando Deus aliquid simpliciter novit, *practica* vero, quando simul operatur & quidem vel cum affectu benevolo, Ps. I, 6. vel cum affectu irato & averso, Apoc. III, 15. quod Scriptura S. interdum per *non nosse* exprimit, Matth. VII, 23.

Respectu *objecti* scientia Dei rectissime dicitur *omniscientia*, quia non modo se ipsum, sed etiam omnes res extra se, quæ non modo existunt & extituri sunt, sed etiam existere possunt, cognoscit.

Primum scientiæ divinæ *objectum* est ipse Deus. Cognoscit se ipsum, Matth. XI, 27. Joh. I, 18. 1 Cor. II, 10. 11. & omnes suas actiones, Act. XV, 18. Vocatur hæc scientia *comprehensiva*.

Secundarium *objectum* sunt res extra Deum, quæ respectu temporis vel in præterita vel præsentia vel futura dividuntur.

Respectu *præteritorum* divina scientia nominatur *recordatio* s. *reminiscentia*, Act. X, 4. Ps. XXV, 6. 7. Jer. XXXI, 20.

Adscribitur propterea Deo *memoria*, quæ vel essentialis vel judicialis vel fœderalis est.

Essentialis *memoria* est ipsa divina scientia, *judicialis* respectum habet ad remunerationem aut punitionem operum hominum, Ps. IX, 13. Neh. V, 19. Hebr. VI, 10. & *fœderalis* spectat

ad servanda promissa, Ps. CXI, 5. Luc. I, 72. Si Deo *oblivio* tribuitur Ps. XIII, 2. XLII, 10. LXXVII, 10. Jes. XLIX, 15, fit respectu memoriae judicialis, Jer. XXXI, 34.

Respectu *praesentium* rerum scientia Dei vocatur *visio & intuitio* f. *scientia visionis*, quia coram oculis ejus omnia nuda sunt, Prov. XV, 3. Jer. XXXII, 19. Sir. XXIII, 28. Hebr. IV, 13. Ps. X, 14.

Respectu *futurorum* scientia Dei est vel *naturalis* f. simplicis intelligentiae, vel *libera* f. visionis. Illa non cum certo voluntatis decreto, hæc vero cum certo voluntatis decreto conjuncta est. Prior appellatur *scientia naturalis*, quia in Deum per naturam & necessario competit. Opponitur *scientiæ liberæ*, quæ Deo soli tribuitur, quatenus secundum liberum suum decretum in rebus futuris concurrit.

Futura contingentia f. res possibiles & conditionatas, quas alii *futuribilia* nominant, Deus per *scientiam mediam* novit. Hæc ea est scientia, qua Deus omnia, quæ sub hac vel illa conditione futura sunt, certo prævidet, etsi ob non impletam conditionem non eveniant. Vocatur scientia hæc *media*, quia futura conditionata medium quasi habent locum inter res possibiles & actu existentes f. inter res simpliciter & necessario futuras.

Plurimi *Calviniani* mediam hanc Dei scientiam negant. Sed nos affirmamus eam. Sic Deus prævidit, quod David capiendus fuisset, si Kegilæ

gilæ mansisset, 1 Sam. XXIII, 11. 12. nec non Christus, quod Tyrii & Sidonii, item Sodomitæ pœnitentiam egissent, si talia miracula apud eos facta fuissent, uti in urbibus Chorazin, Bethsaida & Capernaum facta sunt, Matth. XI, 21. 23. Plura exempla occurrunt Act. XXVII, 24, 31. Ezech. III, 6.

Præscientia est character veri Dei, Jes. XLI, 21. 23. c. XLII, 9.

Objectum ejus sunt omnes res futuræ, quæ vel effectus corporum ex structura eorum necessario proficiscentes, vel effectus animalium, secundum sensuales repræsentationes ex insito instinctu sese moventium, vel effectus voluntatis hominum ex libero arbitrio agentium sunt.

Deum priores duos effectus prævidere, nobis creditu non difficile est, quia ex libertate voluntatis fiunt; sed eum etiam actiones hominum liberas prævidere, rationi non comprehensibile est.

Non dependet divina præscientia a divina ordinatione aut decreto efficaci, Deut. XXX, 19, Gen. IV, 7, neo est conjecturalis, ut Soci-niani & Pelagiani perhibent.

Neutiquam quoque præscientia & prævisio Dei *necessitatem* rei & actionis causantur. Est enim utraque actus intellectus, qui non extra se agit. Sicut eclipses solis & lunæ non ideo fiunt, quia astronomus eas præsciat & prævideat: ita etiam non res futuræ fiunt, quia Deus illas præscit & prædixit. Deus futura cognoscit,

ut præsentia. Uti vero id, quod in præsenti video & cognosco, non ideo, quia video & cognosco, existit: sic quoque futura non propterea eveniunt, quia Deus prævidet.

Præscientia itaque non tollit libertatem actionum humanarum. Nam Deus res futuras non præscit, ut eveniant, sed quia eveniunt. Non aliam necessitatem ea rebus infert, quam quæ dicitur *necessitas eventus s. consequentiæ*, non vero *consequentis*, Act. I, 16.

VORSTIUS cum Socinianis futurorum contingentium *præscientiam divinam* eamque *infallibilem & intuitivam*, quæ a *ratiocinativa*, quam ii admittunt, distincta est, prorsus negat, cum tamen ex Ps. CXXXIX, 2 sq. satis superque probari queat.

Si igitur Deus omnia contingentia, quæ per determinationem causarum liberarum fiunt, cognoscit, non dubium est, quin quoque omnes alias res & quæ ex nexu substantiarum veniunt, cognoscat. Cognoscit itaque substantialia & circumstantialia; facta, verba & cogitata; universalialia & singularia, genera & species, omnia individua, omnes partes, imo minutissima, Matth. X, 30.

C A P U T XV.

DE

S A P I E N T I A D E I.

Sapientia est habitus, non modo bonum finem, sed etiam media ad eum idonea eligendi, eaque

eaque applicandi. Includit *prudentiam*, quæ speciatim circa applicationem mediorum versatur, Deo autem proprie non tribuitur, quia imbecillitatem intellectus & proclivitatem ad errandum supponit.

Sapientia Dei itaque summa intellectus divini perfectio est, qua omnes causas & effectus admirabiliter ad suum finem disponere ordinareque scit. Dicitur alias in Scriptura S. etiam *consilium Dei*, Prov. I, 25. c. VIII, 14. Jes. XLVIII, 29. Jer. XXXII, 19.

Duplicem Deus habet *finem*, 1) gloriam sui nominis & 2) bonum creaturarum suarum. Ambo fines sibi invicem ita subordinati sunt, ut unus alteri vel ultimus vel intermedius sit.

Tribuitur *sapientia* Deo 1) ὑποσατικῶς, quatenus Filius Dei ita nominatur, Prov. VIII, 12. &c. 2) tanquam attributum, secundum quod Deus μόνος σοφός, s. solus sapiens, Rom. XVI, 27. 1 Tim. I, 17. & magnus consilio, Jer. XXXII, 19. vocatur.

Secundum sapientiam suam Deus semper, quod optimum est, eligit, idque approbat, & ut eveniat, omnia sic dirigit, ut modus nobis quidem plerumque sit imperscrutabilis, summæ tamen ejus perfectioni optime conveniens, Rom. XI, 33. 34. Hiob. XII, 13. c. XXVIII, 20-28. Jes. XXVIII, 29.

Ad consequendum finem suum Deus omnia in regno naturæ ita ordinavit, ut unum alterius esse possit modo finis, modo medium.

Omnium

Omnia optime sese manifestat sapientia Dei 1) in opere creationis, Ps. CIV, 24. in primis hominum, Ps. CXXXIX, 14. 15. Hiob. X, 8-12. 2) in opere gubernationis & providentiæ, 3) in opere redemptionis, 4) in administratione ecclesiæ, Eph. III, 10. & 5) in cuiusvis hominis vitæ curriculo, si sollicitè ad vestigia ejus animum attendere volumus, Ps. IV, 4. Ps. LXXIII, 24.

Τὸ μωρὸν τῆ ᾠᾶς s. stultitia Dei, 1 Cor. I, 25. non secundum veritatem, sed erroneam mundi opinionem accipi debet.

CAPUT XVI.

DE

VOLUNTATE DEI IN GENERE.

Voluntas modo facultatem, modo actum indicat. Omnis actus autem est facultatis effectus. Utrumque sub voluntate comprehenditur.

Voluntas in priori significato facultas est tam appetendi cognitum bonum, quam averfandi cognitum malum. Pertinet ad essentiam substantiæ intelligibilis & versatur circa duplex objectum, quod vel appetibile vel averfabile est.

A naturali instinctu s. appetitu sensitivo, qui omnibus animalibus communis est, probe discernenda est voluntas, quia intellectum s. facultatem judicandi de eo, quod bonum vel malum, aut gratum vel ingratum est, supponit. Dependet

pendet igitur voluntas plerumque ab intellectus dominio, cujus dictatis obtemperare solet. Ipse appetitus sensitivus voluntatem non ad obsequium adigere potest, nisi intellectus antea per certas rationes victus sit. Quo excellentior igitur intellectus & quo maior sapientia in ente intelligente est, eo puriores & justiores sunt voluntatis inclinationes & aversiones.

Patet exinde satis, quid de *voluntate Dei* sentiendum sit. Quatenus voluntas Dei facultas est, eadem ab ipsa ejus essentia non differt; quatenus vero actus est, significat sapientissimam ejus propensionem ad omne verum bonum, & justissimam aversionem ab omni vero malo.

Deum omnino *voluntatem* habere, probatur ex Ps. CXV, 3. Rom. IX, 18. 19. Eph. I, 9. 11. Matth. XI, 26. 1 Tim. II, 4. Act. XXI, 14. & Rom. XII, 2. ubi Deus aliquid *vult*, & ex 2 Petr. III, 9. ubi aliquid *non vult* dicitur.

Proprie voluntas tantum circa *bonum* versatur *objectum*, quod vel vere tale est, vel pro tali habetur. Quia vero bonum cum malo pugnat, versatur quidem voluntas etiam circa *malum objectum*, sed non nisi aversando, quatenus id vel verum malum est, vel pro malo habetur. Dicunt hoc nonnulli *noluntatem*, quæ vox autem tam barbara est, ut jure rejiciatur.

Objectum voluntatis divinæ *primarium* est ipse Deus, qui per se summum Bonum est, Matth. XIX, 17. *secundarium* vero sunt creaturæ ejus. Quicquid igitur

igitur Deus vel vult, vel non vult, spectat ad gloriam sui nominis & ad salutem creaturarum, ita tamen, ut priorem semper præferat posteriori.

Si Deus aliquid absolute vult, ad regnum potentiæ, Ps. XXXIII, 9. si vero conditionate aliquid vult, ad regnum gratiæ respectum habet.

Coram Deo non datur aliud *malum*, quam quod dicimus *morale*. Intelligitur autem per illud omne, quod in liberis creaturis cum ejus voluntate pugnat, Ps. V, 5.

Quicquid Deus vult, ab æterno vult, nec aliud quid vult, quam quod ipsum decet.

Cognitio & voluntas in Deo unum constituunt actum.

Voluntas Dei est principium existentiae omnium rerum, quæ extra Deum sunt, Apoc. IV, 11.

Proprie voluntas Dei non admittit *affectus*, quia cum ejus perfectione, immutabilitate & summa beatitudine pugnant. Adscribuntur quidem Deo in sacris literis aliqui *affectus*, e. g. ira, amor, gaudium, tristitia &c. Sed fit hoc ad exprimendum potentiores divinæ voluntatis operationes, quia nobis verba defunt, quibus proprie id exprimamus. Deus ipse non quidem affectus sentit, at nos tamen eorum effectus sentire sinit.

Voluntas divina est *independens* & *absoluta*, quia Deus neminem habet supra se, nulliusque indiget consilio, Rom. XI, 34. 35.

Volun-

Voluntas divina est simplicissima, quia Deus uno actu & sine prævía meditatione eam præstat.

Voluntas divina est immutabilis, quia semper consistit, Jes. XLVI, 10. nec ei resisti potest.

Voluntas divina est infinita, quia non modo ab æterno est, sed eam etiam nullo modo expiscari possumus.

Voluntas divina est liberrima, quia non causam formaliter moventem habet, Deusque nemini rationem de suis decretis & actionibus dare debet, Ps. CXV, 3.

Voluntas divina est efficacissima, quia Deus per omnipotentiam suam omnia, quæcunque vult, efficere potest, Ps. XXXIII, 9.

Quoniam una tantum detur voluntas Dei, a Theologis tamen multifariam distinguitur, ut ex tricis nos eo melius expediamus, in quas ex imbecillitate rationis conjicimur. Distinguitur itaque in *voluntatem Dei naturalem & liberam, in efficacem & inefficacem, in absolutam & conditionatam s. ordinatam, in antecedentem & consequentem, in arcanam & revelatam &c.*

Omnes hæ voluntates non realiter in Deo differunt, sed tantum secundum nostrum concipiendi modum. Versantur circa unum idemque objectum, non vero sub eadem ratione formali.

Præcipua, quæ de tam multiplici Dei voluntate notanda sunt, in sequentibus capitibus, quæ

quæ de libertatē, de efficaciā & de decretis divinæ voluntatis agunt, docebimus.

Tribuuntur etiam Deo respectu voluntatis ejus cæta attributā, nempe 1) amor, 2) justitia, 3) sanctitas, 4) veracitas & 5) omnipotentia, de quibus pari modo singulatim acturi sumus.

CAPUT XVII.

DE

LIBERTATE DEI.

Præcipua Voluntatis proprietas est *libertas*. Hæc si cessat, voluntas in captivitate versatur. Hac de causa brutis non voluntas adscribi potest, quia eorum inclinationes non ex libero arbitrio, sed ex instinctu naturali proficiuntur.

Deficiente intellectu deficit etiam voluntatis actus, quia omnis voluntas circa objectum intellectus versatur.

Uti vero in totum hominem se diffundit corruptio naturalis, sic etiam libertas voluntatis ob inordinatum intellectus regimen valde imminuta & debilitata est.

In Deo omnia perfecta sunt. Hinc etiam ejus voluntati summa tribuitur *libertas* & quidem tam *contradictionis* quam *contrarietatis*.

Libertas contradictionis est, quando homo agere & non agere potest, *libertas contrarietatis* vero, quando hoc vel illud agere, aut bonum

bonum pro malo, melius pro bono & optimum pro meliori eligere potest.

Distinguitur quidem inter *voluntatem Dei naturalem & liberam*. Verum prior versatur tantum circa se ipsum, qui, cum summum Bonum sit, in se quoque solo acquiescit. Dicitur hæc voluntas *necessaria*, quia non potest non ea omnia velle, quæ summæ suæ perfectioni conveniunt, ea vero averfari, quæ eidem repugnant. Nominare illam quoque possumus *voluntatem complacentiæ*, qua e. g. filium suum unigenitum amplectitur, Matth. III, 17.

Voluntas Dei libera proprie voluntas dicenda est. Versatur circa res creatas & quæ extra eum constitutæ sunt. Sicut contingenter istæ existunt & bonitatem tantum finitam habent, ita quoque eas non necessario velle debet. Vult istas potius *libere & quidem absolute*, quia voluntas ejus non causam formaliter aut physice moventem admittit, Ps. CXV, 3.

Nil vult *sine fine*. *Finis* autem est relatio voluntatis ad objectum, propter quod aliquid volumus. Dicitur alias causa virtualiter movens.

Vult etiam Deus nil *sine certo ordine* a se ipso liberrime constituto, ita quidem, ut interdum ex sapienti suo arbitrio, per miracula ab eo discedat.

Cum libertate Dei *summa moralis necessitas* conjuncta est, secundum quam non modo morales Dei proprietates, e. g. veracitas, amor,

sanctitas &c. immutabiles manent, sed etiam Deus ipse non potest non ab æterno omne bonum velle & omne malum nolle.

Libertas itaque *Dei* est ea voluntatis ejus proprietas, qua absolute & independenter, in certo tamen ordine a se ipso constituto, omne id facit aut eligit, quod secundum summam suam sapientiam optimum esse cognoscit.

CAPUT XVIII.

DE

EFFICACIA VOLUNTATIS DIVINÆ.

Et si distinctio inter *voluntatem Dei efficacem* & *inefficacem* pugnare videatur cum omnipotentia divina, non tamen rejicienda est. Deus multa vult sub certa conditione & in certo ordine. Cessante itaque hoc ordine, hacque conditione, cessat etiam efficacia divinæ voluntatis.

Efficax Dei voluntas est, quando Deus aliquid absolute & sine respectu ad causas secundas aut ad ordinem mediorum vult; *inefficax* vero, quando aliquid sub certa conditione, aut secundum causas secundas & certum mediorum ordinem a se ipso constitutum, aut secundum solum suum Beneplacitum vult.

Si Deus secundum suum Beneplacitum aliquid vult, *voluntas simplicis complacentiæ*; si sub
certa

certa conditione aliquid vult, *voluntas conditionata*, & si secundum causas secundas aut certum mediorum ordinem aliquid vult, *voluntas ordinata* appellatur, quæ tamen inter se parum differunt.

Opponitur triplex hæc voluntas *voluntati Dei absolute*, secundum quam non modo mundum creavit, sed etiam omnia miracula facit.

Voluntas Dei conditionata & ordinata *inefficax* nominatur, quatenus non impletur conditio, aut ordo, quo fundatur voluntas. Tali modo vult Deus omnes homines salvare, 1 Tim. II, 4. neminem perdere, Ezech. XXXIII, 11. populum suum omnibus bonis cumulare, Deut. XXVIII, 1. 2. at si conditiones, sub quibus hæc omnia facere vult, non implentur ab hominibus, voluntas Dei hoc respectu *inefficax* est.

Hac ratione vult etiam preces exaudire, in calamitatibus auxilium ferre, opulentiam messem largiri, proventui & opificio nostro benedicere & multa alia facere. Sed cum partim ad causas secundas, partim ad certa media voluntatem suam quasi alligaverit, voluntas non nisi per hæc causas secundas aut præscripta media *efficax* fieri potest. Et hac de causa dicitur voluntas hæc *ordinata*.

Definit autem ordinata esse, si Deus supra dicta omnia posthabitis causis secundis aut præscriptis mediis absolute vult, ut fiant. In *absolute*

solutam tunc *voluntatem* permutatur ordinata, cui non resisti potest.

Voluntati autem *ordinatæ* resistere posse, nemo, qui locum Matth. XXIII, 37 perpendit, negat, nisi Calvinista. Ab hominum quasi libero arbitrio Deum sic dependere putat; quod tamen neutiquam sequitur, quia Deus tantum ordinem, quem ipse libere hominibus præscripsit, servare vult. Liberas enim creaturas non ut truncos & lapides tractat, Deut. XXX, 15 sq.

Locum hic habet distinctio in *voluntatem Dei approbantem, efficientem & permittentem*. Prior voluntas ad bonum per se, altera ad id, quod Deus ipse intendit aut ordinat, & ultima ad malum, quatenus propter bonum, inde expectandum, non impeditur, respectum habet.

Distinguitur etiam in *voluntatem signi & beneplaciti*. Prior est quasi voluntas externa seu manifestatio voluntatis, posterior vero voluntas interna. In sensu orthodoxo distinctio hæc admitti potest, quando e. g. Deus iussit Abrahamum, filium suum immolare; in sensu vero heterodoxo, uti a Calvinianis in doctrina de hominum salute usurpatur, jure meritoque rejicitur.

Distinctio in *voluntatem Dei arcanam & revelatam* etiam huc spectat. Duplex hæc voluntas non secum pugnare debet, alias Deus hypocriseos arguendus foret. *Voluntas arcana* circa varia Dei judicia, quæ inexplorabilia dicuntur, Rom. XI, 33. *voluntas vero revelata* circa negotium

gotium salutis nostræ & circa res, quas Deus nobis cognititas reddere voluit, versatur. Non igitur unum idemque objectum habent.

Distinguere etiam solent Theologi respectu efficacix voluntatis divinæ in *voluntatem antecedentem* & *consequentem*, cujus distinctionis autor DAMASCENUS fuit. Prior est universalis & respicit media, quatenus a Deo offeruntur, posterior vero particularis & respicit media, quatenus ab hominibus aut accipiuntur aut rejiciuntur.

Pertinet hæc distinctio ad doctrinam de divina electione & reprobatione in opere salutis hominum, quapropter missam hic facimus & ad Locum Theologicum, qui de hac distinctione præcipue agit, reservamus.

C A P U T XIX.

D E

D E C R E T I S D E I.

Voluntas latioris notionis est, quam *decretum*.

Voluntas enim tendit ad omnia per se appetibilia, etsi pro ratione circumstantiarum non animum ad ea intendimus, *decretum* vero est certum voluntatis propositum, hoc vel illud faciendi aut omittendi.

Decretum itaque *Dei* est actus divinæ voluntatis, quo aliquid ut certo fiat, secum firmiter & immutabiliter constituit. Dicitur in Scri-

ptura S. *πρόθεσις*, Rom. VIII, 28. 2 Tim. I, 9. *προορίζεν*, Rom. VIII, 29. 30. *πρόγνωσις*, Act. II, 23. Rom VIII, 29. 1 Petr. I, 20. & *σύδοκία*, Matth. XI, 26. Eph. I, 5. 9

Quod Deus in tempore fecit, ab æterno decrevit, & quod decrevit, id eo etiam tempore & ordine, uti decrevit, evenit, Jes. XIV, 27. c. XLVI, 10. 11. Non aliter itaque de decretis divinis, quam ex eventu, judicare licet.

Etsi decreta effectus voluntatis sint, in Dei tamen decretis intellectus ejus per infallibilem prævisionem eventuum concurrit. Et hæc prævisio causa est, cur decretum decretum sequatur. Sic prævisio lapsus in decreto de condendo homine causa fuit decreti de redimendo homine, & prævisio salutis cujuslibet hominis ad decretum de electione & reprobatione hominum ansam dedit.

Proprie omnia *decreta immutabilia* sunt. Quia vero Deus interdum aliquid sub certa conditione decernit, e. g. mortem Hiskiae, Jes. XXXVIII, 1. 5. & destructionem urbis Ninive, Jon. III, 4. 10. dici id potest decretum mutabile, quia Deus impleta conditione decretum suum quasi mutavit. Verum hominibus hoc tantum ita videtur, cum Dei voluntas per se sit immutabilis.

Non autem tollunt decreta divina libertatem hominum, etsi Deus multa permittere decernat, quæ non possunt non fieri. Deus enim, dum aliquid permittere decernit, jam actiones præ-

prævidet, quas decretum permissionis involvit. Hæc prævisio autem non necessitatem actionis, sed tantum necessitatem eventus causatur. Huc referendus est lapsus hominum, nec non proditio Jesu per Judam, quæ expresse inter decreta divina numeratur, Act. II, 23. c. IV, 28.

Præcipua Dei decreta sunt 1) decretum de homine ad suam imaginem condendo, 2) decretum de redimendo genere humano per Filium suum & 3) decretum de eligendis finaliter credentibus & reprobandis finaliter incredulis.

C A P U T XX.

D E

A M O R E D E I.

Amor est inclinatio animi ad id, quod nobis placet. Placet vero omne, quod bonum nobis esse videtur. *Bonum* autem dicimus, quod non modo per se pulchrum & perfectum esse judicamus, sed quod etiam nobis delictum creat, finique nostro conforme est & in rem nostram conducit.

Amor involvit & *benevolentiam* & *beneficentiam*, quatenus nempe inclinatio animi vel in se vel extra se consideratur.

Oppositum amoris vocamus *odium*, quod averfatio animi est ab eo, quod nobis displicet. Displicet vero omne, quod nobis malum esse
vide-

videtur. *Malum* autem est, quod vel per se imperfectum & deforme esse putamus, vel nobis nauseam creat, vel proposito contrarium est, vel damnum infert.

Deo & amor & odium tribuitur, Ps. XLV, 8. Habet enim iste inclinationem ad omne bonum & averſationem ab omni malo. *Bonum* autem ipsi est omne, quod perfectum est & convenientiam cum sua voluntate habet, *malum* vero, quod imperfectum & voluntati suæ contrarium est.

Odium Dei est vel affectus vel effectus. Si est affectus, idem est ac voluntas a malo averſa, si vero est effectus, consistit in punitione mali, quod tamen a Deo sine ulla perturbatione animi fit.

Sicut *amor* apud homines omnium affectuum & virtutum summa est, 1 Cor. XIII, 13. Col. III, 14. Matth. XXII, 36 - 39. ita etiam in Deo amor omnia, quæ de ipsius benevolentia & perfectione animi dici possunt, continet, quapropter in sensu eminentiori Deus ipse nominatur *Amor*, 1 Joh. IV, 8. 6.

Præcipuum amoris divini *objectum* est ipse *Deus*, quia non modo amor a se ipso incipere solet, sed etiam Deus extra se nil nobilius & perfectius novit. Si itaque *creaturas* amat, fit non nisi ex amore sui ipsius, quatenus nempe creaturæ aliquid ad promovendam ejus gloriam conferunt, Prov. VIII, 17.

Amor Dei est vel *inmanens*, vel *transiens*.

Amor

Amor Dei immanens est ipsa Dei voluntas, quatenus benevole propendet in bonum. Involvit 1) desiderium se uniendi, 2) conatum benefaciendi, & 3) voluptatem internam super objecto, in quod inclinatio propendet.

Amor Dei transiens est ipsa beneficentia s. benignitas, qua se erga creaturas suas per varia beneficia in regno naturæ & gratiæ benignum præstat.

Benignitas hæc appellatur *universalis*, quatenus super omnes creaturas, Ps. XXXVI, 6. Ps. CXXXVI, & *communis*, quatenus super omnes homines, Matth. V, 45. 1 Tim. VI, 17. *specialis* vero, quatenus super solos fideles, Ps. XXXII, 10. Nah. I, 7. se extendit.

Amor Dei transiens pro diverso hominum statu diversa quoque accipit nomina. Respectu defectus meriti *gratia*, Exod. XXXIV, 6. Eph. II, 7. Tit. II, 11. respectu hominum miseriæ *misericordia*, 2 Sam. XXIV, 14. Dan. IX, 18. Jer. XXXI, 20. respectu peccatorum tolerantia *patientia*, Rom. XV, 5. 2 Petr. III, 9. respectu dilationis pœnarum *longanimitas*, Exod. XXXIV, 6. Rom. II, 4. & respectu beneficiorum hominibus præstitorum, Φιλανθρωπία, Tit. III, 4. nuncupatur.

Misericordia Dei in gratia erga miseros consistit. Proprie Deus non commovetur per miseriam nostram, quia commiseratio species infirmitatis humanæ est. Cum vero Christus, nostram induerit naturam, is in se quoque quasi

sentit miseriam, qua nos in hac vita afficimur. Uti vero *miseria hominis* duplex est, vel *turpis* respectu peccati, vel *tristis* respectu pœnæ, ita etiam misericordia Dei partim in abolendo reatu dominioque peccati, partim in condonandis & moderandis pœnis occupata est, Exod. XXXIV, 6. 7. Ps. LI, 3. Ps. LXXXVI, 15. Jer. III, 12. Thren. III, 22. Luc. I, 50. 2 Cor. I, 3. Eph. II, 4. 1 Petr. I, 3 &c.

CAPUT XXI.

DE

JUSTITIA DEI.

Justitia a jure derivatur. Jus vero dicimus, quicquid cum lege vel præscripta vel naturali convenit.

Justitia igitur circa omnia, quæ ad implendam legem spectant, versatur, & quia lex non modo promittendo bonum, sed etiam comminando malum ad præstandum obsequium nos instigat, justitia tam in dandis præmiis quam infligendis pœnis occupatur.

Hanc justitiam qui exercet, *judex* vocatur. Officium vero judicis legislatori incumbit & cui id legislator committit. Dicitur autem justitia hæc *forensis*, quia a justitia *civili* distinguenda est, quæ non soli judici, quatenus suum cuique secundum normam præscriptæ legis tribuit, incumbit, sed etiam cuilibet civi ac homini,

mini, quatenus ad normam legis vivit, neminem lædit & jura alterius quovis modo promovet.

Utraque justitia Deo tribuitur. Prior proprie fert nomen *justitiæ*, posterior vero sub nomine *sanctitatis* intelligitur, de qua posthæc singulariter acturi sumus.

Justitia proprie sic dicta Deo adscribitur tanquam summo legislatori. Fluit ex amore sui ipsius, secundum quem vult, ut creaturæ intelligentes gloriam ejus promoveant & ad voluntatem ipsius accurate & diligenter vivant. Leges, quas vel promulgavit, vel cordi inscripsit, sunt norma voluntatis ejus, ad quam si vivimus, præmiis nos cumulat, eam vero si negligimus, nobis pœnas infligit.

Secundum justitiam hanc legislatariam s. judicariam Deus 1) legem s. normam agendi præscribit, 2) per promissiones & comminationes eam obsignat & 3) promissiones & comminationes legi additas partim remunerando, partim vindicando implet & exequitur. Hæ vero executiones in Scriptura S. plerumque *judicia Dei* vocantur, Apoc. XVI, 7. Ps. CXIX, 75. Rom. XI, 33.

Justitia Dei itaque respicit actiones creaturarum intelligibilium, quatenus voluntati divinæ consentaneæ sunt. Est vel *communicativa*, vel *dispositiva* vel *compensativa*.

Justi-

Justitia Dei communicativa idem est ac benignitas favorque Dei & quicquid exinde ad creaturas profluit.

Justitia dispositiva ad Dei providentiam pertinet.

Justitia compensativa est vel remunerativa vel vindicativa.

Justitia remunerativa non meritis nostris, sed sola Dei promissione gratuita fundatur. Proprie hinc non justitia dici potest, quia potius ad Dei bonitatem & veracitatem refertur. Interim cum Deo placuerit, non modo impletionem promissionum, Jes. XLV, 23. Rom. III, 4. 5. 7. sed etiam largitionem vitæ æternæ, Rom. II, 2. 6. 7. & auxilium in ærumnis & calamitatibus, 2 Theff. I, 6. 7. inter exempla justitiæ suæ numerare, non est, cur dubitemus, Deo justitiam tribuere remunerativam.

Justitia vindicativa, quæ alias etiam *punitiva* & *ultrix* nuncupatur, rectius Deo adscribitur, quia actiones hominum magis poenam, quam præmium merentur. Versatur circa poenas infligendas, quæ tum respectu Dei punientis, tum respectu punitorum hominum justissimæ sunt. Finis poenarum est gloria Dei, quia id, quod per peccatum gloriæ divinæ detrahitur, per poenam quasi restituitur.

Respectu justitiæ vindicativæ tribuitur Deo *ira*, Ps. XC, 7. Rom. I, 18. quæ fervor est, peccata puniendi. Involvit ira 1) propositum puniendi, 2) comminationes, quibus propositum

tum puniendi declaratur, & 3) studium, comminationes exequendi. Comparatur hinc in sacris literis ira Dei cum igne comburente, Hebr. XII, 29.

Tribuitur Deo etiam *vindicta*, quæ jus est, transgressionem legis puniendi. In solum Deum, tanquam summum legislatorem, istud competit, Deut. XXXII, 35. Ps. XCIV, 11. Rom. XII, 19. Magistratus politicus executor tantum hujus vindictæ est.

CAPUT XXII.

D E

S A N C T I T A T E D E I.

Sanctitas est excellentia Dei moralis, qua non modo segregatus & alienus est ab omni malo morali, sibi que ipsi deditus, sed etiam omnem perfectionem in se habet, quam in lege sua præscripsit.

Tribuitur Deo, non ut accessorium aliquod, nec ut peculiare attributum, sed ut ipsa ejus essentia, Amos IV, 2. Penetrat enim omnia Dei attributa, ita, ut quodlibet eorum sanctum dici queat.

Distinguitur in Deo a *justitia*, uti in hominibus integritas vitæ a justitia distingui solet, comparaturque in sacris literis cum *luce*, 1 Joh. I, 5. Jac. I, 17. ab igne comburente probe discernenda, qui justitiam Dei repræsentat.

Mani-

Manifestat Deus *sanctitatem* suam 1) in suis decretis, 2) in suo verbo, Rom. VII, 12. Ps. CV, 42. Joh. XVII, 16. 3) in suis operibus, Ps. CXLV, 17. 4) in suis ministris, qui propterea in cœlo *sancti angeli*, Act. X, 22. & in terra *sancti homines* vocantur, 2 Petr. I, 21. 5) in sua Ecclesia, Ps. XCIII, 5. & imprimis 6) in suo Filio, ejusque opere redemptionis & sanctificationis.

Deus κατ' ἐξοχὴν *sanctus* nominatur, Jes. XL, 25. Hof. XI, 9. Apoc. III, 7. eique tale nomen tribuitur, quod præ aliis *sanctum* & venerandum est, Ps. CXI, 9. Ejus quoque habitatio in *sancto* est, Jes. LVII, 15. cujus typus olim *Sanctum sanctorum* in templo fuit. Tanta autem est Dei sanctitas, ut respectu ejus non habeat sui similem, 1 Sam. II, 2.

Hinc non modo tota *Trinitas* sancta vocatur, Jes. VI, 3. Apoc. IV, 8. sed etiam quælibet Trinitatis persona, & quidem *Pater*. Joh. XVII, 11. *Filius*, Luc. I, 35. Hebr. VII, 25. Dan. IX, 34. & *Spiritus* ob perfectionem suam, qua omnes alios spiritus antecedit, nec non, quia opus sanctificationis apud homines obit, in sensu eminentissimo *sanctus* vocatur.

Dei sanctitas nostræ sanctitatis fons est, Rom. I, 4. 2 Thess. V, 23. & exemplar, 1 Petr. I, 15. Lev. XIX, 2. impellitque nos ad sanctificandum Deum, utpote qui nobis semper sanctus esse debet, Jes. VIII, 13. 1 Petr. III, 15. Fit hoc, dum sanctitatem ejus 1) cognoscimus, 2) laudamus & 3) imitamur.

CAPUT XXIII

DE

VERACITATE DEI.

Veracitas est habitus veritatem dicendi.

Triples datur veritas, 1) metaphysica, quæ est convenientia rei cum idea nostra, 2) logica, quæ est convenientia mentis cum re & 3) ethica, quæ est convenientia verborum cum mente. Ultima est hujus loci.

Adscribitur veracitas Deo, quatenus constans est in dicendo vero & servandis promissis. Vocatur alias *veritas in dicendo* & distinguitur a veritate, in essendo & cognoscendo, quarum utraque etiam in Deum competit. Prior ad ejus existentiam & posterior ad ejus omniscientiam spectat.

Veracitas Dei fluit ex ejus justitia & sanctitate, pertinetque ad ejus immutabilitatem.

Tribuitur Deo 1) *positive*, dum dicitur verus, verax & fidelis, Deut. XXXII, 4. Rom. III, 3. 4. Ps. XXXIII, 4. 2) *negative*, dum removetur ab eo a) omne falsiloquium & mendacium, Hebr. VI, 18. 1 Sam. XV, 26. Tit. I, 2. b) omnis fraus & dolus & c) omnis hypocrisis & simulatio. Datur quidem apparens simulatio Dei, quæ autem proprie nil aliud est, quam occultatio.

Deus multoties in verbo suo veritatem jurejurando testatur, e. g. Ezech. XXXIII, 11. Ps. LXXXIX, 36. id vero non ad removendam men-

mendacii suspicionem facit, sed potius ut homines eo magis ad fidem ei habendam commoveat.

Testatur Deus veracitatem suam 1) in narratione historiarum, 2) in prædictione futurorum, Jes. XXXIV, 16. 3) in explicatione dogmatis, Ps. XIX, 8. 4) in promissione præmiorum & 5) in comminatione poenarum.

Quatenus Deus promissa servat, *fidelis*, quatenus vero comminationes implet, *severus* nominatur.

Fidelitas Dei ex 2 Cor. I, 18. 20. & 1 Cor. X, 13. *severitas* vero ex Deut. IV, 24. & c. V, 9. probatur.

C A P U T XXIV.

D E

OMNIPOTENTIA DEI.

Potentia est facultas, aliquid propria virtute existens reddendi.

Differt a *potestate*. *Potentia* enim versatur tantum circa vires, *potestas* vero simul includit jus ac dominium. In Deo semper potentia cum potestate conjuncta est.

Proprie nec potentia nec potestate gaudet ulla creatura, quia non modo destituta est viribus propriis, aliquid existens reddendi, sed in eam etiam nullum proprium jus ac dominium super aliquid competit.

Tribuitur quidem *hominibus* in sacris literis tam potentia aliqua, quam potestas, sed utraque

que est dependens, imperfecta, a Deo concessa, ideoque valde limitata.

Solus itaque *Deus* is est, cui proprie & potentia & potestas tribuenda est. Jure ideo *potentissimus* dici meretur, quia non modo omnem potestatem in cœlis & terris habet, Matth. XXVIII, 18. sed etiam facere potest, quæ supra omnem intellectum finitum sunt, Eph. III, 20. Multi hinc nomen אֱלֹהִים, Gen. XVII, 1. a radice Arabica شَرٌّ, *potentem esse* derivant, quasi se ipsum nominaverit *Dominum potentissimum*. Idem significat vox παντοκράτωρ, quam Paulus de Deo usurpat, 2 Cor. VI, 18.

Duo itaque in *Deo* hic considerata sunt, 1) *potentia* ejus & 2) *potestas* ejus.

Potentia Dei jure meritoque *omnipotentia* vocatur, quia non habet terminum in amplitudine suorum effectuum. Est extensive infinita & describitur per facultatem, omne, quod vult, propria virtute existens reddendi. Probatur ex Matth. XIX, 26. & Luc. I, 37. ubi omnia apud Deum possibilia, nil vero impossibile esse, docetur. Exercet autem potentiam suam non nisi secundum sapientiam suam, quapropter non semper id, quod possibile est, existens reddit. Exercet etiam illam tanta facilitate, ut uno momento per voluntatem suam omnia efficiat, Gen. I, 3. Ps. XXXIII, 9. Jes. XLVIII, 13. Apoc. IV, 11.

Objectum potentia divina omnia sunt, quæ 1) non apertam contradictionem in se habent, e.g.

triangulum duos habens angulos; 2) summis suis perfectionibus non repugnant, e. g. peccatum, aut mendacium, Hebr. VI, 18. & 3) cum voluntate sua non conveniunt, aut cum divino decreto pugnant, e. g. ablatio calicis a Christo, Matth. XXVI, 39. Interim non dici debet, tale quid Deum non facere posse, sed potius, tale quid non fieri posse.

Etsi una tantum & simplicissima sit *potentia Dei*, distingui tamen solet in *absolutam* & *ordinatam*.

Potentia Dei absoluta fit per indeterminatam ejus voluntatem & quidem in solo regno naturæ, *potentia vero ordinata* per causas secundas & secundum ordinem a se constitutum, & quidem tam in regno naturæ, quam in regno gratiæ. Quod Deus per potentiam absolutam facit, vulgo *miraculum* appellatur.

Est potentia hæc Deo essentialis, quapropter ipsi & *brachium* & *dextra* adscribitur, Psalm. LXXXIX, 14. Jer. XXXII, 17.

Potest non modo facere, quicquid vult, Ps. CXXXV, 6. sed etiam quod non vult, Matth. XXVI, 53. & ubi nihil est, Rom. IV, 17. & quidem sine ulla defatigatione, Jes. XL, 28.

Potestas s. ΕΞΟΥΣΙΑ *Dei*, est jus ac dominium ejus universale & independens in omnes creaturas, quo secundum voluntatem suam absolutam iis dominatur, summaque auctoritate cum

cum illis agit, nec non inter eas quicquid ei libet, 1 Chron. XXX, 11. 12. Ps. L, 10-12. Dan. IV; 31. 32. c. V, 19. Hag. II, 9. constituit & ordinat. In primis extendit se potestas hæc super homines, Rom. XIV, 7. 8. in genere autem super cœlum & terram, Ps. CXXXV, 6.

Vocatur Deus propterea *rex*, Ps. X, 16. Jes. II, 7. *magnus rex in toto terrarum orbe*, Psalm. XLVII, 3. Ps. XCVI, 10. *rex gentium*, Ps. XLVII, 9. Jer. X, 7. *rex æternus*, 1 Tim. I, 17. & *rex regum*, 1 Tim. VI, 15. Apoc. XIX, 16.

Adscribitur ipsi etiam propterea *regnum*, 1 Chron. XXX, 11. Ps. CIII, 19. quod specialiter *regnum potentie* nominatur.

Versatur Dei potestas 1) circa omnes res & creaturas, dum istas servat, iisque utitur, quomodo & quamdiu vult, 2) circa omnes hominum status, dum regna dat, cui vult, & mutat tempora & fortunam, Dan. II, 21. c. IV, 32. c. V, 18-21. & 3) circa singulos homines, dum non modo eorum motus & inclinationes actu physico eo flectit, quomodo vult, Prov. XXXI, 1. Lev. XXVI, 36. Ps. XXXIII, 15. sed etiam actu morali eorum voluntatem per præscriptas leges dirigit.





SECTIO II.

DE

DEO UNITRINO

IN SPECIE.

CAPUT I.

DE

MYSTERIO TRINITATIS

IN GENERE.

Doctrina de sacro-sancta Trinitate non a patribus Concilii Nicæni excogitata, nec ex Platonis Philosophia desumta, sed divinitus revelata & in Scriptura S. satis fundata & stabilita est, etsi usurpati termini maxima ex parte ecclesiastici & ἀγαστοι sint.

Versatur doctrina hæc circa maximum fidei mysterium, dum *Trinitas in unitate* omnem rationis captum transcendit. Nemini itaque naturaliter istud cognitum est, Matth. XI, 27. nec per imagines aut picturas sine offensione nominis divini adumbrari potest, Exod. XX, 4.

Est autem doctrina de hoc mysterio ad salutem creditu quam maxime necessaria, quia 1) is, qui Deum non ut Patrem, Filium & Spiritum

tum S. in unitate trinum adorat, non verum Deum adorat, Joh. V, 25. 1 Joh. II, 23. 1 Cor. XII, 3. & 2) quia sine cognitione Trinitatis nec opus redemptionis, quo salus nostra nititur, cognosci potest.

Dantur autem multi SS. Trinitatis hostes, qui communi nomine *Anti-Trinitarii* vocantur. Præcipui nostro tempore sunt *Sociniani*, qui a Lælio & Fausto Socino, duobus cognatis & patriciis Senensibus, Seculo XVI viventibus, nomen & originem acceperunt.

In veteri Ecclesia inprimis *Samosateni*, *Photiniani* & *Sabelliani* mysterium Trinitatis impugnauerunt, qui autem Ecclesiæ non tam magna inflixerunt vulnera, quam *Ariani*, quorum pestiferam doctrinam ante aliquot annos in Anglia *Guilielmus Whiston* ex orco quasi revocavit.

Mubamedani & *Judei* etiam inter hodiernos Anti-Trinitarios numerari possunt. Sed quia Jesu Christi doctrinam & nomen prorsus respuunt, inter ethnicos magis quam hæreticos referri merentur.

Ex veterum Rabbiorum Scriptis satis patet, doctrinam de Trinitate *Judeis in V. T.* non incognitam fuisse. Interim non negandum est, quod eadem multo clarius ex sacris literis N. T. quam ex scriptis V. T. demonstrari queat, fidelesque V. T. non tam luculentam de isto mysterio cognitionem habuerint, quam fideles N. T. habere possunt. Neutiquam tamen asseri debet, eos mysterium hocce prorsus ignorasse,

quia satis perspicua de illo in scriptis Prophetarum occurrunt testimonia.

Certi *Pontificii* Mariam virginem, & certi *Fanatici* suam Sophiam in divinam quasi recipiunt Trinitatem, sed magis propterea ridentur, quam refutantur.

CAPUT II.

DE

PERSONIS DEITATIS IN GENERE.

Dari aliquot & quidem *tres* in Deitate *personas*, ex Scriptura S. tam V. quam N. Testamenti satis superque probari potest, etsi ipsum nomen *personæ* in ea non usurpetur. Est enim vox ecclesiastica, quam primum *Tertullianus* in doctrina de Trinitate adhibuit. Græce per *ὑπόστασις*, Hebr. I, 3. exprimitur, quatenus scilicet vox hæc a voce *σῖν* distinguitur.

Voces & termini, quos ad vindicandum verum Scripturæ S. sensum in hac gravi doctrina doctores Ecclesiæ usurpant, non respuendi sunt, dummodo recte explicantur & intelliguntur. Per eos enim succincte exprimitur, quod alias fusius exprimendum foret. Non autem in concione publica adhibendi sunt, sed tantum in scholis Theologorum & quando in arenam cum hæreticis descendimus. Interim non quidem vocum, sed rerum diversitas hæresis est, etsi non raro monstri aliquid in ipsa doctrina isalat, qui temere nova verba fingit.

Per-

Persona est substantia, quæ non modo intelligens, sed etiam incommunicabilis est. Aliter istam dictam putat quasi *per se unam*, Hebræi vero per פני, & נפש exprimunt.

Substantia est ens, facultate agendi præditum. Vetustiores Metaphysici nominabant substantiam ens, quod non existit in alio, tanquam in suo subjecto.

Substantia, quæ de pluribus dicitur, *communis*, quæ vero non de pluribus dicitur, *incommunicabilis* appellatur. In priori sensu homo, mensa, ovis &c. in posteriori vero David, arca Noë, asinus Bileam &c. substantia dici potest.

Deus in utroque sensu, diverso tamen respectu substantia vocatur. Respectu essentiae suæ substantia *incommunicabilis*, respectu autem personalitatis substantia *communicabilis* est.

Substantia incommunicabilis alias vocatur *suppositum*.

Suppositum est quicquid substantialiter, individualiter, complete & incommunicabiliter existit.

Etsi *Deus* ob suam incommunicabilitatem suppositum dici nequeat, quælibet tamen Deitatis persona suppositum est.

Persona enim est suppositum intelligens.

Sumitur autem vox *personæ* modo *abstractivæ* s. formaliter, modo *concretivæ* s. materialiter.

Si *abstractivæ* sumitur, significat υπαρχιν h. e. *subsistentiam* s. personalitatem, in qua significatione usurpatur in doctrina de Trinitate, ubi

Trinitas tres subsistentias incommunicabiles individuae Dei naturae denotat, quae per se ita indivisibilis est, ut in qualibet persona, concrete spectata, tam essentia divina, omnibus communis, quam ὑπαρξις s. subsistentia singulis propria adsit. Attamen cum abstractum semper lateat in concreto, tanquam suo subiecto, parum interest, num vocem personae in mysterio Trinitatis abstracte, an concrete accipiamus.

Pluralitatem & specialiter Trinitatem personarum ex sacris N. Testamenti literis probare supervacaneum est, cum ex omnibus paginis id satis pateat. Praecipua tamen loca, quae mysterium hoc expresse indicant, sunt: 1 Joh. V, 7. Matth. III, 16. 17. c. XXVIII, 19. Joh. XIV, 16. 2 Cor. XIII, 13.

Ex scriptis vero V. Testamenti difficilius iis videtur veritas hujus sanctissimi mysterii demonstrari posse, quorum intellectus jam multis erroribus & praedjudiciis circa dogma istud obumbratus est; ac qui ex sancto veritatis studio sacrum codicem evolvit, sat multa tam de pluralitate quam trinitate diversarum Deitatis personarum testimonia inveniet, quae luculenter eum docere possunt, mysterium hoc neutiquam fidelibus V. T. incognitum fuisse.

Probatur autem *pluralitas divinarum personarum* in V. Testamento, 1) ex nomine אלהים, quod non tantum terminatione, sed etiam signifi-

ficatione pluralis numeri est, e. g. Deut. VI, 4. Gen. XXXV, 7. 1 Sam. XVII, 26. 2 Sam. VII, 23. 2) ex locis, ubi Deus de se ipso in plurali loquitur, e. g. Gen. I, 26. c. III, 22. c. XI, 7. Jes. VI, 8. quod ab ipso non ad maiestatem suam declarandam fit, alias id in promulgatione legis fecisset, Exod. XX. 3) ex locis, ubi Deus a Deo distinguitur, e. g. Gen. XIX, 24. Exod. III, 4. c. XI, 3. c. XXIV, 1. c. XXXIII, 19. c. XXXIV, 5. 6. Jer. XXIII, 33. Dan. IX, 17. Hof. I, 7. Zach. III, 2. Ps. CX, 1. Hiob. XXXIII, 4. Ps. XLV, 8.

Trinitas personarum probatur ex Jes. IV, 2. 4. c. XXXIII, 22. c. XLII, 1. Hagg. II, 5-8. Psalm. XXXIII, 6. Zach. XII, 10. Habet etiam trina benedictio Num. VI, 24 - 26. Ps. LXVII, 7. 8. ad tres personas respectum, quæ alias etiam singulariter tribui solet & Patri Eph. I, 3. & Filio, Act. III, 26. & Spiritui S. Gal. III, 14. Huc spectant quoque loca, ubi Deus ter sanctus dicitur, e. g. Jes. VI, 3. Apoc. IV, 8.

Ex *Libris Apocryphis* inprimis sequentia loca Trinitatem nobis innuunt, Sap. VII, 26. coll. Hebr. I, 3. & Col. I, 15. it. Sap. IX, 1. coll. Ps. XXXIII, 6. & Joh. I, 1. 2. it. Cap. XVI, 12. coll. Exod. XV, 26. it. Sap. I, 7. & cap. VII, 7. 22. 28. ubi in specie Spiritus Dei mentio fit.

TRIUM DEITATIS PERSONA-
RUM REALI DIFFERENTIA ET
ESSENTIÆ UNITATE.

Duo circa dogma de Trinitate considerata sunt 1) quod tres Deitatis personæ realiter inter se differant & 2) quod eadem personæ unam tantum essentiam constituent.

Tres Deitatis personæ omnino inter se realiter ita differunt, ut alia persona sit Pater, alia Filius & alia Spiritus S. Non autem sunt distincta tantum nomina aut testimonia, nec diversæ emanationes aut relationes, nec meræ virtutes Deitatis, sed vera supposita s. distinctæ personæ.

Male igitur agunt, qui earum *differentiam* ita depingunt, ut quasi *Pater* sit ignis, *Filius* lux & *Spiritus S.* utriusque viva virtus, aut qui *Patrem* vocant Dei voluntatem, *Filium* Dei voluptatem & *Spiritum S.* egressum ex Dei voluntate & voluptate.

Probatur autem *realis* divinarum personarum *differentia* 1) *ex nominibus personalibus*, quibus in scriptura S. a se invicem distinguuntur. Pater enim non simul esse potest Filius, nec Filius simul esse potest Pater.

Probatur 2) *ex characteribus personalibus*. Est enim in qualibet persona aliquid, quod non in altera

altera est. Paternitas nec est in Filio nec in Spiritu S. Filiatio est nec in Patre nec in Spiritu S. & Spiratio passiva nec in Patre nec in Filio. Probatur 3) *ex reali personarum disjunctione*, qua Pater a Filio vocatur ἄλλος f. alius, Joh. V, 32. 37. & Spiritus S. ἄλλος παράκλητος, Joh. XVI, 16. 17. Patres primitivæ ecclesiæ hinc ansam sumserunt dicendi, quod in Trinitate detur ἄλλος καὶ ἄλλος ὑπεστατικῶς, non vero ἄλλο καὶ ἄλλο οὐσιωδῶς. Probatur 4) *ex operibus externis*, quorum quælibet persona sibi aliquid in sua divina œconomia quasi appropriat, & se per istud manifestat. Sic Pater opus creationis & universæ gubernationis, Filius opus redemptionis & Spiritus S. opus sanctificationis sibi appropriat, seque per istud a cæteris personis certo modo distinguit.

Hæc personarum differentia cognoscitur etiam ex cultu religioso, quia quælibet Deitatis persona seorsim adorari & religiose coli solet & potest.

Interim differentia personarum realis non tollit unitatem essentiae. Omnes enim tres personæ unam eandemque essentiam divinam habent, licet sub diversis relationibus & respectibus.

Sunt in qualibet divina persona duo attendenda: 1) essentia divina omnibus tribus personis communis, & 2) relatio, cuilibet personæ propria. Scholastici propterea dixerunt, perfo-

personam divinam compositam esse ex essentia & relationibus.

Illustratur *Trinitas in unitate* simili, a sole desumpto. Sol per se est unum quid. Datur vero in eo ignis, fulgor & calor. Sic unum certo modo etiam est trinum.

Est autem *unitas essentiae in tribus personis* ita comparata, ut nec ex iis composita, nec inter istas divisa sit. Facit illa personas inter se ita coequales & coessentialiales, ut non nisi ratione ordinis in subsistendo & operando una alteri praeponatur.

Neutiquam igitur apud personas divinas aliqua subordinatio locum habet, quasi persona personam perfectione & dignitate superet, ut certi Angli & Arminiani docent, qui propterea mollis Arianismi arguuntur.

Trinitas olim ex tribus personis tres fecerunt Deos.

Veteres Graeci usurpant de divina essentia vocem *οὐσία*, quam distinguunt a voce *ὕπόστασις*, quae iis idem est ac persona. Exprimunt igitur unitatem essentiae tribus personis communem per *ὁμοουσίαν*, qua testantur, unamquamque personam unius ejusdemque essentiae cum altera esse, non quidem specie, sed numero. Cum enim essentia divina non ad modum speciei in pluribus individuis multiplicabilis sit, nulla etiam persona divina alteri *ὁμοούσιος* esse potest specie.

Præci-

Præcipuus scripturæ S. locus, qui Trinitatem in unitate probat, est 1 Joh. V, 7. ubi de tribus Deitatis personis hæc verba occurrunt: καὶ οὗτοι οἱ τρεῖς ἐν εἰσί, h. e. *Et hi tres unum sunt.* Anti-Trinitarii locum hunc valde suspectum reddunt perhibendo, eum non esse avthenticum, sed ex pia fraude a certis ecclesiæ patribus intercalatum. At a multis Theologis & Philologis fatis superque locus hic vindicatus est. Aliqui non de unitate essentiae, sed de unitate consensus illum interpretantur. Faciunt id autem cum aperta textus violatione, uti ex verbis sequentibus patet.

Quicquid ad essentiam Dei pertinet, in tribus personis commune est. Ita e. g. datur in Deo tantum unus intellectus, 1 Cor. II, 11.

Ad pleniorē hujus mysterii expositionem, nunc de singulis personis seorsim agemus & qua ratione a se invicem differant, ostendemus.

CAPUT IV.

D E
PATRE, PRIMA DEITATIS PERSONA.

Pater fons quasi est & principium totius Deitatis, quia absolute & independentē a se ipso est, essentiamque suam cum cæteris Deitatis personis communicat.

Voca-

Vocatur *Pater* propter Filium s. alteram Deitatis personam, quam ex essentia sua ab æterno genuit, Ps. II, 7. Hebr. I, 5.

Totus Deus triunus alias in scriptura S. *Pater* nuncupatur, sed fit respectu creaturarum & imprimis hominum, quibus non modo vitam dedit, sed etiam omnem pro iis curam paternam fovet, eosque alit & vestit, Matth. VI, 25. 26. 31. 32. Nemo hinc majori jure nomen *patris* meretur, quam Deus, Matth. XXIII, 9. Uti vero omnem Deo debemus honorem, timorem & amorem filialem, ita etiam nomen Patris sibi imponere voluit Deus, ut nos officii nostri per istud nomen semper admoneat, Mal. I, 6.

Nemo autem Deum, ut Patrem, magis timuit & dilexit, quam Christus. In omnibus operibus suis honorem ejus promovit. Exemplo nobis non modo esse voluit, sed nos quoque docere, se verum Dei filium esse.

Vocatur vero *Pater cælestis*, ut distinguatur a patribus terrestribus, Eph. III, 15. Matth. V, 48. nec non a falsis ethnicorum Diis, qui non de cælo, sed de terra sunt, Jer. X, 3 - 10. Ps. CXV, 3 - 8.

Et idem hic *Pater cælestis* non modo Christi, quatenus secunda Deitatis persona est, *Pater* dicendus est, sed est quoque ille, ἐξ οὗ πᾶσα πατρία ἐν οὐρανῷ καὶ ἐπὶ γῆς ὀνομάζεται, h. e. a quo omnis paternitas in cælo & terra originem habet, tam respectu Filii sui æterni, quam respectu

respectu omnium fidelium, imo omnium hominum, Eph. III, 15. c. IV, 6.

Patris divinitatem probare supervacaneum est, quia omnes, qui existentiam Dei non negant, eandem quoque ei concedunt, putantes, patris nomen ipsi tribui, quia omnium rerum autor & moderator sit, omniaque ab eo dependeant.

Nos, qui evangelicam veritatem profiteamur, non modo Deum in genere, ut Patrem, colimus, sed etiam quatenus Filius Dei ex essentia ejus, tanquam secunda Deitatis persona, genitus est. Et hac ratione distinguimus, Patrem a Filio & Spiritu S. tanquam primam personam, cui divinitas æque ac toti divinæ essentiæ tribuenda est. SuffICIENTER id ex nominibus, attributis & operibus ejus, Joh. III, 16. c. XVII, 3. Matth. XI, 25. 26. patet.

Christus soli quidem Patri Deitatem adscribit, Joh. XVII, 3. sed non excluso se ipso & Spiritu S. Voluit quasi c. l. ita loqui: *Hæc est ad vitam æternam perveniendi via, ut cognoscamus Patrem, qui tantum verus Deus (non vero simul homo) est, & Jesum Christum, quem misit Pater, & qui non tantum Deus, sed etiam homo est.* Potest etiam loci hujus difficultas facile tolli, si per Patrem h. l. non primam Deitatis personam, sed totum Deum, cujus respectu Christus ab eo missus dicitur, intelligimus.

Nominatur autem Pater *prima Deitatis persona* respectu tantum ordinis in subsistendo & operando,

rando, neutiquam vero respectu perfectionis, virtutis agendi ad extra, temporis & dignitatis, quia omnes tres personæ in hisce sibi æquales sunt.

CAPUT V.

DE

DE FILIO, SECUNDA DEITATIS PERSONA.

Secunda Deitatis persona *Filius* nuncupatur, quia ex essentia primæ personæ, quæ ob hanc causam Pater dicitur, genitus est, Ps. II, 7. Hebr. I, 5. Vocatur propterea Filius Dei *unigenitus*, Joh. I, 14. 18. c. III, 16. *proprius*, Rom. VIII, 32. *primogenitus*, Col. I, 15. 18. & *dilectus*. Matth. III, 17. Joh. V, 20. Col. I, 13.

In V. T. nomen *Filii Dei*, in locis Ps. II, 7. 12. Jes. IX, 6. Prov. XXX, 4. 1 Sam. VII, 14. coll. Hebr. I, 5. in N. T. vero plus centies occurrit. Non modo Pater & Filius ipse, sed etiam angeli, homines & diaboli Christum sic nominant.

Vocantur quidem inter creaturas etiam *angeli*, Hiob. XXXVIII, 7. *magistratus*, Ps. LXXXII, 6. & *fideles*, Joh. I, 12. filii Dei, sed non sunt proprietales. Prærogativæ *proprii Dei Filii* ex 1 Joh. III, 8. Hebr. I, 3 sq. c. III, 3 sq. Luc. X, 22. Joh. I, 18. c. X, 30. & Apoc. II, 18. satis patent.

Cætera

Cætera Filii Dei nomina sunt *verbum Dei*, Ps. XXXIII, 6. Ps. CVII, 20. Joh. I, 1. *sol justitiæ*, Mal. IV, 2. *sapientia*, Prov. VIII, 1. 1 Cor. I, 24. *imago Dei*, Col. I, 15. Hebr. I, 3. *virtus Dei*, 1 Cor. I, 24. Luc. I, 35. *splendor gloriæ divinæ*, Hebr. I, 3. *principium & finis* s. *α & ω*, *primus & ultimus*, Apoc. I, 8. 11. c. XXI, 6. c. XXII, 13. item *angelus fæderis*, Mal. III, 1. & inprimis *Messias* s. *Christus*, 2 Sam. XXIII, 1. Dan. IX, 25. 26. Joh. I, 41. 45. 49. c. IV, 25.

In V. T. sæpius Filius Dei se in forma angelus manifestavit, Exod. III, 2. c. XIV, 19. c. XXIII, 20 sq. Act. VII, 38. sed id semper ita factum est, ut quilibet eum ab angelo creato distinguere potuerit.

Vocatur *secunda Deitatis persona*, 1) quia omnis filius proximus a patre est, & 2) quia immediate a Patre suam subsistentiam habet. Quod vero ordo hic non inæqualitatem dignitatis involvat, testatur Paulus, dum Filium interdum Patri e. g. 2 Cor. XIII, 13. præponit.

Filium Dei itaque personam a Patre distinctam esse, nemo, qui sacrarum literarum fidem non penitus respuit, negat, sed quod simul verus Deus & certa Deitatis persona sit, multi in dubium vocant. Communi nomine hostes Deitatis Christi *Anti-Trinitarii* appellantur, quia simul totum SS. Trinitatis mysterium pessimis suis dogmatibus impugnant. Operæ igitur pretium erit, istos non modo cognitos reddere, sed etiam Deitatem Christi s. Filii Dei contra

eosdem probare. Prius in hoc capite, posterius vero in sequenti facturi sumus.

Hostes Deitatis Christi s. Filii Dei in *tres classes* distinguui possunt. Vel *Arii*, vel *Photini*, vel *Socini* castra sequuntur. De omnibus aliqua dicemus.

Ariani ab *Ario*, presbytero Alexandrino, qui seculo IV vixit, originem habent. Docbat iste, Christum ante conditum mundum a Deo ex nihilo creatum, adoptatum, omnibusque angelis & creaturis præpositum esse, nec non instrumentum divinæ creationis fuisse.

Asseclæ hujus *Arii* dividuntur in crassos, mitiores & subtiles. Priores Filium Patri per omnia dissimilem vocaverunt, quorum duces *Aëtius* & *Eunomius* fuerunt. Alteri Filium quidem Patri similem dixerunt, at non respectu essentiae, sed tantum respectu voluntatis ejus id esse perhibuerunt. Horum caput fuit *Acacius*, Cæsareensis Episcopus. Ultimi, qui etiam *Semi-Ariani* audiunt, Filium Patri ὁμοιούσιον, h. e. essentiae similem, non vero ὁμοούσιον, h. e. ejusdem cum Patre essentiae esse, asseruerunt. Quanquam Arianismus dudum in ecclesia exspiravit, in Anglia tamen nostris temporibus hæresis hæc a *Wilhelmi*

helmi Whistonis & Samuelis Clarkii asseclis adhuc & propugnatur & propagatur.

Phetiniani a *Photino*, Episcopo Sirmiensi in Pannonia, nomen & originem acceperunt. Floruit hic hæresiarcha itidem seculo IV, & docebat, Christum nudum hominem fuisse, eumque omnem suam essentiam in Maria accepisse. Distinguebat λόγον a Christo & asseribat, λόγον ab æterno in Patre quidem fuisse, sed non ab ipso distinguendum esse. Nomen horum hæreticorum nunc prorsus in ecclesia evanuit.

Sociniani a duobus *Socinis*, *Lælio* & *Fausto*, utroque Senensi, qui seculo XVI vixerunt, originem traxerunt. Dogmata eorum continentur in Catechesi Racoviensi, ex qua patet, Christum iis tantum esse nudum hominem, divinis virtutibus ex Dei gratia præditum & ad summam dignitatem evectum. Infauusta hæc secta proh dolor! nostris adhuc temporibus viget. Non solum hic illic in tenebris grassatur, sed etiam in Polonia & Transylvania publice toleratur. Nunc nomen *unitariorum* ferre malunt.

DEITATE FILII DEI IN
SPECIE.

Christum & Filium Dei unam esse personam, nemo facile negat, qui Christi nomen profitetur. Dicitur *Christus* s. *Messias* respectu officii mediatorii sui, *Filius Dei* vero respectu generationis a Patre, propter quam secunda Deitatis persona est.

Hunc Filium Dei autem *verum Deum* esse, probatur 1) ex *nominibus divinis*, quæ ei in Scriptura S. tribuuntur. Hæc sunt inprimis *Deus* & *Jehovah*. Illud est nomen divinæ naturæ, hoc vero divinæ essentiae. Prius occurrit Joh. I, 1. Act. XX, 28. 1 Joh. V, 20. Tit. II, 13. Rom. IX, 5. Hebr. I, 9. 1 Tim. III, 16. Joh. XX, 28. Ps. LXVIII, 18. 19. posterius autem Jer. XXIII, 5. 6. ubi aperte de Christo agitur. Cætera V. T. loca, quæ hic allegari solent, ita comparata sunt, ut, qui non jam de Christo in iis sermonem esse credit, non invenerit fundamentum probationis. In N. T. plus quam centies Christus dicitur *κύριος*, quæ vox cum nomine Jehova convenit. Cætera divina nomina, quæ ei tribuuntur, sunt *dominator*, Mich. V, 2. *rex regum*

regum & dominus dominantium, Apoc. XVII, 14. *pater æternus*, Jes. IX, 6. *princeps vitæ*, Act. III, 15. *dux salutis*, Hebr. II, 10. *rex gloriæ*, Ps. XXIV, 7 sq. coll. Zach. IX, 9. & Matth. XXI, 5. *princeps pacis*, Jes. IX, 6. *lux mundi*, Joh. I, 9. coll. 1 Joh. I, 5. & *dominus gloriæ*, 1 Cor. II, 8.

Probatur Deitas Christi s. Filii Dei 2) *ex generatione ejus a Patre*, quæ actus Dei ad intra est & in Patris æterna communicatione divinæ suæ essentiæ cum Filio consistit. Vocatur propterea proprius Dei Filius, ut supra ostendimus. Hæc generatio autem non tollit divinam independentiam soli Deo propriam. Filius Dei æque ac Pater de se dicere potest, se a seipso esse, Joh. V, 26. Habet quidem Filius Dei hanc independentiam & aseitatem non absolute, at vere tamen per æternam generationem. Jure meritoque igitur Christo tota tribuitur divina natura, ut ex Joh. I, 1. 4. c. X, 30. 38. c. XIV, 10. II. c. XVI, 15. c. XVII, 10. 21. & in primis ex Col. II, 9. patet, ubi expresse legimus, quod in eo *πᾶν τὸ πλήρωμα τῆς θεότητος σωματικῶς*, h. e. tota Deitas vere & realiter in persona ejus habitet. Conf. 2 Cor. V, 19.

Probatur Deitas Christi s. Filii Dei 3) *ex divinis attributis*, quæ ei adscribuntur. Hæc sunt

sunt a) *æternitas*, Joh. I, 1. Apoc. I, 8. II. 17. 18. Jes. IX, 6. 7. Prov. VIII, 22. Mich. V, 1. Joh. XVII, 5. Hebr. XIII, 8. b) *omnipotentia*, Joh. X, 28. Apoc. I, 8. Phil. III, 21. Eph. I, 22. Matth. XXVIII, 18. c) *omniscientia*, Joh. XXI, 17. Matth. IX, 4. Joh. II, 24. 25. c. IV, 29. c. XVI, 30. I Cor. IV, 5. Col. II, 3. d) *immutabilitas*, Hebr. I, 11. e) *voluntas liberrima*, Joh. V, 21. f) *omnipræsentia*, Matth. XXVIII, 20. Joh. III, 13. g) *summa iustitia*, Hebr. I, 8. 9. Jes. IX, 7. Act. XVII, 31. h) *summa sufficientia*, Joh. XVI, 15. & i) *gloria divina*, Joh. XVII, 5. Hebr. I, 3.

Probatur Christi divinitas 4) *ex operibus ejus vere divinis*, quorum præcipua sunt a) *creatio hujus universi*, Joh. I, 3. Col. I, 16. Hebr. I, 2. 10. Eph. III, 9. ubi observandum est, quod particula *dei* hic non causam instrumentalem, sed causam efficientem principalem indicet; uti de ipso Patre usurpatur, Rom. XI, 36. Hebr. II, 10. b) *conservatio hujus universi*, Coloss. I, 17. Hebr. I, 3. omnia enim portare, est regale divinum, I Chron. XXX, 11. 2 Chron. VI, 18. c) *resuscitatio mortuorum*, & quidem per liberam voluntatem & per modum causæ principalis, Joh. V, 21. 28. Exempla sunt juvenis Nainiticus Luc. VII, 14. 15. filia Jairi, Marc. V, 41. Luc. VIII, 53.

54. & Lazarus, Joh. XI, 43. Memoratu dignum est, quod Jesus semper sibi ipsi potestatem resuscitandi tribuat per verba: *ego dico tibi*. Vocat se propterea *ἀνάστασις* s. resurrectionem, Joh. XI, 25. quia autor est omnis resurrectionis, atque adeo etiam sui ipsius, Joh. II, 19. c. X, 18. d) *destructio regni diabolici*, Gen. III, 15. Luc. XI, 20. Col. II, 15. e) *redemptio generis humani*, Rom. III, 24. 1 Tim. II, 5. 6. Hebr. IX, 12. Ps. XLIX, 8. 9. f) *glorificatio corporum*, Phil. III, 21. g) *regeneratio & conversio hominum*, Act. III, 26. h) *illuminatio*, Joh. I, 9. c. XII, 46. Jes. XLII, 6. 7. i) *accensio fidei*, Hebr. XII, 2. k) *remissio peccatorum*, Matth. IX, 6. l) *sanctificatio*, Hebr. II, 11. m) *largitio vite æternæ*, Joh. X, 28. & quæ sunt cætera. Huc etiam spectant ejus *miracula*, Joh. III, 2. c. V, 20. c. X, 38. c. XX, 30. 31.

Probatur denique 5) divinitas Christi *ex cultu religioso*, qui ei tribuitur Joh. V, 23. Phil. II, 9-11. Præter Deum nemo adorari debet, Exod. XX, 3. 5. c. XXXIV, 14. Matth. IV, 10. Jes. XLII, 8. Christus vero adorandus dicitur tam ab Angelis Hebr. I, 6. Ps. XCVII, 7. Apoc. V, 13. quam ab hominibus & quidem tam viventibus, 1 Cor. I, 2. Luc. XXIV, 52. Act. VII, 58. 59. Matth. XIV, 33.

Pf. II, 12. quam defunctis, Phil. II, 10. Est quoque in secula laudandus, Rom. IX, 5. Nos etiam in eum & credere, Joh. III, 16. & sperare jubemur, Rom. XV, 12. 1 Cor. XV, 19. Huc spectat, quod etiam in nomine ejus non modo benedictio, 1 Cor. XVI, 23. sed quoque baptismus fiat, Matth. XXVIII, 19.

Quis itaque dubitet de divinitate Christi s. Filii Dei? Ipse se verum Deum esse confessus est, Joh. V, 18. c. X, 30. 36. sq. confessionemque hanc morte sua obsignavit, Matth. XXVI, 63. 64. Luc. XXII, 70.

CAPUT VII.

DE

SPIRITU S. TERTIA DEITATIS PERSONA.

Tertia Deitatis persona non propter essentiam suam, sed propter personalitatem Spiritus vocatur. Est enim spiraculum omnipotentis, Hiob. XXXIII, 4. & spiritus oris divini, Ps. XXXIII, 6. Sanctus appellatur, ut distinguatur ab omni alio spiritu, qui divina caret sanctitate, nec non ut indicetur operatio ejus in hominibus, quæ in sanctificatione consistit.

Mentio

Mentio fit *Spiritus Sancti* in literis V. T. Gen. I, 2. Hiob. XXXIII, 4. Pl. XXXIII, 6. Pl. XXXIX, 7. Mich. II, 7. 2 Chron. XV, 1. c. XX, 14. c. XXIV, 20. Jes. XI, 2. c. XL, 13. c. LXIII, 10. 1 Sam. X, 10. 1 Reg. XVIII, 12.

κατ' ἐξοχὴν dicitur *spiritus*, Joh. VI, 63. Matth. IV, 1. c. XII, 31. Marc. I, 20. & quidem 1) a modo subsistendi, quia per spirationem ineffabilem subsistit, Pl. XXXIII, 6. & 2) a modo operandi, quia ejus operationes in movendo, vivificando, & refocillando consistunt, quæ proprie vento & flatui tribuuntur, Joh. III, 8. Manifestavit se propterea sub symbolo venti valde spirantis, Act. II, 2.

Hostes mysterii Trinitatis sunt etiam hostes Spiritus S. dum negant, eum distinctam a Patre & Filio personam unius ejusdemque essentiae & dignitatis esse.

Sociniani istum appellant virtutem Dei s. qualitatem intermediam inter divinam potentiam & ejus effectus, hominibus communicabilem. *Mubamedani* per eum suum Mahometh intelligunt, quem ex Joh. XV, 26. & c. XVI, 7. paracletum nominant. *Ariani* & *Macedoniani* creaturam Filii nuncupabant. *Sabellius* & *Photinus* pro una eademque cum Patre & Filio persona habebant. *Montanus* se ipsum Spiritum S. vocabat. *Michael Ser-*

vetus non in Deo, sed in hominibus Spiritum S. quærendum esse docebat. *Joh. Bidellus* pro præcipuo quodam angelo, quocum Deus in singulari familiaritate vixerit, & *Christophorus Sandius* pro tota sanctorum angelorum cohorte eum habebat. *Joh. Caspar Westphalus* tertiam hominis partem, 1 Thess. V, 23. certus *Anglicanus Anti-Trinitarius* ἐνέγγελον Dei in creaturis, *Mennonita Abrahamfen* virtutem divinam a Christo, hominibus largiendam, & *Petrus Pairet* cum aliquibus Patribus ecclesiæ amorem divinum nominaverunt.

Verum omnes orthodoxi ecclesiæ doctores docent, Spiritum S. non modo veram a Patre & Filio distinctam personam, sed quoque cum utroque unius ejusdemque essentiae divinæ esse. Hoc ut firmiter credamus, nobis probandum incumbit, 1) quod Spiritus S. fit verus Deus, & 2) quod sit a Patre & Filio personaliter distinctus: Prius in hoc capite, posterius vero infra faciemus.

Spiritum S. verum Deum esse probatur 1) ex nominibus ejus divinis. Dicitur enim a) *Jehovah*, Jer. I, 9. coll. 2 Petr. I, 21. it. Deut. XXXII, 12. coll. Jes. LXIII, 10. sq. it. Jes. VI, 8. coll. Act. XXVIII, 25. it. Ps. XCV, 6. 7. coll. Hebr. III, 7. b) κρῖνος, 2 Cor. III, 17. 1 Cor.

1 Cor. XII, 4-6. & c) *Deus*, Act. V, 3. 4. 1 Cor. III, 16. 17.

Probatur Spiritus S. divinitas 2) ex *processione ejus a Patre & Filio*, de qua infra pluribus agetur.

Probatur eadem 3) ex *attributis ejus divinis*. Tribuitur enim ei a) *aeternitas*, Gen. I, 2. coll. Prov. VIII, 27. Joh. I, 1. b) *omnipotentia*, Jes. XI, 2. Mich. II, 7. Matth. XII, 28. c) *omnipræsentia & immensitas*, Ps. CXXXIX, 7. d) *omniscientia*, 1 Cor. II, 10. Jes. XI, 2. e) *omnisapientia*, Jes. XL, 13. 14. f) *liberrima voluntas*, 1 Cor. XII, 11. g) *summa veracitas*, Joh. XIV, 17. & h) *sanctitas*, quapropter κατ' ἐξουσίαν Spiritus Sanctus dicitur.

Probatur 4) ex *operibus ejus divinis*. Hæc sunt a) *creatio hujus universi*, Gen. I, 2. Hiob. XXXIII, 4. Ps. XXXIII, 6. b) *conceptio Christi in utero materno*, Luc. I, 35. c) *resuscitatio mortuorum*, Rom. VIII, 11. d) *inspiratio prophetica*, 2 Petr. I, 21. e) *regeneratio*, Joh. III, 15. coll. Joh. I, 13. f) *renovatio & sanctificatio*, Tit. III, 8. g) *missio & unctio doctorum ecclesiae*, Act. XX, 28. c. XIII, 2. 4. & h) *largitio & distributio donorum Dei* tam communium, quam extraordinariorum, 1 Cor. XII, 4-11. *Dona* hæc sæpe in Actis Apostolorum sub ipso Spiritus S. nomine intelliguntur, Joh. V,

V, 39. Et de hisce donis etiam Act. XLIX, 2. sermo est, quando de fidelibus Ephesinis dicitur, quod nesciverint, an detur Spiritus S.

Probatur denique ista 5) ex *cultu ejus religioso*, dum a) in nomine ejus baptizamur, Matth. XXVIII, 19. b) in eum irremissibiliter peccare possumus, Matth. XII, 31. c) salus & gratia ab eo impetratur, 2 Cor. XIII, 13. d) ad eum, tanquam testem & vindicem provocatur, Rom. IX, 1. & e) a Seraphinis ejus sanctitas celebratur, Jes. VI, 2. 3.

CAPUT VIII.

DE

DIVINIS ACTIBUS, PROPRIETATIBUS ET NOTIONIBUS PERSONALIBUS, QUIBUS TRES DEITATIS PERSONÆ INTER SE DISTINGVUNTUR.

Personæ divinæ distinguuntur a se invicem 1) per *actus personales*, 2) per *proprietates personales* & 3) per *notiones personales*.

Actus s. *opera Dei* sunt vel *ad intra*, vel *ad extra*. *Actus Dei ad intra*, qui omnes æterni sunt, dicuntur ii, quorum objectum ipse Deus est, *actus vero ad extra*, sunt ii, quorum objectum res extra Deum sunt.

Actus

Actus Dei ad intra sunt vel *essentiales* vel *personales*. *Essentiales* spectant ad essentiam Dei sine restrictione ad certam personam, *personales* vero respectum habent ad certam Deitatis personam producendam. Ad *essentiales actus ad intra* pertinet e. g. amor Dei erga se ipsum; *personales* vero *actus ad intra* sunt generatio & spiratio, de quibus in sequentibus capitibus plura dicemus.

Actus Dei ad intra personales sunt *divisi*, quia non in omnes tres personas competunt, cæteri vero actus omnes & ad intra & ad extra sunt *indivisi*.

Actus Dei ad extra sunt vel *immanentes* vel *transeuntes*. *Immanentes* vocantur, quorum objectum intra essentiam Dei perficitur, *transeuntes* vero, quorum objectum extra Dei essentiam perficitur. Ad illos pertinent actus intellectus & voluntatis Dei, ad hos vero e. g. inspiratio sacrarum literarum, creatio, redemptio, conservatio &c.

Actus Dei ad extra transeuntes distinguuntur in *essentiales* & *personales*. *Personales* sunt, quorum objectum quidem res est, quæ extra Deum perficitur, in aliqua tamen Deitatis persona terminatur, *essentiales* vero, quorum objectum res est, quæ extra Deum perficitur, & neque inchoative, neque terminative

tive certæ divinæ personæ singulatim tribuenda est. Ad hosce actus referuntur e. g. supra dicti actus creationis, inspirationis, conservationis &c. ad illos vero e. g. productio humanitatis Christi, apparitio Spiritus S. columbina &c.

Proprietatum Dei personalium dantur tres, paternitas, filiatio & processio.

Paternitas est proprietas primæ personæ, quæ propterea *Pater* dicitur, quia habet Filium, ex sua essentia ab æterno genitum.

Filiatio est proprietas secundæ personæ, quæ propterea *Filius* dicitur, quia habet Patrem, ex cujus essentia ab æterno genitus est.

Processio est proprietas tertiæ personæ, quæ propterea *spiritus* dicitur, quia ut spiraculum oris a prima & secunda persona procedit.

Vocantur hæ *proprietates* etiam *relative*, & quidem *reales*, quia ad se invicem respectum habent.

Notiones Dei personales a proprietatibus personalibus non aliter differunt, quam quod per priores id strictius de personis divinis dicatur, quod per posteriores latius dicitur. Sic potest paternitas & filiatio pluribus quidem substantiis tribui, non vero ἀγεννησία f. innascibilitas, nec nativitas æterna, nec spiratio activa, quæ solis Deitatis personis tanquam certi characteres adscribuntur.

Per *innascibilitatem* Pater solus is est, qui ab alio nec genitus est, nec procedit.

Per

Per *nativitatem æternam* Filius Dei solus est, qui ab æterno genitus est.

Per *spirationem activam* Spiritus S. solus est, qui ab æterno ut spiraculum, divinum procedit.

Propter has notiones autem *Personæ Deitatis* neutiquam multiplicantur, quia secundum regulam Theologorum in divinis omnia sunt unum, nisi obveniat relativa oppositio. Hac ratione nec ex parte Patris paternitas, innascibilitas & spiratio activa, nec ex parte Filii filiatio, nativitas æterna & spiratio activa sibi invicem relative opponuntur.

C A P U T IX.

D E

DE GENERATIONE PATRIS ET FILII IN SPECIE.

Generatio est ea actio divina ad intra, qua *Pater* ex essentia sua ab æterno genuit Filium, dum ab æterno essentiam suam divinam & omnia, quæ ad divinitatem spectant, cum eo communicat. Respectu *Filii* hæc actio vocatur *nativitas*, quæ alias etiam *generatio passiva* nominari solet.

Pater itaque non solum essentiam divinam, sed etiam modum essentiam divinam habendi a se ipso habet, quod de Filio & Spiritu S. non dicere possumus, quippe qui quidem essentiam
divi-

divinam, non vero modum, divinam essentiam habendi, a se habent. Recte igitur Christus dixit, *Patrem dedisse Filio, vitam habere a se ipso*, Joh. V, 26.

Profluit exinde ordo subsistendi & operandi, secundum quem Filius a Patre differt. Sicut *Filius* subsistentiam suam, ita etiam ordinem operandi, Joh. V, 19. 20. a Patre habet.

Neutiquam autem *generatio* & *nativitas divina* cum Roëllio *tropica* aut *metaphorica* vocari debet, sed est *propria*, quia omnia requisita ad sunt, quæ ad propriam generationem & nativitatem pertinent. Hæc sunt, 1) ut sibi simile producat, 2) ut essentia cum altero communicetur & 3) ut relatio patris & filii inde oriatur. Improperie Filii *nativitas exitus* nominatur, Mich. V, 1. Joh. XVI, 27. 28.

Interim non negari potest, *divinam generationem* & *nativitatem* ab *humana* valde diversam esse. Hæc corporaliter, & finite ab ejusmodi substantiis fit, quæ separatam essentiam separatasque proprietates habent, illa vero incomprehensibili, infinito & prorsus singulari modo fit, quia Pater & Filius non modo unam eandemque essentiam, sed etiam una eademque attributa habent. Illustrari potest simili, a luce desumpto, Hebr. I, 3. 1 Joh. I, 5. Est enim Filius quasi lux de luce genitus.

Hanc ob causam etiam hæc Filii generatio & *nativitas* non nisi *ab æterno* esse potest. Probat, batur,

batur hoc 1) ex Pf. II, 7. ubi Pater ad Christum dicit: *Filius meus es, ego hodie genui te*, ubi vox אֲנִי præsentissimum atque unicum æternitatis momentum significat. Probatur 2) ex Mich. V, 1. ubi Propheta egressiones s. nativitatem Christi dicit esse, מִקְרָם מִיְּמֵי עוֹלָם, h. e. a principio dierum æternitatis. Probatur denique 3) ex Col. I, 15. ubi Christus vocatur πρωτότοκος πάσης κτίσεως, h. e. is, qui genitus est, antequam ulla esset creatura.

Durat hæc generatio & nativitas in æternum, non quidem successive, sed ita, ut semper ἐν τῷ νῦν æternitatis fiat. Est igitur semper pro consummata habenda.

C A P U T X.

D E

PROCESSIONE SPIRITUS S.
I N S P E C I E.

Processio Spiritus S. est actio divina ad intra, qua Pater & Filius ab æterno essentiam divinam cum Spiritu S. communicant ita, ut Spiritus distincta quidem ab iis persona sit, quæ unam tamen eandemque essentiam habet. Respectu Patris & Filii vocatur *spiratio*, respectu vero sui ipsius *processio*.

Solus Pater essentiam divinam habet a se ipso. Quia vero Filius cum Patre unius ejusdemque essentiæ est, Joh. X, 30. c. XVII, 10. 11. non
Pars I. M. potest

potest non Spiritus S. essentiam suam divinam ab utroque habere, s. procedere, ita, ut propterea & *Patris* & *Filii Spiritus* dicatur. Fittamen in ejusmodi ordine, ut Spiritus non a Patre solo, sed a Filio procedat. Hinc Christus dixit, cum Spiritum mittere vellet: *Non loquetur is a semet ipso, sed quaecunque audierit, loquetur: ex meo accipiet & vobis annuntiabit: omnia, quaecunque habet Pater, mea sunt: propterea dixi: ex meo accipiet & annuntiabit vobis*, Joh. XVI, 13-15.

Fit processio hæc ab æterno & durat in æternum sine successione & vicissitudine, quia apud Deum semper *hodie* est, Ps. II, 7.

Habet itaque Pater & Filius causam Spiritus S. in se mediante spiratione, ita, ut uterque principium sit Spiritus S. & quidem unicum, non duplex, quia ambo eadem virtute Spiritum S. ab æterno in æternum producant.

In Græca Ecclesia negatur, Spiritum S. a Filio procedere, in Ruthenica vero processio hæc a Filio inter opera Dei ad extra refertur, dum per eam ejusmodi largitio donorum intelligitur, quæ consentiente Filio fit.

At cum Spiritus 1) expresse *Spiritus Filii* vocetur, Gal. IV, 6. Rom. VIII, 9. 1 Petr. I, 11. 2) a Filio mitti dicatur, Joh. XV, 26. Luc. XXIV, 49. 3) a Christo per afflationem symbolice repræsentetur, Joh. XX, 20. & 4) relativa alias inter Filium & Spiritum S. oppositio tolleretur, neutiquam Spiritus S. processio a Filio negari debet.

Neu-

Neutiquam quoque dicere debemus, Spiritum S. a Filio procedere respectu humanæ naturæ, quia hæc in tempore cœpit, Gal. IV, 4. Interim omnino procedit a Christo Θεανθρωπῶ, duas naturas habente.

Missio Spiritûs S. ab ejus processione & spiratione probe discernenda est. Habet illa quidem fundamentum in processione ejus substantiali, sed in hoc differt, ut in tempore fiat, cum processio & spiratio ab æterno sit. Illa magis manifestationem personalitatis divinæ, hæc vero ipsius essentiæ communicationem significat.

Qui mittitur, non necessario inferior est eo, qui mittit. Mittitur interdum etiam par a pari, Jes. XLVIII, 16.

Ex hisce satis constat, *Spiritum S. veram* Divinitatis *personam* esse, quia ei non modo nomina & idiomata personalia, sed etiam proprietates, apparitiones & operationes personales tribuuntur. Distinguitur enim a Patre & Filio, quia 1) ab utroque procedit, 2) ab utroque mittitur, 3) utrique opponitur, & 4) distincta nomina habet.

In œconomia cœlesti est Dei παράκλητος inter homines. Sicut Filius causam hominum coram Deo, sic Spiritus S. causam Dei apud homines agit.





LIBER III.

DE

CREATIONE ET PROVIDENTIA DEI.

Conjungimus duos hos fidei articulos, quia unum quasi constituunt opus divinum ad extra. Quicquid enim Deus in principio rerum creavit, id per providentiam suam in ejus natura & ordine etiam conservat. Est propterea Providentia divina *creatio quasi continuata.*

Agemus igitur in *duabus Sectionibus*, 1) de *Creatione* & 2) de *Providentia.*

SECTIO I.

DE

CREATIONE.

CAPUT I.

DE

CREATIONE IN GENERE.

Vox *Creationis* h. l. non significationem moralem, uti de magistratus electione & constitutione usurpatur, nec significationem
spiri-

spiritualem, e. g. Ps. LI, 12. nec significationem aliam impropriam, e. g. Ps. CIV, 30. & Num. XVI, 30. sed prorsus singularem & propriam habet.

Significat enim *productionem rei vel ex nihilo vel ex materia prorsus inhabili.*

Productio ex nihilo vocatur *Creatio immediata* & productio ex materia inhabili *Creatio mediata.*

Non h. l. intelligitur *Nihil negativum*, sed *privativum*. Illud est id, quod nec est, nec esse potest: hoc vero, quod quidem non est, sed tamen esse potest. De illo valet canon: *ex nihilo nihil fit.*

Optime actus creationis per *existens reddere* exprimitur, Rom. IV, 17. Si ex nihilo aliquid existens redditur, vox Creationis *in sensu strictissimo*; si ex materia præexistente, sed inhabili existens redditur, *latius*, & si per causas naturales existens redditur, *in sensu latissimo* usurpatur.

Tribus utitur Scriptura S. *vocibus* ad exprimendum actum Creationis, scilicet *בָּרָא*, *עָשָׂה*, & *יָצַר*. Sunt synonyma, si ponuntur cum objecto Creationis.

Doctrina de Creatione omnino inter articulos fidei, sed secundarios, refertur, quia non modo ex lumine naturæ non cognosci potest, Hebr. XI, 3. sed etiam salva salute æterna non negari debet.

Per lumen naturæ quidem cognoscitur, mundum non esse æternum, sed quando & quomodo mundus ortus sit, sine revelatione divina non liquet.

Hac de causa etiam non nimis curiose modum creationis indagare debemus, ut *Thomas Burnet*, *Wilhelmus Whiston*, *Detlev Cluverus* & alii fecerunt, quia opus creationis ad objecta fidei pertinet.

Sedem doctrinæ de hoc Dei opere invenimus, Gen. I & II. item Ps. CIV. Præcipua vero dicta classica sunt Jes. XL, 26, c. XLV, 12. Jer. X, 11 - 13. Act. IV, 24. c. XVII, 24. Hebr. XI, 3. Apoc. IV, 11.

Creatio itaque est actio divina, qua aliquid, quod nondum extitit, vel mediate vel immediate existens redditur.

CAPUT II.

DE

CREATORE.

Quia opus creationis omnes superat vires naturales & determinatas, *omnipotentia* ad istud omnino requirebatur, quæ attributum est solius Dei.

Solus itaque *Deus* omnium rerum creator est, Jes. XLIV, 24. c. XLV, 12, 18. Gen. I, 1. Exod. XX, 11. Hiob. IX, 8. Neh. IX, 6. Rom. XI, 34. Jer. X, 11 - 13. Ps. CXLVI, 6. Act. IV, 24. c. XVII, 24. Apoc. IV, 11.

Errat

Errat *Weigelius*, quando ex Ps. CIV, 4. conjectat, astra & elementa ab angelis producta esse.

Tribuitur autem creatio non soli *Patri*, I Cor. VIII, 6. etsi in operando primus sit, sed etiam *Filio*, Joh. I, 3. Eph. III, 9. Col. I, 16. Hebr. I, 2. Prov. VIII, 27 - 30. Ps. CII, 26. coll. Hebr. I, 10. & *Spiritui S.* Gen. I, 2. Ps. XXXIII, 6. Hiob. XXXIII, 4.

Particula *διὰ*, *per*, quæ de *Filio* dicitur, non causam instrumentalem, sed causam efficientem principalem indicat. Usurpatur autem ea non de Patre, sed tantum de Filio, ut exinde divinarum personarum ordo in operando eo magis pateat, Paterque eo melius a persona Filii distinguatur. Non tamen propterea credi debet, quamlibet personam Deitatis certum operis pensum in creatione absolvisse, ita, ut quasi *Pater* e. g. materiam aquosam, *Filius* lucem primigeniam & *Spiritus S.* virtutem vitalem in principio rerum produxerit, ut nonnulli perhibent.

Deo non aliam creationis causam moventem tribuere possumus, quam manifestationem gloriæ suæ, quapropter etiam se per hujus universi creationem ab omnibus falsis Diis distinguere solet, Jer. X, 11. Jes. XLV, 18 sq. Psalm. XCVI, 5. Benedixit etiam ex hac causa diei septimæ, ac voluit, ut homines istam ad ejus cultum, laudem & recordationem adhibeant, Gen. II, 3. Exod. XX, 11. Dicitur quievisse illa die. Sed *quies* hæc non aliter intelligenda est, quam quod Deus desierit, aliquid novi creare.

Involvit vox hæc simul oblectamentum animi super res creatas.

Alii Theologi *causam creationis impulsivam* in sola Dei *bonitate* quærunt. Sed non satis accurate hoc dicitur. Quatenus quidem Deus creaturas suas ita creavit, ut omni jucunditate & felicitate frui, nec non sibi invicem usui & oblectamento esse queant, bonitas ejus omnino ex omnibus operibus elucet, Ps. CXXXVI. at non tamen ea propterea causa creationis movens primaria vocari potest. Bonitas enim Dei ante mundum conditum jamjam fuit, quia attributum Dei essentialiale est, quod per benignitatem manifestari solet.

Causam exemplarem creationis constituunt ideæ singularum creaturarum in intellectu divino expressæ. Subjungit propterea Moses omni fere operi divino verba hæc: *vidit Deus, quod bonum sit.*

CAPUT III.

DE

MUNDO IN GENERE.

M*undus* significat integram compagem rerum creatarum, ex materia & forma constantem.

Materia sunt partes, ex quibus mundus compositus est. Sunt istæ partim *continentes*, scilicet cœlum, terra & mare, Act. IV, 24. partim

tim contentæ, scilicet omnia, quæ cœlum, terra & mare continent.

Res contentæ sunt iterum vel materiales vel immateriales. *Imateriales* sunt spiritus, *materiales* vero, quæ ex partibus materialibus compositæ sunt. Spiritus alias dicuntur *mundus intelligibilis*, qui *mundo visibili*, ad quem omnes corporeæ creaturæ pertinent, opponitur.

Forma mundi consistit in ordine, nexu & harmonia partium, ex quibus mundus compositus est.

Mundus nomen habet a *mundo* s. ornatu muliebri, quia pulcher is est & venustus. Hebræi eum עֲלָם & Græci αἰὼν, Hebr. I, 2. nec non κόσμον Act. XVII, 24. vocant. Vox ultima α κοσμεῖν, ornare, descendit.

Ad mundum omnia pertinent, quæ extra Deum sunt. Extra ipsum autem nil est, quod non intra sextiduum creatum sit, Apoc. IV, 11.

Excipiuntur *qualitates privativæ*, quæ non ad creaturas divinas referri debent, quia fructus sunt lapsus hominum, e. g. peccatum, Sir. X, 22. & mors, Sap. I, 13.

Quæstio: num præsens mundus inter omnes posibles optimus sit? nostris quidem temporibus valde ventilatur, sed jure meritoque inter fuitiles & inanes refertur. Unicus enim tantum datur mundus, nec Deus plures uno creare voluit. Cur igitur de possibilitate plurium mundorum multa disputemus, cum unius tantum mundi idea in divino intellectu locum habuerit?

buerit? Nomen *mundus* est quasi nomen proprium, quod soli præfenti structuræ hujus universi, cujus generis non datur alia, tribuitur. Interim Philosophi, qui dictam quæstionem proferunt, nil aliud indicare volunt, quam quod præfens mundus ita comparatus sit, ut ad manifestandam Dei gloriam melior esse nequeat. Supponunt prævisionem lapsus hominum. Inde concludunt, quod Deus eum nec voluerit nec potuerit impedire, quia id fini suo, qui est gloriæ ejus manifestatio, haud conveniens fuisset. Potuisset itaque præfens mundus fini Dei haud convenientior fieri. Bonum enim dicunt, quod fini conveniens est, optimum vero, quod fini convenientissimum. Cum igitur Deus semper optimum eligat, sequi inde credunt, præfentem mundum inter omnes possibiles omnino optimum esse.

Attamen cum mundus in intellectu divino secundum primam ejus ideam, quam Creator de eo habuit, omnino melior fuerit, quam postea factus est, jure meritoque quæstio hæc tanquam scandalosa & Deo incongruens rejicitur.

Vox *mundus* in sacris literis interdum etiam improprium habet sensum. Significat enim modo totum hominum genus, Joh. III, 16. 1 Joh. V, 19. Jos. XXIII, 14. 1 Reg. II, 2. modo solos impios & incredulos, Joh. XVI, 20. Rom. XII, 2. 1 Joh. III, 13. c. IV, 5. modo bona
tem-

temporaria, 1 Cor. VII, 31. 1 Joh. II, 15 - 17.
modo etiam malum in mundo, Gal. I, 4. 2 Tim.
IV, 10. 1 Joh. V, 4. Jac. IV, 4.

CAPUT IV.

DE

TEMPORE CREATIONIS ET
PRINCIPIO MUNDI.

Nec mundum, nec materiam primam ab
æterno esse, ratio & revelatio docent.
In principio enim creavit Deus cælum & terram,
Gen. I, 1.

In tempore itaque mundus cœpit. Est vero
tempus nil aliud, quam determinata uniuscu-
jusvis rei duratio. Quicquid igitur princi-
pium & finem habet, illud etiam habet tempus.

Extra tempus nil est, nisi *Deus*, qui propterea
æternus dicitur, Ps. XCIII, 2. Ps. CII, 25. 28.
Æternitas enim excludit tempus, quod cum
ipso mundo originem cepit.

Mundus & tempus ita secum conjuncta sunt, ut
neutrum sine altero existere queat. Nec *mun-*
dus sine tempore mundus, nec *tempus* sine
mundo tempus esse potest. Sicut autem tem-
poris cursus omnes mundi formas & mutatio-
nes determinat, ita etiam temporum vicissitu-
dines & periodi a mundi mutabilitate & rerum
variatione dependent.

Neutiquam igitur mundus *in æternum* durare
potest, quia ad tempus alligatus est, cujus
respe-

respectu impossibile est, mundum non habere finem.

Dum Deus præcipuum mundi incolam, scilicet *hominem*, non ad mundanam, sed cœlestem condidit vitam, ab initio etiam voluit cœlum & terram aliquando iterum annihilare.

Mundus vero cum non ab æterno sit, quaeritur: *quo anni tempore iste initum ceperit?* Quidam verno, alii autumnali tempore id factum esse perhibent.

Primi parentes in zona temperata septentrionali conditi sunt. Hinc probabile est, mundum creatum esse tempore autumnii, quo etiam antiquissimi populi e. g. Chaldæi & Ægyptii, nec non ipsi Israëlitaë ante educationem ex Ægypto annum inceperunt, Exod. XXIII, 16. coll. c. XXXIV, 22. Judæi quidem post egressum ex Ægypto annum verno tempore auspiciari a Deo jussi sunt, sed factum id est propter Festum Paschatos, Exod. XII, 2. ad quod omnia alia Festa accommodanda erant. Alias satis notum est, Judæos in rebus civilibus pristinam Calendarum rationem retinuisse. Distinguebant propterea annum in *ecclesiasticum* & *civilem*. Illum cum mense Nisan verno tempore, hunc vero cum mense Tifri autumnali tempore incipiebant, quo etiam secundum JOSEPHUM in *Antiq. Jud. Lib. I, c. 4.* diluvium factum esse creditur, cujus initium Moyses in primis anni mensibus ponit, Gen. VII, 11.

Præ-

Præter hunc anni computum etiam maturitas frugum, quæ autumnali tempore solita est, sententiam eorum, qui initium mundi in autumno ponunt, probabilem reddit. Omnes tunc arbores fructus ferunt, tellusque omnia, quæ ad animalium nutrimentum serviunt, abundanter & copiose suppeditat.

CAPUT V.

DE

ORDINE CREATIONIS.

Deus in creatione usus est *ordine architectonico*. Usurpatur propterea de mundi origine vox *καταβολή*, Matth. XIII, 35. Joh. XVII, 24. Luc. XI, 50. quæ vox a *καταβάλλεσθαι*, Hebr. VI, 1. derivatur, quod idem significat, ac aliquid præmoliri, aut opus aliquod prudenti consilio suscipere.

καταβολή igitur & delineationem operis, & jactum ejus fundamentum denotat.

Delineatio ab æterno facta est, cum Deus ideas rerum creandarum sibi repræsentaverit, *fundamentum* vero *jactum* est sub initio temporis & quidem secundum dictam delineationem. Mundus itaque non ortus est per casum fortuitum, sed est effectus consilii sapientissimi.

Actus creationis in ordine ita sequuntur: 1) productio materiæ primæ, 2) materiæ hujus digestio in certum systema, 3) systematis hujus exornatio, & 4) totius operis perfectio.

Versi-

Verficulus libri Geneseos primus continet totius historiæ creationis summam.

Deus facile omnia uno momento producere potuisset; at placuit ipsi, intra *sex dierum spatium* opus creationis perficere.

Causas, cur Deus id fecit, non nobis revelavit. Forsitan fecit, 1) ut infinitam sapientiam suam quasi per partes in suis effectibus ostenderet, 2) ut se Deum ordinis præberet nobisque amorem ordinis infunderet, 3) ut nos a creatione naturali ad spiritualem duceret, & 4) ut tempus in dies & hebdomadas ad sui nominis gloriam & hominum commodum divideret.

Prima die Deus primam materiam, lucem primigeniam & spiritus, *secunda die* aërem & ætherem, *tertia* mare & terram cum arboribus & plantis, *quarta* sidera cœlestia, *quinta* animalia aquatilia & volatilia, & *sexta* animalia terrestria, tam quadrupeda, quam reptilia, nec non ipsum hominem creavit. Consummato creationis opere sequebatur *dies septimus*, quem Deus quieti hominum & suo cultui dicavit. Exponit nobis hoc Moses in capite I. libri sui Geneseos.

Errant, qui *sex dies* per tot annos aut millia-ria interpretantur. Fuerunt enim omnino naturales dies, quarum quælibet ex 24 horis constat. A sensu autem proprio & literali in relationibus historicis nunquam recedere debemus.

Errant

Errant etiam, qui ex Sir. XVIII, 1. judicant, Deum omnia *uno momento* creasse, Mosem vero ob stupida Judæorum ingenia totum opus creationis in sex intervalla divisisse. Verum vox *כולם* h. l. non per *simul*, sed per *communiter*, (quasi dicatur: *omnia & singula*) interpretanda est. Non obstant hic quoque loca Gen. II, 4. & Jes. XLVIII, 13.

In priori quidem occurrit vox *כיום*. At *כיום* non semper unicum diem, sed etiam tempus plurium dierum, e. g. Jer. XXXI, 32. denotat.

In posteriori loco dicitur quidem Deus omnia fecisse *יחד* h. e. *simul*. At *יחד* non semper temporis simultaneitatem, sed sæpe etiam idem ac *pariter*, e. g. Ps. XXXIII, 15. Jes. XL, 5. significat.

Hominem Deus ultimam voluit esse creaturam, quia cætera omnia in ejus commodum creavit. Voluit enim, ut ista partim homini habitaculum præbeant, partim eum oblectent, & nutriant, partim ei serviant, partim eum ad glorificandum creatorem incitent.

CAPUT VI.

DE

MODO CREATIONIS.

Nulla datur *causa materialis* creationis, quia Deus spiritus & materiam primam ex nihilo

hilo produxit, Hebr. XI, 3. Nec ex essentia sua Deus mundum creavit, quia ens simplicissimum est.

Modus, quo in productione hujus universi Deus usus est, non per emanationem, nec secundum leges mechanicas explicandus est: fuit tamen ordini naturæ congruus, quia primum simplicia & postea composita corpora creavit.

Ex liberrima voluntate omnipotentiam suam ad operandum applicuit, dum dixit: *fiat!* verbum hoc statim in effectum transiit, ita, ut illico factum sit, quod dixit, Gen. I, 3. Psalm. XXXIII, 9.

Vox *דבר*, & *dixit*, non modo λόγον προφορικόν s. ipsum voluntatis divinæ actum, sed etiam λόγον ὑποστατικόν s. Filium Dei significat, qui alias in Scriptura S. expresse λόγος s. Verbum dicitur, Joh. I, 3. Ps. XXXIII, 6. Hebr. XI, 3.

Non autem propterea Filius Dei causa instrumentalis creationis dicendus est. Certi hæretici id faciunt, provocantes ad Joh. I, 3. Eph. III, 9. Col. I, 16. Sed ex Prov. VIII, 27-30. Jes. XLV, 18. coll. v. 23. & Phil. II, 10. item ex Ps. CII, 26. coll. Hebr. I, 10. satis patet, particulam *διὰ* in citatis locis non causam instrumentalem, sed causam efficientem principalem indicare.

Deus nullo instrumento in opere creationis usus est. Solò enim voluntatis ductu per omnipotentiam suam mundum & omnes creaturas condidit, nec alicujus ope ac consilio
indi-

indiguit. Nemini etiam de suis factis rationem reddere debet, aut alicui aliquid retribuere, quod prius acceperit, Rom. XI, 34. 35.

Nemo quoque in principio rerum adfuit, quem consuleret, cum nec angeli, nec alia substantia ante conditum mundum extiterit. Errant autem, qui angelos Deo in opere creationis adstitisse asserunt.

CAPUT VII.

DE

MATERIA PRIMA MUNDI.

Datur omnino *materia prima*, ex qua omnia corpora producta sunt, quæ tamen non æterna est. Ethnici istam olim vocarunt *primum Chaos*, quæ vox idem fere ac, *תהו ובהו* s. informem, rudem ac indigestam molem significat, cujus Moses in historia creationis Gen. I, 2. mentionem facit. Ab æterno materiam primam fuisse, quidam somniaverunt. Verum aperte errant contra Scripturam S. quæ non modo soli Deo tribuit æternitatem, sed etiam clare nos docet, mundum in principio temporis originem cepisse & a Deo ex nihilo productum esse.

Materia prima nil aliud est, quam quod alias Physici prima elementa s. vim plasticam nominant. Non præexistens, nec æterna dicenda est, quia in primo creationis momento orta; nec pro aliqua substantia habenda, quæ for-

Pars I.

N

mam

mam habeat specificam; sed fuit *principium elementare*, quod omnes res creatas, omniaque corpora materialiter inter se connectit.

Principium hoc in creaturis propagatur, seque diffundit in omnia, quæ vel naturaliter vel artificialiter adhuc formantur. Durat usque ad interitum mundi, nec cessat in solutione corporum. Formæ rerum quotidie quidem pereunt, non vero elementum hoc materiale. Deus qui ex nihilo id produxit, solus quoque est, qui in nihilum iterum rediget. Philosophi variis insigniunt istud nominibus. Modo animam s. archæum mundi, modo *ἐντελέχειαν* vocarunt. Sed parum commode, quia talis denominatio facile ad Deismum & Spinosismum ducit.

In creata *indigesta mole* s. *massa* materia hæc prima ita latuit, ut, cum Deus eam postea quasi elaboraret, materia hæc cum omnibus, quæ a Creatore in suo ordine producebantur, communicaretur. Constabat ista ex particulis, aqua, terra, igne & aëre plenis, quæ vulgo quatuor mundi elementa vocantur. Inter hæc aqua copia sua superabat cætera. Habebat propterea totum primum Chaos formam aquosæ substantiæ, qua de causa etiam Moses, quando creationem cœli describit, istud sub nomine *aquarum* indicat, Gen. I, 6. 7.

Quidam tribuunt *materiæ primæ* duas singulares proprietates, scilicet vitalitatem & luciditatem. *Vitalitatem* nominant subtilem ejus
vir-

virtutem, qua indigesta moles mobilis & viva, *luciditatem* vero, qua lucida & visibilis facta fit. Prior alias *spiritus vitalis*, posterior vero *lux primigenia* nuncupatur.

Productio hujus primæ materiæ, quæ in indigesta mole latuit, pensum erat primæ diei, cui separatio lucis a tenebris addebatur.

CAPUT VIII.

DE

COELO ET SIDERIBUS.

Creatio *cæli* opus fuit secundæ diei. Cum enim Deus plurimam aëris partem a reliqua massa separaret & in unum colligeret, oriebatur inde in media indigesta mole ejusmodi *aëreum Expansum*, quod dictam molem in duas dividebat partes, quarum subtilior & levior pars in altum surgebat, gravior vero infra manebat.

Hoc expansum accipiebat nomen *cæli*, quod teste Paulo 2 Cor. XIII, 2. *triplex* est, *aëreum*, *æthereum* & *empyreum*. Proprie quidem unum tantum datur cælum. Cum vero particulae elementares eo subtiliores & nobiliores fiant, quo altius surgunt, orta inde est divisio in tres cælos.

Primum cælum globum terrestrem circumdat, & *aëreum* dicitur, quia ejus particulae a terrenis & aquosis particulis minus purgatæ, & cum atmosphæra s. colluvie humorum & va-

porum ex globo terrestri indefinenter in altum surgentium, commistæ sunt. In hoc cœlo generantur nubes & nebula, nix & pluvia, fulgur & tonitru, ros, grando & pruina, venti & omnes tempestates ac meteora. Aves sub eo volant, quæ tamen non de aëre vivunt, sed genus sunt animalium terrestrium, quod de terra sustentatur, quapropter ultra atmosphæram volatum suum non extendunt.

Alterum cælum nominamus æthereum, quia ex particulis æthereis constat, quæ multo subtiliores sunt, quam aëreæ. Æther enim compositus quasi est ex particulis aëreis & igneis nobilioribus, quas ob nimium calorem & subtilitatem nulla animantia tolerare possunt. Hinc eo difficilius respirant, quo magis in altis montibus cœlo æthereo appropinquant. Natant in eo quasi planetæ & stellæ, quapropter etiam cælum hoc a quibusdam *cælum sidereum* appellatur. Vastitas hujus cœli ex stupenda stellarum altitudine patet, cum secundum calculum Astronomorum proxima stella a terra nostra plus quam 50000 millies centum milliaria distet.

Tertium cælum vocatur empyreum, quia quasi in mero igne consistit. Constat ex nobilissimis particulis igneis ab omni aqua, terra & aëre ita purgatis, ut subtilitate & claritate sua nil in tota natura detur, quod cum ea comparari queat. Cum enim ignis naturaliter non solum in altum surgat, sed etiam surgendo purior fiat,
non

non mirum est, cœlum altissimum ex subtilissimo igne consistere, quia nobilissimæ ejus particulæ in unum tunc quasi coeunt.

Cœlum hoc cum extremam cœli regionem occupet, *cælum cœlorum* vocatur, 1 Reg. VIII, 27. 2 Chron. II, 6. Plerumque in Scriptura S. typus est status beatitudinis æternæ, Luc. X, 20. Joh. III, 13. Phil. III, 20. nec non symbolum divinæ majestatis, Act. VII, 56. Ps. XI, 5. Matth. III, 16. quapropter etiam *thronus Dei* nuncupatur, Jes. LXVI, 1. Matth. V, 34.

Sidera ex ea indigestæ molis parte orta sunt, quæ aquæ dicuntur supracœlestes, Gen. I, 7. Fiebat hoc die creationis quarta, v. 14 - 19. Cum enim massa hæc aquosa plena fuerit particulis igneis, aëreis & terrenis, Deus massam istam ita elaboravit, ut terrenas & aquosas particulas maxima ex parte ad formandos planetas & inprimis lunam, igneas vero ad formandum solem stellasque fixas adhiberet.

Neutiquam igitur sidera hæc jam ante conditum mundum extiterunt, uti *Thomas Burnet*, & *Whiston* perhibent dicentes, ea in creatione tantum visibilia facta esse. Neque ex eorum positu aliquid præfagiendum est, Jer. X, 2. Deut. XVIII, 10.

Solis & lunæ speciatim Moses mentionem fecit in historia creationis, quia diem & noctem regunt, hominibusque ansam dant, tempus in annos, menses & dies dividendi. Nominantur *magna lumina*, quia præ aliis sideribus tan-

quam magna in cernendi sensum cadunt. Num vero *sol* centrum totius systematis mundi sit, circa quod non modo totum cœli firmamentum, sed etiam terra ipsa, tanquam planeta, se quotidie moveat, an vero inter planetas numerandus sit, qui intra certum temporis spatium cursum suum circa globum terrestrem absolvunt, in Scriptura S. non determinatur. Videtur tamen hæc posteriori sententiæ magis patrocinari, quam priori. Interim non negandum est, quod systema Copernicanum nostris temporibus Astronomis maxime arrideat, quia observationibus eorum optime respondet.

Cometæ ad inferiorem cœli regionem pertinent, magisque ad singularia cœli phænomena, quam genuina sidera numerantur, cum nec cursus, nec natura eorum unquam ab homine docto pervestigari potuerit. Quod vero Johannes Heynius aliique novaturientes philosophi de iis somniaverunt, inter aniles jure meritoque refertur fabulas. Vulgo variorum malorum prænuncii esse creduntur, quod tamen, quia non modo Deus interdixit, signa cœli metuere, ut ethnici faciant, Jer. X, 2. sed etiam multæ interdum calamitates terram premunt, quas nullus cometa prædixit, nec non eorum apparitio universalis, bellum vero aut pestis aut aliud malum publicum, quod cometam sequi dicitur, particulare est.

CAPUT IX.

DE

TERRA ET MARI.

Terra magnum illum globum indicat, qui sub cœlo quasi fluctuat. In sensu generali *mare* includitur, in speciali vero ab eo distinguitur. Constat autem non ex meris terrenis particulis, sed est ex omnibus quatuor elementis composita. Tam aqueæ, quam igneæ & aëreæ particulæ admixtæ sunt terræ, quæ ideo nunquam pura est, etsi particulæ terrenæ copia superent aqueas, igneas & aëreas.

Oriebatur terra, cum Deus aquas in certa loca colligeret & hac ratione materiam liquidam a materia sicca & crassiori separaret. Certa indigestæ molis pars tunc arida reddebatur, & hæc dicebatur *terra*, aquarum vero collectio nomen *maris* accipiebat, quod quidem suis cancellis ita inclusum est, ut istos transgredi nequeat, Hiob. XXXVIII, 10. 11. Jer. V, 21. non tamen propterea naturam mutat, quia falsa ejus acedo continuusque motus ab omni putredine & fœtore istud conservat.

Terra occultos suos habet meatus, in quibus quasi circulantur aër, aqua & ignis, per quorum commixtionem lapidum & mineralium generatio efficitur. Aëris & ignis copia interdum per terræ motus & ignivomos montes erumpit, aqua vero abundantiam suam per

fontes quasi ejicit & in fluminum alveos transmittit, quibus postea transfertur in mare.

Mare superat magnitudine terram continentem. Exinde patet, cur Moses indigestam molem, ex qua omnia condita sunt, *aquas* dixerit, Gen. I, 6. 7. Erat enim massa valde aquosa. Maximam hujus aquæ partem continet mare, quod suas occultas abscissiones habet, quibus in gremium terræ penetrat & non modo in eo aquam abscedentem supplet, sed etiam ejus conciliationem cum reliqua aqua conservat.

Constat autem mare & omnis aqua culinaria non ex mera aqua, sed admixtæ sunt ei particulæ tam terrenæ, quam igneæ & aëræ. Priores dant aquæ tam gravitatem, quam virtutem nutriendi & gramina gignendi, alteræ dant calorem & luciditatem, & ultimæ elasticitatem & quod pisces & omnia animantia aquatica in ea respirare & natare queant.

Non autem Deus terram & mare tantum condere, sed etiam vario modo exornare voluit. Pertinent autem ad *ornamenta terræ* non modo omnis generis herbæ, arbores, frutices & flores, quos Deus progerminare jussit, Gen. I, 11, 12. sed etiam montes, silvæ, valles, flumina, lacus & fontes, quæ omnia jam ante diluvium extiterunt, etsi per illud magnam passa sint mutationem.

Sunt, qui cum Thoma Burneto *montes* ex diluvio exortos esse autumant. Sed errant, cum non solum eorum mentio fiat ante diluvium, Gen.

Gen. VII, 19. 20. sed expresse etiam inter res creatas numerentur, Ps. XC, 2. Ps. CIV, 6. 8. Prov. VIII, 25. Terra certa receptacula habere debuit, in quibus se colligeret aqua ad irrigandum & fœcundandum solum, quod sine montibus fieri nequit.

Ad ornamenta terræ spectat etiam *Paradisus*, amœnissimus ille hortus, quem Deus intra Tigridis & Euphratis confinia s. in regione Mesopotamiæ, quæ hodie *Irak*, in Scriptura S. vero *Eden* vocatur, eum in finem plantavit, ut primi homines in illo jucundissima vita fruantur. Plura de Paradiso alibi dicemus.

Ad *ornamenta maris* pertinent non modo insulæ, fyrtes & plantæ marinæ, sed quicquid etiam gremium maris fovet, & vel ab eo ejicitur, vel ex ejus fundo petitur. Huc spectant omnis generis conchæ, lapides & alia vegetabilia marina.

CAPUT X.

DE

ANIMALIBUS.

Animalia sunt substantiæ, corpore organico & virtute tam sentiendi, quam appetendi aut averfandi, nec non se de loco in locum movendi, præditæ.

Virtutis hujus principium *animam* dicere solemus, a Scriptura S. vero *spiritus vitæ* aut *flatus spiritus vitæ*, Gen. VII, 15. 22. nominatur.

Habet sic spiritus analogiam cum anima humana, quæ autem multo nobiliori ortu & natura gaudet. Interim *homines* omnino inter animalia numerantur, qui autem tam intellectu, quam aliis egregiis proprietatibus cætera omnia valde superant. Agemus de iis speciatim in peculiari libro.

Dividuntur *animalia* in *rationalia* & *bruta*. Illa sunt homines, hæc vero cætera omnia. In hoc omnia animalia conveniunt, quod duplicis sexus sint, commixtione feminis sese propagent, de terra nutrimenta capiant, sensuum organa habeant & facultate sentiendi, appetendi, averfandi & movendi gaudeant.

Bruta animalia ex multis generum millibus constant. Plerumque distinguuntur in *terrestria*, *aquatica* & *volatilia*, quorum iterum diversæ dantur species.

Terrestria sunt vel *quadrupedia* vel *reptilia*, quorum illa plerumque pilosam, hæc vero levem cutem habent.

Aquatica alias vocantur pisces & *volatilia* aves, quorum illi natando, hæc vero volando de loco in locum se conferunt. Accedunt varia *insecta* tam volantia quam reptantia, quæ non minus de Creatoris omnipotentia

tentia & sapientia testantur, quam animalia summæ magnitudinis, ex quibus Elephas & Rhinoceros inter terrestria, Cete & Crocodilus vero s. Behemoth & Leviathan, Hiob. XL & XLI. inter aquatica & aquila struthioque inter volatilia primum locum habent.

Omnia hæc animalia gaudent quidem cognitione sensuali, Jes. I, 3. nec non phantasia & memoria, sed carent intellectu, Hiob. XXXIX, 17. & voluntate libera. Sunt etiam naturaliter obnoxia morti & interitui, Eccl. III, 20. Pereunt enim non modo quoad corpus, sed etiam quoad animam, quia hæc non genuinus spiritus est, uti anima humana, sed tantum virtus aliqua iis concreata, quæ mechanice corpus tam movet, quam animat.

Non uno die creata sunt animalia. *Aquatilia & volatilia* quinta die, *terrestria* vero sexta originem cœperunt. Aquatilia nec non aves aquaticas Deus ex mari, Gen. I, 20. cæteras vero aves ex terra, Gen. II, 19. produxit.

Ex terra etiam sexta die Deus omnia pecora, jumenta, feras bestias, serpentes & quicquid vel quatuor pedibus incedit, vel humi serpit, condidit, Gen. I, 24.



SECTIO



S E C T I O II.

D E

P R O V I D E N T I A.

C A P U T I.

D E

P R O V I D E N T I A I N G E N E R E.

P*rovidentia* a *providendo* nomen habet. Denotat igitur hæc vox prævisionem s. cognitionem futurorum, quatenus cum cura aliqua salutis conjuncta est.

Providere hinc idem significat ac prospicere. Est igitur non merus actus intellectus, sed simul actus voluntatis.

D E O tribuitur, quatenus non modo omnia prævidet, sed omnium quoque rerum curam habet. Denotat itaque actum illum, quo Deus creaturis prospicit & earum saluti consulit. In Scriptura S. non occurrit vox aliqua, quæ actum hanc exprimat. Plerumque *videre* veteribus Hebræis idem fuit ac *providere*, Gen. XXII, 8. 14.

In libro Sapientiæ c. XIV, 3. vox *πρόνοια* legitur, quæ significatum vocis *providentia* optime

me exprimit. Interim non defunt *loca*, quæ satis superque de divina agunt providentia. Ex V. T. præcipua sunt Ps. XXXVI, 7. Ps. CIV, 5-30. Ps. CXXXVI, 4-25. Ps. CXLVII, 8. 9. Ps. CXIX, 1-16. Hiob. X, 9-12. Prov. XXI, 1. 2. & ex N. T. sequentia: Matth. VI, 25-32. c. X, 29-31. Act. XIV, 16. 17. c. XVII, 28. Rom. VIII, 28. c. XI, 36. Col. I, 17. Hebr. I, 3.

Fundamentum providentiæ divinæ partim in intellectu, partim in voluntate Dei locum habet. In *intellectu* scientia & sapientia, in *voluntate* vero sanctissima justissimaque ejus ad promovendam sui ipsius gloriam & hominum salutem consilia (quæ Eph. I, 11. βελή τῆ θελήματος αὐτῆς dicuntur) id sunt, quo providentia fundatur. Accedunt Dei *bonitas* & *potentia*, ex quibus ejusmodi divinum regimen oritur, quo altissimus Dominus non modo statum creaturarum accuratissime novit, sed etiam optima media ad consequendum fines suos sanctissimos tam eligere quam adhibere potest.

Competit autem providentia in totam SS. *Trinitatem*. Sicut enim omnes tres Deitatis personæ in opere creationis convenerunt, ita etiam omnes in providentia circa creaturas, quæ quasi creatio continuata est, concurrunt. In specie adscribitur ea *Patri*, Matth. VI, 26, 32. *Filio*, Hebr. I, 3. Col. I, 17. & *Spiritui S.* 1 Cor. XII,

XII, 11. Ps. CXXXIX, 7. item *Patri & Filio* conjunctim Joh. V, 17.

Nil aliud autem Deum ad providentiam suam impellit, quam summa ejus *bonitas & amor paternus*, Luc. XI, 13. Sap. XI, 25. David propterea multa reiteratione celebrat divinam bonitatem, quando in laudandis operibus ejus occupatus est, Ps. CXXXVI.

Tres dantur providentiæ divinæ *actus*, πρόγνωσις, πρόθεσις & διοίκησις. Secundum πρόγνωσιν Deus omnia prævidet, Matth. VI, 32. secundum πρόθεσιν omnia ad suum finem decernit, Act. II, 23. & secundum διοίκησιν decreta exequitur. Paulus ad omnes tres providentiæ actus alludit Eph. I, 11.

In sensu strictiori sola διοίκησις id est, quod proprie providentiam dicimus, quia πρόγνωσις ad Dei omniscientiam & πρόθεσις ad ejus voluntatem pertinet.

Sunt autem *actus* divinæ providentiæ proprie non divisi, uti in hominum providentia, ubi actus actum sequitur, sed sunt omnes una & quidem perfectissime sine ulla hæsitantia, nec tamen fortuito.

Respectu objecti *providentia divina* dividitur in *generalem, specialem & specialissimam*, respectu autem modi in *physicam & moralem*.

Solet etiam in *ordinariam & extraordinariam* distingui. Prior circa communem naturæ ordinem & cursum, posterior vero circa miracula versatur.

CAPUT II.

DE

PROVIDENTIA DEI GENERALI.

Providentiæ generalis objectum sunt omnes creaturæ. Vult enim Deus non modo hujus universi Autor & Creator, sed etiam ejus conservator esse, Act. XVII, 25. Col. I, 17. Rom. XI, 36. Hebr. I, 3.

Non modo *homines*, Act. XVII, 26 - 28. & *angeli*, Ps. CIV, 4. Matth. XVIII, 20. ad objectum providentiæ generalis pertinent, sed etiam 1) *omnia inanimata*, e. g. *nubes*, Ps. CXXXV, 7. Hiob. XXXVII, 12. Ps. CXLVII, 8. Jes. V, 6. *pluvia*, Deut. V, 17. Hiob. XXXVI, 27. 28. Ps. LXVIII, 10. Act. XIV, 17. *ventus*, Ps. CXXXV, 7. Jer. LI, 16. Amos. IV, 13. Hiob. XXVIII, 25. Sir. XLIII, 18. *aqua*, Hiob. XXVI, 10. Psalm. XXXIII, 7. *ignis*, Ps. XI, 7. Ps. CXLVIII, 8. Jer. XVII, 27. Sir. VII, 19. *tonitru*, Ps. XVIII, 14. Jes. XXIX, 6. Hiob. XXXVII, 2 - 5. *fulgur*, Ps. XCVII, 4. Jer. X, 13. Hiob. XXVIII, 26. c. XXX, 30. 32. c. XXXVIII, 25. *grando*, Exod. IX, 23. Ps. CXLVIII, 8. Hagg. II, 18. Sir. XLIII, 16. *nix*, Ps. CXLVII, 16. Hiob. VI, 16. Sir. XLIII, 19. *tempestas*, Ps. LXXXIII, 16. Jes. XXIX, 6. *sol & astra*, Ps. CIV, 19. Ps. CXLVII, 4. Ps. XIX, 5 - 7. Matth. V, 45.

Pertinent ad objectum providentiæ generalis 2) *omnia vegetabilia* & quicquid e terra progerminat, e. g. *gramina*, *frutices*, *arbores*, *herbæ*,
plan-

plantæ, olera, frumenta, legumina & ejus generis alia, Pf. CIV, 13 - 16. Matth. VI, 28. 30. 1 Cor. XV, 30.

Pertinent huc 3) *omnia animalia* cujuscunque generis & quidem non modo respectu totius generis, sed etiam respectu singulorum individuum Pf. CIV, 27 - 30. Pf. CXLV, 15. 16. Pf. L, 10. Sir. XXXIX, 36. imo *omnes pisces* in mari & aquis, Luc. V, 6. Jon. II, 1. Pf. LXXIV, 13. 14. Pf. CIV, 25. 26. *omnes aves & volucres* ab aquila usque ad passerem & corvum, Matth. VI, 26. Hiob. XXXIX, 27 - 30. Pf. CXLVII, 9. Matth. X, 29. Luc. XII, 6. *omnes belluæ & ferae*, Hiob. XXXIX, 1 - 12. Pf. CIV, 18. 21. 22. *omnia reptilia & insecta, vermes & serpentes*, Hab. I, 14. Amos. IX, 3. Pf. CXLVIII, 10.

Pertinent denique ad objectum providentiæ generalis 4) *omnia minutissima & abjectissima*, e. g. *crinis*, Matth. X, 30.

Non enim indecens est Deo, res curare abjectas, quia non minus de ipsius sapientia & potentia eæ testantur, quam res gloriosissimæ. Quod homini abjectum est, non propterea etiam a Deo abjicitur & spernitur. Uti nulum artificem sui operis pudet, sic etiam non Deum suarum creaturarum.

Errat igitur PLINIUS, quando in *Hist. Nat. L. I. c. 7.* scribit, *divinam majestatem pollui, si res abjectas curet*; HIERONYMUS vero in *Comment. in Habac. cap. I.* non sine blasphematione scripsit: *fatuam Dei adulationem esse, qua Majestas ejus ad hoc*

hoc deducatur, ut sciat per momenta singula, quot culices nascantur, quotve moriantur, quota muscarum sit multitudo, quot pisces natent in aquis.

Quæritur nunc: *qua ratione Deus providentiam suam generalem in creaturas exerceat?* Fit conservando, augendo, minuendo, multiplicando, fecundando, protegendo, auxiliando, dirigendo, cibando, potando, bonam tempestatem largiendo & alia ratione, qua se tanquam summum mundi & olympi moderatorem præstat. Omnia hæc sunt effectus divinæ conservationis & gubernationis. Antequam vero de utraque singulatim agimus, de providentia speciali & specialissima aliqua præmittemus.

CAPUT III.

DE

PROVIDENTIA DEI SPECIALI
ET SPECIALISSIMA.

Objectum providentiæ specialis sunt homines, nobilissimum creaturarum terrestrium genus, circa quos occupata est Dei providentia jam inde a conceptione usque ad mortem. *In Deo enim vivimus, movemur & sumus, Act. XVII, 28.*

Theologi plerumque tres faciunt divinæ circa homines providentiæ periodos, dum considerant eorum ingressum in mundum, eorum progressum in mundo & eorum egressum ex mundo.

Pars I.

O

Respe-

Respectu *ingressus in mundum* versatur providentia divina 1) circa hominis conceptionem & formationem, Ps. CXXXIX, 13-16. Hiob. X, 8-11. Jer. I, 5. & 2) circa ejus nativitatem, ut nascamur non modo feliciter, Ps. XXII, 10. Ps. LXXI, 6. sed etiam certo & opportuno tempore, uti Moyses, Act. VII, 20. & Christus, Gal. IV, 4. Huc spectat etiam 3) quod mares & foeminae in pari numero in lucem edantur. Novit quoque Deus quemlibet hominem jam ante ejus conceptionem & nativitatem, Jer. I, 5. Ps. CXXXIX, 16.

Respectu *progressus in mundo* versatur providentia divina 1) circa nutritionem, Matth. VI, 25. 31. 32. 2) circa conservationem, Hiob. X, 12. Act. XVII, 25. 3) circa amictum, Matth. VI, 25. 30. 4) circa conditionem & statum vitae, Jer. I, 5. 1 Sam. XVI, 1. 7. 12. 1 Cor. VII, 17. 20. 5) circa conjugium, Gen. XXIV, 50. Prov. XIX, 14. Tob. III, 20. 21. c. VII, 12-14. 6) circa consilia, Ps. XX, 5. Prov. XVI, 3. Jes. XIX, 3. Act. V, 38. 7) circa varios vitae ductus, Ps. IV, 4. Ps. XLVIII, 15. Ps. LXXIII, 24. Jes. XLVIII, 17. Ps. XXVII, 11. Ps. XXXVII, 5. 8) circa actiones, Ps. CXXXIX, 5. Jer. X, 23. 9) circa fortunæ casus, Amos. III, 6. Jes. XXXI, 2. 10) circa pericula, Ps. XCI, 3-7. 10-15. Jes. XLI, 10. c. XLIII, 2. 11) circa inopiam & egestatem, Hebr. XIII, 5. Ps. XXXVII, 25. Ps. XXXIII, 19. 1 Reg. XVII, 6. Ps. CXXXII, 15. Jes. XXX, 20. Marc. VIII, 17. Ps. CXLVI, 7. 1 Reg.

1 Reg. XVII, 14 - 16. 12) circa senectutem, Ps. LXXI, 9. 18. Jes. XLVI, 4. & 13) circa morbos, Exod. XV, 26. c. XXIII, 25. Ps. XLI, 4. Jes. XXXVIII, 5.

Respectu *egressus e mundo* versatur providentia divina tam circa mortis genus, 1 Reg. XXII, 34. coll. v. 17. c. XIII, 22. 24. 2 Reg. IX, 33. 36. quam circa mortis tempus, quod plerumque vocatur terminus vitæ, de quo infra pluribus agemus. In genere notandum est, quod nemo casu fortuito & sine voluntate Dei moriatur, Ps. XC, 3. Hiob. XIV, 5. c. XXXVIII, 2. Matth. X, 28 - 30.

Providentia Dei specialissima differt a speciali non nisi gradu, & versatur circa *fideles*, in quos oculus Domini inprimis intentus esse dicitur, Ps. XXXIII, 18. Non modo singuli fideles specialissima hac providentia gaudent, sed etiam totus eorum cœtus, qui appellatur *Ecclesia*, Eph. V, 29. & *Dei populus & peculium*, 1 Petr. II, 9. Caput ejus est *Christus*, qui specialissimæ quoque Dei providentiæ objectum fuit in statu suæ exinanitionis, Act. II, 23. Fuit enim lapis, in quem septem directi fuerunt oculi, Zach. III, 9.

CAPUT IV.

DE

CONSERVATIONE DEI.

Deus, qui autor est creaturarum, earum quoque est conservator. Nomen *patris* pro-

O 2

pterea

pterea gerit, Matth. VI, 32. Eph. III, 15. Ut vero patris est, non modo gignendo vitam dare, sed etiam geniti vitæ prospicere, sic etiam Deus non potest non paternum suum amorem, quo omnes amplectitur creaturas, Sap. XI, 25. prospicientia sua testificari. Confitemur hoc publice in confessione nostra fidei, quando in *Catechismo minori* ita dicimus: *Credo, quod Deus creaverit me una cum omnibus creaturis; quod corpus & animam, oculos, aures & omnia membra; rationem & omnes sensus mihi dederit & adhuc sustentet: ad hæc, quod vestes & calceos, cibum ac potum, domum, uxorem, liberos, agros, jumenta & omnia bona cum omnibus vitæ necessariis copiose & quotidie largiatur, me contra omnia pericula protegat & ab omnibus malis liberet & custodiat.*

Omnia hæc beneficia effectus sunt ejus *conservationis* s. *sustentationis*, quæ actio est, qua efficit Deus, ut quælibet creatura tamdiu dureret & existat, quam ei placet. Respicit igitur illa non modo ad singularum creaturarum existentiam, sed etiam ad earum essentiam & vires operandi. Cessante hac sustentatione sequitur earum destructio. Involvit itaque *divina conservatio* indefinentem Dei influxum in creaturas ad largiendum singulis, quæ iis conducunt.

Optime hoc Paulus expressit phrasi, *Φέρεται πάντα*, Hebr. I, 3. Portat quasi Deus & gestat creaturas, ne collabantur, aut intereant, aut in nihilum redigantur. Convenit cum hac
phrasi

phraſi altera, quæ Col. I, 17. occurrit, ubi apoſtolus de Chriſto dicit: *πάντα ἐν αὐτῷ συνέστηκε*, h. e. *omnia in ipſo conſiſtunt*. Idem eſt ac dixiſſet, nos in eo vivere, moveri & eſſe, Act. XVII, 28. aut ipſum omnia in omnibus operari, 1 Cor. XII, 6. c. XV, 28.

Eſt autem Dei *conſervatio* vel *mediata* vel *immediata*. *Immediata* eſt, qua Deus per ſe ipſum creaturis proſpicit. Sic conſervat ſpiritus, 1 Tim. V, 21. Jud. v. 6. fidera cœli, Hiob. IX, 7. 8. c. XXXVIII, 33. Pf. XIX, 5. 6. 7. Pf. CXLVII, 4. prima elementa & totam naturam in ſuo ordine & curſu, Gen. IX, 11 ſq. Pf. CXIX, 90. 91. Hiob. XXXVIII, 22 - 38. nec non hunc vel illum hominem, e. g. Moſem, Eliam, Danielem &c. *Mediata* eſt, quæ fit per certa media, quæ plerumque *cauſæ ſecundæ* dicuntur. Huc ſpectat propagatio per ſemen, nutritio per cibum & potum, & progerminatio frugum per bonam tempeſtatem & ſemina.

Conſervatio Dei etiam in *ordinariam* & *extraordinariam* diſpeſci ſolet. Illa fit per curſum naturæ & cauſas ſecundas, hæc vero per miracula ſ. extraordinarios omnipotentia Dei effectus.

Eſt itaque *mundus* neutiquam machina aliqua, quæ per ſe ſubſiſtit, nec quaſi horologium, cujus motus a ſtructura ſua ita dependet, ut nullius indigeat adjumento. Errant igitur, qui cum Naturaliſtis perhibent, omnia in mundo fieri caſu & per ordinem, naturæ impreſſum,

aut, qui cum Paracelsistis *archeum mundi* statuunt, qui quasi anima sit totius universi, a qua omnes mutationes & vicissitudines in mundo veniant.

Datur quidem generale aliquod principium vitalitatis in natura, quod nonnulli vim *plasticam* & *motricem* vocant, sed eadem non nisi cum influxu divino operationes suas exercet.

Indidit etiam Deus naturæ certas vires, secundum ejus voluntatem sese movendi, quæ quasi istius leges sunt, quas transgredi non vult in suo cursu: at non tamen Deus propterea otiosus spectator terrestrium rerum dicendus est, Joh. V, 17.

CAPUT V.

DE

GUBERNATIONE DEI ET EJUS CONCURSU AD CAUSAS SECUNDAS.

Gubernatio Dei est ille divinæ providentiæ actus, quo omnium creaturarum motus & actiones ex libero arbitrio & sapientissimo consilio regit & gubernat.

Largitus est quidem Deus omnibus creaturis certas vires & virtutes, se ipsas movendi, deditque in specie hominibus liberum arbitrium faciendi quæcunque velint: sed ubique simul influxu suo iis ita præsto est, ut nec vires, nec liberum arbitrium sine voluntate ejus in actum veniant. Vocatur hoc a Theologis

logis admodum barbare *concurfus ad causas secundas.*

Causæ secundæ sunt quasi causæ intermediæ, quibus Deus ad consequendos fines suos utitur. Ad hunc usum ipsi omnes vires & virtutes creaturarum serviunt. Est igitur *concurfus Dei ad causas secundas* nil aliud, quam universalis Dei gubernatio totius mundi & singularum creaturarum mediantibus earum viribus & virtutibus, naturaliter ingentis.

Duplex est *concurfus Dei* ad causas secundas, *physicus & moralis.*

Concurfus physicus versatur circa creaturarum motus & *moralis* circa earum actiones. Ille magis ad creaturarum conservationem, hic vero ad earum gubernationem spectat. Sicut vero omnis actio liberum arbitrium supponit, ita *concurfus Dei moralis* tantum apud homines locum habet.

Gubernatio Dei aut sic dictus *concurfus* versatur tam circa causas, quam circa earum effectus.

Causæ sunt vel *naturales*, vel *fortuitæ*, vel *morales*. Ad omnes Deus concurrit. Concurrit ad causas naturales, Deut. XI, 14. 15. Jer. V, 24. 2 Chron. VII, 13. c. XX, 37. Amos. IV, 7. 9-11. Concurrit ad causas fortuitas, Exod. XXI, 13. Prov. XVI, 33. Amos. III, 6. Concurrit denique ad causas morales, Prov. XXI, 1. c. XVI, 1. 9. c. XIX, 21. Jer. X, 23.

Malebranchius, qui auctor systematis causarum occasionalium est, concursum Dei ultra modum extendit docendo, Deum per membra & organa corporis omnia efficere, quæ anima facere velit. Daret quasi homo cogitando Deo occasionem, omnia in eo faciendi.

Concursus Dei ad effectus fit per quatuor actus, nempe permissionem, impeditionem, directionem & determinationem.

Permissio est actus gubernationis divinæ, quo Deus malas actiones fieri permittit. Objectum igitur hujus permissionis sunt malæ actiones, quas Deus permittit, non quidem moraliter, sed physice: non per omissam prohibitionem, sed per omissam impeditionem. Fit ex occultis, iisque sapientissimis, causis, & quidem tam respectu piorum, ut exempla Davidis, Ps. CXIX, 67. 71. & Petri, Luc. XXII, 32. docent, quam impiorum, e. g. Pharaonis, Exod. IV, 21. c. VII, 3. c. X, 1. 2. c. XIV, 4. cujus memorabilis interitus gloriam Dei eximie promovit. Permittit autem Deus malas actiones, 1) ex justitia, Rom. I, 24 sq. Psalm. LXXXI, 12. 13. 2) ex sapientia, Gen. L, 20. 1 Cor. I, 23. 27 sq. & 3) ex studio correctionis, Jer. XXXI, 19. 2 Cor. XII, 7 sq.

Ad quæstionem: *num Deus ad malam actionem concurrat?* respondetur distinguendo inter actionis

nis

nis motum physicum & ejus moralitatem, quam multi Theologi ἀταξίαν nominant. Ad priorem, non vero ad posteriorem, quæ ab hominis determinatione dependet, Deus concurrit. Alii distinguunt etiam inter τὸ materiale & τὸ formale malæ actionis. Illud est mala actio, quatenus actio est, hoc vero determinatio actionis, quatenus mala est. Ad prius, non vero ad posterius Deus concurrat.

Impeditio est alter actus divinæ gubernationis, quo Deus non fieri permittit id, quod sine læsione sui nominis permittere nequit. Impedit autem tam actus irrationalium creaturarum, Dan. VI, 22. c. III, 27. quam actiones rationalium & quidem tam bonas, Act. XVI, 6. 2 Sam. VII, 5. quam malas, 1 Sam. XXIII, 27. 28. c. XXV, 32. Fit hæc impeditio vel in ordine naturæ & gratiæ, vel extraordinarie, ut exempla Pharaonis, Gen. XII, 17. Bileami, Num. XXII. & Sauli Act. IX. probant. Distinguitur autem impeditio divina in moralem & physicam, quæ ultima plerumque violenta est.

Directio tertius est actus gubernationis Dei, quo aliquid ad certum finem ab eo intentum dirigit. Dirigit autem non modo bonas actiones, Matth. II, 1 sq. sed etiam malas, Gen. L, 20. Act. IV, 28. nec non consilia & cogitationes,

nes, Prov. XXI, 1. Ps. XXXIII, 15. casus fortuitos, Jud. XVI, 25. 30. & morbos, Joh. XI, 4. Omnia iis, qui Deum amant, in bonum vergunt, aut, ut Paulus hoc exprimit, πάντα συν-
 ἔργει εἰς ἀγαθόν, Rom. VIII, 28.

Determinatio denique est quartus gubernationis divinæ actus, quo Deus id, quod creaturis accidit, ita determinat, ut voluntatis suæ constitutum terminum non superet. Fit hoc tam respectu temporis, quam modi. Exempla sunt Jobus c. I & II. & populus Israel, peste percussus, 1 Chron. XXI, 27. Huc etiam spectant divinæ promissiones de minuendis poenis & avertendis malis.

CAPUT VI.

DE

FORTUNA ET FATO.

Fortunam in genere dicimus nexum causarum incognitarum, qui eventus rerum nobis reddit inexpectatos.

Inexpectatus vero rerum eventus, quatenus nobis vel ex voto vel non ex voto accidit, respectu hominis, cui accidit, *fortuna* in specie vocatur.

Si homini aliquid ex voto & sententia accidit, *fortuna secunda* s. *prospera* dicitur, & si ei
 non

non ex voto & sententia accidit, *fortuna adversa* nuncupatur.

Homines quotidie fortunæ ludibrio expositi sunt. Res enim plerumque iis præter spem & opinionem accidunt. Dum enim vel rerum causas prorsus ignorant, vel falsos illis tribuunt effectus, res omnino multo aliter iis eveniunt, quam cogitarunt.

Ethnici *fortunam* inter Deas retulerunt & nudam globo insistentem pinxerunt, ut significet, eam non modo magnam inter homines habere potestatem, sed etiam valde esse mutabilem. Christiani utrumque experiuntur. Potestatem & mutabilitatem fortunæ per totam vitam conqueruntur; & quod maximum est, plerumque animadvertunt, fortunam tam injustam esse, ut in regimine suo nullorum meritorum rationem habeat.

Sed quæritur: *a quonam principio tanta fortunæ volubilitas & cæcitas dependeat?*

Ethnici plerumque *fato* adscripserunt inopinatos fortunæ casus, cui inexsuperabilem & ineluctabilem tribuerunt vim. Fecerunt hoc imprimis Stoici Philosophi, a quibus etiam nomen *fati stoici* ortum est. Intelligebant per istud fatalem illum causarum naturalium nexum, secundum quem credebant, omnia necessario, & quidem in suo ordine, statoque tempore, fieri; & cum homines rarissime id, quod fit, prævideant, per cæcam quasi sortem id ipsis evenisse videbatur.

At

At sic tollitur omnis libertas agendi, Deoque non opus est, qui cuncta moderatur. Jure meritoque hinc rejicimus ejusmodi fatum, ipsis ethnicis, saniori mente præditis, exosum, aliudque non statuimus, quam quod ipsa Dei providentia concernit. Huic soli tribuimus sortem & fata, quibus trahimur retrahimurque in vita nostra.

Omnis fortuna nostra tam prospera, quam adversa a Deo ejusque providentia dependet. Datur omnino quidem *fortuna*, seu ejusmodi causarum incognitarum nexus, qui rerum eventus nobis reddit inopinatos, Eccl. IX, 11. sed versatur sub gubernatione Dei, Gen. XXIV, 50. c. XXXIX, 3. Deut. XXX, 9. Amos. III, 6. Prov. XVI, 33. Sir. XI, 14. Fortuna itaque non apud Deum, sed tantum apud homines locum habet. Hi soli sunt, quibus aliquid forte fortuna fieri videtur, quod tamen non nisi secundum sapientem Dei providentiam evenit.

Homo quidem *sua* ipsius *fortune* *faber* dicitur, sed non in tali sensu, ut quasi causarum nexum in sua potestate habeat & rerum eventus determinare queat, sed quatenus Deum per actiones suas commovet, ut rerum eventus vel ad ejus punitionem vel remunerationem dirigat, Hos. XIII, 9. Interdum etiam Deus causarum cursum in eo ordine progredi jubet, in quem homo ipse res suas perverso modo deducit.

CAPUT VII.

DE

CONCURSU DEI MORALI.

Operæ pretium est, aliquid speciatim *de concursu morali* addere, cum supra tantum de Dei concursu physico egerimus.

Dicitur *providentia moralis*, quia non modo circa actiones hominum *morales*, sed etiam *moraliter* circa easdem versatur.

Actiones hominum vocantur *morales* respectu legum, ad quarum normam fieri debent. Si cum legibus conveniunt, *bonæ*, si vero ab his discrepant, *malæ* nominantur. Competit autem in omnem actionem certa moralitas, cujus respectu vel bona vel mala est. Sicuti vero leges non unius ejusdemque conditionis sunt, quia aliæ ad civilem, aliæ ad spiritualem vitam nos ducunt, ita etiam actiones hominum tam bonæ quam malæ vel *civiliter* vel *spiritualiter* morales sunt. Circa utrasque versatur providentia moralis.

Modus vero, quo circa istas versatur ea, *itaque moralis* est. Versatur enim *moraliter* h. e. ita, ut hominum voluntas ad hoc vel illud commoveatur. Libertati hominum tamen non vim affert talis operatio divina. Utitur enim Deus ejusmodi rationibus, quæ non coacte, sed libere voluntatem humanam flectere possunt.

Non quidem Deus providentiam hanc *moralem* semper *immediate* exercet per operationes

nes Spiritus S. internas, Rom. VIII, 14. Gal. V, 18. Pf. CXLIII, 11. Luc. II, 27. sed etiam & præcipue *mediate*, partim per *angelos*, Matth. II, 13. 19. Act. XXVII, 23. partim per *homines*, & quidem per ministros ecclesiæ, magistratus, patresfamilias & alias personas. Quando id, quod per homines in aliis moraliter efficitur, ad res spiritualiter bonas bonas pertinet, Spiritus S. cum sua cooperatione semper præsto est.

Providentia moralis præstatur per hortationes, suasiones, obtestationes, promissiones, comminationes, approbationes, remunerationes, redargutiones & alias ejusmodi actiones divinas, de quibus in Scriptura S. multa occurrunt exempla, quæ nos movere possunt, a malis actionibus abstinere, bonis vero insistere.

CAPUT VIII.

DE

TERMINO VITÆ.

Vitam humanam *terminum* habere, ex Hiob. XIV, 5. Pf. XXXIX, 5. Pf. CXXXIX, 16. Act. XVII, 26. & Deut. XXXI, 14. satis superque patet.

Deus hujus termini quidem auctor est, at non absolute, sed certo tantum respectu.

Hominem mors nunquam invasisset, nisi lapsus esset. Orto autem peccato, orta etiam est mors, omnium hominum vitam abrumpens.

Uti

Uti vero Deus per essentiam suam non potest non omnia, quæ in tempore fiunt, ab æterno prævidere: sic etiam prævidit & lapsum & mortem hominum, antequam eos crearet. Et hæc prævisio divina finem vitæ nostræ ita determinat, ut coram Deo omnino pro termino fixo habendus sit.

Homo ordinarie non moritur, nisi id, quod naturam & constitutionem corporis ejus conservat, cessat. Dicitur istud plerumque humidum radicale & calidum nativum. Utroque hoc cessante turbatur *κράσις* corporis, viresque ejus sensim prosteruntur, donec tandem homo exstinguitur. Ps. XC, 10. Interim cum Deus non modo exitum cujusvis hominis accurate præsciat, sed etiam ad causas secundas, quibus hominis valetudo sustentatur, concurrat, Deus omnino dici potest, ejusmodi hominis terminum vitæ præfixisse.

Est itaque *terminus vitæ nec fatalis nec fortuitus* dicendus.

Fatalis omnino foret, si absolute & immutabiliter ad certum mortis genus & tempus homo destinatus sit. Verum si mors tali modo nos eriperet e vita, nemo manus carnificis nec alium funestum vitæ exitum, cui obnoxius fuit, evitare posset. Interim non modo *Muhamedani*, sed etiam *Calviniani* terminum vitæ omnino fatalem & immutabilem esse perhibent. Sed hæc doctrina homines aut tristes & conturbatos, aut audaces & temerarios reddit.

Quod

Quod Deus prævidit, certissime quidem evenit, at non propterea id evenit, quia prævidit, sed Deus prævidit, quia evenit. Si enim aliter eveniret, quam revera evenit, Deus etiam aliter id prævidisset.

Facile probari potest ex sacris literis, terminum vitæ neutiquam fatalem esse, sed ab ordine naturæ & certis causis dependere, si exempla divinaque testimonia de mutato vitæ termino consideramus.

Mutat Deus & mediate & immediate terminum vitæ. *Mediate* fit non modo ab homine ipso vel crassa vel subtili ratione, sed etiam ab aliis hominibus. Utrumque Deus permittit. *Immediate* vero fit partim prolongando, partim abbreviando vitam.

Prolongat Deus interdum vitam hominum tam ex promissione generali, Exod. XX, 12. Prov. III, 1. 2. Deut. XXX, 20. 1 Reg. III, 14. quam ex causis specialioribus, ut exempla Hisikiæ, Jes. XXXVIII, 5. Pauli, 2 Cor. I, 8-11. Epaphroditi, Phil. II, 27. & eorum, qui ex morte in vitam reducti sunt, testantur.

Abbreviat etiam terminum vitæ, dum non modo *piorum* vitam ex singulari providentia decurtat, Sap. IV, 10-14. Jes. LVII, 1. 2. 1 Reg. XIV, 13. 2 Chron. XXXIV, 28. sed etiam impios præmatura morte aufert, quod partim ordinarie per gladium magistratus fit, partim extraordinarie per varia judicia & morbos, Ps. LV, 24. Ps. CIX, 8. Prov. X, 27.

Ex-

Exinde patet, quod terminus vitæ neuti-
quam *fortuitus* vocari debeat, ut ab Epicureis,
Naturalistis & Atheis fit, Sap. II, 2. Nil enim
fit in mundo fortuito. Datur quidem fortuna,
sed quid de ea judicandum sit, jam supra osten-
dimus.



LIBER IV.

DE ANGELIS.

Cum *angelorum* detur duplex status, doctri-
na de iis optime dividi potest in *tres Sectio-
nes*, quarum *prima* de angelis in genere, *altera*
de angelis bonis & *tertia* de angelis malis s. dæ-
monibus agit.

SECTIO I.

DE

ANGELIS IN GENERE.

CAPUT I.

DE

EXISTENTIA ANGELORUM.

Existentia *angelorum* s. *spirituum* haud eviden-
ter ex lumine naturæ patet. Istud enim
nil aliud nos docet, quam quod sensus tangit

Pars I.

P

& cu-

& cujus natura non intellectum nostrum transcendit. Interim cum existentia angelorum non pugnet cum lumine naturæ, sat probabilibus rationibus facile eo adigi potest homo, ut eos credat.

Qui *occultas* in mundo *operationes* non negat, nec negare potest *occultas causas*. Has vero sine subiecto inhæſionis cogitare, absurdum est. Exinde liquet, quod dentur substantiæ potentes, quibus operationes occultæ tribuendæ sunt.

Tales substantiæ vero non possunt esse materiales, quia operationes occultæ invisibiles sunt. Si non sunt materiales, nec sunt corporales. Quod autem nec materiale nec corporale est, id est spirituale. Exinde sequitur, dari *Spiritus* sive substantias incorporeas, quibus operationes in mundo occultæ adscribendæ sunt. Talis spiritus est ipse *Deus* & quidem in sensu excellentissimo, quippe qui spiritus independens est, omnia in mundo moderans.

Huic autem cum non omnia, quæ in mundo occulte fiunt, adscribere queamus, sequitur, dari etiam *Spiritus*, a quibus operationes occultæ, quæ cum voluntate Dei pugnant, proficiunt. Hoc posito, probabile est, existere etiam alios *Spiritus*, a quibus operationes occultæ, quæ non cum voluntate Dei pugnant, veniunt.

Vulgo sub nomine *mundi intelligibilis* comprehenditur, quicquid ad spirituum regnum & eorum operationes spectat. Opponitur *mundo*
sensi-

sensibili, sub quo creaturæ sensibiles, quæ vel sentiunt, vel sentiri possunt, intelliguntur. *Spiritus* mundum intelligibilem constituunt, quia intelligentia præcipua eorum facultas & virtus est.

Qui sacris literis imbutus est, existentiam spirituum & angelorum non in dubium vocabit. Occurrunt enim in Scriptura S. non modo multa de iis eorumque operationibus & apparitionibus divina testimonia, sed etiam fide dignissima exempla. Provocari quoque posset ad experientiam eorum, qui de spiritibus & spectris multa vidisse se jactant, si non ejusmodi visus & apparitiones plerumque effectus forent perterriti animi & deceptæ imaginationis.

Est quidem *doctrina de angelis* non ad primarios fidei articulos referenda, spirituum tamen existentia a nemine, nisi qui Naturalismi argui vult, negari potest, Act. XXIII, 8.

Præcipua Scripturæ S. loca, ex quibus existentia Spirituum s. angelorum probari potest, sunt Gen. XXXII, 1. Ps. XXXIV, 8. Ps. XCI, 11. Ps. CIII, 20. Ps. CIV, 4. Matth. IV, 11. c. XVIII, 20. c. XXII, 30. c. XXV, 31. c. XXVI, 53. Luc. XI, 25. c. XVI, 22. c. XXIV, 37. 39. Act. XXIII, 8. Gal. I, 8. Eph. VI, 12. 2 Petr. II, 4. Hebr. I, 4-7. Jud. v. 6.

Existentiam angelorum olim prorsus negarunt *Sadducæi*, Act. XXIII, 8. nec non *Samaritani*, qui per eos mandata & potentiam Dei intellexe-

tellexerunt. Negant eos etiam hodierno tempore omnes *Naturalistæ & Athei*.

Malorum spirituum operationes negavit BALTHASAR BECKERUS, spectra vero & magiam diabolicam CHRISTIANUS THOMASIVS.

DAVID JORIS cum suis asseclis per *angelos* cogitationes hominum & per *diabolum* corruptam hominum voluntatem intellexit.

Spiritus intermedii, qui quasi bruta in mundo intelligibili esse dicuntur, in Scriptura S. nullum fundamentum habent. Exsunt tantum in cerebro eorum, qui decepta phantasia laborant, & studium novaturiendi amant. Operationes, quas iis tribuunt, diabolicam malitiam satis produnt.

CAPUT II.

DE

ESSENTIA ET NATURA ANGELORUM.

Angeli vocantur *spiritus*, Ps. CIV, 4. Hebr. I, 7. 14. Eph. VI, 12. Nomen hoc eorum naturam & essentiam satis indicat.

Spiritus a *spirando* nominatur in omnibus linguis. In Hebraica vox רוח a נשם, & in Græca vox *πνεῦμα* a *πνέω* descendit. Utrumque etymon idem ac *flare* & *spirare* significat. Proprie de vento & halitu usurpatur. Facile exinde cognoscitur, per *spiritum*, ab Hebræis רוח & a

& a Græcis πνεῦμα dictum, non aliam substantiam intelligi posse, quam corpore & figura destitutam & invisibilitate gaudentem.

Naturam talis substantiæ non quidem explicari possumus, quia in hac vita nobis semper occulta manet. Sufficit tamen, quod opponatur substantiæ corporeæ. Sunt quidam, qui angelis *subtile* aliquod *corpus* tribuunt, ut veteres Platonici & certi Patres Ecclesiæ, nec non nostris temporibus Jo. CHRISTIANUS LOERS, Theologus Duisburgensis, & CAROLUS FRID. GOEDE, aliique ex eruditorum cohorte fecerunt. Sed cum Scriptura S. angelos nobis tanquam substantias delineet, quæ omnis materiæ expertes sunt, missam omnino sententiam hanc facimus.

Datur quidem materia tam subtilis, ut non in cernendi sensum cadat, e. g. aër. Attamen facile aliis sensibus percipi potest. Spiritum vero per se nullo modo percipere possumus, nec visu, nec auditu, nec olfactu, nec tactu, nisi extraordinarie induat corpus & operetur in & per materiam.

Est itaque spiritus *substantia simplex*, quia non ex materia compositus est. Christus propterea expresse dixit, spiritum non habere carnem & ossa, Luc. XXIV, 39. Dixit hoc eo tempore, cum discipulos suos de veritate corporis sui, quod tunc glorificatum erat, certos reddere voluit.

Cum igitur spiritus omnis materiæ expertes sint, aliud quid eorum naturam constituere debet. Hoc sunt istæ facultates, quibus existentiam suam manifestant, quæ autem non possunt non ita comparatæ esse, ut suo subiecto dignæ & convenientes sint. Huc pertinent intellectus & voluntas, nec non potentia agendi.

Spiritus itaque est substantia materiæ expertis, intellectu & voluntate, nec non potentia agendi prædita.

Nominantur vulgo *angeli* ab ἀγγέλλειν, *nunciare*, quia olim Dei nuncii ad homines fuerunt, Hebr. I, 14.

Deus & *anima hominis* inter spiritus quidem æque ac angeli numerantur, sed ab iis valde distinguendi sunt. *Deus* enim est spiritus independens & infinitus, angelus vero spiritus dependens & finitus. *Anima hominis* est quidem verus spiritus, sed incompletus, quia non nisi cum corpore completam habet substantiam; angelus vero est spiritus completus, qui per se sine corpore subsistit.

Spiritus, qui sine corpore subsistit, tres habet proprietates, 1) incorruptibilitatem, 2) invisibilitatem, 3) illocalitatem.

Angeli itaque sunt incorruptibiles, invisibiles & illocales.

Sunt 1) *incorruptibiles*, non quidem absolute, sed ex benignitate Creatoris, qui æquali facilitate id, quod ex nihilo produxit, iterum annihilare potest. Placuit autem Deo, eos ita crea-

creare, ut per se nec mori nec interire queant, Luc. XX, 30. Sunt igitur substantiæ simplices, quæ non ex certis partibus compositæ sunt, ideoque dissolvi nequeunt.

Sunt 2) *invisibiles*, quia immaterialitate gaudent. Quicquid in cernendi sensum cadit, speciem & figuram habere debet. Hac vero cum angeli destituti sint, neutiquam cerni possunt. Quid vero de eorum apparitionibus judicandum sit, infra ostendetur.

Sunt denique 3) *illocales*, quia propter immaterialitatem nullo loco inclusi sunt. *Locus* dicitur spatium, quod a materia circumscripte & extensive repletur. Sicut vero totus mundus ex materia constat, ita quoque in mundo proprie non datur spatium, quod vacuum sit, quia secundum principia elasticitatis creatura creaturæ semper locum cedit. Angeli sunt quidem *in loco*, sed *indefinite*, h. e. ita, ut nec repleant, nec circumscribant locum, quia extensione & specie externa carent. Movent se quidem de loco in locum, Matth. IV, 10. 11. c. VIII, 32. Luc. XI, 24 - 26. sed non nisi infinito & tali modo, qui eorum naturæ conveniens est, nec non tanta velocitate, ut instar cogitationum intra unius momenti spatium huc illuc se conferant. Tribuuntur iis propterea alæ, quibus quasi volant, Jes. VI, 2. Dan. IX, 21. Possunt ideo clausas portas & solidam materiam penetrare, Luc. XXIV, 36. 37.

CAPUT III.

DE

ORIGINE ANGELORUM.

Angelos non ab æterno esse, sed in *tempore* originem cepisse, nemo negat, qui æternitatem inter solius Dei attributa numerat. Non Deus tantum, sed etiam Christus eorum Creator appellatur, Col. I, 16. Quo tempore autem a Deo, omnium rerum extra se existentium auctore, creati sint, non satis constat.

Eos autem nec ante, nec post, sed *intra sextiduum*, quo Deus cœlum & terram condidit, creatos esse, res extra omnem dubitationis aleam posita est. Nam ante mundum conditum nulla extitit creatura, Ps. XC, 2, nilque in principio rerum adfuit, nisi Deus, Joh. I, 1. 2, post sextiduum vero Deus ab omni opere creationis ordinario quievit, Gen. II, 2.

Certum igitur est, angelos intra primos sex dies creatos esse; *quo autem die*, ex historia creationis non liquet. Sine dubio sub exercitu cœli intelliguntur, Gen. II, 1, Neh. IX, 6, Luc. II, 13.

Sunt, qui ex Ps. CIV, 2-4. judicant, angelos die secunda originem cepisse. Alii vero probare student, eos sexta die creatos esse, quod imprimis D. JO. BALTHASAR BERNHOLDUS statuit in *Dissertatione*, quam A. 1731. Altorfii habuit. Multis quoque ex Hiob. XXXVIII, 4-7. creditu non difficile visum est, angelos statim
prima

prima die & quidem ante jactum mundi fundamentum conditos esse.

Sed omnes hæ opiniones argumentorum pondere laborant. Verisimillimum est, spiritus originem cepisse, antequam Deus homines creavit, quia non modo iis ministrare debebant, Hebr. I, 14. sed etiam jam ante eorum existentiam Deum laudasse dicuntur, Hiob. XXXVIII, 7.

Non datur *materia*, ex qua creaverit Deus angelos, quia spiritus sunt completi, omni materia destituti. Substantiam habent simplicem, quæ partibus caret, ex quibus composita sit. Ex nihilo itaque Deus istos reddidit existentes vi omnipotentiae suæ, qua etiam lucem primigeniam creavit dicendo: *fiat!* Gen. I, 3.

Sunt autem omnes *una* creati, quia non sicut animæ humanæ aut aliæ creaturæ, se ipsos propagandi facultatem acceperunt. Patet exinde eo magis simplicitas essentiae eorum, quia propagatio per generationem cum ista pugnat.

C A P U T IV.

D E

EXCELLENTIA ANGELORUM.

Angelos inter omnes creaturas *excellentissimas* esse, quilibet concedet, qui considerat excellentiam naturæ eorum proprietatumque præstantiam, inter quas incorruptibilitas, sin-

gularis potentia agendi & præstantissima sciendi facultas præcipuæ sunt. Has ne quidem lapsus infirmavit, cum ipsi cacodæmones maxima ex parte adhuc de iis gloriari possint, ut infra docebimus.

Aucta autem est eorum excellentia per beatitudinem, ad quam post confirmationem in bono evecti sunt. Expresse nunc dicuntur coram throno Dei stare, 2 Chron. XVIII, 18. Dan. VII, 10. Apoc. V, 11. c. VII, 11. & faciem Patris cœlestis semper intueri, Matth. XVIII, 10. Equidem mali spiritus per excellentiam naturæ suæ etiam ad solium Dei accedere possunt, Hiob. I, 6. c. II, 1. & 2 Chron. XVIII, 20. sed non simul fruuntur beatitudine cœlesti.

Angelorum excellentia 1) ex eorum *nominibus* patet, dum *filius Dei*, Hiob. I, 6. c. II, 1. c. XXXVIII, 7. *Elohim*, Ps. VIII, 6. coll. Hebr. II, 7. *stella matutinæ*, Hiob. XXXVIII, 7. *flamma ignis*, Ps. CIV, 4. *Mabanaim*, Gen. XXXII, 2. & denique *throni*, *dominationes*, *principatus* & *potestates*, Col. I, 16. Eph. VI, 12. nominantur.

Patet excellentia eorum etiam 2) ex *officiis*, quæ Deo præstant, dum non modo mandata & iudicia divina singulari virtute exequuntur, sed etiam ad amplificandam divinam gloriam multum conferunt, Hiob. XXXVIII, 7. Jes. VI, 2. 3. Ps. CIII, 20. 21. Ps. CXLVIII, 2. Apoc. VII, 11. 12. Hac de causa etiam aliquando Christum ad iudicium gloriose rediturum comitabuntur, ejus-

ejusque adventum sono tubarum proclamabunt, Matth. XXV, 3. 1 Theff. IV, 16.

Ob tantam excellentiam ipse Christus cum iis comparatur, Hebr. I. ut eo magis ejus personæ præstantia & dignitas innotescat.

Sunt, qui negant, angelos *ad imaginem Dei* creatos esse. At quis hoc in dubium vocet, cum angeli non modo Dei filii nuncupentur, sed summa etiam sapientia & sanctitate, ex quibus imago divina præcipue consistit, gaudeant?

Quidam etiam negant, angelos excellentiores esse hominibus, 1) quia dicantur πνεύματα λειτουργικά, Hebr. I, 14. 2) homines custodire debeant, Ps. XCI, 11, 12. 3) Christus non angelorum, sed hominum naturam assumeret, Hebr. II, 14. 15. & denique 4) Deus non lapsorum angelorum, sed lapsorum hominum misertus sit.

At respondemus ad 1) quod, non tam respectu hominum, quam ipsius Dei πνεύματα λειτουργικά dicantur; ad 2) quod custodia hominum etiam Deo tribuatur, Ps. CXXI, 3. ad 3) quod quidem Christi assumpta humana natura, non vero ipsorum hominum natura excellentior facta sit natura angelica; & ad 4) quod Deus, cum solius generis humani misertus sit, eo ipso significaverit, angelos excellentiores esse hominibus, quia ob acceptam majorem perfectionem minorem commiserationem mereantur.

NUMERO ET ORDINE ANGELORUM.

Angelorum numerum non quidem definire possumus, eum tamen valde magnum esse, certum est.

Scriptura S. mentionem facit multorum *μυριάδων* s. innumerabilium angelorum, qui Deo serviant, Ps. LXVIII, 18. Dan. VII, 10. Hebr. XII, 22. Christus sibi plus quam duodecim legiones angelorum a Patre expetere potuisse testatur, Matth. XXVI, 53. & Gehasi vidit totum montem angelorum auxiliatricium plenum, 2 Reg. VI, 17.

Spiritus malorum numerus non minor est numero bonorum angelorum. Ille obsessus fatabatur, in se integram habitare spirituum immundorum legionem, quæ apud Romanos communiter numerum indicabat, qui ex sex millibus militum constabat.

Exinde cognoscitur, numerum angelorum *multitudini hominum* fere æquiparandum esse. Num vero istam superet, indicari nequit.

S. Brigitta magna cum temeritate olim docuit, angelorum tot esse, ut cuilibet homini decem eorum assignari queant, *Ambrosius* vero ex Luc. XV, 4. conjecturavit, angelorum numerum superare copiam hominum nonagies novies.

novies. Sed de hac re nil amplius nobis constat, quam quod in Scriptura S. revelatum est.

Ingens hic angelorum numerus certos inter se *ordines* & *gradus* habet. Non enim unius ejusdemque generis & muneris sunt angeli, etsi non satis liqueat, in quo diversitas ordinis eorum proprie consistat. Essentia & specie vix credo inter se differre, cum spiritualis & simplex eorum natura neutrum admittat. Interim differentia angelorum per se non in dubium vocanda est.

Deus, qui ordinem amat, 1 Cor. XIV, 40. omnes in mundo creaturas in certos ordines distribuit & per eosdem mirificam suam sapientiam multifarie patefecit; cur non etiam amorem ordinis in creatione angelorum, tanquam excellentissimarum suarum creaturarum, adhibuisset, ita, ut unus alterum instar stellarum claritate & gloria superet? Eo magis id credendum est, quia electi, qui angelis assimilabuntur, Matth. XXII, 30. expresse dicuntur, se invicem aliquando in vita æterna claritate superaturos esse, 1 Cor. XV, 41. 42.

Satis perspicue *diversitas angelorum* eorumque *ordinis* patet 1) ex *nominibus propriis*, quæ certis angelis tribuuntur, qualia sunt *Gabriel*, Dan. VIII, 16. c. IX, 21. *Luc. I*, 19. *Michael*, Dan. X, 13. *Raphael*, Tob. III, 25. *Uriel*, 4 Esr. IV, 1.

Patet 2) ex *nominibus dignitatis*, quæ angelis in Scriptura S. adscribuntur. Hujus generis
sunt

sunt *Cherubim*, Gen. III, 24. *Seraphim*, Jes. VI, 2. *throni*, *dominationes*, *virtutes*, *principatus* & *potestates*, Col. I, 16. Eph. I, 21. *archangelus*, 1 Theff. IV, 16. &c.

Patet 3) ex *differentia malorum spirituum*, qui certum inter se habent ordinem & talem quidem, qualis est imperantium & parentium. Nam non modo mentio fit *Beelzebubi*, tanquam principis dæmoniorum, Luc. XI, 25. sed etiam *diaboli* & *eius angelorum*, Matth. XXV, 41. Apoc. XII, 9.

Patet denique 4) ex *Dan. VII, 10*: ubi alii angeli Deo serviisse, alii vero coram eo stetisse dicuntur.

Pontificii *tres angelorum choros* constituunt, quorum quilibet ex tribus ordinibus constat. Ad primum chorum referunt *Cherubim*, *Seraphim* & *Thronos*, ad alterum *Dominationes*, *Virtutes* & *Potestates*, & ad tertium *Principatus*, *Archangelos* & *Angelos*. Sed ex Scriptura S. hoc pari difficultate, quam Judæorum somnium de decem angelorum ordinibus, de quo BUDDÆUS in *Philos. Hebræorum* p. 415. egit, probari potest. Provocant Pontificii ad DIONYSII librum de *Hierarchia cælesti*, per quem intelligunt DIONYSIUM AREOPAGITAM per Paulum conversum, Act. XVII, 34. qui id ei revelasse autumant, quod Paulum vidisse credunt, cum in cælum tertium elatus fuerit, 2 Cor. XII, 2. Sed liber hic jure meritoque inter supposititios refertur.

CAPUT VI.

DE

INTELLECTU ANGELORUM.

In *Intellectus* est facultas cogitandi. *Cogitare* autem & sciendi & judicandi actum involvit.

Hac facultate non destituti esse possunt angeli, quia imagine Dei gaudent & inter creaturas excellentissimæ sunt. Ad eorum essentiam omnino pertinet hæc facultas, ut supra ostendimus, quia sine illa nil nisi inanis ventus & umbra forent, nec Deo officia aliqua præstare possint.

Jure meritoque hinc angelis in Scriptura S. tribuuntur ejusmodi operationes, quæ ab intellectu proficiscuntur, quales sunt laudatio, Jes. VI, 3. & adoratio Dei, Hebr. I, 6. nec non cognitio rerum, 2 Sam. XIV, 20. Ephes. III, 10.

Intellectus angelorum multo excellentior est, quam intellectus hominum, 2 Sam. XIV, 20. Intellectui hominum enim objecta se sistunt per sensus, angelorum vero intellectui objectorum repræsentatio fit per ideas. Est autem angelorum intellectus æque limitatus, ac intellectus hominum, quia non modo eorum cognitio crescere solet, 1 Petr. I, 12. sed etiam multa ab iis prorsus ignorantur.

Triplex datur angelorum *cognitio*, naturalis, revelata & beatifica, quas alii habitualementem, experimentalem & intuitivam nominant.

Cognitio

Cognitio naturalis s. *habitualis* angelis concreata est. Versatur circa res omnes existentes, quas cognoscunt per se secundum internam & externam formam & constitutionem.

Cognitio revelata s. *experimentalis* ea est, quam vel per revelationem vel per experientiam habent. Futura contingentia per se ignorant, licet occultum causarum nexum ob suam sagacitatem multo melius introspicere queant, quam homines. Incognitæ iis etiam sunt cogitationes hominum. Non aliter quam ex signis aut effectibus istas conjicere possunt. Solus enim Deus καρδιогνώστης est, Jer. XVII, 10. Act. I, 24. c. V, 8. Nesciunt etiam diem extremi judicii, Marc. XIII, 22. nec non decreta & consilia Dei, Rom. XI, 34. Interim non modo multa per experientiam discunt, 1 Petr. I, 12, Eph. III, 10. sed iis etiam Deus multa revelat.

Cognitio beatifica s. *intuitiva* solis angelis in bono confirmatis propria est. Versatur circa Deum & omnia, quæ ad divinam gloriam & æternam beatitudinem spectant. Hæc eadem est, ad quam homines electi aliquando eveniunt, 1 Cor. XIII, 12.

Angeli proprie non habent *loquelam*, etsi linguarum angelicarum mentio fiat, 1 Cor. XIII, 1. Deumque laudare dicantur, Jes. VI, 3. At possunt tamen non modo secum invicem communicare ideas, sed etiam ope aëris certos sonos & certa verba formare, quibus
cum

cum hominibus olim fermocinati sunt, Dan. VIII, 17. c. IX, 22. Luc. I, 13. 19. 28. c. II, 10. c. XXIV, 4-6. Act. I, 10. 11.

C A P U T VII.

D E

VOLUNTATE ANGELORUM.

Voluntas est facultas appetendi bonum & averfandi malum. Conjuncta esse solet cum intellectu. Hoc cum præditi sint angeli, omnino iis etiam voluntas tribuenda est. Monstrant autem angeli eam in omnibus actionibus, quæ in Scriptura S. illis adscribuntur. Semper enim ad certos fines agunt & quo ipsos ducit inclinatio eorum. *Boni angeli* plerumque opera & consilia divina de salute hominum introspicere cupiunt, 1 Petr. I, 12. *mali* vero obambulando quærunt, quem deglutiant, 1 Petr. V, 8.

Ante lapsum voluntas angelorum *libertatem* habuit vel bonum appetendi, vel malum averfandi; post lapsum vero hæc voluntatis libertas iis quidem remansit, ita tamen, ut *boni angeli* nunc tantum hoc vel illud bonum præ altero appetant, aut hoc vel illud malum præ altero averfentur; *mali angeli* autem hoc vel illud malum præ altero appetant & hoc vel illud bonum præ altero maxime averfentur.

Pars I.

Q

Non

Non modo *malum*, quod angeli averfantur, sed etiam *bonum*, quod appetunt, est vel vere vel apparenter tale, pro diverso angelorum statu. Nominamus autem *malum*, quod cum voluntate Dei pugnat, & *bonum*, quod cum eadem convenit. *Angeli* in bono confirmati verum malum averfantur & verum bonum appetunt, *cacodæmones* vero averfantur bonum, tanquam apparens malum, & appetunt malum, tanquam apparens bonum. Habent enim bonum pro malo & malum pro bono.

Angelis etiam non desunt *affectus* s. vehementiores voluntatis inclinationes & commotiones, quales sunt gaudium, Luc. XV, 10. tristitia, ira &c. In primis mali angeli variis affectibus torquentur, e. g. metu, Jac. II, 19. Matth. VIII, 29. 31. invidia, Sap. II, 24. ira, 1 Petr. V, 8. Apoc. XII, 12. &c.

CAPUT VIII.

DE

POTENTIA ANGELORUM.

Potentia est facultas extra se operandi. Hæc angelis neutiquam deneganda est, cum non modo intellectu, sed etiam voluntate gaudeant. Utraque facultas iis foret inutilis, si id, quod velint, facere nequeant.

Dicuntur propterea *fortes robore*, Ps. CIII, 20. *exercitus Domini*, Gen. XXXII, 2. *fortes armati*, Luc.

Luc. XI, 21. *angeli potentia Christi*, 2 Theff. I, 7. *potentes principes*, Eph. VI, 12. & qui *robore ac virtute multo majores sunt hominibus*, 2 Petr. II, 11.

Exempla, quæ non modo de malis, sed etiam de bonis angelis in Scriptura S. occurrunt, satis hoc probant. De *malis* infra latior dicendi campus dabitur, de *bonis* vero hic allegare sufficientia loca, quæ de eorum robore ac virtute evidentissima continent exempla, e. g. 2 Reg. XIX, 35. 2 Sam. XXIV, 16. Gen. XIX, 10. Act. XII, 7. Matth. XXVIII, 2. Ps. LXXVIII, 49. 2 Reg. VI, 17. Act. V, 19.

Est autem *potentia* angelorum *valde limitata*, ita, ut etiam diabolus sine permissione Dei nequicquam facere possit, Hiob. I, 12. c. II, 6. 2 Petr. II, 4. Hebr. II, 14. In specie nequeunt 1) ex nihilo aliquid facere, 2) veras substantias producere, 3) substantias rerum permutare, 4) se ipsos propagare, 5) vera miracula patrare, & 6) contra absolutam Dei voluntatem agere. Interim non negandum est, eos propriis suis viribus admirandos omnino edere posse effectus, qui captum nostrum excedunt, at non tamen miracula, sed tantum *mirabilia* tales dicendi sunt effectus.

Fecerunt interdum quidem angeli *miracula*, sed non propriis viribus. Deus enim per istos potentiam suam præstitit. Vocantur propterea *angeli potentia Dei*, 2 Theff. I, 7.

Ex Dan. X, 13. cognoscimus, angelum angelo interdum succurrere.

C A P U T IX.

D E

APPARITIONE ANGELORUM.

Apparere idem est ac in cernendi sensum cadere. Dicimus id proprie de rebus, quæ non semper nobis ob oculos versantur. Sic apparet stella aut cometa, qui antea nondum visus est. Apparet lux, dum improvise tenebrosus locum illuminat. Plerumque vox hæc usurpatur de spiritibus & defunctis animabus, quando se hominum conspectui sistunt.

Quæritur: *num spiritus proprie apparere queat?* Respondemus negando, quia nil cerni potest, quod non materiam habet. Cum vero spiritus omnis materiæ expers sit, ut supra demonstravimus, de eo etiam non dicere possumus, quod per se & proprie appareat.

Nihilominus multa de apparitionibus angelorum & spirituum in Scriptura S. occurrunt exempla, quæ in dubium vocare nefandum foret. Apparuerunt autem angeli hominibus olim partim in assumpto vero corpore, partim in visione.

Quando in *corpore* apparuerunt, corpus istud ad functionem, cuius causa missi sunt, per unionem accidentalem, (non vero essentialem),

lem), divinitus assumerunt, postea vero iterum deposuerunt. Huc spectant apparitiones, ubi apparens corpus manibus contrectari potuit, e. g. Gen. XVIII, 4. c. XIX, 2. 10. 16. Act. XII, 7.

Plurimæ angelorum apparitiones factæ sunt in *visione*, & quidem duplici ratione; vel specie corporis fefellerunt oculos, vel phantasiæ impresserunt visus. Interdum etiam per solum alloquium, cum sonum perceptibilem in aëre formaverint, sese manifestarunt.

Omnes *apparitiones angelorum bonorum* jussu Dei, qui homines per eas de re aliqua momentosa certos reddere voluit, factæ sunt. Per se autem nunquam apparuerunt. Ex hac causa non amplius expectandæ sunt eorum apparitiones, quia Deus omnes res scitu dignas satis nobis in sacris literis revelavit. Nec habemus de iis aliquam promissionem. Canon Scripturæ S. quæ omnia continet, quæ scitu credituque necessaria sunt, clausus est. A Christo propterea ad solum Mosem & prophetas in rebus fidei & salutis ablegamur, Luc. XVI, 29. Difficulus etiam apparitiones bonorum angelorum, si aliquas statueremus, discernere possemus a diabolicis, quia diabolus non modo personam angeli lucis induere, 2 Cor. XI, 14. sed etiam, uti ex Act. XVI, 16 - 18. & Marc. I, 23. 24. patet, interdum vera dicere potest.

Haud consultum itaque est, nobis apparitiones angelorum a Deo expetere. Est species

tentationis Dei, quæ nobis Matth. IV, 7. interdicitur. Nec sine horrore eas tolerare possumus, ut exempla Danielis, Dan. X, 9. 16. 17. Mariæ, Luc. I, 29. piarum mulierum ad sepulchrum Christi venientium, Marc. XVI, 8. aliorumque piorum hominum docent.

Quid de apparitionibus dæmonum & animarum defunctorum judicandum sit, suo loco indicabimus. Hic annotasse sufficiat, quod sine permissione Dei nullus dæmon alicui homini apparere queat, quia catenis tenebrarum vinctus est.

CAPUT X.

DE

STATU GRATIÆ ANGELORUM.

Primævus angelorum status vocatur *status gratiæ*. Opponitur statui vel gloriæ vel ignominiae. In priorein tempore lapsus pervenerunt ii, qui in bono confirmabantur, in posteriorem vero, qui a Deo infeliciter defecerunt.

Sunt, qui *statum puræ naturæ* fingunt, eumque angelis ante lapsum tribuunt. Intelligunt per eum statum, in quo earum perfectionum indiguerunt angeli, quibus nunc in statu gloriæ gaudent. Sed cum Deus omnia valde bona fecerit, Gen. I, 31, etiam angelos statim ab
initio

initio ita creavit, sicut esse debebant. Judas hinc in Epist. v. 6. expresse scripsit, angelos malos non servasse τὴν ἑαυτῶν ἀρχὴν s. originem suam. Exinde patet, cacodæmones primum bonos fuisse.

Vocatur autem primæva hæc bonitas *status gratia*, quia ex mera Dei gratia suas acceperunt perfectiones, ita tamen, ut earum quoque jacturam facere potuerint.

Gratia itaque h. l. denotat perfectiones habituales, quas Deus angelis ad officia præstanda in creatione contulit. Officia hæc erant, Deum recte cognoscere & super omnia diligere, veritati ejus credere, bonitati suæ confidere, jussis divinis obtemperare & salutem æternam sperare.

His officiis ut recte fungerentur angeli, Deus ex gratia intellectum & voluntatem eorum ita glorificavit, ut inter omnes creaturas non sui similes haberent.

Intellectus angelorum luce quadam habituali præditus erat, qua cognoscere poterant, quæ de rebus supernaturalibus ab iis cognoscenda erant. Lux hæc erat donum, quo Deus eorum intellectui imprimebat omnes rerum cognoscendarum species, ita, ut si non satis evidenter & quales per se sint, tamen respectu modi determinati, indubitanter intelligerent, quantum Deus de iis intelligi volebat. Fidem vero non habebant rebus per evidentiam objecti, sed per auctoritatem revelantis Dei.

Voluntas prædita erat justitia & sanctitate habituali. Poterant hinc angeli in statu gratiæ omnes suas actiones secundum normam voluntatis divinæ instituere & perficere. Continebat autem justitia hæc ac sanctitas totum virtutum supernaturalium complexum, quæ tam ad Deum, quam ad se ipsos & alias creaturas spectabant. Vocatur alias hic complexus *ἀλήθεια* h. e. summa fidelitas, integritas & sanctitas, a qua diabolus defecisse dicitur, Joh. VIII, 44.

Alii *spem* & *charitatem* id nominant, quod per justitiam & sanctitatem exprimimus.

Spes angelorum ante confirmationem in bono directæ erat ad æternam beatitudinem, tanquam bonum absens, certo tamen expectandum. Supponebat spes hæc fiduciam in Deum, ita, ut voluntas eorum in ipso, tanquam summo bono, & quatenus causa efficiens futuræ beatitudinis esset, acquiesceret; *charitas* vero erat habitus, officia sua sine ulla molestia & difficultate ad voluntatis divinæ normam præstandi.

Accedebat *libertas agendi*, qua quoque gaudebant angeli in statu gratiæ. Hæc ita comparata erat, ut ea quidem abuti possent, sed non nisi propria culpa. Intellectus enim & voluntatis perfectiones sufficiens iis sepimentum erant, factam tectamque conservare suam primævam bonitatem. Interim cum nec intellectus omnia evidentissime cognosceret, nec volun-

voluntas jam in bono confirmata esset, fieri potuit, ut magnus angelorum numerus a veritate descisceret & in summum se præcipitaret exitium.

Quamdiu autem duraverit *status gratiæ*, non satis liquet. Facile tamen ex Gen. I, 31. ubi omnia, quæ Deus creavit, valde bona dicuntur, conjecturare licet, lapsum angelorum non intra sextiduum creationis, sed brevi post factum esse. Oriebatur tunc discrimen inter angelos bonos & malos.

Boni dicebantur, qui ex statu gratiæ in statum gloriæ transierant, *mali* vero, qui perdita divina gratia in statum ignominiae & damnationis ceciderant.



SECTIO II.

DE

ANGELIS BONIS.

CAPUT I.

DE

ANGELORUM CONFIRMATIONE IN BONO.

Confirmatio in bono sequebatur angelorum malorum lapsum, de quo infra agemus. Est

Q 5

vero

vero hæc confirmatio in bono determinatio voluntatis angelorum ad omne id, quod cum voluntate Dei convenit, & quidem ita, ut nullo modo a veritate iterum deflectere queant.

Dici etiam potest ἀναμάρτησία s. *impeccabilitas angelorum*, quia non possunt non Deum, perfectissime cognitum, super omnia diligere ejusque sanctissimæ voluntati summa cum voluptate in omnibus obtemperare.

Distinguenda autem est hæc angelorum *impeccabilitas* ab *impeccabilitate Dei*, quæ sola est absoluta, cum illa e contra sit determinata. Non adversantur huic *impeccabilitati* verba Eliphæ, Hiob. IV, 18. c. XV, 15. quippe quæ quidem ex θεοπνευσία consignata, non vero ipsi Eliphæ divinitus inspirata sunt. Comparatur etiam in hisce Scripturæ S. locis sanctitas creaturarum cum sanctitate ipsius Dei, quæ illam longe antecedit.

Est confirmatio angelorum in bono ex æterno quidem, sed non absoluto, Dei decreto, nec ex merito facta. Cum enim Deus prævidisset constantem eorum obedientiam, quam aliis labentibus in statu gratiæ præstituri forent, decrevit, istos in bono confirmare, quod etiam gratiose fecit. Appellantur angeli propterea *electi*, 1 Tim. V, 21.

Confirmatio hæc est pars gloriæ & beatitudinis æternæ, ad quam post lapsum angelorum malorum evecti sunt, quæ gloria tanta est, ut ipsum Deum in summa ejus majestate clare & intuitu

intuitive cognoscere possint. Vocantur propterea *angeli lucis*, 2 Cor. XI, 14. quia semper vident faciem Dei, Matth. XVIII, 10. in luce inaccessibili habitantis, 1 Tim. VI, 16. Et hæc visio idem est ac beatitudo æterna, 1 Cor. XIII, 12. 2 Cor. V, 7.

Ex hac beatitudine ortus est *amor intensissimus* quo voluntas angelorum Deo ita inhærere cœpit, ut ab eo nunquam iterum deflectere queat.

Adhæsiō hæc autem non voluntatis libertatem tollit. Nam etsi voluntas angelorum non amplius indifferens sit ad bonum & ad malum, indifferens tamen est ad hoc vel illud bonum, quod ita comparatum est, ut salvo timore Dei pro lubitu illud vel velle vel nonvelle possint, quatenus scilicet Deus istud ab iis non expresse postulat.

C A P U T II.

D E

OFFICIIS ANGELORUM BONORUM IN GENERE.

Beatitudo cœlestis non in *otio* consistit. Certa potius *officia* requirit, quorum functio ad ipsam beatitudinem pertinet. Præstantur autem officia hæc libere & cum summa voluntate, quapropter etiam non molestiam iis creant, sed potius gaudium cœleste augment ac promovent.

Exinde

Exinde patet, quod non pugnet cum beatitudine angelorum, si iis adhuc certa attribuuntur ministeria. Vocantur enim omnes angeli *πνεύματα λειτουργικά* f. spiritus ministrantes, Hebr. I, 14.

Is, cui ministrant, *solus Deus* est, qui omnes creaturas ad sui nominis gloriam condidit. Præstant quidem hominibus varia ministeria, sed non nisi jussu Dei, cui soli obtemperant.

Neutiquam hinc angelos nominare possumus *ministros hominum*, quia a nostra voluntate non dependent. Sunt potius nostri comministri, Apoc. XIX, 10. quia nobiscum uni eidemque Creatori ac Domino serviunt.

Officia hinc & ministeria eorum tantum a Deo exorare, eademque ipsi soli accepta referre debemus. Sicut enim servo non gratias ago, quod ad mandatum domini sui mihi officium præstet, ita nec angelo gratias debeo pro beneficio, jussu Dei mihi præstito.

Male igitur agunt *Pontificii*, angelos pro acceptis beneficiis religioso cultu prosequentes, ut infra docebimus.

Est autem *officium* angelorum bonorum in genere *ministratorium*. Versatur vel circa Deum & Christum, vel circa homines.

Ministerium angelorum *circa homines* est vel generale vel speciale. *Generale* spectat non modo ad pios, sed etiam ad impios, *speciale* vero præstatur tantum piis, & quidem tam in temporalibus, quam spiritualibus rebus.

CAPUT

C A P U T III.

D E

OFFICIIS ANGELORUM BONO-
RUM, QUÆ DEO ET CHRISTO
IMMEDIATE PRÆSTANT.

Non ex necessitate Deus angelorum ministerio & officiis utitur, quippe qui nullius indiget creaturæ, Act. XVII, 25. Jes. XL, 14. sed ex voluntate libera & providentiæ suæ suavi dispositione istos idoneos reddidit ad sibi serviendum.

Distinguuntur *officia angelorum* respectu Dei in gloriosa & ministerialia. *Gloriosa* sunt, quando Deum cognoscunt, intuentur, amant & inde maximum gaudium hauriunt. Pertinent illa ad ipsam eorum beatitudinem, quo spectant loca Dan. VII, 10. Matth. XVIII, 10. 1 Petr. I, 12.

Officia angelorum ministerialia vel ad nominis Dei amplificationem vel ad voluntatis ejus impletionem spectant.

Nomen Dei amplificant, dum laudibus ipsum extollunt & attributa operaque ejus magni faciunt, Jes. VI, 3. Hiob. XXXVIII, 7. Ps. CXLVIII, 2. nec non mandata ejus promptissime exequuntur, Ps. CIII, 20. Dan. IX, 23. voluntatique ejus obtemperant, Ps. CIII, 21. Matth. VI, 10.

Officia

Officia hæc etiam *Jesu Christo*, Salvatori nostro, præstant, Hebr. II, 9. Matth. IV, 11. Præfiguravit ea Moyses per imagines angelorum, quas jussu Dei intexere curavit tabernaculo, nec non per arte factos Cherubim, qui alis tangebant arcam fœderis. Distinguenda autem sunt officia hæc angelorum in ea, quæ Christo in diebus carnis præstiterunt & ea, quæ ei adhuc in cœlo præstant.

Præstiterunt olim Salvatori nostro multa servitia, cum in terra versaretur, & quidem tam in statu exinanitionis, quam exaltationis.

In *statu exinanitionis* 1) annuntiabant hominibus ejus conceptionem, Luc. I, 35. & natiuitatem, Luc. II, 9 - 14. 2) ministrabant ei cum a Satana tentaretur, Matth. IV, 11. & 3) confortabant ipsum, cum in monte olivarum tempore passionis suæ sanguine sudaret, Luc. XXII, 43.

In *statu exaltationis* aperiebant ejus sepulchrum annuntiabantque Apostolis piisque mulieribus, ejus resurrectionem, Matth. XXVIII, 2. 5. 6. Marc. XVI, 5. 6. Luc. XXIV, 4 - 6. Joh. XX, 12. 13. nec non excipiebant ipsum in adscensione ad cœlos, Act. I, 10. Psalm. XLVII, 6. 7. Pf. LXVIII, 18.

Christo in cœlis officia præstant, quando ei se subjiciunt, Eph. I, 21. 22. eumque adorant, Hebr. I, 6. Pf. XCVII, 7.

Aliquando etiam comitabuntur eum in re-
ditu ad judicandum homines, Matth. XXV, 31.
1 Theff. IV, 16.

C A P U T IV.

D E

OFFICIIS ANGELORUM BONO-
RUM CIRCA HOMINES
IN GENERE.

M*inisteria*, quæ angeli boni hominibus præ-
stant, fiunt ex speciali mandato Dei, Ps.
XCI, 11. etsi ad ea creati dicantur, Hebr. I, 14.
Ps. CIV, 4. Jure meritoque hinc ad eorum
officia referuntur.

Verfantur autem officia angelorum bono-
rum, quæ hominibus præstant, tam circa ma-
los, quam circa bonos homines. Sunt quidem
malorum hominum inimici, Gen. III, 24. Num.
XXII, 31. 32. Act. XII, 23. non tamen iis per se
nocent. Beneficiis eos potius afficiunt, dum
non modo istos in variis periculis protegent,
sed etiam eorum malitiam quovis modo coër-
cent. Interim non negandum est, angelorum
officium circa malos homines maxime in exe-
quendis Dei judiciis consistere, ut exempla
Sodomitarum, Gen. XIX, 13. Ægyptiorum,
Exod. XII, 23. Assyriorum, 2 Reg. XIX, 35.
Herodis Agrippæ, Act. XII, 23. & æterne da-
mnatorum, Matth. XIII, 42. 50. testantur.

Ma-

Maxime circa *bonos homines* officia angelorum versantur, quæ non modo ex mandato Dei, sed etiam ex affectu charitatis iis, tanquam suis amicis & cohæredibus vitæ æternæ, præstant.

In *genere* officia angelorum erga pios homines tam ad corporalia, quam ad spiritualia spectant.

Respectu *corporalium* eos non modo protegent, Ps. XXXIV, 8. Ps. XCI, 11. Dan. III, 25. 26. c. VI, 22. 2 Reg. VI, 16. 17. sed etiam ex variis malis sicut Lothum, Gen. XIX, 16. Petrum, Act. XII, 7. cæterosque Apostolos, Act. V, 19. eruunt.

Comitantur peregrinantes, Gen. XXIV, 7. c. XXXII, 1. 2. Tob. V, 16. Admonent de imminentibus periculis, Matth. II, 19. Erudiunt de rebus occultis, Matth. I, 20. Dan. VIII, 16. 19. c. IX, 22 sq. Apoc. I, 1. c. XXII, 6. 16. Jud. XIII, 3. Act. I, 11. Dant bona consilia, Matth. II, 19. 20. Act. X, 3. 4. Tob. VI, 6. 9. 10. c. XI, 3. 4. Consolantur paventes, Dan. X, 12. 19. Luc. I, 13. 30. c. II, 10. Marc. XVI, 6. & quæ sunt cætera. Hæc omnia angeli per inspirationem, somnia & varia omina faciunt, quia non amplius apparent.

Sunt, qui cum *Erasmio Schmidio*, Philologo Wittebergenfi, perhibent, angelos quoque tempestates avertere, ventos sedare, fœcundas pluvias cœlo demittere, salubritatem aëris tueri & contra morbos remedia suppeditare. Sed non fatis hoc ex sacris literis probari potest.

Uni-

Unicum, quod huc spectat, exemplum, desumitur ex Joh. V, 4. ubi de angelo, aquam in piscina Bethesda salubriter movente agitur.

Respectu *spiritualium* rerum angeli piis hominibus officia præstant, quando salutem eorum consulunt, Act. X, 3 sq. in afflictionibus istos erigunt, Act. XXVII, 23. 24. de conversione eorum lætantur, Luc. XV, 10. animas illorum post mortem in beatitudinem æternam transportant, Luc. XVI, 22. & die judicii ex omnibus mundi plagis istos colligunt, eosque ab impiis secernunt, Matth. XIII, 49. c. XXIV, 31. c. XXV, 32. Marc. XIII, 27.

Quæritur hic : *an cuilibet homini certus angelus ad custodiam datus sit?* Pontificii id aperte asserunt.

Angelum tutelarem istum vocant, qualem Jacobus, Gen. XLVIII, 16. Paulus, Act. XII, 11. 15. c. XXVII, 23. Tobias junior, Tob. V, 29. & Judith c. XIII, 20. habuisse & Christus infantibus Matth. XVIII, 10. adscripsisse dicitur. At Pontificii non modo singulis hominibus, sed etiam singulis civitatibus & provinciis ex Act. XVI, 9. imo singulis elementis ex Apoc. XIV, 18. c. XVI, 4. certos angelos assignant, qui iis præsent & pro iis curent.

Sed pugnant cum hac hypothese tam loca Ps. XXXIV, 8. Ps. XCI, 11. &c. quam exempla Jacobi, Gen. XXXII, 1. 2. & Elisæi, 2 Reg. VI, 16.

Ex Act. XII, 15. ex locis Apocryphicis patet quidem, inter Judæos tunc temporis invaluisse

opinionem de angelo tutelari, quam ex scholis Philosophorum, qui multa de hominis genio s. spiritu familiari docuerunt, petiverunt. At ex ipsis sacris literis id non ut divina veritas probari potest. Nam Jacobi angelus Gen. XLVIII. fuit angelus increatus, s. Filius Dei, & Pauli angelus Act. XII & XXVII. pertinet ad extraordinarie missos angelos, cujus tutela alius quoque homo gaudere potest. Verba vero Christi Matth. XVIII. nil aliud docent, quam quod infantes præ aliis hominibus ab angelis custodiantur.

CAPUT V.

DE

OFFICIIS ANGELORUM BONORUM,
QUÆ SPECIATIM TRI-
PLICI HOMINUM STATUI
PRÆSTANT.

Cum angeli *πνεύματα λειτουργικά* h. e. spiritus, ministerio publico destinati, eoque fungentes sint, Hebr. I, 14. jure meritoque iis officia quædam circa singulos hominum status tribuuntur. Sunt enim hominibus ubique tutela & ministerio suo præsto. Hoc probari potest ex omnibus istis Scripturæ S. locis, ubi mentio fit angelorum in negotiis hominum tam sacris quam politicis & æconomicis occupatorum.

Theo-

Theologi inde occasionem sumserunt, angelis in omnibus hominum statibus certa officia tribuendi. Sicut vero *tres* dantur *status hominum*, nempe ecclesiasticus, politicus & œconomicus, ita etiam angeli in quolibet se ministratorios præbent, bonumque hominum promovent.

Status Ecclesiasticus versatur circa plantandam & conservandam ecclesiam. In hoc valde occupatos deprehendimus angelos in Scriptura S. quando legimus, quod *a*) promulgationi legis Mosaicæ adfuerint, Gal. III, 19. Act. VII, 53. Hebr. II, 2. Deut. XXXIII, 2. *b*) Christi adventum in carne primum annuntiaverint, Luc. I, 30 sq. c. II, 10 sq. *c*) idololatriæ introductionem in ecclesiam impediverint, Jud. v. 9. *d*) cœtibus sacris interfuerint, 1 Cor. XI, 10. 1 Tim. V, 21. & *e*) fideles ministros doctoresque ecclesiæ contra hostes & persecutores protexerint, e. g. Josuam, Zach. III, 7. Eliæum, 2 Reg. VI, 16. 17. & Petrum, Act. XII, 7-9. &c.

Status politicus versatur circa administrationem reipublicæ, quæ per magistratum ejusque ministros fit. Hisce angelos multifariam præsto esse, testatur Scriptura S. quando Dan. X, 13. legimus, Deum misisse angelum in aulam regis Persarum, ut mala consilia impediât. Legimus porro Dan. VI, 22. angelum occlusisse ora leonum, ne Danieli, ministro regni primario, noceant. Legimus denique 2 Reg.

XIX, 35. & Jef. XXXVII, 36. angelum pio regi Hiskiae contra hostes succurrisse, exercitumque hostilem ad internecionem cecidisse. Hoc auxilium quoque Judae Maccabæo ab angelo factum est, cum contra Lyfiam pugnaret, 2 Macc XI, 8 sq.

Status æconomicus versatur circa rem familiarem & domesticam, comprehenditque tam statum conjugalem quam herilem. In utroque angeli sua officia hominibus præstant, ut conjugium Isaaci, Gen. XXIV, 7. vallata domus Hiobi, c. I, 10. coll Ps. XXXIV, 10. & tutela infantum, Matth. XVIII, 10. testantur. Huc quoque spectat conjugium Tobiae junioris per angelum feliciter peractum, Tob. VII & VIII.

Quicquid Deus olim per angelos præstitit, id adhuc nostris temporibus præstat. Exempla & testimonia, quæ de angelorum officiis hominibus præstitis in Scriptura S. occurrunt, in hunc finem consignata sunt, ut spem & consolationem inde hauriamus, Rom. XV, 4.

CAPUT VI

DE

CULTU ANGELORUM

BONORUM.

Quia Pontificii angelos pro acceptis beneficiis *cultu religioso* prosequuntur, operæ pretium est, de ejusmodi cultu hic aliqua addere.

Ange-

Angelos omnino *cultu aliquo* dignari possumus, non modo propter perfectiones, quibus præ cæteris creaturis gaudent, & propter gloriosa ministeria, quæ Deo præstant, sed etiam propter favorem & officia, quæ iis accepta referre debemus. Sed distinguendum est inter cultum honoris & cultum religiosum.

Cultus honoris est, quando patronos & quibus multa beneficia debemus, nec non personas dignitate conspicuas magni facimus, aliis præferimus, & ne offendamus, nobis cavemus. Ejusmodi cultus præstatur ipsis hominibus. Deus ad eum nos expressa lege obstrinxit. Cur quæso dubitemus, angelis eundem præstare, cum dignitate & virtute nos longissime antecedant?

Pertinet ad *honoris cultum* angelis præstandum
a) ut virtutes & ministeria eorum laudibus extollamus, Ps. CIII, 20. 21. *b)* eorum opera & divinæ voluntatis impletionem imitemur, Matth. VI, 10. Luc. XI, 2. *c)* honorifice eorum recordemur, Dan. VI, 22. Gal. IV, 14. 1 Petr. I, 12. Hebr. XIII, 2. *d)* operationes eorum non temere negemus, Act. XXIII, 8. & denique *e)* præsentiam eorum revereamur, 1 Cor. XI, 10. 1 Tim. V, 21.

Talis cultus, qui non idololatricus est, ab eo, quem Pontificii angelis exhibent, valde differt. Hi enim cultu religioso sanctos spiritus prosequuntur, dum eos invocant & eorum tutelæ se commendant.

Ejusmodi *cultum religiosum* soli Deo debemus, quem sacris precibus, vel invocamus, vel ejus gratiæ & clientelæ nos commendamus.

Ejusmodi cultus in angelos neutiquam competit. Cujuscunque etiam generis sint preces, quas ad angelos dirigunt Pontificii, iis tamen offenditur Deus, qui solus adorandus & religiose colendus est, Matth. IV, 10. Et unde quæso judicare velimus, angelos preces exaudire, vel aut iis delectari, cum nec exemplum, nec promissio in sacris literis extet, nos id docens? Quid? quod potius legatur, angelos respuisse omnem invocationis & adorationis cultum, addita ratione, quod conservi sint nostri & consortes nostræ salutis, Apoc. XIX, 10. c. XXII, 8. 9.

Provocant quidem Pontificii ad Gen. XLVIII, 16. Jos. V, 14. aliaque Scripturæ S. loca, ubi tamen non de angelo creato, sed increato, scilicet Filio Dei, sermo est. Distinguunt etiam inter *λατρείαν*, *δουλείαν* & *ὑπερδουλείαν*. *Λατρείαν* soli Deo, *δουλείαν* angelis defunctisque sanctis hominibus & *ὑπερδουλείαν* virgini Mariæ humanæque Christi naturæ tribuunt. Sed distinctio hæc nullo nititur fundamento, quia dictæ voces synonyma sunt, quæ in Scriptura Sacra promiscue usurpantur, siquidem *δουλεία* æque ac *λατρεία* Deo tribuitur, ut ex Matth. VI, 24. 1 Theff. I, 9. Rom. XII, 11. c. XVI, 18. Act. XX, 19. aliisque locis
fatis

fatis patet, ὑπερδουλεία vero vox est, a Pontificiis ad confirmandum suum errorem recens excogitata.



S E C T I O III.

D E

ANGELIS s. SPIRITIBUS MALIS.

C A P U T I.

D E

LAPSU MALORUM SPIRITUUM.

Angelos s. spiritus in summa quidem perfectione creatos esse, sed ita tamen, ut a Deo deficere potuerint, jam supra ostendimus.

Nunc quæritur: *quomodo & quando lapsus malorum spirituum factus sit?*

Deum non autorem esse eorum malitiæ, certum est. Omnes enim creavit *bonos*, Gen. I, 31. Joh. VIII, 44. Jud. v. 6. 2 Petr. II, 4. Creavit etiam ita, ut suam primævam integritatem facile conservare potuissent, si non suo libero arbitrio ultro abusi fuissent. Quale vero peccatum fuerit, per quod a bonitate concreata

desciverint & mali facti sint, adhuc inter Theologos disceptatur.

JACOBUS CARPOVIUS ipsam primorum hominum seductionem primum malorum angelorum peccatum fuisse, quo a Deo deflexerint, summo studio evincere studet in *Theol. sua Dogm. Tom. I. p. 731 sq.* Ita enim argumentatus est: Deus angelis legem dedit, ut ipsum recte colant & aliarum creaturarum felicitatem promoveant. Cum vero seducendo hominem Deum calumniati sint & blasphemaverint, homines autem in mortem præcipitaverint, legem sibi datam transgressi sunt. Sicuti vero omnis transgressio legis peccatum actuale est, ita sequi putat, angelos per seductionem hominis lapsos esse, 2 Petr. II, 4. 1 Joh. III, 8. Provocat inprimis ad Joh. VIII, 44. ubi diabolus homicida ab initio vocatur, & non perstitisse in veritate dicitur.

Verum concessio etiam hoc, quod scilicet seductio Adami & Evæ primum angelorum malorum peccatum actuale fuerit, exinde tamen non sequitur, in hoc ipsam lapsus eorum formam constituisse. Historia de lapsu hominum ira a Mose describitur, ut non dubium sit, autorem illius jam a Deo detrusum fuisse, antequam seductionem susceperit. Cur enim *serpens callidissimus* dictus foret seductor, si non malitiæ plenus ad homines accedisset?

Forma itaque lapsus angelorum fuit abusus liberi arbitrii ad efferendum se supra limites a Deo

Deo præscriptos. Exinde orta est abnegatio fiducia & obedientiæ, quam Deo debebant, Gen. III, 1. Joh. VIII, 44. Jud. v. 6. 1 Joh. III, 8. Recte hinc *Siracides* superbiam omnis peccati principium nominat, c. X, 14. 15. Dedit etiam diabolus consummatæ suæ superbiæ singulare specimen, cum a Christo adorari voluerit, Matth. IV, 9.

Factus est lapsus angelorum non intra sextiduum creationis, sed brevi post, quia Deus finito isto omnia bona esse declaravit, Gen. I, 31.

Per lapsum hunc angeli mali non modo dona gratiæ amiserunt, sed tota etiam eorum natura ita corrupta & depravata est, ut lux atque cognitio in tenebras & ignorantiam, sapientia in stultitiam & amor sanctus in pravam philantiam mutatus sit, 2 Petr. II, 4. Eph. VI, 11. 12. Jac. II, 19. Apoc. XII, 9.

Status hic corruptus nunquam in iis tolli potest. Sunt enim non modo in malo obdurati, sed carent etiam redemptore.

C A P U T II.

D E

NOMINIBUS, NUMERO ET ORDINE MALORUM SPIRITUUM.

Præcipuum malorum spirituum nomen est *Diabolus*, quæ vox a διαβάλλειν, calumniari, 1 Tim. III, 11. descendit. Jure meritoque no-

R 5

men

men hoc iis imponitur, quia non modo Deum apud homines, Gen. III, 1. 4. 5. sed etiam homines apud Deum, Hiob. I, 9. c. II, 4. 5. calumniantur.

In scriptis N. T. a Christo plerumque ita nominantur, Matth. XIII, 39. c. XXV, 41. Marc. XVI, 17. Luc. VIII, 12. c. XIII, 32. Joh. VIII, 44. nec non ab omnibus Evangelistis & Apostolis. Ipſis Judæis nomen hoc haud inconſuetum fuit, Sap. II, 24. Tob. VI, 17.

Sæpiſſime uſurpatur collective pro tota malorum ſpirituum cohorte, Matth. XXV, 41. Luc. VIII, 12. Joh. VIII, 44. Act. X, 38. Eph. VI, 11. 1 Petr. V, 8. 1 Joh. III, 8. Hebr. II, 14. Jac. IV, 7. Interdum etiam indicat principem malorum ſpirituum, de quo infra agetur.

Alterum nomen eſt *Satan*, quod hebraicum eſt & adverſarium ſignificat, Matth. XVI, 22. Imponitur malis ſpiritibus nomen hoc, quia conſtanter hominum ſaluti & felicitati adverſantur, 1 Petr. V, 8. & jurati eorum hoſtes ſunt, Matth. XIII, 25. 39. In ſingulari ſi uſurpatur vox hæc, plerumque principem diabolorum denotat, e. g. Hebr. I, 6. c. II, 1. Zach. III, 1. 2. Matth. IV, 10. 2 Cor. XII, 7. Apoc. II, 9. 13. c. XII, 9. c. XX, 20. Interdum etiam collective ſumitur pro toto ejus exercitu, e. g. Pf. CIX, 6. Luc. X, 18. c. XI, 18. Rom. XVI, 20. 1 Cor. VII, 5. 2 Cor. XI, 14. 1 Theſſ. II, 18.

Tertium nomen eſt *demon* & *demonium*, Matth. VII, 22. c. IX, 33. 34. Joh. VII, 20. Vox hæc a
δαίμων,

δαίμων, *scire*, descendit. Habent nomen ab affectata rerum futurarum cognitione, quam magi & sagæ spiritibus, quorum ope in magicis suis artibus utuntur, tribuunt, 1 Sam. XXVIII, 7. Act. XVI, 16.

Cætera nomina non proprie in malos spiritus competunt, quia certas tantum operationes & proprietates de iis indicant. Usurpantur autem ea plerumque collective.

Tali modo dicitur diabolus *magnus draco* & *antiquus serpens*, Apoc. XII, 9. c. XX, 2. quia primos homines in forma serpentis seduxit.

Dicitur porro *Deus hujus mundi*, 2 Cor. IV, 4. & *princeps mundi*, Joh. XII, 31. c. XIV, 30. c. XVI, 11. Eph. VI, 12. nec non *dominatio tenebrarum*, Col. I, 13. Eph. VI, 12. quia magnum super mundum & homines affectat dominium, Matth. IV, 8. 9. Vocatur etiam *ὁ πονηρός*, Matth. XIII, 19. *spiritus impurus*, Matth. XII, 43. Luc. XI, 24. *spiritus mendax*, 1 Reg. XXII, 22. Joh. VIII, 44. *spiritus crudelis*, Prov. XVII, 11. *homicida*, Joh. VIII, 44. *Apollyon*, Apoc. IX, 11. & *Belial*, s. *nequam*, qui nemini prodest, 2 Cor. VI, 15. Omnia hæc nomina lapsis spiritibus ob eorum malitiam tribuuntur.

Numerus malorum spirituum incertus quidem, at valde tamen magnus est, quia eorum tanquam magnæ cohortis mentio fit, Marc. V, 9. Eph. VI, 12. Plerumque *Satanæ* s. *draconis angeli* audiunt, Matth. XXV, 41. Apoc. XII, 9. 2 Cor. XII, 7.

Patet

Patet exinde, malos spiritus *certos* inter se habere *ordines*. Constituunt quasi *regnum* aliquod, in quo datur princeps, cui cæteri parent. Princeps est *archi-diabolus* ille, qui a Judæis *Beel-Zebub* s. Deus stercoris, nominabatur, Luc. XI, 15. Christus de ejus regno testatur, discordiam in eo non locum habere, Luc. XI, 17. 18. quia omnes mali spiritus in unum eundemque finem agant in operationibus suis, etsi tam malitia quam potentia inter se differant, Luc. XI, 24. Eph. VI, 12.

CAPUT III.

DE

INTELLECTU ET COGNITIONE
MALORUM SPIRITUUM.

Mali spiritus omnino gaudent *intellectu*, quia substantiæ intelligentes sunt.

Est autem *intellectus* facultas cogitandi, quæ per varios actus præstatur, quorum præcipui sunt actus sciendi & judicandi.

Cum vero totus malorum spirituum intellectus per lapsum valde corruptus & tam lumine gratiæ, quam lumine gloriæ destitutus sit, nec cognitio nec judicium eorum suam debitam perfectionem & rectitudinem habet.

Cognitio diaboli in rebus naturalibus admodum quidem magna est, quia in mundo suam dominationem habet & omnium rerum natu-
ram

ram (qua autem in perniciem hominum abutitur) accuratissime novit; at in rebus divinis satis parva, incerta & cum tremore, Jac. II, 19. timore, Matth. VIII, 29. & errore, Matth. IV, 6. conjuncta est. Est autem illa partim *naturalis*, partim *experimentalis*.

Futura contingentia cogitationesque hominum, quas iis non ipse inspiravit diabolus, prorsus nescit, etsi ex nexu causarum multa conjecturare possit, quæ alias hominibus incognita sunt.

Destitutus simul est diabolus *virtute* de rebus cognitis ac agendis recte *judicandi*. Hinc Christus Joh. VIII, 44. de diabolo testatur, veritatem non esse in eo. In dicendo itaque non verax est, sed mendax, deceptor & calumniator. In ratiociniis suis valde errat & haud raro, dum regno Dei nocere studet, ejus incrementum promovet. Potest hoc colligi ex historia passionis Christi, cujus mortem Satanas summo studio promovit, non judicans, inde sibi maximam contractum iri noxam ac damnum.

Tribuitur quidem intellectui ejus magna *calliditas* & *astutia*, Gen. III, 1. Eph. VI, 11. 2 Cor. XI, 14. sed vera sapientia & prudentia ei deest, quia utraque sine lumine divino, quod per lapsum amissum est, in substantia intelligente cessat.

VOLUNTATE MALORUM SPIRITUUM.

Habent mali angeli s. spiritus omnino facultatem appetendi & averfandi, sed perverse eam exercent.

Naturaliter omne verum bonum appetere & omne verum malum averfari debent, quia hoc ad perfectiones pertinet, quas iis Deus in creatione largitus est. At cum per lapsum primævam suam integritatem & divinam imaginem prorsus amiserint, voluntas eorum in tantam cecidit perversitatem, ut nunc verum bonum averfentur & verum malum appetant.

Verum bonum omne id est, quod cum voluntate Dei convenit, & *verum malum*, quod cum eadem pugnat. Exinde sequitur, diabolum cum suis angelis Deo ejusque regno constanter adversari, nec non erga omnes, qui Deum amant & colunt, se infensissimum præbere. Dicitur propterea ὁ πονηρός, 1 Joh. II, 13. ὁ ἀντίδικος, 1 Petr. V, 8. & ὁ ἐχθρός, Matth. XIII, 27. opponiturque Deo tanquam contrarius Dominus, Luc. XI, 23. 2 Cor. IV, 14. 15. Matth. VI, 24. Marc. VIII, 33. Eph. VI, 11. 12. qui perpetuo infidias parat hominibus,
ut

ut eos a Deo avertat & in æternam perniciem detrudat, 1 Petr. V, 8. Apoc. XII, 9. 10. 12.

Non deest angelis damnatis *libertas voluntatis*, quæ tamen non versatur circa bonum & malum, sed tantum circa varia mala, ex quibus hoc vel illud eligere solent.

Nec defunt malis spiritibus vehementes voluntatis motus, quos alias *affectus* nominamus. Tribuitur enim iis *ira*, Apoc. XII, 12. 1 Petr. V, 8. *invidia*, Sap. II, 24. *tremor*, Jac. II, 19. & *odium*, Joh. VIII, 44. 1 Petr. V, 8. nec dubitandum est, quin *perpetuo dolore* ob suam damnationem angantur.

Pluribus infra ostendemus, quam multifarie malam suam voluntatem erga homines declarent.

CAPUT V.

DE

POTENTIA MALORUM SPIRITUUM.

Magnam omnino *potentiam* habent spiritus mali, quæ tamen a Deo valde limitata est. Citra divinam voluntatem neminem lædere possunt, Hiob. I, 12. Matth. VIII, 31. Vinciti propterea dicuntur catenis tenebrarum, 2 Petr. II, 4.

Notatu dignissimum exemplum potentie diabolicæ præbet historia Jobi, cujus infausa fata omnia a diabolo veniebant, Hiob. I & II. Recte hinc a Christo ὁ ἰσχυρὸς s. *validus & fortis* dici-

dicitur, Matth. XII, 29. Luc. XI, 21. Petrus eum cum *rugiente leone* comparat, 1 Petr. V, 8. & Paulus admonet nos de ignitis telis ejus, tanquam *potentis principis*, qui non habeat carnem caducam, nec sanguinem, Eph. VI, 12.

Gaudet potentia agendi in omnia elementa, meteora & animantia, Hiob. I, 16. 19. Matth. VIII, 32. nec non in corpora hominum, Hiob. II, 7. Luc. XIII, 16. & animas, 1 Chron. XXII, 1. Matth. XVI, 23. Hiob. I, 15. 17. Satis id cognoscitur ex ejus operationibus & obsessio- nibus, de quibus infra pluribus agetur.

Tam *mirabiles* interdum edit diabolus in na- tura *effectus*, ut istos difficulter a veris miracu- lis distinguere possimus. Ne vero hominibus per terribilem suam formam horrorem incu- tiat, nec eos impediat, eidem confidere, uti- tur plerumque ope hominum.

Hujus generis sunt omnes *sagæ & magi*, qui per magiam diabolicam tam mirificas faciunt operationes, ut omnem fere fidem superent. Exemplum præbent magi Ægyptiaci, qui æque ac Moses baculos suos in serpentes permuta- bant & ranis terram implebant, Exod. VII, 11. 12. c. VIII, 7. Ipse Antichristus per miras Satanæ operationes dignitatem & auctoritatem suam in ecclesia stabilivit, 2 Theff. II, 9-11.

Neutiquam tamen diabolo vera *miracula* ad- scribi debent. In solum Deum ea competunt. Sunt tantum *mirabiles naturæ effectus*, quos dia- bolus per occultum causarum nexum mirifice producit.

CAPUT VI.

DE

OPERATIONIBUS MALORUM
SPIRITUUM ORDINARIIS.

Substantia intelligens nunquam otiosa est. Semper aliquid operatur pro inclinatione voluntatis suæ. Mali itaque spiritus in continua operatione versantur, Hiob. I, 7. Luc. XI, 24. 1 Petr. V, 8. Sunt autem operationes eorum omnes voluntati Dei & saluti hominum contrariæ, quia jurati Dei hominumque hostes sunt, qui amplificationem regni divini quovis modo impediunt, eique damnum inferunt, Matth. XIII, 28. Luc. XI, 20. 23. Apoc. XII, 7. 12. homines vero in æternam perniciem detrudere student, 1 Petr. V, 8. Utuntur propterea variis artibus & insidiis, Eph. VI, 11. 12.

Spectant vero operationes malorum spirituum tam ad pios, quam ad impios homines. *Impios* laqueis suis captivos ducunt, 2 Tim. II, 26. Eph. II, 2. intellectum eorum excoecant, 2 Cor. IV, 4. verbum Dei de cordibus eorum sumunt, Luc. VIII, 12. & denique eos quotidie ad nova peccata alliciunt, inque iis obdurant.

Pios ad suum regnum reducere student, & quidem partim tentando, Gen. III, 1. Matth. IV, 1. 1 Cor. VII, 7. Apoc. II, 10. partim alliciendo,

Pars I.

S

liciendo,

liciendo, Luc. XXII, 31. Impetrant interdum quoque scopum suum, 1 Tim. V, 15. quapropter Paulus Eph. VI, 11 - 17. armaturam spiritualem commendat, ne in certamine cum malis spiritibus salus animæ in discrimen veniat, Petrus vero 1 Petr. V, 9. fide & vigilantia iis resistere jubet.

Nocere conantur partim corporibus hominum, dum morbos immittunt, Luc. XIII, 11. 16. & variis plagis corpora afficiunt, Hiob. II, 7. partim bonis & opibus, dum illas perdunt, Hiob. I, 16. 19. aut auferunt, Matth. VIII, 32. partim menti, dum eam inquietant, 1 Sam. XVI, 14. partim ipsi animæ, dum homines a Deo averunt, in errores ducunt & per peccata in æternam damnationem trahunt.

Speciatim mali spiritus cuilibet statui hierarchico adversantur.

Statui ecclesiastico obfunt, quando hæreses spargunt, Matth. XIII, 27. 1 Tim. IV, 1. 2. 2 Theff. II, 8. falsum Dei cultum in ecclesiam introducunt, 1 Reg. XII, 28 - 31. doctores ecclesiæ falsiloquos reddunt, 1 Reg. XXII, 22. Jer. XIV, 14. c. XXIII, 21. 30. scandala excitant, Matth. XVI, 23. c. XVIII, 6. 2 Cor. VI, 3. pios & salutes ministrorum ecclesiæ conatus impediunt, 1 Theff. II, 18. auditores a pia meditatione verbi abducunt, Luc. VIII, 12. & persecutiones contra doctrinam & ecclesiam christianam moliuntur, Apoc. XII, 7. 11. 13-17. c. XIII, 4. 7.

Statui

Statui politico nocent, quando principibus mala consilia inspirant, 1 Chron. XXII, 1. Dan. X, 13. injusta bella excitant, 1 Reg. XXII, 21. 22. & dissidiorum semina in republica spargunt, quibus res maximæ dilabuntur, Luc. XI, 17.

In *statu æconomico* officiunt *conjugibus*, lites ferendo & ad libidinem sollicitando, 1 Cor. VII, 5. *liberis*, bonam educationem impediendo, eosque contra parentes incitando infelicesque reddendo, & *æconomiæ*, servos servasque perfidiosos & obstinatos reddendo, jacturam rei domesticæ causando, discordiamque in familia excitando.

Agunt mali spiritus quidem libere, sed dirigit Deus plerumque actiones eorum ad bonum finem, & quidem tam ad castigandos pios, Hiob. I & II. 2 Cor. XII, 7-9. quam ad puniendos impios, Ps. LXXVIII, 49.

C A P U T VII.

D E

MAGIA DIABOLICA.

M*agia* nomen habet a *magis*, hominibus in omnium bonarum artium & philosophiæ studiis apud Persas, olim versatissimis. Indoctæ plebi eorum scientia de rebus occultis tam mirifica videbatur, ut eam commercio cum spiritibus tribuere non dubitaret. Ex-

inde ortum est nomen *Magia*, per quam intelligitur studium, occultas artes ope spirituum malorum exercendi.

Duplex datur *Magia*, naturalis & diabolica. *Magia naturalis* est ipsa philosophia sublimior, quatenus a plebe, occultarum naturæ causarum ignara, falso spiritibus malis eorumque commercio adscribitur; *Magia diabolica* vero est ea ipsa, quam supra descripsimus. Dicitur *diabolica*, quia omnino a diabolo venit. Alias etiam *Nigromantia* h. e. atra ars, die schwarze Kunst, vocatur.

Sunt, qui omnem *magiam diabolicam* negant & inter aniles referunt fabulas. Sed neutiquam in dubium vocari debet, si ad Scripturæ S. frutinam perpendimus, quæ experientia nos docet, optima rerum magistra.

Omniis *magia diabolica* involvit *commercium* aliquod cum malis spiritibus, quod vel *explicitum*, vel *implicitum* est.

Est vero *magia diabolica* vel *divinatrix* vel *operatrix*. Illa versatur circa futurarum occultarumque rerum revelationem, hæc vero circa mirificos rerum naturalium effectus, qui plerumque in alterius perniciem vergunt. Homines, qui priori magiæ dediti sunt, *vates*, *pythones* & *pythonissæ*, nec non germanice *Fluge Männer* & *Fluge Weiber* nuncupantur. Tales fuerunt mulier Endoræa, 1 Sam. XXVIII, 7. 8. & ancilla Philippica, Act. XVI, 16. 18. In lingua Hebræa dicebantur *חַבָּוֹת*, Lev. XIX,

31. quia plerumque ex tumido ventre, tanquam utre, oracula depromebant. Veteres Græci ex eadem causa tales homines *ἐγγαστριμύθους* & *ἐγγαστριμάντας* vocabant, cujus generis Pythonissa Delphica fuit, cujus oracula pro divinis habebantur.

Ejusmodi vaticinandi modus nec naturalis nec divinus est, quia non modo certo spiritui adscribitur, sed etiam severissime a Deo interdicitur, Lev. XIX, 31. c. XX, 27. Num. XXIII, 23. Deut. XVIII, 10-12.

Magia operatrix per varias operationes exercetur ope diaboli. Homines hujus artis periti proprie nominantur *magi*, nec non *sage*, *incantatores*, *prestigiatores*, *prestigiatrices* & *incantatrices*. Scriptura S. multoties eorum meminit & incantationibus eorum magicisque operationibus tales tribuit effectus, qui humanam fere fidem excedunt. Allegari hic merentur exempla majorum Aegyptiacorum, Exod. VII & VIII. Simonis Magi, Act. VIII, 9. & Elimæ, Act. XIII, 8-10.

Quis dubitet, nostris quoque temporibus dari homines, qui permittente Deo incantationibus & aliis occultis artibus diabolicis alios fascinare & non modo valetudini corporis, sed etiam rei domesticæ damnum inferre queant. Nec creditu absurdum est, ejusmodi homines sibi interdum adscivisse certos spiritus familiares, quos vulgus modo draconem, modo den Robolt, modo den Hecke-Mann nominat, cujus

ope magiam suam exercent. Cum spiritus vaticinantes, quibus mulier Endoræa & ancilla Philippica olim usæ sunt, omnino fuerint spiritus familiares, cur non plures dari queant etiam nostris temporibus?

Sed omne commercium cum malis spiritibus, nec non omnes operationes magicæ ad abominanda crimina pertinent. Satis hoc patet ex tot interdictis divinis, quæ in Scriptura S. occurrunt, inter quæ allegasse sufficiant loca Exod. XXII, 18. Num. XXIII, 23. Mal. III, 5. Apoc. XXI, 8. c. XXII, 15. Deus enim & diabolus, lux & tenebræ, Christus & Belial non concordare, nec inter se commercium habere possunt, 2 Cor. VI, 14. 15. Luc. XI, 23. Matth. VI, 24.

CAPUT VIII.

DE

OBSESSIONIBUS MALORUM SPIRITUUM.

O*bsessio* h. l. vox ecclesiastica est, quæ a Theologis ad exprimendam & designandam illam afflictionem diabolicam usurpatur, quam Scriptura S. *δαμονίῃς* *ἰσχύϊ* vocat.

Duplex datur obsessio diabolica, nempe corporalis & spiritualis.

Obsessio corporalis illud opus diaboli est, quo per subtilitatem substantiæ suæ corpus hominis intrat

intrat & turbato liquido nerveo motus dolorosus in illo excitat, omniaque organa & membra ejus ad suam voluntatem dirigit. Dicuntur tales miseri homines a scriptoribus sanctis *demoniaci* s. δαιμονιζόμενοι, nec non καταδυναστευόμενοι ἀπὸ τοῦ διαβόλου; h. e. a diabolo sub suam potestatem redacti, Act. X, 38.

Horum nullo tempore plures fuerunt, quam tempore Christi, Matth. VIII, 16. 28. Marc. I, 32. Luc. IV, 41. Act. X, 38. Sapienter Deus id tunc temporis præcipue diabolo permisit, ut Christus eo magis se potentiores præstaret hoc potente spiritu, Luc. XI, 22. nec non ut ostenderet, se venisse, ut opera diaboli destruat, 1 Joh. III, 8.

Nostri temporibus exempla quidem rara sunt, sed tamen non prorsus neganda, imprimis inter Pontificios, apud quos diabolus adhuc multum pollet, 2 Thess. II, 9. 10. Habent isti certum genus clericorum, quos *Exorcistas* nominant, quorum est, diabolum expellere. Ne vero frustra officio suo fungantur, fingunt sæpissime diabolos, quos ad defraudandam plebem facili negotio ex hominibus ejiciunt. Caveamus autem, ne omnem obsessionem diaboli corporalem cum D. Jo. CASP. WESTPHALO negemus, qui in *Pathologia sua Demoniacæ* eam per morbos convulsivos interpretatur.

Obsidet vero diabolus non solum impios, sed interdum etiam *pios*, ut exempla docent Jobi,

cujus corpus satanas miserrime afflixit, c. II, 7. 12. 13. & Pauli, quem angelus Satanae colaphis cecidit, 2 Cor. XII, 7. Recte hinc B. Gerbardus scripsit: *Quod si Paulus, tantus Apostolus, a Satana colaphizatus est, ne magnitudo revelationum ipsum extolleret, quid mirum, si etiam satanae potestas ad tempus in corpora piorum concedatur?*

Misere autem diabolus tunc corpus hominis excruciat, inque eo tam mirabiles & peccaminosos effectus producit, ut ex unguibus hisce infernalis leo satis cognosci, ejus vero operatio ab epilepsia, aliisque morbis aut fascinationibus bene distingui possit.

Merentur hic allegari verba *Friderici Hoffmanni*, celeberrimi quondam Medici Hallensis, qui de potentia diaboli in corporibus humanis ita scripsit: *Ad recipiendas operationes diaboli in corpore humano dispositio quaedam adesse debet, quae praesente eas feliciter effici potest. Hinc senes, aniculae, melancholici, victu duro & crasso fruantes, sub caelo frigido degentes &c. magis dispositi & idonei sunt ad recipiendas operationes diaboli, quam alii, in quibus contrarium est. Dantur propterea in terris septentrionalibus plures sage, quam in Gallia & Italia.*

Obsessio spiritualis ea est diaboli operatio, qua animam hominis ita occupat, ut nec cogitare nec velle aliud quid possit, quam quod ipse suggerit. Talis obsessio erat, cum Satan intraverit cor Judae, Luc. XXII, 3. Joh. XIII, 27. Impellit hoc, modo diabolus homines

homines ad varia scelera, Joh. XIII, 2. Operatur efficaciter in iis incredulitatem, Eph. II, 2. Excoecat sensus, ne illucescat iis lumen evangelii, 2 Cor. IV, 4. Ducit eos ad voluntatem suam tanquam laqueo implicatos, 2 Tim. II, 26. Obdurat eos in malitia, inspirat scandalosas & blasphemias cogitationes, implet animum pessimis consiliis, cor vero turpissimis cupiditatibus, nec non impedit omnem reversionem ad bonam frugem. Jure meritoque hinc ejusmodi homines *filiis Satanae*, Joh. VIII, 44. & τοῦ πονηροῦ, Matth. XIII, 38. vocantur.

C A P U T IX.

D. E.

SPECTRIS S. APPARITIONIBUS
MALORUM SPIRITUUM.

Spectra in Græca lingua *Φαντάσματα* dicuntur. Sunt terricula & ludibria diaboli, quibus homines vel terrere, vel seducere, vel iis nocere studet.

Manifestant sese partim per visum, partim per auditum, partim per tactum, & sunt operationes malorum spirituum extraordinariæ, quibus vel imaginationem nostram, vel sensus decipiunt, ita, ut videamur nobis prodigiosum quid vel cernere vel audire, quod tamen illico evanescit.

S 5

Oritur

Oritur interdum in auribus nostris tantus strepitus, quasi omnia vasa in cella & culina in mille ruinas dirumperentur, quæ tamen postea illæsa inveniuntur. Pari modo percipitur aliquando vox vel hominis vel animalis, nullibi tamen præsentis.

Quæstio inde orta est: *num spectra magis intra, quam extra nos existant?* Si præsentiam ipsam diaboli & veram ejus operationem in nos non negamus, nescio, cur non prius affirmeremus. Objicit enim diabolus glaucoma oculis & imprimit imaginationi visus & sonos, qui extra nos revera non existunt. Exinde cognoscitur causa, cur ex duobus sæpissime tantum unus aliquid videat vel audiat, quod tamen alter se non videre aut audire testatur.

Omnis spiritus per se est invisibilis. Nisi corpus aliquod induit, non sensibus percipi potest. Ejus igitur operationes vel per deceptionem phantasiæ & sensuum, vel per effectum sese manifestant.

Hinc tempore noctis præcipue spectra grassantur, quia phantasia tunc ad recipiendas falsas ideas maxime disposita est. Plurimum quoque valent spectra apud pavidos homines, quorum imaginatio jam variis portentis repleta est.

Ab sit tamen, ut *spectra* per se negemus, cum eorum mentio fiat in Scriptura S. Exempla de iis occurrunt 1 Sam. XXVIII, 13. 14. & Sap. XVII, 15. coll. Ps. LXXVIII, 49. In Judaica eccle-

ecclesia omnino olim credita sunt, ut ex Matth. XIV, 26. & Luc. XXIV, 37. patet, ubi de Christi discipulis narratur, quod falso putaverint, se videre spectrum.

Christus ab opinione de spectris sine dubio eos tunc liberasset, si prorsus nulla dentur. Evitare autem hic debemus tam nimiam credulitatem, quam nimiam incredulitatem.

Ad spectra referendæ sunt omnes sic dictæ *apparitiones defunctorum hominum*, qui per se nunquam in hanc vitam redeunt, sed in statu suo, in quem post obitum transferuntur, perpetuo manent usque ad diem judicii. Pontificii valde errant, quando per ejusmodi apparitiones animas mortuorum intelligunt, quæ ob certas causas non quietem habeant, sed tamdiu in mundo oberrare debeant, donec per sacrificia missatica expientur & ex purgatorio liberentur. Provocant ad Sir. XLVI, 23. ubi Samuel post mortem apparuisse & Regi Saulo imminentem interitum annunciasse dicitur. Sed locus hic occurrit in libro Apocrypho. Ex 1 Sam. XXVIII, 6-14. potius patet, diabolum personam mortui Samuelis induisse & Saulum ad desperationem commovisse.

Tota de apparitionibus defunctorum hypothesis cum satisfactione Christi valde pugnat. Diabolus eo magis Pontificios per ejusmodi apparitiones ludibrio habet, ut in erroribus suis detineat.

Quæ-

Quæritur hic etiam : *quid de omnibus, quæ imminentem mortem aut infortunium aliquod præsentant, judicandum sit?* Diabolo ista non temere adscribenda sunt, sed potius bonis angelis, qui homines interdum de rebus futuris jussu Dei admonere solent.

CAPUT X.

DE

JUDICIO ET DAMNATIONE
MALORUM SPIRITUUM.

Judicium super diabolum & malos spiritus statim post lapsum eorum factum est, cum in totius naturæ suæ corruptionem & in extremam immutabilemque miseriam ceciderint. Instare quidem iis adhuc majus & durius judicium dicitur Jud. v. 6. 2 Petr. II, 4. sed intelligitur per istud nil nisi publicatio & executio divini judicii in die mundi extremo expectanda.

Juxta sacram Apocalypsin nonnulli Theologi tres faciunt gradus damnationis diaboli, quorum primus est ejectio ex cœlo aëreo, Apoc. XII, 8. 9. alter præcipitatio ejus in abyssum, Apoc. XX, 2. 3. quam deprecatus sit Satan, Luc. VIII, 31, & tertius detrusio in locum sulphureum, Apoc. XX, 10. verum omnia hæc loca alium quoque sensum habere possunt.

Id, quod extra dubitationis aleam positum est, in eo consistit, ut credamus, malos spiritus

ritus in statu quidem damnationis vivere, ultimum vero supplicium iis adhuc imminere, ut ex supra allegatis locis Judæ & Petri patet.

Sentiunt autem & *pœnam damni* & *pœnam sensus*. Illa in jactura boni, hæc vero in sufferendis malis consistit. *Pœna sensus* alias dicitur ignis æternus, Matth. XXV, 41. & palus ignis sulphurisque plena, Apoc. XX, 10. Qualis vero ignis sit & quomodo a spiritibus sentiiri queat, non exponi potest. Hieroglyphice forsitan infernales cruciatus per eum intelliguntur.

Erunt autem *pœnæ*, quibus affliguntur mali spiritus, æternæ, Matth. XXV, 41. 46. Marc. IX, 45. 46. Apoc. XX, 10.

Pœna divina delicto æqualis esse debet. Omne igitur peccatum contra infinitum Deum infinitam quoque pœnam meretur. Nec ἀποκατασσις, Act. III, 21. nec ἀνακεφαλαίωσις, Eph. I, 10. nec ἀποκατάλλaxis τῶν πάντων, Col. I, 20. in eorum salutem conducit, ut suo loco pluribus ostendemus. Iis enim non datus est redemptor, Hebr. II, 16. Cur vero Deus lapsos spiritus non redemerit, factum forsitan est, 1) quia auxilium respuerunt, 2) redemptionis salva Dei justitia non participes fieri potuerunt, & 3) ex libero arbitrio a Deo defecerunt.





LIBER V.

DE

HOMINE.

Q*uinque momenta sunt, quæ sacrarum literarum cultor de homine discere debet, nempe 1) ejus natura, 2) imago divina, 3) lapsus, 4) peccatum & 5) mors. Ne vero liber cæteros magnitudine excedat, de peccato in singulari libro agemus. Quæ vero de hominis natura, imagine divina, lapsu & morte scitu necessaria sunt, in tot Sectionibus jam perpendemus.*

SECTION I.

DE

HOMINIS NATURA

ET

CONSTITUTIONE.

CAPUT I.

DE

HOMINE IN GENERE.

H*omo est substantia intelligens, ex duabus partibus, anima rationali & corpore organico,*

ganico, constans, ad imaginem divinam in eum finem creata, ut gloriam Dei promoveat & vita felici in æternum fruatur.

Dicitur in lingua Hebræa אָדָם, *Adam*, ab אֶדְמָה, h. e. *terra rubicunda*, ex qua creatus est, Gen. II, 7. Accepit nomen hoc in recordationem sui ortus & interitus, Gen. III, 19. 1 Cor. XV, 47. Eandem significationem habet vox latina *homo*, quæ sine dubio ab *humo* s. *terra* derivatur.

Imponebatur nomen *Adam* s. *homo* tam mari quam sceminæ, Gen. V, 2.

Primo nomen proprium fuit primi hominis, deinde factum est nomen appellativum totius generis humani, Gen. VI, 3. Eccl. III, 19.

Alias homo in lingua sancta etiam nominatur אֲדָמָה a אָדָם, h. e. *ager fuit*. Significat itaque miseram & ærurnosam creaturam, Ps. VIII, 5. Ps. CXLIV, 3.

Homo non ex tribus *partibus essentialibus*, sed tantum ex *duabus* constat. *Spiritus enim & anima* in homine unum idemque sunt. Si hæ voces conjunguntur, e. g. Hebr. IV, 12. 1 Thess. V, 23. Luc. I, 46. 47. per *spiritum* intelligitur id, quod in hominis renati natura regenitum est. Probat hicce significatus ex Joh. III, 6. Rom. VIII, 10. Gal. V, 17. 22. c. VI, 18. 2 Tim. IV, 22. Jud. v. 19.

Homo inter omnes creaturas terrestres excellentissima est. Patet hoc 1) ex singulari Dei consilio, de eo creando, Gen. I, 26. 2) ex mi-
rifica

tifica ejus structura, 3) ex ejus præstantissimis donis & prærogativis, & denique 4) ex ejus pretiosissima redemptione.

Homo totius mundi, a Deo ad suam gloriam creati, interpret est. Jure meritoque hinc dicere possumus, omnia propter hominem condita esse, hominem vero propter Deum.

Accommodata enim sunt in mundo omnia vel ad hominis utilitatem, vel ad ejus necessitatem, vel ad ejus delectationem, & quidem ita, ut in omnibus celebretur bonitas, sapientia & potentia Dei, Ps. XIX, 2 - 4. Ps. CIV. CXXXVI & CXLVIII. Quæ celebratio ut per hominem debite fiat, iste a Deo tot donis excellentissimis præditus est.

Mirifica hominis structura præstantissimæque ejus virtutes repræsentant quasi in nuce totam mundi machinam, quapropter homo a quibusdam *microcosmus* s. *parvus mundus* appellatur. Est igitur valde deplorandum, quod tam excellentissimum omnipotentia divina specimen non pristinam retinuerit perfectionem.

Homo in *quadruplici statu* considerandus est, nempe in statu integritatis, in statu transgressionis, in statu reparationis & in statu glorificationis. Alii nominant quadruplicem hunc statum, statum innocentia, miseria, gratia & gloria.

Status integritatis s. *innocentia* ille fuit, in quo homo ante lapsum vixit.

Status

Status transgressionis f. *miseriæ* sequebatur lapsum, qui hominem tam corporaliter, quam spiritualiter miserum reddidit.

Status reparationis f. *gratiæ* dicitur ille, in quem homo per gratiam in Christo receptus est.

Status denique *glorificationis* f. *gloriæ* consistit in vita æterna, ad quam post beatam mortem a Deo evehitur.

C A P U T II.

D E

CREATIONE ET PROPAGATIONE HOMINIS.

Homo inter omnes creaturas, quas Deus in principio rerum intra primos sex dies produxit, ultima fuit, Gen. I, 26. Factum id est, ut omnia, quæ emolumento & oblectamento ei esse poterant, jam parata inveniat.

Patet exinde, hominem inter omnes creaturas terrestres præcipuam & excellentissimam esse. Placuit autem Creatori, tantum unum in principio condere hominem, cui postea alterum addidit.

Ante ejus creationem non extiterunt alii homines, ut perversus Peyrerius somniavit, qui *Præ-Adamitas* illos vocavit, alius vero Anglus *Co-Adamitas* nominavit. Ex Gen. II, 5. 7. 1 Cor. XV, 45. & Act. XVII, 26. facile utraque sententia refutari potest.

Pars I.

T

Homi-

Hominem ex *duabus* tantum *partibus essentialibus*, corpore scilicet & anima, constare, jam supra demonstravimus. Hæ partes, si conjunctæ sunt, vivam constituunt personam, Gen. II, 7.

Corpus hominis ex terra conditum est, uti omnia alia animantia terrestria, Gen. I, 24. Dicitur enim factus esse עֶפֶר מִן הָאֲדָמָה h. e. *pulvis ex terra rubra*, Gen. II, 7. Nonnulli exinde cum Tertulliano conjecerunt, Deum addito liquore pulverem in limum aut argillam coagulasse & ita corpus humanum fabricasse. Credat quisque, quod velit, hoc tamen certum est, corpus primi hominis ex glebula mollis humidæque terræ, & quidem rubræ formatum esse. Formavit autem Deus illud, sicut figulus ollam, uti vox יָצַר Gen. II, 7. coll. Hebr. X, 8. indicat. Formavit ita, ut vultu ad cœlum directo incedat & sic ostendat, quo præcipue tendere debeat.

Neutiquam vero corpus hoc neo-creatum per se exanime, sed potius vividum fuit, etsi anima nondum inspirata sit. Habet enim corpus specialem suam vitam, a vita totius hominis, quæ in unione corporis cum anima consistit, distinctam, quæ tamen ita comparata est, ut communiter post discessionem animæ a corpore simul cum vita totius hominis extinguatur.

Eodem momento, quo productio corporis fiebat, facta etiam est inspiratio animæ.

Anima vero hæc non ex materia prima, uti aliorum animantium animæ, sed immediate
a Deo

a Deo, sicut cæteri spiritus, ex nihilo producta & sic indestructibilis reddita est.

Est itaque anima hominis a Deo quidem, sed non ex Deo creata, ut *Petrus Poiret* & alii de grege Fanaticorum perhibent, qui animam vel ex essentia Dei emanasse, vel partem ipsius divinæ essentiæ esse docent. Generis Dei quidem esse dicimur, Act. XVII, 28. 29. at non ob emanationem ex essentia Dei, sed propter imaginem Dei nobis in creatione collatam.

Nominat Moses id, quod Deus homini primo inspiravit, נְשִׁמַת חַיִּים h. e. *spiraculum viventium* s. principium respirationis vivæ. Exprimit hæc vox optime naturam animæ humanæ, quippe quæ non immaterialis & per se viva, sed etiam totius machinæ humanæ unica vis motrix & omnium ejus operationum tam internarum quam externarum causa est.

Halitus assimilatur, qui non modo invisibilis est, sed multum etiam in homine valet, certissimumque signum est, vitam vere inesse corpori. Hac de causa etiam dicitur Deus inspirasse animam in *nares*, quia halitus per nares spiratur & respiratur.

Fuit autem *inspiratio Dei* medium, quo usus est, cum animam corpori ingenuerit. Et per hanc inspirationem homo factus esse dicitur נִפְשָׁא חַיָּה, h. e. *persona viva & vera*. Probatur hæc significatio vocis נִפְשָׁא ex multis Scripturæ S. locis & inprimis ex Num. XXIII, 10. & Ezech. XVIII, 5.

Accipiebat homo *nomen* אָדָם, *Adam*, quia corpus ejus אֶדְמָה מִן הָאָרֶץ h. e. *ex terra rubra* creatum est. Indicatur itaque substantia s. animans, colore rubello, quo ordinarie humanum corpus obductum est, conspicuum.

Fuit autem Adam in principio neutiquam ἀνδρόγυνος s. *duplicis sexûs*, sed genuinus mas. Deus enim Gen. I, 27. non dicitur creasse marem & foeminam illum, sed אָנָּשׁ, illos. Locus vero Matth. XIX, 5. 6. non de physica corporum agglutinatione, sed arctissimo amoris & amicitiae conjugalis vinculo agit.

Deus haud bonum esse judicavit, hominem manere solum. Decrevit igitur, mulierem s. foeminam creare, eamque illi associare, Gen. II, 18. Fecit hoc eodem die, quo Adamum condidit Gen. I, 27. Cum enim non invenienda sit inter animalia focia, quæ כַּנְיָוִת, h. e. *conveniens* ei sit ad conversandum & concubandum, Deus in gravem somnum delabi jussit Adamum, quo durante ex ejus costa mulierem formavit, Gen. II, 21. 22.

Costa, ex qua condita est mulier, non fuit in mare superflua, alias corpus ejus monstrosum fuisset. Neque exemta hac costa Deus corpus mutilavit, sed potius defectum per aliam costam refarcivit, Gen. II, 21.

Quæritur autem: num Deus animam primæ mulieris immediate, sicut Adami animam, an simul ex costa Adami creaverit? Verisimillima sententia est, animam mulieris simul cum corpore
ex

ex costa Adami conditam & quasi ab anima ejus, ut lux a luce, accensam esse, quia tota mulieris persona de mare sumta dicitur, Gen. II, 22.

Placuit vero Deo, mulierem ex corpore virili formare, ut inde eo clarius pateat non modo *ὁμοσμία* utriusque sexus & quod pares inter se sint mas & foemina, tam respectu naturæ, quam respectu originis, sed etiam, ut se invicem eo magis ament, eoque familiarius secum vivant.

Mulier, quia propter virum creata est, omnino dignitate inferior est viro, 1 Cor. XI, 7-9.

Scopus primarius Dei in creanda muliere fuit propagatio generis humani. Corpus Adami quidem in creatione ad generandum sui similem aptum reddiderat, eique instinctum ad concubandum ingenuerat Deus, sed deerat foemina, quacum concubaret. Hanc igitur creabat Deus ex costa ejus & ita formabat, ut ad concubandum, concipiendum & pariendum idonea foret. Accedebat divina benedictio de procreanda sobole, Gen. I, 28. quæ statim in effectum transiit, ita, ut brevi tempore Cain & Habel nascerentur, Gen. IV, 1. 2.

Hac ratione ex unius sanguine s. semine omnium hominum generationes in toto terrarum orbe ortæ sunt, Act. XVII, 26. Jure meritoque hinc *prima mulier* nomen *מרים* s. *Eva* accepit, Gen. III, 20. quia communis mater omnium hominum est.

Primi parentes totum genus humanum coram Deo repræsentabant, quia in iis omnes latuerunt posterius, quos Deus secundum suam omniscientiam statim in principio cognovit & ut suo tempore & ordine vi benedictionis ejus nascantur, decrevit.

Propagatur autem per generationem non modo corpus, sed etiam anima, ut infra pluribus ostendemus.

CAPUT III.

DE

CORPORE HOMINIS.

Corpus est ea hominis pars essentialis, quæ materialis & organica est. Constat ex multis mirifice connexis artubus, qui ex ossibus, carne obductis, & innumeris venis, nervis & arteriis, quibus sanguis & alii humores circulantur, compositi sunt.

Cavamen ejus variis intestinis repletum est, quæ ad nutriendam, augendam & conservandam hominis structuram faciunt.

Convenit quidem corpus humanum in multis cum corporibus cæterorum animalium tam respectu internæ quam externæ formæ, at non modo materia, ex qua compositum est, sed etiam structura ipsa tam nobilitate quam dignitate cætera animalium corpora multum antecedit.

Omnia

Omnia in corpore humano ad inhabitationem animæ rationalis mirifice disposita sunt, ita, ut non aliud corpus ad istam quadret, nec alia anima facultates suas in eo præstare queat.

Differt autem corpus humanum externe a corporibus cæterorum animalium in terra viventium, 1) *facie*, quæ erecta, serena & prorsus singularis est, 2) *cute*, quæ non pilosa & hirsuta, sed plana & mollis, coloreque vel albo vel nigro prædita est; 3) *manibus*, singulariter formatis & ad quævis opera idoneis; 4) *in-cessu*, qui duobus pedibus per gradus fit, 5) *gestibus*, venustate & agilitate distinctis, & denique 6) *statura* spectabilissima & majestatem quasi præ se ferente.

Accedunt facultates ridendi, flendi & loquendi, quibus haud minus se homo ab omnibus aliis animalibus distinguit.

Etsi corpus humanum per se non *indestructibile* factum sit, Deus tamen *immortale* istud esse voluit. Hæc immortalitas ad imaginem divinam pertinebat, ad quam homo conditus est, Gen. I, 27. Poterat quidem hominis corpus mortale fieri, sed non per se mortale fuit. Volebat autem Deus istud ab omni corruptione liberum servare, quamdiu imaginem divinam retineret homo. Ejus itaque mors & corruptio sunt effectus peccati originis, Gen. II, 17. Rom. V, 12. c. VI, 23.

Ex 1 Cor. XV, 50. probare vult *Henricus Stebbing*, doctus Anglus, homines non potuisse vi-

vos in beatitudinem æternam evehi, nisi mortis analogon passi fuissent. Sed verba Pauli non ad homines per se, sed quatenus in statu præsentis corruptionis considerantur, respectum habent.

Ad corporis humani *dignitatem* pertinet, quod non modo Deus sibi in Scriptura S. membra humana, e.g. aures, manus, oculos, brachia & corpus *αὐθρῶν παλάθειαν* adscripserit, sed etiam Filius Dei carnem nostram assumeret, ita, ut in omnibus tam respectu corporis, quam respectu animæ, solo peccato excepto, nobis similis factus sit, Hebr. II, 14.

Corpora humana aliquando non modo ex morte resurgent, sed tunc etiam singulariter glorificabuntur & spiritualibus qualitatibus instruentur.

CAPUT IV.

DE

ANIMA HOMINIS.

Anima hominis est spiritus corpori ingenitus, hominem ad movendum se, nec non ad sentiendum, cogitandum & appetendum aut averfandum idoneum reddens.

Datur quidem in omnibus animalibus *anima*, sed in irrationalibus ista non est purus & genuinus spiritus, quia de materia hanc Deus in creatione sumxit. Est hinc ea quoque non immortalis, sed interit in morte cum corpore & anni-

annihilatur. Habet quidem ejusmodi anima facultatem sese movendi, nec non appetendi, averſandi, ſentiendi & ſibi aliquid imaginandi, neutiquam vero cogitandi, ratiocinandi & alias rationales actiones præſtandi.

Aliquam quidem analogiam cum anima humana, ſed non veram convenientiam habet.

Anima hominis e contrario vero ſpiritus eſt, immediate a Deo creatus & corpori primi hominis in eum finem ingenitus, ut cum corpore indiſſolubiliter & in æternum unitus ſit, unamque cum iſto ſubſtantiam rationalem conſtanterque vivam conſtituat, & ſe per ordinariam generationem cum corpore propaget.

Animam humanam *verum ſpiritum* eſſe, non modo ex clariſ dictis Luc. XXIII, 46. & Act. VII, 58. ſed etiam ex origine, natura & operationibus ejus ſatis ſuperque patet.

In lingua ſacra voces עֲדָנָא & ψυχή de anima humana uſurpantur, ſed interdum idem ac *perſonam* ſignificant, e. g. Gen. II, 7. Num. XXIII, 10. Ezech. XVIII, 5. item Marc. III, 4. Act. II, 41. 1 Petr. III, 20.

Eſt hoc propter *immortalitatem* & *incorruptibilitatem animæ*, quæ ex iſtis locis non ſufficienter probari poteſt, notandum.

Sunt autem *immortalitas* & *incorruptibilitas* præcipuæ proprietates animæ, quæ genuinum ſpiritum conſtituunt. Nam etſi anima corpori humano ingenita ſit, ut iſtud vivum reddat & moveat, ea ipſa tamen anima omnis materiæ

expers est. Per se quidem vivit, non vero per se operatur. Corpore enim organico opus habet, si aliquid agere vult. Sicut corpus sine anima, ita anima sine corpore quiescit.

Arctissima autem animæ cum corpore conjunctio immortalitati ejus nihil detrahit, quia corpus ipsum quoque ad vitam æternam creatum est, quod quidem non per se immortale fuit, durante tamen vinculo ejus cum anima non interire potuit.

Est vero *immortalitas animæ* neutiquam *absoluta* vocanda, quia Deus, quicquid ex nihilo produxit, in nihilum etiam, si vult, redigere potest. Deus enim, cum hominem ad vitam æternam creaverit, Sap. II, 23. & propterea imagine sua instruxerit, voluit etiam ejus animam talis naturæ esse, ut per se nunquam interire, nec ob immaterialitatem suam dissolvi, queat. Est itaque anima vere immortalis, sed non nisi ex gratia Dei; & licet in morte a corpore separetur, non tamen interit.

In nobismet ipsis immortalitatem animæ satis sentimus ex insito ad perpetuam nostri conservationem nisu & instinctu, quo etiam studium gloriæ & memoriæ post mortem spectat. Nec anima unquam bonis terrestribus satiatur. Semper plus ultra tendit. Recte hinc Augustinus in *Confess. L. I. c. 1.* scripsit: *Fecisti nos, Domine, ad te, & inquietum est cor nostrum, donec requiescat in te.*

Præ-

Præcipuæ facultates animæ rationalis sunt intellectus & voluntas.

Intellectus est facultas cogitandi s. sibi aliquid interne repræsentandi. Dicitur alias *mens* s. *animus*, item *cor*. Sicut vero intellectus per se mera facultas animæ est, ita quoque anima actum nil intelligit, nisi quod antea per sensus percipit. Ad hanc autem perceptionem sensualem requiritur corpus organicum. Hoc si salubre & integrum est, etiam facultas tam percipiendi, quam intelligendi in actum venit. Comprehendit vero actus intelligendi non modo notitiam memoriamque rerum & imaginationem, sed etiam ratiocinationem & iudicium, de quibus omnibus in Philosophia prolixè agitur.

Voluntas est facultas libere inclinandi ad cognitum bonum & libere averfandi cognitum malum.

Actus voluntatis sequitur plerumque actum intellectus. Distinguitur autem voluntas ab appetitu sensitivo s. instinctu naturali, utpote qui etiam in animalibus irrationalibus datur. Voluntas libere, appetitus vero sensitivus necessario agit, spectatque tantum ad sui ipsius conservationem & propagationem. In hominibus appetitus sensitivus a dominio intellectus & voluntatis dependet, a quo etiam vario modo temperatur.

Ad voluntatem etiam pertinet tranquillitas animi, secundum quam voluntas in fruitione illius boni, quod appetiit, acquiescit. Homines

mines impii & mundo dediti nunquam eam adipiscuntur. Semper inquieti manent, Jes. XLVIII, 22. Ps. XXXIX, 7. Jer. VI, 16. Matth. XI, 29. Quamdiu animus aut voluntas id nondum impetravit, quod quærit & desiderat, homo *inquietus* dicitur, & si impetratum bonum iterum amittit, *tristis* redditur.

Non *triplex* in homine datur *anima*, vegetativa, sensitiva & rationalis, ut Aristoteles docuit, sed tantum una, quæ vero tam movendi, & sentiendi, quam ratiocinandi facultatem habet.

CAPUT V.

DE

VINCULO UNIONIS INTER ANIMAM ET CORPUS.

Animam cum corpore arctissime & quasi essentialiter unitam esse, res extra omnem dubitationis aleam posita est. Quomodo autem id fiat, & qua ratione ambo in se invicem operentur, difficillima inter Philosophos quæstio est.

Quia mens non capere potest, quomodo purus spiritus cum materia essentialiter uniri possit, veteres Pelagiani & multi ex Pontificiis & Calvinianis, nec non certi Philosophi ansam inde sumserunt, animæ propagationem per traducem negandi, & e contra asserendi, Deum vel omnes animas in principio rerum uno actu creavisse, vel uniuscujusque hominis animam
eo,

eo momento, quo in utero materno conceptio fit, immediate creare & embryoni ingignere. Provocant ad Eccl. XII, 17. ubi spiritus hominis ad Deum redire dicitur, qui dederit eum. Sed ex loco hoc nil amplius probari potest, quam quod anima hominis non solum immortalis, sed etiam a Deo creata sit. Num vero creatio hæc mediate, an immediate fiat, suo loco relinquitur.

Traducianos vocant eos, qui aliter sentiunt. Ad hos referunt omnes, qui orthodoxam de peccato originis doctrinam fovent. Præexistentia animarum humanarum valde cum ista pugnat, nec cum historia creationis primorum parentum conciliari potest. Adamo quidem, non vero Evæ, immediate a Deo ingenitam esse animam legimus, neque in tota Scriptura S. unico verbo mentio fit cujusdam præexistentis, aut a Deo speciatim creatæ animæ. Ex benedictione divina, Gen. I, 28. potius concludi potest, hominem a Deo accepisse facultatem per traducem se propagandi, perinde ac cum animalibus irrationalibus hac in re comparatum est. Sicuti enim hæc se non modo quoad corpus, sed etiam quoad animam propagant, ita etiam homo, animal rationale, se propagat.

Dictu sane difficile est, quomodo spiritus se multiplicare queat? sed quis propterea de veritate hujus rei dubitet, cum omnis generatio rerumque propagatio, etsi quotidie oculis nostris

stris obversetur, per se mysterium sit? Si ignis materialis per communicationem aut accensionem propagari potest sine diminutione sui ipsius, cur non etiam anima per generationem per traducem? Non autem anima ex anima, sed animatum ex animato gignitur. Aura feminalis in conceptione est quasi lux de luce accensa.

Hæc cum ita sint, facile judicari licet, quam arcta sit inter animam & corpus unio. Secundum primam Dei intentionem ea nunquam dirumpi, nec dissolvi debuit. Sicuti autem utraque pars ex uno semine una oritur, ita etiam utraque alterius non indigere nequit in quacunque operatione & animali & rationali.

Corpus suppeditat organa & anima dat facultates. Hisce conjunctis homo fit viva & rationalis substantia. Nisi corpus & anima conspirant, nec membra corporis moveri, nec sanguis circulari, nec sensus percipere, nec mens cogitare, nec intellectus intelligere, nec voluntas aliquid appetere vel averfari potest.

Tota corporis structura est organica & ita comparata, ut nihil in eo sit, quo non utatur *anima* in sua operatione. Per sensuum organa sentit. In cerebro gignit ideas & in corde, ubi sanguinis fluxus & refluxus fit, concipit desideria & cupiditates.

Corpus e contra nec artus movere, nec videre, nec audire, nec sonum per os & guttur edere, nec ire, nec comedere, nec concubare,
nec

nec aliud quid facere potest, nisi concurrat anima, quæ tamen organa sana, integra & matura requirit.

Exinde cognoscimus, cur infantes & senio confecti homines multo debilius cogitent, concupiscant & sese moveant, quam qui in medio ætatis flore vivunt & optima valetudine utuntur. Inde quoque fit, quod læsa auris non audiat, læsus oculus non videat, læsus pes non vadat, læsa manus non prehendat, læsum cerebrum nil intelligat, & sic porro.

Uti corpus corpus formositate, magnitudine & robore antecedit, ita etiam anima animam præstantia facultatum superat, quod plerumque a Dei creatoris benevolentia & benignitate dependet, Sap. VIII, 19. Hinc etiam Deus quibusdam hominibus, præ aliis plus dare rationis & intelligentiæ dicitur, Eccl. II, 26. Dan. II, 21.

Philosophi nondum convenerunt in determinando modo, quo anima & corpus in se invicem operentur. Præcipua, quæ ab iis excogitata sunt, systemata, sunt 1) *Systema physici influxus*, 2) *systema causarum occasionalium* & 3) *systema harmoniæ præstabilite*.

Systema physici influxus est usitatissimum & vetustissimum. Secundum istud anima causa est, ut corpus se moveat; & corpus causa est, ut anima cogitet & sentiat. Influunt sic quasi ambo in se invicem. Hinc ortum est nomen influxus physici.

Systema

Systema causarum occasionalium est, quo Deo tribuitur causa, cur corpus moveatur & anima cogitet. Hac ratione anima & corpus tantum occasionem dant Deo, per utrumque operandi: hinc dicitur istud systema causarum occasionalium. Autor ejus est *Cartesius* & qui vestigiis istius firmiter insistit, *Malebranchius*.

Systema harmoniæ præstabilite denique est illud, quo perhibetur, Deum animam & corpus in utero materno ita formasse, ut quodvis pro se in debita harmonia, propria virtute, ingenitas suas vires & actiones in suo ordine suoque tempore præstet. Secundum hoc systema anima & corpus duo quasi sunt horologia, conjunctim ita aptata, ut quodlibet pro se, in justa tamen harmonia, a Deo ipso ordinata, devolvatur. *Leibnitius* systema hoc excogitavit & *Christianus Wolffius* pluribus in ordinem redegit, orbique erudito de meliori commendavit.

Nostrum non est, systemata hæc examinare. Philosophis id relinquimus. Interim primum ex iis mihi & simul omnibus, quibus orthodoxia evangelica cordi est, arridet, quia minus difficultatis quam cætera habet & cum veritate divina optime convenit.





SECTIO II.

DE

IMAGINE DIVINA.

CAPUT I.

DE

ORIGINE ET SUBJECTO IMAGI-
NIS DIVINÆ.

Imago divina denotat excellentiam naturæ & felicitatem status primorum hominum ante lapsum. Vocatur *imago divina*, quia exprimit & assimilat perfectionem beatitudinemque Dei.

Non dabatur in primo homine *status purorum naturalium*, antequam imaginem Dei acciperet, ut Pontificii somniant, sed homo a primo existentiae suæ momento imaginem Dei habuit, quæ simul ei connaturalis fuit.

Autor imaginis divinæ fuit ipse Deus. Dicebat enim sexta creationis die: *faciamus hominem ad imaginem nostram secundum similitudinem nostram*. Dictum, factum. Creavit Deus hominem ad imaginem suam, Gen. I, 27. & porro: *ad imaginem Dei creavit illum*, c. IX, 6.

Loquitur in priori loco Deus in plurali, ut ostendat, creationem hominis esse opus totius sanctæ Trinitatis. Errant, qui exinde con-

Pars I.

U

cludunt,

cludunt, hominem repræsentare imaginem singularum Deitatis personarum. Non enim imago divina characteres Trinitatis personales, sed essentialem Dei perfectionem delineat. Eph. IV, 24.

Finis imaginis divinæ *respectu Dei* fuit, 1) ut seipsum in hominibus tanquam in speculo cum voluptate videat, Prov. VIII, 31. 2) ut se in hominibus quasi propaget, cum omne bonum sit communicabile, 3) ut in terra aliquis sit, qui ipsum cognoscat, amet, laudet & glorificet; & 4) ut in terra habeat, quocum familiariter conversetur, quia similis simili gaudet.

Respectu hominum finis imaginis divinæ fuit, 1) ut creatorem suum cognoscant, 2) ut in conjunctione cum Deo vera felicitate fruantur, eamque in posteros propagent, 3) ut creatorem debito modo colere, eique servire queant, cuius causa iis imago divina in legem naturalem & prohibitio eius de fructu arboris vetitæ in legem positivam data est; & 4) ut per talem obedientiam summum beatitudinis cœlestis gradum consequantur.

Subiectum imaginis divinæ fuit homo utriusque sexus. Expresse enim Gen. I, 27. c. V, 1. 2. iste, quem Deus ad suam imaginem condidit, dicitur fuisse *mas* & *fœmina*. Utraque persona est verus homo. Cum igitur in omni homine imago divina restauranda sit, Eph. IV, 24. Col. III, 10. utriusque quoque sexus homo non potest non ad imaginem divinam creatus esse.

Recte

Recte hinc Paulus scripsit, in Jesu Christo, imaginis divinæ restauratore, non discrimen esse inter marem & scēminam, Gal. III, 28.

At quæritur: *cur Paulus 1 Cor. XI, 7. virum imaginem & gloriam Dei, mulierem vero gloriam viri nominet?* Facit hoc, ut indicet, 1) Adamum per se, Evam vero in Adamo ad imaginem Dei creatam esse, & 2) virum esse caput & dominum mulieris, Eph. V, 23. 1 Tim. II, 12.

Competit igitur imago divina in virum primario, in mulierem vero secundario, nec dubitandum est, mulierem in originali sapientia & perfectione paulo infirmiore fuisse viro, quapropter etiam diabolus istam primum aggressus est, cum seduceret homines, Gen. III, 1. 1 Tim. II, 14. Petrus hac de causa etiam totum genus scēminum debilius instrumentum nominavit, 1 Petr. III, 7.

Per se *mas & scēmina* non specie, sed tantum sexu differunt, etsi mas quibusdam prærogativis gaudeat, Gen. I, 26. 27. Utrique hinc tribuitur definitio hominis. Æquales habent partes essentiales & proprietates. Uno eodemque modo gignuntur. Pares a Deo promissiones in scriptura S. acceperunt, & si Christus sexus masculini fuit, e contra ex femine mulieris genitus est.

Prærogativa maris præ scēmina patent 1) ex ordine modoque creationis, Gen. II, 18 sq. 1 Cor. XI, 8-12. 1 Tim. II, 13. & 2) ex præcepto divino de non edendo fructu arboris ve-

titæ, ad virum directo, quasi fuerit uxoris suæ præceptor, Gen. II, 16. 17. c. III, 9-12.

Non igitur dubitandum est, quin uxor etiam ante lapsum marito suo aliquo modo subordinata fuisset, Gen. II, 23. Post lapsum Deus expresse mandato mulieres dominio & voluntati virorum subjecit, Gen. III, 16. 1 Tim. II, 11-15. Eph. V, 22-24. Col. III, 18. 1 Petr. III, 1. 5. 6.

CAPUT II.

DE

FORMA ET NATURA IMAGINIS DIVINÆ.

Imago divina est complexus omnium perfectionum animæ & corporis, quas Deus primis hominibus in creatione in eum finem contulit, ut in sanctitate & iustitia ipsi serviant & vita felici fruantur.

Imago itaque h. l. non proprie, sed improprie sumitur. Est vox biblica, a Deo ipso usurpata, Gen. I, 26. 27. Explicatur per additam vocem *similitudo*. Imago & similitudo hic unum idemque significant. Coniunguntur hæ voces, ut inde pateat, quod fuerit imago Deo *simillima*.

Dicitur *imago similitudinis*, ut distinguatur 1) ab imagine identitatis, quæ in solum Christum competit, Hebr. I, 3. Col. I, 15. & 2) ab imagine

gine nudæ delineationis, Ps. LXXIII, 20. Matth. XXII, 20.

Similitudo differt ab æqualitate. Homo Deo quidem similis, non vero æqualis dici potest.

Homo non ad *imaginem Christi*, sed Christus potius ad *imaginem hominis* formatus est, Hebr. II, 14. Rom. VIII, 3. Phil. II, 7. Decretum enim Dei de homine creando prius est decreto de mittendo filio Dei. Locus vero Rom. VIII, 29. non de hominis creatione, sed de fidelium conformatione cum Christo agit.

Salomo *imaginem divinam* per vocem *רשׁוּ* exprimit, dum scribit, Deum fecisse hominem *רשׁוּ*, h. e. *rectum & perfectum*, Eccl. VII, 29. Vox hæc omnes perfectiones imaginis divinæ comprehendit.

Sedem habuit imago divina non in essentia hominis, sed tantum in *natura* ejus.

Essentia & natura plerumque quidem unum idemque significant, certo tamen modo inter se differunt. *Essentiam* proprie dicimus, quod ipsam substantiam alicujus rei constituit, *naturam* vero, quod alicujus rei substantiam ab aliis distinguit.

Neutiquam vero imago divina in ipsa hominis *essentia* seu *substantia* consistebat, ut Manichæi, Flaciani, & certi Fanatici docent. Nam homo erat tantum imaginis divinæ subiectum. Quicquid autem in ente, tanquam in suo subiecto, est, non ipsa entis substantia esse potest.

Imago divina fuit potius *qualitas* substantiæ humanæ *naturalis*, quæ naturæ hominis quidem firmiter inhæsit, salva tamen essentia hominis abesse potuit. Omnino itaque *accidentale quoddam* fuit, at non extrinsecum, sed *intrinsecum*.

Imago divina dicitur *naturalis*, non quatenus naturam hominis constituit, sed quatenus naturæ ejus inhæsit. Erat enim naturæ hominis in ipsa creatione tam intime ingenua, ut cum eadem in omnes posteros, tanquam excellentissima qualitas, propagari potuerit.

Vocari propterea potest *donum Dei naturale*, quod *donum supernaturale* opponitur, quale quid Deus ex singulari gratia tantum huic vel illi homini accidentaliter largiri solet.

Distinguitur imago divina in *primariam* & *secundariam*. Ad *primariam* pertinent perfectiones primariæ, quæ ipsam imaginem divinam constituunt, quales sunt sapientia, justitia & sanctitas, Col. III, 10. Eph. IV, 24. ad *secundariam* vero eæ, quæ ex prioribus sequuntur, e. g. sanitas & immortalitas corporis, felicitas vitæ, dominium in creaturas &c.

Imaginem divinam valde imminuunt *Pelagiani*, qui propterea non amissam esse statuunt. *Semi-Pelagiani* sunt Pontificii, qui imaginem Dei pro solo dono supernaturale, quod ad naturam hominis non pertineat, habent.

Sociniani perhibent, imaginem Dei tantum in certis prærogativis, e. g. in recto usu rationis,

nis, dominio in creaturas, immortalitate corporis &c. constituisse.

Qualem & quantam perfectionem imago divina involvat, cognoscendum dat 1) *ipse Deus*, tanquam perfectissimum & excellentissimum ens, cujus attributa conjunctim sumta δόξα τοῦ Θεοῦ in sacris literis dicuntur, quo alludit Christus, Matth. V, 48. 2) *Christus*, qui ἀπαύγασμα τῆς δόξης τοῦ πατρὸς vocatur, Hebr. I, 3. cujus sapientiam & virtutem imitari debemus, 1 Joh. IV, 17. 1 Petr. II, 21. 3) *lex divina*, quæ quasi delineatio perfectionum Dei moralium est & speculum, in quod diligenter introspicere debemus, Lev. XIX, 2. 1 Petr. I, 15. 16. Jac. I, 25. Sicut amor summa legis est, 1 Tim. I, 5. Matth. XXII, 37 - 39. ita etiam Deus amor dici potest, 1 Joh. IV, 8. & denique, 4) *spiritualis renovatio hominis*, quæ restauratio est imaginis divinæ, Col. III, 10. Eph. IV, 24.

CAPUT III.

DE

SCIENTIA ET SAPIENTIA ORIGINALI

Sapientia originalis ea fuit intellectus humani perfectio habitualis, qua homo in statu integritatis non modo omnium divinarum, humanarum & naturalium rerum, sed etiam finium

earum veram perfectamque cognitionem habuit, Col. III, 10. Eph. IV, 23.

Gaudebat itaque homo in statu integritatis non solum excellentissima rerum cognitione *f. scientia*, sed etiam facultate, scientiam hanc ad optimum finem dirigendi & applicandi, quam facultatem nominare solemus *sapientiam*.

Errant, qui cum Socinianis & Anabaptistis *Adamum* instar pueri rudem fuisse perhibent, nec non cum Arminianis ei impotentiam, per se aliquid intelligendi & credendi, tribuunt.

Scientia hominis ante lapsum nec *infusa* fuit, ut certi Pontificii docent, nec *acquisita*, ut Photiniani asserunt; sed *innata*, ita tamen, ut gradus habuerit progressuque temporis tam per revelationem quam per experientiam crescere & augeri potuerit.

Erat *finita & limitata*, alias homo omniscius fuisset. Nec *intuitiva* dicenda est, utpote quæ tantum ad vitam æternam pertinet, 1 Cor. XIII, 12. 1 Joh. III, 2.

Objectum scientiæ primitivæ fuit inprimis *Deus* ejusque voluntas; postea *angeli*, quorum natura & officia haud incognita fuerunt homini in statu integritatis; porro *ipse homo* secundum ejus virtutes & facultates; & denique *omnes creaturæ & res naturales* secundum earum constitutionem & virtutem internam.

Neutiquam intelligentia hæc ad res futuras & fortuitas extendi debet. Has enim nosse, soli Deo omniscio & cui istas revelavit, tribuen-

buendum est. Dabatur igitur in statu integritatis aliqua ignorantia, sed non alia, quam puræ negationis.

Interim non negari potest, in intellectu hominis ante lapsum insignem fuisse cognitionem divinarum & naturalium rerum. Sicut Deus tanquam *lux* describitur 1 Joh. I, 5. Ps. CXXXIX, 12. ita etiam in intellectu humano lux erat, caligini mentis Eph. IV, 18. opposita. Datur autem *triplex* in homine *lux*, 1) scientiæ, 2) gratiæ & 3) gloriæ. Primam habuit homo ante lapsum, altera gaudent renati & tertia dabitur in electis.

Specimen concreatæ rerum naturalium cognitionis eximiæ præbuit Adam, cum non modo animalibus, Gen. II, 19. 20. sed etiam uxori suæ, v. 23. nomina dederit naturæ convenientissima.

Erat autem *cognitio* hæc non mere speculativa & theoretica, sed quam maxime *practica*, quia homo omnia ad certum finem, eumque optimum & voluntati sapientis Dei consentaneum dirigere potuit.

Prudentia certo modo non locum habebat in statu integritatis, quippe quæ lapsis tantum hominibus necessaria est, qui per istam se ex omnibus difficultatibus expedire & in suis periculis & calamitatibus conservare solent.

CAPUT IV.

DE

JUSTITIA ET SANCTITATE
ORIGINALI.

Justitia originalis multis idem est ac ipsa imago divina; proprie autem differt ab ea, ut pars a toto.

Latius hinc patet imago divina, quam justitia originalis, quæ nihil aliud est, quam omnium virium & facultatum hominis singularis integritas exactissimaque harmonia, secundum quam homo non modo omnis proclivitatis ad male agendum & inordinati motus sensitivi expers, sed etiam ad sponte liberrimeque facienda omnia, quæ voluntati Dei consentanea sunt, promptus paratusque fuit.

Speculat itaque justitia originalis magis ad voluntatem, quam intellectum, parumque differt a *sanctitate originali*, utpote quæ species ejus est, quatenus scilicet tantum in voluntatis actionumque conformitate cum voluntate Dei consistit. Ambæ propterea in Scriptura S. plerumque conjunguntur, e. g. Eph. IV, 24. Luc. I, 75. Col. I, 22.

Optime tota justitia originalis ἀλήθεια (h.e. ein rechtschaffen Wesen) quæ omnem fraudem, simulationem & ἀνομίαν excludit, Eph. IV, 21. nec non ἀπλότης, 2 Cor. I, 12. c. XI, 3. item *vita ex Deo*, Eph. IV, 18. & δόξα τῷ Θεῷ, Rom. III, 23. dici potest.

Erat

Erat autem justitia originalis non, ut Flacius docuit, ipsa substantia hominis, sed tantum qualitas, per omnem substantiam hominis diffusa, atque adeo corpori & animæ communis, habebatque naturam legis divinæ universalis, cordi hominis inscriptæ & legi morali, per Mosem postea promulgatæ, conformis.

Ad justitiam originalem pertinet etiam *αὐταρχεία*, quæ dabatur in primis hominibus respectu appetitus sensitivi. Consistebat in ejusmodi tranquillitate & moderatione animi ac cordis, ut nec cupiditates carnis, nec affectus animi inordinate & ultra modum se moverent, sed se potius recto intellectus judicio & sancto voluntatis regimini promte & sine lucta subicerent. Ex hac causa primi parentes in statu integritatis dicuntur non cognovisse, se esse nudos, nec propterea erubuisse, Gen. II, 25. Liquet exinde, eos sine inordinata libidine fuisse, etsi objectum non defuerit, quod eos alliceret.

Appetitu sensitivo non plane carebant primi homines. Habebant enim non modo cibum capiendi, bibendi & concubandi cupiditatem, sed etiam cupiditatem gloriæ & bonorum. Verum omnes ejusmodi cupiditates valde temperatæ & rectæ rationi divinæque voluntati non contrariæ erant.

Nec deficiebant primis hominibus *ἡθνη καὶ πάθη* f. *affectus*, qui commotiones animi sunt, ex inopinata objecti mutatione orientes. Cum enim

enim homines non omnia, quæ iis obvenire solent, præsciant, animus eorum non potest non commoveri, quoties aliquid novi & inopinati iis accidit. Tales affectus in statu integritatis nec modum excedebant, nec cum voluntate Dei pugnabant.

Certi affectus in isto statu prorsus deerant, e. g. ira, tristitia, invidia, pudor &c. qui partim per se peccaminosi, partim fructus peccaminosi status sunt.

Theologi omnem appetitus sensitivi moderationem & integritatem *αὐταρξίαν* vocant, per quam ejusmodi cordis & animi castimoniam & puritatem intelligunt, quæ primos homines incapaces reddidit, cupiditatibus & affectibus suis immodice indulgendi.

Huc spectat etiam *liberum arbitrium*, quod ea voluntatis humanæ facultas originalis fuit, secundum quam homo proprio motu & sine ulla coactione tam in spiritualibus, quam in naturalibus agere vel non agere, itemque hoc vel illud agere potuit. Plura alibi de libero hominum arbitrio dicemus.

Ex omnibus hisce, quæ jam protulimus, satis patet, quid de *Pontificiorum* justitia originali judicandum sit. Tribuunt primis parentibus *statum purorum naturalium*, s. ejusmodi statum, in quo mere naturalibus animæ & corporis viribus & cupiditatibus præditi fuerint. Hæ cum inter se naturaliter pugnent, Deum ad easdem coercendas supernaturale aliquod donum iis de-

dedisse afferunt, quod justitiam originalem aut imaginem divinam vocant, qua amissa natura hominis non corrupta, sed tantum naturalis virium & cupiditatum propensio ad pugnandum inter se in actum perducta sit. Est igitur secundum Pontificiorum doctrinam imago divina quasi sertum virginis, quod non ad virginis naturam, sed tantum ad ejus ornatum pertineat.

Hic errant etiam *Sociniani*, qui luctam carnis & spiritus, *Arminiani*, qui aliquam ad peccandum inclinationem, *Weigeliani*, qui aliquid vere mali, & *Calixtini*, qui rationis cum appetitu sensitivo pugnam, primis parentibus in statu integritatis tribuunt.

CAPUT VI.

DE

IMMORTALITATE ORIGINALI.

Homo ante lapsum immortalitate gaudebat. *Immortalitas* vero hæc non *absoluta* erat, qualem solus Deus habet, 1 Tim. VI, 16. sed tantum *hypothetica*, quia salva hominis essentia & adesse & abesse poterat, nec non a Dei gratia & benignitate dependebat.

Triplex dabatur in homine *immortalitas*. Prima spectabat ad animam, altera ad corpus & tertia ad totum hominem.

Anima

Anima per se, tanquam spiritus immaterialis, immortalis erat. Hæc immortalitas mansit, etsi homo imaginem Dei amisit.

Corpus erat immortale ex benignitate Dei, qua noluit istud in eas particulas dissolutum iri, ex quibus compositum est.

Totus homo immortalis erat, quatenus Deus vinculum unionis inter animam & corpus in homine indissolubile esse voluit. Et hæc est ea ipsa immortalitas, quæ ad imaginem Dei pertinet.

Mors est solutio vinculi inter animam & corpus. Quamdiu igitur anima & corpus, tanquam partes substantiæ animalis essentielles, unitæ sunt, tamdiu etiam homo vivit. Uti vero Deus hominem ad perennitatem vitæ creavit, Gen. II, 7. Sap. II, 23. ita etiam voluit eum esse immortalem.

Immortalitas itaque hominis donum Dei fuit, quod cum imagine sua in prima creatione ei contulit, ut anima & corpus nullo modo & tempore disjungantur, sed constanter unita maneat, atque adeo homo semper & in æternum vivat.

Hæc immortalitas a *Pontificiis* dicitur fuisse donum supernaturale & extraordinarium, quod etiam in statu integritatis tolli potuisset.

Sociniani vero & qui cum iis unam eandemque inflant tibiam, prorsus negant, primum hominem immortalem fuisse. Contra istos adducere possumus loca, in quibus docetur, peccatum

catum hominis veram mortis & miseriæ ejus causam esse, e. g. Gen. II, 17. Lev. XVIII, 5. Rom. V, 12. c. VI, 23.

Corpus dicitur fuisse immortale, quatenus ex benignitate Dei naturaliter ita comparatum erat, ut non dissolvi potuerit in prima sua elementa.

Nec in se, nec extra se aliquid dabatur, quod vires ejus debilitaret & istud morbidum redderet. Erat semper sanum, nullisque doloribus & imbecillitatibus aut casibus infelicibus obnoxium.

Senectus non consumebat vires, sed corpus semper in suo robore, suaque *εὐκρασία* tamdiu manebat, usque dum homo ex paradiso terrestri in cœlestem vivus transportaretur.

Quando vero vires aliquo modo labasci incipiebant, homo accedere poterat ad *arborem vite*, a Deo propterea in medio paradisi positam, ut per rectum ejus usum labascentes corporis vires iterum reficeret, Gen. II, 9. c. III, 22.

C A P U T VI.

D E

STATU INTEGRITATIS ET PARADISO.

S*tatus integritatis* est status, in quo primi parentes ante lapsum vixerunt. Habet nomen ab integritate, quia primi homines non modo

modo integri vitæ scelerisque puri erant, sed etiam integritate imaginis divinæ gaudebant.

Erat *status felicissimus*, quia homines non modo perfectam Dei rerumque cognitionem habebant, sed etiam cum voluptate divinam voluntatem faciebant. Animus nulla adverſitate perturbabatur. Conſcientia ſemper quieta manebat, & corpus nil mali ſentiebat. Nec metus, nec dolor, nec triſtitia, nec invidia, nec aliud quid, quod homini poſt lapſum moleſtiam & ærumnam creare ſolet, aderat, mortis vero morbiſque periculum prorsus ceſſabat. Omnia, quæ homini & nutrimento & oblectamento eſſe poterant, terræ ſolum ultro proſerebat & cunctæ creaturæ ei obſequium præſtabant.

Dominium primi hominis *ſuper creaturas* erat adjunctum imaginis divinæ, Gen. I, 26. Non ſe extendebat ſuper aſtra, aut angelos, ſed tantum ſuper creaturas terreſtres & inprimis ſuper animalia bruta, quia iſtorum tantum Deus expreſſis verbis mentionem fecit, Gen. I, 28. Conſiſtebat autem non ſolum in jure & poſtate ſuper creaturas, ſed etiam in vi & potentia ſectendi eas ad obſequium.

Erat autem *dominium* hoc non tantum *utile*, ſed etiam *directum*, attamen non *abſolutum*, ſed *limitatum*. *Dominium* abſolutum in ſolum Deum, tanquam ſupremum cœli terræque dominum, competit, 1 Chron. XXX, 12. Pf. VIII, 7-10. Pf. XXIV, 1. Pf. L, 10. 11. Hagg. II, 9. homi-

homines vero tanquam Dei œconomi, quibus omnia concedidit Deus, Gen. IX, 2. Matth. XXIV, 47. tantum dominium limitatum habent.

Distinguendum autem est inter hujus *dominii possessionem* & *usurpationem*. Neutra quidem amissa est, Gen. IX, 2. 3. posterior vero valde imminuta. Num vero hominibus in statu integritatis etiam carnem animalium edere licuerit, a quibusdam quidem ex Gen. I, 29. in dubium vocatur, sed non penitus negandum est, quia alias usus tot animalium, in primis piscium, nesciretur, ut taceam, quod esus carnis nullibi in sacris literis interdictus sit, nec animus noster ab eo abhorreat.

Status integritatis valde distinguendus est a *statu beatitudinis* & *gloriæ*, qui ad solam vitam cœlestem pertinet, ad quam Deus ex statu integritatis singulatim homines evexisset, si non peccassent.

Status itaque integritatis cum statu matrimonii & familiæ bene constare potuit, Gen. II, 18. 23. 24. Nec defuit in eo somnus v. 21. nec labor v. 15. Hoc tamen intervenit discrimen, quod ante lapsum non ex lassitudine dormivissent homines, nec cum molestia & sollicitudine opera sua fecissent.

Locus, in quo primi homines in statu integritatis vixerunt, vocatur *hortus in Eden*, Gen. II, 8.

Si nomen hoc appellative sumitur, significat *hortum voluptatis* & *amœnitatis*. Alias etiam

hic hortus עֵדֶן dicitur, quæ vox Eccl. II, 9. Neh. II, 8. & Cant. IV, 13. occurrit & a עָרַף h. e. *fructus tulit*, descendit.

Ex hac voce formarunt Græci nomen *Paradisus*, quod Luc. XXIII, 43. 2 Cor. XII, 4. & Apoc. II, 7. reperimus. Indicat regionem, quæ instar amœnissimi horti non modo oleribus & fructiferis arboribus confita est, sed etiam varii generis animalia & feras continet.

Talis regio erat Paradisus, quæ post diluvium in memoriam perditionis Paradisi nomen *Eden* h. e. *terræ deliciarum*, accepit. Floruit hæc regio non modo temporibus Mosis, Gen. II, 8. 10. sed etiam diu posthæc, ut ex Jes. XXXVII, 12. & Ezech. XXVII, 23. patet.

Jo. Harduinus multum operis consumpsit in tuenda sententia, quod *Paradisus* situs fuerit in terra Canaan, sed paucorum ex nostra Ecclesia Theologorum assensum nactus est. Nostris temporibus in primis JONAS CORTE in *Suppl. III. ad Itinerarium suum* p. 77 sq. evincere studuit, terram Sodomæ & Gomorræ fuisse locum Paradisi. Provocat ad tuendam suam hypothesein, ad B. Lutherum, qui in *Commentario in Genesim* idem docuerit. Vide *Tom. IX. Altenb. p. 346. a.* Hujus sententiæ etiam fuisse fertur Jo. Heinr. Heideggerus in *Histor. Patriarch. Exercit. IV. § 42.* nec non Maxime Rev. Dnus Hæckius, Minister verbi divini Hamburgensis in supra allegato *Suppl. p. 88.*

Flumina, intra quæ juxta Mosis descriptionem Paradisus locum habuisse fertur, hodie non modo alia nomina, sed etiam alios meatus habent. Hinc difficile est, verum ejus situm indicare. Nobis scitu sat est, primos homines in statu integritatis incoluisse regionem Asiæ, quæ deliciarum plena fuit, in diluvio vero earum jacturam fecit. Interim non negandum est, totum terrarum orbem ante hominis lapsum Paradisi formam habuisse. Hominum enim genus non semper intra confinia amœnissimi sui horti in Eden mansisset, si in statu integritatis se multiplicasset, sed potius se extra ejus cancellos in omnem terram posthac diffudisset.

Paradisus, etsi perditus sit in hac terra, adumbrat tamen adhuc statum gloriæ post hanc vitam, Luc. XXIII, 43. 2 Cor. XII, 4. Apoc. II, 7.

C A P U T VII.

D E

JACTURA ET RELIQUIIS IMAGINIS DIVINÆ.

Imagō Dei in hominibus amissa est per lapsum primorum parentum. Probatū hoc non modo ex historia lapsus, de quā infra pluribus agemus, sed etiam ex corrupto hominum statu, in quo jam versantur homines, nec non ex

renovatione, quæ quasi imaginis divinæ restauratio est, Eph. IV, 22-24. Col. III, 10.

Signa amissæ imaginis divinæ in primis parentibus fuerunt pudor, metus, occultatio, frivola excusatio & pœnitentia, Gen. III, 7. 8. 10-13.

Negant Sociniani, Weigeliani & quidam ex Arminianis, imaginem Dei per lapsum amissam esse. Provocant ad Gen. IX, 6. 1 Cor. XI, 7. & Jac. III, 9. Sed ibi quidem homines dicuntur ad imaginem Dei conditi esse, sed non simul asseritur, istos eadem adhuc gaudere.

Pontificii distinguunt inter imaginem & similitudinem Dei. Priorem mansisse, posteriorem vero amissam esse contendunt. Sed distinctio hæc nullo nititur fundamento. Rectius distinguitur inter imaginem Dei & ejus reliquias, quas alii *vestigia* dicere malunt.

Intelligimus per *reliquias* s. *vestigia* imaginis divinæ non modo id, quod quasi redolet pristinam sapientiam, justitiam & sanctitatem, sed etiam omne, quod in hominis natura, intellectu & voluntate adhuc restat, ad cognoscendum, nos olim felicioris fuisse sortis & conditionis. Probari hoc potest ex Rom. I, 18-32. c. II, 14. 15. Act. XVII, 23. 27. 28.

Supereſt etiam de imagine Dei usus *conscientiæ*, secundum quam de nostris actionibus judicare possumus, num licitæ sint
nec

nec ne. Speciatim de ea in sequenti capite agemus.

Reliquiæ imaginis divinæ quintuplicem habent usum: 1) sunt testimonia primæ felicitatis, 2) conservant externam disciplinam & pacem publicam inter homines, 3) ducunt nos ad Deum, verumque ejus cultum, 4) multum faciunt ad Dei glorificationem & 5) reddunt homines coram tribunali divino inexcusabiles, Rom. I, 20.

Recordatio imaginis divinæ nos excitare debet 1) ad exuendam imaginem mundi, Rom. XII, 2. nec non Satanæ & animalium brutorum, quibus in malis nostris cupiditatibus & operibus similes sumus, & 2) ad induendam imaginem Christi, secundi Adami, quod in hac vita inchoate, in futura autem complete fit, Ps. XVII, 15. 1 Cor. XV, 49. 1 Joh. III, 2.

C A P U T VIII.

D E

C O N S C I E N T I A.

C*onscientia* est ea animæ facultas, omnibus hominibus ingenita & concreata, qua non modo actionum suarum conscii sunt, sed etiam de earum moralitate, num bonæ

& licitæ, an malæ & illicitæ sint, iudicium ferre possunt.

Græce vocatur *συείδης* a *σύν* & *είδεναι*, quæ vox verbum latinum perfecte exprimit.

Ad reliquias imaginis Dei pertinet conscientia, sed per peccatum originale valde læsa & debilitata est.

Naturaliter unicuique homini inhæret. Hinc non modo *cordi* tribuitur, 2 Sam. XXIV, 10. 1 Reg. II, 44. Eccl. VII, 23. Jer. XVII, 1. 1 Joh. III, 21. Rom. II, 15. sed etiam per ipsum *spiritum hominis* interdum intelligitur, Rom. VIII, 16. 1 Cor. II, 11. Prov. XX, 27.

Pertinet *conscientia* ad utramque animæ facultatem, *intellectum* & *voluntatem*: ad *priorem*, quatenus hominem suarum actionum conscius; & ad *posteriolem*, quatenus eundem ad iudicandum de suis actionibus, atque adeo vel ad sese damnandum vel excusandum vel absolvendum impellit.

Norma conscientia est *lex*, tam *naturalis*, Rom. II, 14. 15. quam *divina* & *civilis*.

Objectum ejus sunt omnes actiones, *moraliter*, h. e. respectu legis, consideratæ. Sicut vero *lex* triplex est, ita etiam actiones vel naturales vel spirituales vel civiles sunt.

A cognitione & applicatione *legis* dependet *qualitas conscientia*. Distinguitur enim respectu *normæ* in *rectam*, *erroneam* & *dubiam* conscientiam.

Conscientia recta fundatur norma recta, f. lege recte intellecta & applicata, *conscientia erronea* vero lege non recte, & dubia lege dubitanter intellecta & applicata.

Ex dubiis conscientiae oriuntur *casus conscientiae*, per quos tales intelligimus actiones, quæ ad conscientiam spectant & respectu moralitatis difficulter decidi possunt.

Respectu iudicii, de moralitate actionis ferendi, distinguitur *conscientia in bonam, malam & scrupulosam*.

Conscientia bona est, quando homo ob actiones suas nil mali timet, Hiob. XXVII, 6. Hebr. XIII, 18. 2 Cor. I, 12. *conscientia mala* vero, quando homo se ipsum ob actiones suas damnat & poena dignum judicat, 1 Joh. III, 21. Sap. XVII, 10. 11. & denique *conscientia scrupulosa* f. *anxia*, quando homo de integritate & impunitate actionum suarum dubitat. *Inquieta* tunc est conscientia & *vulnerata*.

Potest etiam conscientia respectu status, in quo homo vivit, diversimode distingui.

In *statu gratiae* dicitur conscientia respectu normæ certa, Rom. XIV, 5. & respectu actionum & fidei *leta*, 1 Joh. III, 21. Sir. I, 11. *pura*, 1 Tim. III, 9. 2 Tim. I, 3. *quieta*, Sir. XIX, 10. *illefa*, Act. XXIV, 16. & *tranquilla*, quæ tranquillitas etiam *pax conscientiae* vocari potest.

Status naturæ duplex est, vel securitatis vel servitutis. In statu securitatis datur conscientia dormiens, laxa & cauteriata, 1 Tim. IV, 2. & in statu servitutis conscientia angusta, timida, Jef. VII, 2. Sap. XVII, 2. & desperabunda.

Caveamus igitur, ne contra conscientiam dubiam agamus, nec conscientiam bonam lædamus & maculemus. Studeamus potius, conscientiam certam adipisci, imbecillam roborare, vulneratam sanare, & aliorum conscientiam teneram non offendere. Omnem lapidem moveamus, ut, cum Paulo dicere queamus: *Ἐν τῷ αἰσῶ, ἀπρόσκοπον, συνείδησιν ἔχειν πρὸς τὸν Θεὸν καὶ τὰς ἀνθρώπους διαπαντός*: h. e. *in hoc me exerceo, ut inoffensam conscientiam omni tempore habeam coram Deo & hominibus*, Act. XXIV, 16. Confer Act. XXIII, 1.

Plura de conscientia pertinent ad Theologiam moralem.





S E C T I O III.

D E

L A P S U H O M I N U M.

C A P U T I.

D E

A U C T O R E L A P S U S.

Auctor lapsus non alius est, quam *diabolus*. Is enim in paradiso primos parentes seduxit, Gen. III, 1 - 5. 2 Cor. XI, 3. Dicitur propterea *homicida ab initio & pater mendacii*, quia mentiendo fefellit homines, Joh. VIII, 44.

In historia lapsus vocatur *serpens*, Gen. III, 1. Quæritur hinc inter Theologos: num vox hæc proprie, an improprie & metaphorice intelligenda sit?

Communis sententia est, diabolum obsedis-
se verum serpentem & per eum locutum esse cum
 primis hominibus. Sed qui contrariam tuen-
 tur sententiam, provocant 1) ad silentium Scri-
 pturæ S. de obsessione serpentis nil memoran-
 tis, 2) ad sapientiam primorum hominum, na-
 turam animalium satis cognoscentium, 3) ad
 justitiam divinam, diabolo ejusmodi obsessio-
 nem non permittentem, & 4) ad maledictio-
 nem,

nem, seductori impositam, quam naturalis serpens neutiquam meruit.

At cur non dicere velim, diabolum serpentis formam assumpsisse, aut phantasticum serpentis corpus induisse?

Sine dubio diabolus metaphorice in historia lapsus nominatur *serpens*, uti alibi fit, e. g. Luc. X, 19. 20. 2 Cor. XI, 3. Apoc. XII, 9. Est enim nomen Symbolicum. Quia serpentes animalia sunt astuta, venenata, abominanda & infensa, jure meritoque cum malis comparantur spiritibus. נחש, *serpens* & שרף, *saraph*, in plurali *Seraphim*, Num. XXI, 8. 9. sunt synonyma, hac quidem cum distinctione, quod prior vox generalem, posterior vero specialem significationem habeat.

Serpens itaque Gen. III, 1. est ipse diabolus, metaphorice sic dictus. Nec obstat, Mosem de isto scripsisse, cætera terræ animalia calliditate superasse.

Diabolus enim cum dejectus fuerit in terram, Apoc. XII, 9. facile inter omnes in terra viventes s. existentes creaturas callidissimus esse potuit.

Necesse vero habuit diabolus *calliditatem* ad seducendum homines, quia alias non ad defectionem istos traxisset. Aggrediebatur fraudulentia sua non modo intellectum & voluntatem primorum hominum, sed etiam eorum sensus externos, Gen. III, 6. Accedebat præcipue ad mulierem, viro debiliorem, 1 Petr. III,

Petr. III, 7. quam mendaciis suis fraudulenter decipiebat. Hæc vero peccans suafione sua simul in peccatum inducebat virum. In memoriam hujus deceptionis muliebris nulla nunc fœmina ad publice prædicandum verbum Dei in ecclesia admitti debet, 1 Tim. II, 14. Interim cum Adam, tamquam communis totius generis humani parens, uxoris suæ quasi radix ac principium fuerit, *unus* quoque *homo* fuisse dicitur, per quem peccatum in mundum venit, Rom. V, 12. Sumitur simul h. l. vox *unus* collective, sicut Gen. I, 27. quia maritus & uxor una caro sunt, Matth. XIX, 16.

Maledictio serpentis, Gen. III, 14. 15. metaphorice interpretanda est. Homini enim incedere & pulverem edere, statum abjectissimum indicat, Mich. VII, 17. Ps. XLIV, 26. Ps. LXXII, 9.

Causam, cur homines seduxerit diabolus, non aliam habuit, quam regno Dei damnum inferre & homines sua beatitudine privare. Autor Libri Sapientiæ hinc recte judicat, per diaboli invidiam mortem in mundum venisse, Sap. II, 24. Hominibus enim invidebat felicitatem, nec pati poterat, eos melioris esse fortis.

PERMISSIONE DIVINA LAPSUS.

Cum nihil in mundo sine præscientia & permissione Dei fieri queat, quæritur: *annon in Deum aliqua culpa cadat, quod homines lapsi sint?*

Homines libenter volunt culpam peccati & omnis inde exortæ miseriæ in Deum transferre, uti ipse Adam certo modo fecit, Gen. III, 12.

Verum nec causa physica, nec causa moralis lapsus hominum dicendus est Deus, & quidem 1) ob essentialem ejus sanctitatem & bonitatem, 2) ob serium peccati interdictum, 3) ob commissi peccati exprobrationem, & 4) ob poenæ ejus irrogationem.

Deus nec impulit nec determinavit primos homines ad lapsum. Serio potius ab eo retrahere studuit istos, non quidem physice, utpote quod cum concreata hominis libertate agendi pugnavisset, sed moraliter, dehortando scilicet & comminando, nec non vires ad præcavendum largiendo.

Deus quidem lapsum præscivit, sed scientia rei non ejus est causa. Sicut speculum
non

non rei, quam repræsentat, causa est, ita nec Dei intellectus, cui omnia perspecta sunt, causa cognitarum rerum esse potest.

Interrogant autem omnes, qui temere Deum injustitiæ arguunt, *cur non hominem aliter creaverit?* Verum non potuit homo ita creari, ut ei plane non possibile fuisset peccare & labi. Debebat enim esse creatura a Deo dependens & libere agens. Deinta autem libertate agendi vel machina mortua, vel animal brutum, vel truncus fuisset. Si vero plane non labi potuisset homo & quidem per essentiam suam, non fuisset homo, sed substantia divina, quod cum unitate Dei pugnat.

Ad quæstionem: *Cur Deus lapsum hominum permiserit, cum tamen impedire potuisset?* respondetur, ideo permisisse lapsum, quia convenientius ei fuit permittere, quam impedire. Talis Dei œconomia circa homines, universim spectata, perfectior fuit, quam quæcunque alia. Lapsus sine graviori, inde emergente, malo impediri non potuit. Qui inter plura possibilia id eligit, quod convenientius est cæteris & perfectius, is nihil committit se indignum aut incongruum.

Inter malum facere & permittere, magnum est discrimen. Malum facere, ut bonum exinde proveniat, nefas est, Rom. III, 8. at malum
lum

lum permittere, ut plura exinde eliciantur bona, omnino licitum est, ut ex folius Josephi exemplo Gen. XLV, 5. c. L, 20. satis probari potest.

Inter bona majora, quæ non nisi ex permissione lapsus orta sunt, jure refertur opus redemptionis Jesu Christi.

Potest etiam facilius permitti malum reparabile, quam irreparabile.

Qui non ad impediendam malam actionem obligatus est, nec malæ actionis culpam habet.

CAPUT III.

DE

OCCASIONE LAPSUS.

Occasionem labendi dedit lex de non comedendo fructu arboris vetitæ, Gen. II, 17. Nam sine lege non datur transgressio, Rom. IV, 15.

Quæritur autem: *Cur Deus homini legem præscripserit?* Factum id est ex singulari Dei sapientia. Homo enim non credere debebat, se absolutum esse terræ dominum, qui neminem super se habeat, quem timeat & cui obsequium præstet. Lex autem data satis docebat, eum sub Deo esse, cui omnia bona accepta referre deberet. Hoc homini poterat esse fundamentum

mentum timoris Dei, nec non studii, statum felicitatis suæ quotidie augendi & in bono se ita confirmandi, ut postea nunquam a Dei voluntate desciscere potuisset.

At proh dolor! lex divina præbuit homini occasionem peccandi. *Arbor vetita* homini offendiculo fuit, quo delapsus est in perniciem.

Arbor hæc in Scriptura S. vocatur *arbor cognitionis boni & mali*, Gen. II, 9. 17. Accepit nomen hoc ob divinam tentationem, qua hominem eo deducere voluit, ut cognoscat, quid bonum vel malum sit. In medio horti sita erat. Cujus generis vero fuerit, inter Philologos adhuc disceptatur. Ex sacris literis non liquet, num malus an pirus fuerit. In hoc fere omnes sani Theologi conveniunt, quod non singularis fuerit naturæ. Habebat sine dubio sui generis plures in horto & erat æque bona, quam cæteræ arbores.

Errant igitur, qui cum *Henningio Huthmanno*, Rectore Ilfeldensi, arbori vetitæ vim adscribunt naturalem, corpus hominis ejusque sanguinem cum omnibus humoribus ita corrumpendi, ut tota ejus natura per esum fructus ejus corrupta sit. Sed unde hæc vis nocendi, cum omnia, quæ Deus intra sextiduum creavit, valde bona dicantur? Gen. I, 31. Accedit,

cedit, quod non facultates animæ simul corrumpi potuissent, si corpus a veneno arboris noxam accepisset. Paulus expresse inobedientiam primi hominis nominat causam lapsus, Rom. V, 19.

Verisimillimum mihi visum est, arborem vetitam fuisse malum punicam, quia *a*) jucunda ista est in oculis, ejusque fructus ad edendum desiderabilis, Cant. IV, 13. c. VIII, 2. Num. XIII, 24. Deut. VIII, 8. *b*) vox Hebræa פִּינִי nomen a dolo habet, *c*) mala punica multifarium usum typicum in V. T. habuerunt, & *d*) ethnici mala punica Junoni, Saturno & Rheæ sacra esse voluerunt, fictioneque sua de Proserpina ob hæc mala in æternum detrusa, historiam lapsus adumbrarunt. Sed conjecturam hanc nemini obtrudimus.

Pessimam sententiam de arbore vetita fovit *Hadrianus Beverlandus*, Ictus Batavus, qui metaphorice per eam membrum Adami genitale in medio corporis ipsius, per paradysum adumbrati, positum intellexit, primosque parentes per concubitum libidinosum, quem Moses per esum fructus vetiti indicaverit, lapsos esse perhibuit.

Neutiquam vero præceptum Dei de non comedendo fructu prohibito causam lapsus dicere debemus. Quemadmodum enim Principis præceptum de non auferenda re aliena non causa furti est, etsi criminis furti omnes, qui istud præ-

præceptum transgrediuntur, reos facit: ita etiam cum præcepto divino de non comedendo fructu arboris vetitæ comparatum est.

CAPUT IV.

DE

FORMA LAPSUM.

Nomen *lapsus* desumptum est a voce *παρά-πτωμα*, quæ sæpissime in scriptis apostolicis occurrit. Derivatur a *παράπτεσθαι*, incidere & prolabi, Hebr. VI, 6.

Incepit lapsus primorum hominum in *intellectu*. Actus enim voluntatis semper actum intellectus sequitur.

Cum diabolus mendaciis suis illecebrosis homines aggrediretur, primum studebat intellectum eorum præjudiciis & falsis opinionibus occupare. Calumniabatur Deum, quasi invideat majori hominum perfectioni & felicitati: mentitum igitur ipsum esse perhibebat, quod esum de arbore cognitionis boni & mali eam ob causam, ut non moriantur, interdix-erit, Gen. III, 1-5.

Simulac calumniis hisce assensum præbere incipiebant primi parentes, lapsus aderat. Deficiendo a concreata cognitione habituali, & pro invido & mendace habendo Deum, 1 Joh. V, 10. voluntas inclinabat se ad obsequendum diabolo. Mulier oculos ad arborem dirigebat,

Pars I.

Y

cujus

cujus jucundus aspectus cupidam eam reddebat, de ejus fructibus aliquid degustandi. Cupiditas hæc cum concepisset, peccatum peperit, Jac. I, 15. Mulier extendebat manus ad decerpendum fructum & de eo comedens marito quoque aliquid porrigebat, qui pari cupiditate id accepit & edit, Gen. III, 6.

Sic homines non modo a concreata cognitione Dei, sed etiam amplectendo apparens bonum pro vero a genuina habitualique cognitione veritatis defecerunt. Amissa vero hac cognitione amittebatur etiam lux, sine qua nemo recta via incedere potest.

Lapsus hominum erat partim *internus*, partim *externus*. *Lapsus internus* habebat tres gradus, 1) ἀπιστία, 2) pravam cupiditatem & 3) propositum de prohibito fructu edendi.

Lapsus externus peractus est, cum revera primum Eva, deinde Adam manus extenderint & de fructu comederint.

Per lapsum hunc totum rumpebatur foedus, inter Deum & homines initum, vinculumque amoris inter utrosque prorsus dissolvebatur.

C A P U T V.

D E

IMPUTATIONE LAPSUM.

Imputatio est, quando rei culpa in aliquem confertur. Proprie peccatum originis tantum

tum Adamo & Evæ imputandum est. Hi enim soli commiserunt istud.

At *cur*, quæso, *lapsus Adami posteris imputatur?* Aperte id fit a Paulo Rom. V, 16. 18. 19. ubi expresse dicit, per unius lapsum condemnationem super omnes homines venisse & per unius inobedientiam multos factos esse peccatores. Nonne hoc pugnare videtur cum verbis Dei dicentis: *filius non ferre debet crimen patris, sed quæ persona peccat, morte extinguatur?* Ezech. XVIII, 20. Cur igitur Deus non primos homines propter commissum peccatum statim enecavit & alios creavit, qui genus humanum propagarent?

Ad quæstionem hanc ut debite respondeamus & objectiones diluamus, primum ponimus, quod Deus in Adamo & Eva simul omnes posteros creaverit, ita, ut potentialiter & virtualiter in lumbis eorum quasi omnes & singuli existerent. Factum hoc est vi benedictionis divinæ, Gen. I, 28. Omnes igitur homines Deus jam novit, antequam in utero materno concipiuntur, Jer. I, 5. Pf. CXXXIX, 16.

Adam erat totius generis humani *caput representativum*, Rom. V, 12. 1 Cor. XV, 22. Fœdus igitur, quod Deus cum eo iniit, Gen. II, 15-17. ad omnes simul posteros spectavit. Hoc vero rupto culpa in omnes homines redundavit, quia omnes simul in Adamo peccaverunt, Rom. V, 12. 18. 19. Si itaque Deus primos homines ob commissum peccatum ex-

tirpasset, omnes simul posteros, quos jam noverat, extirpare debuisset. Hoc vero facere non poterat, nisi contra se ipsum ageret. Quod enim jam vidit Deus, antequam revera extitit, id etiam non potest non existens reddere. Si itaque lapsus hominum non factus fuisset, nec lapsum Deus prævidere potuisset. Addimus & hoc, quod homo ad æternitatem creatus sit, & propterea immortalem acceperit animam. Hanc vero non annihilare potuit, nisi primum suum decretum mutaret. Decretum vero mutare, cum summa ejus perfectione pugnat.

Oportebat igitur primos homines tamdiu vivos manere, donec liberos genuerint, qui genus humanum propagent. Nec aliter quoque mori debebant, quam rupto vinculo corporis & animæ, quia secundum primum Dei decretum non funditus interire poterant.

Non autem propterea injustitiæ arguendus est Deus, quod primorum hominum peccatum toti humano generi imputaverit, nec pugnat cum ejus sapientia, quod primam hominum stirpem non penitus extirpaverit & alios homines condiderit. Nam si alios creavisset, nemo nostrum unquam in lucem editus foret, quia in priori stirpe simul omnes interivissemus.

Jure meritoque hinc ferimus culpam Adami, dum non modo in ipso peccavimus, sed etiam ejus corruptam naturam in nos suscepimus.

Desti-

Destituti sumus justitia originali, prava autem concupiscentia laboramus omnes. Ex peccaminoso semine quisque formatur, Ps. LI, 7. & ex immundo non nascitur mundus, Hiob. XIV, 14.

C A P U T VI.

D E

EFFECTIBUS LAPsus.

Effectus lapsus sunt calamitosi. Amissa enim imagine Dei amissa quoque est justitia originalis omnisque felicitas vitæ, tranquillitas animi & immortalitas corporis.

Hoc ut eo melius intelligamus, exponemus 1) quid ex parte Dei, & 2) quid ex parte hominum secutum sit lapsum primorum parentum.

Ex parte Dei secutum est 1) *judicium* ejus tam super lapsos homines, quam serpentem, qui eos seduxit, Gen. III, 14. 16 - 19. 23. 24. & 2) *evangelium* de redimendis hominibus per Christum, Gen. III, 15. cujus effectus fuerunt a) mitigatio poenæ, & b) usus vestium, Gen. III, 21.

Ex parte hominum sequebatur lapsum 1) corruptio totius naturæ, 2) status vitæ miserri-
mus & denique 3) mors inevitabilis. Triplex hoc malum in omnes Adami posteros propagatur, Gen. V, 3. Rom. V, 12. 18. Ps. LI, 7. Eph. II, 3.

Corruptio totius naturæ locum habet 1) in *intellectu*, qui amissa primæva scientia & sapientia plenus ignorantia, stultitiæ & erroris factus est, Eph. IV, 18. 1 Cor. II, 14. 2) in *voluntate*, quæ sanctitate sua & inclinatione ad obsequendum Deo, præstandumque, quod proximo debemus, non solum destituta, sed simul omnibus pravis cupiditatibus, inordinato amore erga se ipsum & averfatione a quacunque re bona ac iusta impleta est, nec non magnam liberi arbitrii jacturam fecit, Rom. VII, 15 - 23. Eph. IV, 22. & denique 3) in *corpore*, quod variis morbis, periculis & doloribus, imo morti ipsi & putrefactioni obnoxium factum est, Gen. III, 19. Rom. VII, 24.

Status vitæ post lapsum est omnino miserrimus. Simulac enim primi homines ex paradiso ejiciebantur, reditusque ad eum clauderetur, Gen. III, 24. maledictio divina hominibus totique terræ imposita, Gen. III, 16 - 19. in effectum transiit. Ager ferebat spinas & tribulos. Uxores cum magnis doloribus pariebant & mares in ærumnis & solitudine labores & opificia sua obibant, inque sudore panem edebant. Conscientia plena anxietatis & inquietudinis reddebatur, animus vero omnem tranquillitatem amittebat. Statum hunc miserum omnium optime descripsit Siracides, c. XL, 1 - 8.

Mors, quæ est ultimum hominis malum, Sir. XL, 2. 1 Cor. XV, 26. per & propter peccatum
tum

tum εἰς πάντας ἀνθρώπους διήλθεν, h. e. in omnes homines pervasit, Rom. V, 12. In describenda morte hic non prolixi esse volumus, quia jam speciatim de ea acturi sumus.



SECTIO IV.

DE

MORTE TEMPORALI.

CAPUT I.

DE

MORTE IN GENERE.

Mors in sensu latiori omnem peccati poenam indicat, Gen. II, 17. Rom. VI, 23. speciatim vero & proprie tantum finem vitæ significat.

Mors generalius sumpta *triplex* est, temporalis s. naturalis, spiritualis & æterna.

Mors spiritualis consistit partim in ira & maledictione Dei, 2 Cor. III, 6. coll. Rom. IV, 15. it. Deut. XXX, 19. partim in privatione gratiæ divinæ, Luc. XV, 24. 1 Joh. III, 14. Col. II, 13. Eph. II, 1. 5. Rom. VIII, 6. 1 Tim. V, 6. partim in impotentia naturali, ad Dei voluntatem vivendi, Rom. VI, 13. Eph. IV, 18. 2 Petr. I, 3.

Mors æterna est ipsa damnatio æterna, Matth. X, 28. quæ in Apocalypsi c. XX, 6. 14. c. XXI, 8. mors secunda vocatur.

Respectu *mortis naturalis* distinguendum est inter *mortem hominis* & *mortem corporis*. Homo moritur, quando anima & corpus separantur, corpus vero, quando particulæ, ex quibus istud compositum est, dissolvuntur per putrefactionem.

Vita hominis consistit in animæ & corporis facultate agendi harmonica. Quamdiu harmonica hæc facultas durat, homo vivere, eadem autem cessante, mori dicitur.

Vita corporis in vi ejus motrice, ad operationes naturales determinata, consistit. Hæc durat, quamdiu non per aliquid, quod Philosophi menstruum s. heterogeneum vocant, tollitur aut turbatur. Sicut vero circulatio sanguinis principium omnium motuum corporis organici est, ita corporis vita etiam in sanguine esse dicitur, Lev. XVII, 11.

Et si autem *totus homo* moriatur, non tamen *totum hominis* interit. Non solum enim anima post mortem superstes est, sed etiam principium, ex quo corpus compositum est, utpote quod non nisi cum tota mundi machina annihilari potest.

Interim certum est, hominem per se non de tali natura esse, ut ejus immortalitas primæva non a sola Dei benignitate, cui totam divinam imaginem debemus, dependerit, quapropter

propter etiam *arbor vitæ* non ob aliam causam, quam ad conservandam hominis vitam naturalem in medio paradisi posita esse videtur, Gen. II, 9. c. III, 22.

CAPUT II.

DE

AUTORE MORTIS.

Autor mortis est ipse *Deus*, qui sub comminatione ejus, tanquam justissimæ pœnæ, hominibus legem de non comedendo certæ arboris fructu dedit, Gen. II, 17. Penes eum solum enim est summum jus vitæ & necis, Deut. XXX, 19. Jer. XXI, 8. Sap. XVI, 13. Sir. XI, 14. Potest hinc vitam & auferre & iterum reddere, 1 Sam. II, 6.

Factum autem est citra intentionem Dei, quod mors super homines venerit. Ad vitam potius æternam istos creavit, Sap. II, 23. Sicut Deus vitam a se ipso habet & fons est omnis alius vitæ, ita etiam tanquam amator vitæ Sap. XI, 27. voluit, ut homines tanquam excellentissimæ inter terrestres creaturæ semper feliciter vivant, Sap. I, 13. 14.

Est igitur Deus respectu mortis magis ut *Legislator* & *Judex*, quam ut Deus & Creator considerandus. Sicut judex non potest non secundum præscriptas leges promeritam pœnam alicui sine *προσωποληψία* irrogare, etsi per se

valde ei doleat ejusmodi hominis exitium & damnum: ita quoque Deus per se neutiquam vult mortem peccatoris, Ezech. XXXIII, 11. ob suam autem justitiam & veracitatem tenetur, mortis pœnam infligere cuique, qui istam promeruit. Adscribitur propterea Deo in sacris literis tam ira, Pf. XC, 7. Rom. I, 18. quam vindicta, Deut. XXXII, 35. Rom. XII, 19.

Sunt, qui nomini Dei injuriam fieri putant dicendo, ipsum esse autorem mortis. Magis *diabolum* ita nominandum esse judicant, quia primus homicida vocatur, Joh. VIII, 44. At diabolus causa potius, quam autor mortis dicendus est. Homines enim ad peccandum omnino quidem incitavit, &, ut mortis pœnam subirent, occasionem dedit, non tamen mortem ipsam iis inflixit, quia potestas puniendi penes solum Deum fuit.

Hic solus ex auctoritate legislatoria homines ad mortem, tanquam ad promeritam pœnam, condemnavit, &, adimendo iis concreatas perfectiones, reddidit mortales: at causa mortis non propterea dicendus est Deus, Sap. I, 13. 14. ut nunc pluribus ostendemus.

CAPUT III.

DE

CAUSIS MORTIS.

Causa mortis in genere spectata est *peccatum*.
Nisi homines peccassent, nec mors in mundum

mundum venisset, Rom. V, 12. Est enim malum poenae, quod malum culpæ semper sequitur.

Cum *diabolus* autor lapsus & peccati hominum sit, jure meritoque etiam ad causas mortis referri potest, non quidem proximas, sed tamen remotas, Sap. II, 24. Joh. VIII, 44. Hebr. II, 14. Ad easdem etiam pertinent *primi homines* ipsi respectu suorum posterorum, Rom. V, 12.

Causæ mortis proximæ dupliciter considerantur, vel *physice* vel *moraliter*. *Physice* considerantur, quatenus directe, *moraliter* vero, quatenus indirecte mortem causantur. Per se omnes mortis causæ sunt *physicæ*.

Dividuntur autem *causæ mortis physicæ* in *naturales*, *præternaturales* & *violentas*.

Causæ mortis naturales sunt humidi radicalis absumptio & nativi caloris extinctio, ex naturali hominis corruptione vergente ætate proveniens. Fit hoc in senectute, in qua vires naturales languescunt, humoresque vitales sensim exsiccantur. Ita Abraham & Isaac mortui esse dicuntur, Gen. XXV, 8. c. XXXV, 29. Talis felicitas paucis hominibus obtingit, quia debitam diætam, continentiam & moderamen affectuum negligunt.

Causæ præternaturales sunt morbi, qui in homine non ex communi naturæ necessitate, sed aliunde, e. g. ex vitio diætæ, victus & aëris, ex nimis vigiliis, defectu motus & quietis,
nec

nec non ex abusu affectuum, ex libidine & intemperantia oriuntur, quales sunt febres, hydrops, phthisis, pestis aliique morbi, qui substantiam corporis evertunt, spiritusque vitales ita dissipant, ut, si non salubris medicina, quæ a Deo creata est, Sir. XXXVIII, 2. 4. 12. justo tempore adhibeatur, hominem præter naturam enecent. Aristoteles hujus mortis principium ἐπίκτητον πάθος, h. e. *adventitiam passionem* nominat.

Causæ violentæ sunt res externæ, quibus vel toti corpori vel parti ejus nobiliori ejusmodi vis infertur, quæ circulationem sanguinis tollit, adeoque vitam extinguunt. Huc pertinent omnis generis venena, mortifera arma & instrumenta, nec non aqua, ignis, belluæ &c.

Omnes has mortis *causas* nominamus *physicas*, quatenus directe mortem causantur. Dantur interdum tales in ipsis hominibus, quando vel sibi ipsis ea, quæ lethifera sunt, applicant, ut Saul & Ahitophel, 1 Sam. XXXI, 4. 2 Sam. XVII, 23. vel, ut ab aliis occidantur, postulant, Jud. IX, 54. vel scientes volentesque in occisorum manus currunt, 2 Sam. II, 22. 23. Act. XXI, 13. vel periculis moriendi se temere exponunt, 1 Reg. XXII, 32. 2 Chron. XVIII, 31. c. XXXV, 22. 23. vel facinoribus suis Deum aut magistratum ad supplicium sibi solvendum laceffunt, vel per vitam dissolutam & luxuriosam, nimias lucubrationes & alia ratione sibi præmaturam mortem contrahunt.

Omne

Omne hoc mortis genus communi nomine *αὐτοχρησία* dicitur, quæ vel directa vel indirecta est. *Directa* ΑΥΤΟΧΡΕΙΨΙΑ est, quando aliquis se ipsum vel propriis vel alienis manibus data opera vita privat, *indirecta* vero, quando aliquis non quidem data opera, at fortuito tamen & se invito sui ipsius mortis causa fit. Prior *αὐτοχρησία* inter crimina, posterior vero inter humanas infirmitates numeratur.

Quæritur: *Annon in certis casibus homini christiano liceat vitam suam abbreviare?* Respondetur negando, quia 1) omne homicidium in præcepto quinto interdictum est, 2) ipsa lex naturæ nos ad nostri conservationem obligat, & 3) nos non nostræ vitæ domini sumus, Rom. XIV, 7. coll. Joh. X, 18. Interim mitius omnino sentire possumus de iis, qui vel in persecutionibus ad conservandam suam castitatem vel ex melancholia se ipsos interficiunt, quam *αὐτοχρησία* in se spectata neutiquam defendi queat.

Moraliter aliquis causa mortis alterius esse potest, si latrones & homicidas pretio conducit, aut mandato, suasionibus, minis & promissionibus aliquem ad occidendum alterum inducit, aut alia ratione cædem hominis promovet. Valet hic dictum: *Quod quis per alium facit, per se fecisse putandus est.* Sic David Uriam, 2 Sam. XI, 15. c. XII, 9. Absalom fratrem Ammon, c. XIII, 28. 29. & Judæi Christum Act. II, 23. c. III, 15. interfecerunt.

Huc

Huc spectat etiam negligentia, alterum de mortis periculo admonendi, Ezech. XXXIII, 6. aut a morte custodiendi, Exod. XXI, 19. aut res lethiferas ei justo tempore auferendi.

Præter homines etiam *angeli* causa mortis esse possunt, quatenus Dei voluntatem in occidendis impiis exequuntur, ut exempla Herodis Agrippæ, Act. XII, 23. & populi Judaici tempore Davidis peste cæsi, 2 Sam. XXIV, 16. docent. Imo *mali spiritus* interdum hominum mortem causari solent, Hiob. I, 12. 15. 16. 17. 19. 2 Reg. XXII, 20-23. 35. 2 Chron. XVIII, 19-22. 33. 34.

Lichtscheidius, Theologus Berolinensis, putavit, impios omnes vita privari per certum angelum mortis, quod etiam Muhamedanorum & hodiernorum Judæorum sententia est.

CAPUT IV.

DE

FORMA MORTIS.

Forma mortis consistit in dissolutione vinculi inter animam & corpus.

A vinculo animæ & corporis dependet vita naturalis. Hoc si cessat, cessat etiam vita. Homo igitur vivere desinit, simulac anima & corpus separantur, Ps. CXLVI, 4. Eccl. XII, 7.

Est

Est itaque mors naturalis quasi *dissolutio naturæ*, ut ait Cicero, cui etiam *animam aut spiritum efflare* s. *edere*, idem est ac mori.

Et hæc est totius Scripturæ S. loquendi ratio de morte. Paulus hinc expresse vitæ suæ decessum *ἀνάλυσιν* nominat, 2 Tim. IV, 6. & quando mori cupit, dicit: *τὴν ἐπιθυμίαν ἔχω, εἰς τὸ ἀναλῦσαι*, Phil. I, 23.

Eandem significationem habet vox *ἐκπνέειν*, h. e. animam efflare, quod de Christi morte occurrit, Marc. XV, 37. & Luc. XXIII, 46. Matthæus id per *ἀφίεναι τὸ πνεῦμα*, h. e. dimittere spiritum, Matth. XXVII, 51. & Iohannes per *παράδιδόναι* s. tradere spiritum, Joh. XIX, 30. exprimit. Pari modo Stephanus Christum in morte invocans dixit: *δέξαι τὸ πνεῦμα μου*, h. e. *accipe spiritum meum*, Act. VII, 59. Quo etiam spectant verba Petri, quando mortem per *ἀπόθεσιν τῆς σκηνώματος* h. e. *depositionem domicilii* s. corporis, 2 Petr. I, 13. 14. describit.

Formalis itaque ratio mortis temporalis consistit in dissolutione vinculi naturalis inter animam & corpus, qua facta statim sequitur *διάσσις*, h. e. *localis separatio & abscessio animæ a corpore*.

Hoc ultimum *Theologi Tubingenses* olim negarunt, perhibendo, ad mortem sufficere veram animæ a corpore *διάλυσιν*, licet non statim anima a corpore localiter secedat. Provocant ad Act. XX, 10. ubi Paulus de mortuo Eutycho dixit, animam ejus in ipso adhuc esse. Sed
locum.

locum hunc contra supra dictos Theologos omnium optime vindicavit B. ROMANUS TELLERUS in *Diss. Acad.* an. 1722 Lipsiæ habita, in qua ostendit, *ad naturam mortis requiri mentis a corpore διάσασιν, non vero solam διάλυσιν.* Probat enim, Apostolum vel de anima mortui adolescentis tanquam mox réversura, vel de eadem ad preces ac gestus Apostolicos jam tum reversa locutum esse.

Interim distinguendum est inter *mortem hominis & mortem corporis.* Homo moritur, quando anima & corpus separatur, corpus vero moritur s. interit, quando particulæ, ex quibus compositum est, dissolvuntur, quod in putrefactione fit.

CAPUT V.

D E

NECESSITATE MORTIS.

Duplici respectu mors *necessaria* est, respectu Dei & respectu hominum.

Respectu Dei necessaria est mors ad luendam pœnam, quam Deus ex justissimo judicio ad vindicandam læsam suam majestatem non potuit non omnibus hominibus, qua peccatoribus, imponere, Gen. II, 17. Ezech. XVIII, 5. Rom. VI, 23. Sir. XLI, 5.

Peccata sunt crimina læsæ majestatis divinæ, quæ non nisi morte expiari possunt. Pugnat enim cum divina justitia & sanctitate, homi-
nibus

nibus peccatorum impunitatem dare & sceleratam eorum vitam non morte tollere.

Pertinet autem ad luendam Dei pœnam, ut anima & corpus dissolvantur. Hoc res acerbissima est, super qua tota natura horrescit. Vocatur propterea mors *rex terrorum* h. e. res terribilissima, Hiob. XVIII, 14. Omne enim, quod vivit, vitæ finem reformidat. Homo hinc pro conservatione vitæ suæ cuncta, quæ possidet, dare solet, Hiob. II, 4.

Mortis acerbitas universalis est. In primis sentiunt eam impii, 1 Sam. XV, 32. & qui in mundo omnibus rebus abundant, Sir. XLI, 1. Jure meritoque ideo mors vocari potest malum, quod ex justa Dei vindicta necessario super omnes homines ob peccatum venit. Ex hac causa omnes omnino homines mori debent, Ps. LXXXIX, 49. Rom. V, 12. Ps. XC, 13. Jes. LI, 12. Hebr. IX, 27. Hiob. XXX, 23. Sir. XIV, 18. c. XXV, 32.

Est autem mors quoque necessaria *respectu* ipsorum *hominum*, quia radix peccati in iis non aliter tolli potest, Rom. VI, 7. c. VII, 24. 1 Cor. XV, 30. 50. 51.

Radix peccati s. *fomes* ejus, quæ alias peccatum originale nominatur, naturæ hominis ita inhæret, ut non nisi cessante vinculo animæ & corporis extirpari queat. Sedes peccati in hoc vinculo subsistit. Necessè hinc est, ut vinculum hoc dissolvatur, & corpus, cujus massa sanguinea & animalis veneno isto infecta est, in cineres redigatur.

Pars I.

Z

Exinde

Exinde patet, quod ad tollendam peccati radicem non sola separatio animæ a corpore sufficiat, sed simul requiratur putrefactio & cinerificatio corporis, Gen. III, 19. 2 Cor. IV, 16. 1 Cor. XV, 42. Eccl. III, 20. & XII, 7. Tota enim hominis natura inverti & purificari debet, si vitæ cœlestis particeps fieri vult. Nam peccaminosa caro & sanguis non in regnum Dei introire possunt, 1 Cor. XV, 50. Hinc Christus etiam eos, quos in adventu vivos deprehendet, statim immutabit h. e. tollendo fomitem peccati glorificabit, 1 Cor. XV, 51-53.

Ex hisce dictis liquet, *cur Christi emortuum corpus non putrefactioni obnoxium fuerit?* Ps. XVI, 10. Erat istud immune a peccato, quapropter etiam non opus fuit, ut per putrefactionem purificetur. Ad luendam enim pœnam divinam sufficiebat sola separatio animæ ejus a corpore. Nam Christi mors non necessaria erat respectu sui ipsius, sed tantum respectu Dei & hominum redimendorum.

Propter sublationem radicis peccati, quæ in morte fit, omnino mors aliquid boni dicenda est, ut jam pluribus ostendemus.

CAPUT VI.

DE

UTILITATE MORTIS.

Mors per se quidem aliquid *mali* est, imo summum malum, quatenus nimirum peccati pœna est. At vero cum Christus merito suo mortem aboleverit, 2 Tim. I, 10. 1 Cor. XV, 26. 54. Hebr. II, 14. 15. ea nunc hominibus lucrum est, Phil. I, 21.

Neutiquam tamen omnibus hominibus mors res utilis est, sed tantum iis, qui in Christum credunt, Joh. VI, 50. c. VIII, 51. c. XI, 26. & in fide usque ad mortem perseverant, Apoc. II, 20. Matth. X, 22. c. XXIV, 13. Marc. XIII, 13. Rom. XIV, 8.

Impii, qui salutem in Christo respuunt, manent sub ira & maledictione Dei, Joh. III, 36. Gal. III, 10. moriuntur in suis peccatis, Joh. VIII, 24. & τὸ φρόνημα τῆς σαρκὸς f. vita carnalis sibi ipsis mors est, Rom. VIII, 6. 13. Jac. I, 15. per quam detruduntur in mortem æternam, Ps. XLIX, 20. Luc. XVI, 22. 23. Sir. XLI, 13.

Multo aliter e contrario comparatum est cum *piis* & qui in Christum credunt. Mors iis est res & utilissima, Phil. I, 21. & exoptatissima, 2 Cor. V, 2. Phil. I, 23. Num. XXIII, 10.

Quæritur autem: *in quo consistat utilitas, quam pii ex morte capiunt?* Est multifaria, omnis autem Christo accepta referenda. Consistit enim

1) in liberatione ab omni peccato ejusque radice & fomite, ut supra jam ostendimus; 2) in fine omnis hujus calamitatis & miseriæ, 1 Reg. XIX, 4. Hiob. VII, 1-4. Sir. XXX, 17. c. XLI, 3. 4. 3) in liberatione animæ ab onere corporis morbidi & peccaminosi, 1 Reg. VII, 24. 2 Cor. V, 4. Sap. IX, 15. 4) in requie ab omni labore & ærumna, Jef. LVII, 2. Apoc. XIV, 13. Sap. IV, 7. 5) in certissima spe, aliquando cum glorificato corpore iterum resurgendi, 1 Cor. XV, 16. sq. 42-44. Phil. III, 20. 21. Joh. XI, 24. Hiob. XIX, 25. 26. Dan. XII, 2. 3. & denique 6) in transitu ad vitam æternam, Joh. V, 24. 2 Cor. V, 1. Luc. XVI, 22. Pf. XXXI, 6.

Ob hanc utilitatem mors piorum *somno* comparari solet, Matth. IX, 24. Joh. XI, 11. Deut. XXXI, 16. Matth. XXVII, 52. 1 Cor. XV, 20. 1 Theff. IV, 13. Jef. XXVI, 19.

Hinc placide obdormivisse dicuntur in sacris literis David, 1 Reg. II, 10. Salomo, c. XI, 43. Stephanus, Act. VII, 60. & omnes alii fideles.

Jure meritoque ideo dies mortis præfertur diei nativitatis, Eccl. VII, 2. justus vero in morte confusus esse dicitur, Prov. XIV, 32.

Ad quæstionem: *num christiano liceat sibi mortem optare?* respondetur affirmando, si non ex impatientia & desperatione fit. Exempla Pauli, Phil. I, 23. Rom. VII, 24. 2 Cor. V, 2. & Elia, 1 Reg. XIX, 4. quorum uterque in sua mortis exoptatione plenus spei & fidei fuit, non vero exem-

exempla *Jonæ*, c. IV, 3. *Rabelis*, Gen. XXX, 1. & *Mosis*, Exod. XXXII, 32. qui omnes ex impatientia mortem sibi voverunt, huc trahi debent.

CAPUT VII.

DE

STATU ANIMARUM POST
MORTEM.

Anima cum non solum ex voluntate Dei, sed etiam per se immortalis sit, non potest non post mortem superstes manere. Datur hinc *status* aliquis *post mortem*, in quem anima post separationem a corpore transfertur.

Status hic a statu beatitudinis aut damnationis per se non quidem distinguendus est, quia anima post mortem vel in gloriam æternam recipitur, vel in infernum detruditur, Eccl. XI, 3. Luc. XVI, 22. 23. At vero cum laborum operumque mercedem non sola anima, sed totus homo aliquando a summo judice accepturus sit, 2 Cor. V, 10. Apoc. XXII, 12. mihi non adeo absolum visum est credere, statum animæ post mortem certo modo distinctum esse ab eo statu æternitatis, in quem totus homo post judicium extremum transmittetur. Differt iste non re ipsa, sed secundum circumstantias.

Scriptura S. statum hunc post mortem plerumque per voces *חַיִּים* & *ἀδης* exprimit. Plu-

rimi Theologi eas quidem interpretantur per infernum aut sepulchrum, sed non in omnibus locis biblicis id satis apte fieri potest, e. g. Ps. XVI, 10. Ps. XXX, 4. Ps. LXXXIX, 49. Eccl. IX, 10. Jes. XXVIII, 15. c. XXXVIII, 10. Hos. XIII, 14. Act. II, 27. Apoc. I, 18. c. XX, 13. Indicant potius istæ voces in allegatis locis statum, in quem anima post mortem transfertur. In hoc anima separata est a corpore, ita tamen, ut substantialiter existat, vereque vivat, etsi functionibus suis consuetis destituta sit. Si beate obiit, dicitur versari in manibus Dei, Ps. XXXI, 6. Luc. XXIII, 46. Sap. III, 1. si vero non beate e vita discessit, in locum suum abiisse fertur, Act. I, 25. Paulus nominat statum damnatarum animarum post mortem τὰ κατώτερα μέρη τῆς γῆς, Eph. IV, 9. & Petrus τὴν Φυλακὴν s. *carcerem*, 1 Petr. III, 19.

Pontificiorum somnia de *purgatorio* huc non quadrant. Intelligunt per istud statum pœnalem, in quo defunctæ fidelium animæ per certum ignem, ab infernali diversum, a peccatis inhaerentibus plene purgantur, antequam in vitam æternam introeunt. Ne vero miseræ animæ nimis diu in purgatorio morari debeant, monachi aliique clerici eas ex isto per preces suas & sacrificia missatica liberare student, quapropter plurimi ex papicolarum grege ante obitum de suis opibus multa ad hunc cultum legare solent. Sed figmentum & fraus clericorum est tota doctrina de purgatorio, quia in
sacris

facris literis nullo nititur fundamento, sed tantum excogitata est ad evacuandas laicorum crumenas & additandum se stipe largifica. Provocant quidem ad 1 Cor. III, 15. ubi autem per ignem metaphorice gravis tentatio intelligitur, 1 Petr. I, 7. Nobis sufficit, mortuos in Domino ἀπ' αἰῶνι beatos celebrari, Apoc. XIV, 13.

Fuerunt semper aliqui in ecclesia, qui de *defunctis animabus* statuerunt, eas post mortem dormire usque ad diem extremum. *Psychopannychitæ* vocantur, qui hoc asserunt. Nostris temporibus in primis *Johannes Heynius*, minister verbi divini in Marchia Brandenburgica, sententiam hanc pervicaciter defendit & multas inter Theologos rixas propterea movit.

Provocant *Psychopannychitæ* 1) ad loca, ubi defuncti dormire dicuntur, e. g. Matth. IX, 24. c. XXVII, 52. Joh. XI, 1. Sed respondent, qui contrariam sententiam tuentur, defunctos dormire non respectu animæ, sed tantum respectu corporis, Dan. XII, 2. Jes. XXVI, 19.

Provocant 2) ad Hebr. IV, 3. 10. & Apoc. XIV, 13. ubi asseritur, fideles per mortem in requiem ingredi. Sed quiescere animas ab operibus molestiisque præsentis vitæ, non vero ab operibus cœlestibus, ex Apoc. IV, 8. probare student, qui iis contradicunt.

Provocant 3) ad Ps. VI, 6. Ps. LXXXVIII, 13. & Ps. CXV, 17. ubi defunctis memoria Dei & facultas eum laudandi abjudicatur. Sed re-

spondetur, ejusmodi memoriam & laudem h. l. intelligi, quæ per actus corporis externos fiat.

Provocant denique 4) ad 2 Tim. IV, 8. & 1 Petr. V, 4. ubi de corona justitiæ perhibetur, quod non nisi die extremo accipienda sit. Sed sermonem h. l. esse respondetur de beatitudine absolute consummata, non vero de beatitudine secundum quid consummata.

Quantum ego judico, *maxima dubia* in hac doctrina versantur 1) circa *modum*, quo animæ a corpore separatæ cogitare possint, cum ordinarie non aliter id fieri queat, quam per organa cerebri; 2) circa *necessitatem resurrectionis corporum*, quæ sic salva nostra beatitudine cessare possit: 3) circa *bis mortuos*, qui fruitione gloriæ cœlestis, cujus secundum communem sententiam participes jam facti forent, a Deo benignissimo parum apte iterum privari potuerunt, ut taceamus, eos post reditum in hanc vitam cœlestis gaudii non sibi conscios fuisse; 4) circa extremum judicium, in quo demum homines mercedem operum suorum accipient, 2 Cor. V, 10. Apoc. XX, 12. c. XXII, 12. & 5) circa *pœnam mortis*, toti homini decretam, quæ in solum corpus caderet, si anima, quæ tamen peccati subjectum primarium dicitur, majoris felicitatis per mortem particeps fieret, quam ante mortem jam habuit.

Opponitur *exemplum latronis*, Luc. XXIII, 43. ad quod Psychopannychitæ respondent, ani-
mam

nam ejus in regno gloriæ omnino versari potuisse, etsi quieverit.

De *limbo patrum & infantum*, de quo Pontificii multa somniant, alibi acturi sumus.

C A P U T VIII.

D E

S T A T U C O R P O R U M
P O S T M O R T E M.

Corpora humana *immortalitate* donabantur in creatione. Amissa autem imagine divina amissa etiam est hæc immortalitas tanquam donum Dei extraordinarium, ita, ut nunc morti & putrefactioni obnoxia sint.

Corpus hominis per se non fuit immortale. Condidit istud Deus ex gleba terræ. Materiale hinc istud & aliquid compositi est, quod naturaliter ad interitum suum tendit & non constanter subsistere potest: quapropter etiam Deus ad Adamum dixit: *pulvis es, & in pulverem reverteris*, Gen. III, 19.

Exanimatum igitur corpus jure meritoque terræ mandatur, ut ibi in pulverem & cinerem resolvatur.

Actus hic nominatur *sepultura*, quæ a mundo condito inter homines consueta fuit. Pauci tantum inter barbaros populos corpora defunctorum comburere, aut in aquam mittere, aut alia ratione perdere solent.

Apud Judæos & Christianos semper usus sepeliendi corpora floruit. Felicem se judicat quisque ex iis, si honesto funere post obitum sepeliri potest. Per totam fere vitam hujus rei curam habet. Exemplo nobis sunt Patriarchæ, de quibus constat, magna sollicitudine sibi paravisse honestam sepulturam, Gen. XXIII, 4. c. XLIX, 29. Huc etiam spectat Josephus Arimathæus, qui sibi ante mortem exstruxit sepulchrum, Matth. XXVII, 60. E contrario iis, qui sepultura carere debuerunt, id semper probro & dedecori habitum est, 2 Reg. IX, 34. Jer. XXII, 19.

Sepulchra quovis tempore *sacra* esse voluerunt homines, & quidem non aliam ob causam, quam quia sepulturam corporum inter actus religionis numeraverunt.

Christiani eo magis corpora sua sepelienda curant, quia in sacris literis dormire dicuntur usque ad diem extremam, qua quasi ex somno a Christo excitabuntur, & ad vitam redire jubebuntur, Dan. XII, 2. Joh. V, 28. 29. 1 Thess. IV, 16. Sunt instar feminis, quod terræ committi debet, 1 Cor. XV, 36. 42 - 44.

Neutiquam hinc Christiani sepulchrorum aspectum reformidant. Iis sunt vera κοιμητήρια s. *dormitoria*. in quibus placide quiescunt, Jes. LVII, 2. Ipsius Salvatoris corpus propterea per aliquot dies in sepulchro jacuit, ut quasi sanctificet gremium terræ nobisque gratas reddat catacumbas nostras.

Non

Non tamen salutis æternæ iis aliquid detrahitur, quorum corpora certis de causis non terræ mandari possunt, sed vel in maris abyssum dejiciuntur, vel igne consumuntur, vel a bestiis, piscibus & avibus devorantur, vel in aëre intereunt.

Accidit hoc multis hominibus, qui terra marique peregrinantur, aut in manus carnificis cadunt, aut temporibus belli & persecutionis interimuntur. Valent hic verba AUGUSTINI, *Lib. I. de Civ. Dei c. 12.* ita scribentis: *Multa corpora Christianorum terra non texit, sed nullum eorum quisquam a cælo & terra separavit: qui totam implet præsentia sua terram, is novit, unde resuscitet, quod creavit.* Addit simul verba Lucani: *Cælo tegitur, qui non habet urnam.*

Non autem corpus post mortem prorsus annihilatur, sed tantum resolvitur. Partes ejus elementares, ex quibus compositum est, dissolvuntur & cum aliis sibi analogis conjunguntur. Coeunt quasi ad formandum aliud quid, quod materiale & corporale est, ita, ut de priori corpore nil remaneat, 1 Cor. XV, 36. 37. Appellatur hoc *putrefactio* & *cinesactio*, Hiob. XVII, 14. 1 Cor. XV, 42. 2 Cor. IV, 16. Hæc necessaria est, ut radix peccati, carni in hærentis, extirpetur & deleatur, Rom. VI, 5-7. 2 Cor. IV, 16.

Inde patet, cur Christi corpus a putredine immune mansit, Ps. XVI, 10. Fuit enim in eo non peccatum, quod deleri debuit.

Quan-

Quanquam autem dissolutio corporum interdum ex naturalibus causis impediatur, substantia tamen eorum omnino alteratur.

Dantur enim varia balsama tam naturalia quam arte facta, quæ ad conservandam corporis exanimati structuram aliquid faciunt. Inde fit, ut, si corpus terræ mandatur, quæ balsamica virtute prædita est, istud interdum ad tempus incorruptum maneat. Pontificii igitur valde errant, quando defunctorum corporum bonum odorem & statum incorruptum pro genuino sanctitatis criterio venditant.

Dissolutarum defuncti corporis particularum nova coagulatio cum aliis particulis elementaribus a certis Philosophis appellatur *μετενσωμάτωση*, quam in peculiari *Dissertatione academica* B. HENRICUS KLAUSINGIUS, Theologus Lipsiensis, refutavit.

Quid vero de ista judicandum sit, - suo loco pluribus docebimus.



LIBER VI.

DE

PECCATO.

Doctrina de peccato commodissime in tres *Sectiones* dividitur. Agemus nempe in *Sectione I.* de peccato in genere, in *Sectione II.* de peccato originali & in *Sectione III.* de peccatis actualibus.

SECTIO I.

DE

PECCATO IN GENERE.

CAPUT I.

DE

NATURA PECCATI.

Peccatum est quicquid in homine cum lege & voluntate Dei pugnat. Rectissime hinc dicitur *ἀνομία*, 1 Joh. III, 4. Vox hæc ab *α* privativo & *νόμος* composita est, quapropter idem ac *aberrationem a lege* significat. Optime hinc exprimit hæc vox naturam & formam peccati.

Con-

Conveniunt cum hac significatione cætera nomina, quæ peccato in lingua tam Hebræa quam Græca imponuntur. Præcipua ex Hebraicis sunt נִשְׁתָּה & הִשְׁתָּה, עֲשָׂה & יָשָׁה, quæ conjuncta invenimus Exod. XXXIV, 7. & Pf. XXXII, 1. 2. Inter Græca vero notari merentur ἁμαρτία, ἀδικία, παράπτωμα & παράβασις.

Vox נִשְׁתָּה proprie aberrationem a scopo, Jud. XX, 16. vox עֲשָׂה, defectionem, prævaricationem & rebellionem, & vox יָשָׁה perversitatem & iniquitatem significat.

ἁμαρτία ab α privativo & μάρπτειν, capere & prehendere, compositum esse videtur. Indicat ideo actum & statum, quo quis nec vult nec potest scopum attingere. Idem hoc est, ac a scopo aberrare.

Ἀδικία, 1 Joh. V, 17. unius ejusdemque fere significationis est cum ἀνομία. Sicut hæc illegalitatem, ita illa injustitiam s. discessionem a jure significat.

Παράπτωμα a παραπίπτειν descendit. Labitur igitur & excidit quasi a norma s. regula, qui peccat.

Παράβασις transgressionem s. violationem legis & prævaricationem indicat. Convenit cum hac significatione vox Hebræa עֲשָׂה.

Ex hisce nominibus natura peccati satis patet. Est in eo aliquid tam positivi, quam privati. Si peccatum abstractive & formaliter accipitur, est privativum, si vero concretive & materialiter sumitur, positivum est.

In abstracto & objective consistit in defectu conformitatis cum voluntate & lege Dei, *in concreto vero & subjective* in aberratione a voluntate & lege Dei. Utrumque indicatur per voces *avopia* & *adixia*, quæ non modo respiciunt ad formam peccati, sed etiam ad *materiam* ejus, quæ omne id est, quod cum voluntate & lege Dei sive committendo, quod vetitum est, sive omittendo, quod præceptum est, pugnat.

Avopia igitur includit simul *avtrivopia*, nec non omnia, quæ sine lege fiunt. Lex decalogi enim voluntatem Dei non modo præcipiendo, sed etiam interdicens nobis manifestat.

Quis itaque dubitet, connatam pravam concupiscentiam æque peccatum dicendam esse ac habitus male agendi & actio cum lege divina pugnans, aut actionis mandatæ omissio, peccata sunt.

Quatenus peccatum in natura hominis sedet, *peccatum originale* appellatur, quatenus vero per cogitationes, verba & facinora erumpit, *peccatum actuale* nominamus.

C A P U T II.

D E

NORMA PECCATI.

Norma peccati est *lex*. Sine lege enim non datur *avopia* aut transgressio legis, Rom. IV, 15. c. VII, 7. Est autem *lex* non *norma* constitutiva, sed *regulativa*.

Lex

Lex in genere est præscripta voluntas Superioris de rebus tam omittendis quam faciendis, nos ad obsequium præstandum obligans. Differt a *consilio*, quod non modo per se non obligat, sed quod etiam ab eo, qui non superior est, dari potest.

Superioris dignitas maxime versatur circa legislationem. Qui non potestatem habet alterum ad obsequium obstringendi, nec nomen superioris meretur.

Cum igitur *Deus* supremus omnium rerum Dominus sit, omnino etiam potestatem ac dignitatem suam in eo ostendere debet, ut, qui ei subditi sint, ad præstandum omnia, quæ voluntati suæ consentanea sunt, obliget. Hoc non aliter fieri potest, quam per *legem*, quæ quasi regula est, ad quam quisque, cui ea data est, actiones suas instituere debet.

Ejusmodi legem accepit etiam homo, qui ad cultum Dei creatus est. Ut autem sciat, se obligatum esse ad obsequium, nec eum lateat, quæ officia ipsi præstanda sint, Deus ei legem dedit, quam partim cordi inscripsit, partim voce ac literis promulgavit. Prior dicitur *lex naturæ*, posterior vero *lex revelata*, utraque vero eo tendit, ut actiones nostras ad Dei voluntatem instituamus.

Obligatio legis a subjectione dependet, & hæc respectu Dei tam magna est, ut major esse nequeat. Summa enim Deus gaudet potestate, eique omnia in cœlis & terris subiecta sunt, i
Chron.

Chron. XXX, 12. Pf. CIII, 19. Sap. XI, 24.
Matth. XXVIII, 18. 1 Tim. VI, 15.

Dei *voluntas* itaque nobis lex est, quam non transgredi debemus. Cordi inscripta est Jer. XXXI, 33. ita, ut ne quidem per lapsum Adami penitus oblitterata sit. Recte hinc Paulus dixit: *Gentes, quæ legem non habent, sibi ipsis sunt lex, ostendentes opus legis scriptum in cordibus suis, prout testificantur conscientia & cogitationes eorum se invicem accusantes & excusantes*, Rom. II, 14. 15.

Ut vero eo magis constet, quid Deus a nobis velit, revelavit legem decalogi, quam postea per prophetas & ipsum Christum multoties repetiit, pluribusque explanavit & hominibus severissime inculcavit. Neminem igitur fugere potest, quid bonum sit & Deus postulet, Mich. VI, 8.

Lex itaque est norma & regula *actionum nostrarum*, ad quam istas & instituere & dijudicare debemus. Quæ actiones cum hac regula conveniunt, *bonæ*, quæ disconveniunt, *malæ* vocantur. Dicuntur ambæ *morales*, quia a creatura rationali, quæ libertate agendi gaudet, proveniunt. Sunt vel *naturales*, vel *civiles*, vel *spirituales*, quatenus scilicet ad præscriptionem vel legis naturalis, vel civilis, vel divinæ fiunt. Quod enim coacte aut ex mero instinctu naturali, aut furiose fit, nullam habet moralitatem.

Cum autem omnis actio moralis vel bona vel mala sit, quæritur, quid de *actionibus imlif-*

ferentibus s. *adiaphoris* judicemus? Jure meritoque negantur ejusmodi actiones liberae, quae per se nec bonae nec malae dici possunt. Dantur quidem res indifferentes, sed non actiones indifferentes. *Actio* semper versatur circa objectum aliquod, quod vel per se bonum vel per se malum vel indifferens est. Participat actio quidem, si objective consideratur, naturam objecti, subjective tamen semper moralis est, & consequenter vel bona vel mala, quia non secundum objectum, sed secundum praescriptionem legis dijudicari debet.

Qualis igitur lex est, talis etiam est moralitas actionis ad eam instituendae. Sic e. g. saltatio in diebus sabbathi in iis locis, ubi a magistratu politico permittitur, respectu legis civilis non actio mala vocatur, at est tamen mala respectu legis divinae. Objective & per se considerata saltatio in diebus sabbathi est res indifferens, quia certo respectu & permissa & non permissa est, subjective vero non est indifferens, sed mala actio. Est enim lege divina prohibita, etsi lege civili permissa sit.

Est autem lex non modo norma actionum nostrarum, sed etiam earum *judex*, Hebr. IV, 12. Rom. II, 12. Personae igitur, quae officium judicis obeunt, sunt quasi legis executores. Ipse Christus non aliter homines judicabit, quam secundum legis & voluntatis divinae praescriptionem, Joh. XII, 48. 2 Cor. V, 10. Matth. XVI, 27. 1 Petr. I, 17. Apoc. XXII,

12. Hanc ob causam quoque ethnici ἀναπολόγητοι i. e. inexcusabiles vocantur, quia lex cordi inscripta eos aliquando condemnabit, Rom. I, 20.

Est lex divina etiam *index* moralitatis nostrarum actionum. Ex lege enim cognoscimus, num actiones nostræ bonæ sint, an malæ. Paulus propterea testatur, *se nescivisse, pravam cupiditatem peccatum esse, si non ex lege id cognovisset*, Rom. VII, 7. Alibi expresse scripsit, peccata non cognosci nisi ex lege, Rom. III, 20. imo ne quidem ἐλογεῖσθαι, h. e. imputari aut existere sine lege, Rom. V, 13.

Jure meritoque igitur legem nominare possumus normam peccati, quia de cujuslibet actionis moralitate decidit, nec non indicat, quid inter peccata referri debeat.

CAPUT III.

DE

MALO PECCATI.

Malum opponitur bono, Gen. II, 9. sicut autem bonum multiplex est, vel metaphysicum, vel logicum, vel physicum, vel morale, ita etiam malum diversimode considerandum est.

Malum metaphysicum est defectus perfectionis, *malum logicum* defectus veritatis, *malum physicum*

defectus utilitatis & *malum morale* defectus honestatis.

Si de *peccato* sermo est, facile cognoscitur, istud nec malum metaphysicum nec malum logicum in se habere. Ei tantum inhæret malum physicum & malum morale, quia nec utilitatem præstat, nec honestatem secum fert.

Quod nec utile nec honestum est, id *damnum* & *turpitudinem* infert. Utrumque inest peccato. Hinc jure meritoque appellari potest *summum malum*, quia & perniciosissima & turpissima res est. Dicitur propterea peccatum in sacris literis κατ' ἐξοχήν *malum*, e. g. Hiob. I, 1. Ps. XXXIV, 15. Rom. VII, 19. 1 Petr. III, 11.

Duplex itaque in peccato datur *malum*, nempe malum *physicum*, quod *damnum*, & malum *morale*, quod *turpitudinem* infert.

Damnum peccati, quod ex *malo physico* oritur, *terum duplex* est, vel *privativum* vel *positivum*.

Damnum privativum consistit in jactura omnis istius boni, quod vitam in-tempore & æternitate jucundam, felicem & beatam reddit. Bonum hoc cum imagine Dei nobis collatum, at cum ea iterum per peccatum amissum est. Amissa est grātia Dei, tranquillitas animi, immortalitas corporis, innocentia & jucunditas vitæ, quies conscientiae, benignitas soli, spes proxima vitæ æternæ & quæ sunt cætera.

Magnam

Magnam quoque jacturam fecimus per peccatum respectu intellectus & voluntatis. In nobis nunc nec vera sapientia, nec vera prudentia datur, & quicquid sapientiæ & prudentiæ adhuc præstamus, summo studio ac labore antea disci debet. Nostra desideria sunt immoderata, confusa, iniqua. Magis tendunt ad ea, quæ stulta & perniciofa, quam quæ salutaria sunt & honesta.

Damnum peccati positivum consistit non modo in totius naturæ nostræ corruptione, sed etiam in omnis generis miseria & calamitate vitæ hujus, nec non in ipsa morte & condemnatione æterna, de quibus omnibus alibi pluribus agitur.

Alterum *malum peccati*, quod *morale* appellamus, consistit in *turpitudine*. Reddit enim peccatum homines adeo turpes in oculis Dei, ut faciem ab iis avertat, istosque aversetur & nauseam super eos sentiat, Jes. LIX, 2.

Ipsis hominibus turpitudine peccati in oculos cadit, quia in aliis sæpe vitam sceleratam avertantur, cui tamen ipsi dediti sunt.

Ex hac peccati turpitudine oritur *pudor*, qui ea mentis affectio est, qua homo ex innato honoris studio inhonesti facinoris reprehensionem reformidat.

Primi parentes ante lapsum non habuerunt pudorem, Gen. II, 25. c. III, 7. simulac vero peccaverant, pudore afficiebantur, c. III, 10. Ex hoc pudore fugiebant Deum, seque ab ipso

abscondebant. Faciunt hoc adhuc omnes peccatores, tenebras quærentes & lucem fugientes, Joh III, 20. Vocantur propterea eorum mala opera in sacris literis *opera caliginis*, Eph. V, 11. Paulus vero, si ab iis dehortatur, nos jubet *ὡς ἐν ἡμέραις* h. e. sicut in medio die & coram hominibus, ambulare, Rom. XIII, 13.

Pudor naturaliter penes omnes quidem homines est, quia omnes peccato infecti sumus, crescentibus autem delictis ita interdum decrescit pudor, ut plane in nonnullis cessare videatur. At summus hic est malitiæ impietatisque gradus, quando hominem nullius flagitii amplius pudet, nec faciei suæ suffunditur rubor.

CAPUT IV.

DE

POENA PECCATI.

Pœna a *puniendo* nomen habet. Est malum passionis, quod creaturæ rationali a iudice ob malum actionis in ejus compensationem infligitur. Non igitur ex charitate, sed severitate & iustitia retributiva oritur pœna.

Proprie *pœna finis* non emendatio peccatoris, sed commissi delicti & injuriæ compensatio est. Omnis enim lex vel obedientiam vel pœnam dicitur.

Pœna peccati ab *afflictionibus fidelium* distinguenda est. Hæ quidem sunt æque ac illa fructus

ctus

ctus peccati & malum aliquod passionis, at non tamen vera poena dicendæ, quia non compensationem peccati, sed emendationem peccatoris pro fine habent. Nominantur istæ propterea *castigationes paternæ*, quia Deus se in iis præstat instar boni parentis, qui liberos suos ex studio emendationis castigat, Hebr. XII, 6. Apoc. III, 19.

In sacris N. T. literis plerumque nomen *crucis* ferunt afflictiones fidelium, quia iis assimilamur Christo crucifixo, dum per istas corrupta natura cum suis pravis cupiditatibus quasi crucifigitur & hoc modo frenatur & emendatur, Matth. XVI, 24.

Tria dantur ejusmodi *afflictionum genera*. Spectant enim vel ad *παιδείαν*, vel ad *δοκιμασίαν* vel ad *μαρτύριον*.

Afflictiones piorum, quæ ad *παιδείαν* spectant, sunt castigationes carnis peccaminosæ, Rom. VI, 6. Gal. V, 24. Quæ ad *δοκιμασίαν* spectant, sunt probationes & tentationes, quibus exploratur fides, patientia, constantia & quævis alia virtus, ut in iis eo magis corroboremur & aliis hominibus bonum præbeamus exemplum, 1 Petr. I, 6. 7. 2 Cor. VIII, 2. Jac. I, 22. Tob. XII, 13. Sir. II, 5. Quæ ad *μαρτύριον* spectant, sunt testimonia veritatis, quibus confitemur fidem, cui addicti sumus, quæ imprimis in ecclesia plantanda consueta erant, Act. XXII, 20. Hebr. XII, 1. 1 Petr. V, 1. Apoc. II, 13. c. XI, 7.

Omnis peccati pœna unico verbo *mors* dicitur, Rom. VI, 23. Gen. II, 17.

Mors est vitæ privatio. Naturaliter ex peccato fluit, quia homo per istud Deum, omnis vitæ fontem, deferit & ab eo discedit. Sicut vero triplex datur vita, scilicet naturalis, spiritualis & æterna, ita etiam *triplex mors* est, naturalis, spiritualis & æterna.

Omnis mors constat ex duabus partibus, privatione boni & sensu mali. Datur igitur *duplex peccati pœna*, pœna damni & pœna sensus.

Pœna damni est, quando peccator bono privatur, & *pœna sensus*, quando malo afficitur.

Omnis mors *duos* habet *gradus*, inchoationem & consummationem. *Inchoativa mors* est malum morti præcedens, & *consummativa* malum morti ipsi inhærens.

Quia de *naturali morte* supra prolixè egimus, de *æterna* vero s. damnatione suo loco acturi sumus, nobis hic sola *mors spiritualis* remanet, de qua aliqua adhuc dicemus.

Mors spiritualis est prima & proxima peccati pœna. Consistit in privatione gratiæ divinæ, quæ transgressionis legis primus effectus est. Comprehendit tam malum damni, quam malum sensus. *Malum damni* in morte spirituali est defectus gratiæ divinæ & impotentia ad voluntatem Dei vivendi, *malum sensus* vero anxietas cordis, inquietudo animi morsusque conscientiæ & quicquid animam nostram turbat, misereque cruciat. Uti vero omnis gratiæ priva-

privatio ex ira & odio illius, a quo gratia provenit, oritur, ita etiam *ira & odium Dei* mors spiritualis, quæ nos quasi spiritualiter enecat, vocari potest, Rom. IV, 15. coll. 2 Cor. III, 6.

C A P U T V.

D E

AUCTORE ET CAUSIS PECCATI.

Auctor peccati est *diabolus*, qui primos parentes seduxit & illecebris suis ad defectionem a Deo commovit, Gen. III, 1-6. Joh. VIII, 44.

Causa efficiens peccati, quæ talis & abstractivæ sumti, proprie non datur, quia peccatum aliquid privativi est & in defectu illius perfectionis consistit, quæ actiones nostras coram Deo rectas & justas reddit. Quatenus vero peccatum concretivæ & subjectivæ sumitur, omnino causam efficientem habet, quæ semper ipse *homo* est, qui peccat.

Sicut enim omnes hominis actiones ab ejus voluntate dependent, ita etiam peccaminosæ actiones non aliam habere possunt causam efficientem, quam peccatoris pravam cupiditatem & inclinationem, Jac. I, 14. quæ partim per diabolum, partim per impios homines & mala exempla excitatur.

Deus nullo modo causa peccati dicendus est, cum nec directe nec indirecte istud velit, Ps.

V, 5. Jes. LXV, 12. Est summe bonus, Matth. XIX, 17. & fons omnis bonitatis, Jac. I, 17. Nemo hinc dicat, si ad peccatum incitatur, quod Deus eum incitet; Deus enim neminem ad malum incitat, Jac. I, 13. Vocatur lux, 1 Joh I, 5. Mich. VII, 8. 1 Tim. VI, 16. Qualem vero communionem habeat cum tenebris, 2 Cor. VI, 14. Joh. III, 19-21. Odit potius peccata, Ps. XLV, 8. quia cum sanctissima sua voluntate pugnant.

Deus ad omnes quidem hominum actiones *concurrit*; non vero quatenus peccaminosæ, sed quatenus naturales sunt. In quavis enim mala actione *duo* perpendenda sunt, *motus physicus* & *moralitas ejus*, quatenus nempe motus ad certum finem fit, & secundum præscriptas leges dijudicatur. Ad prius, scilicet ad motum physicum, non vero ad posterius, nempe moralitatem, quæ ab hominis determinatione dependet, *concurrit* Deus.

Deus, etsi interdum *peccata peccatis puniat*, 2 Sam. XII, 11, 12. c. XVI, 10. c. XXIV, 1. 2 Chron. XVIII, 22. 2 Thess. II, 11. Rom. I, 24. Ps. LXIX, 28. non tamen horum peccatorum ipsa causa est. Permittit ea tantum ex justo judicio, neutiquam vero ad ea homines instigat. Antegressa etiam non impedit sequi plura eaque graviora peccata; ex quo fit, ut justitiam suam retributivam super peccatores magis patefaciat & eo insignius in puniendis delictis edat exemplum, Exod. VI, 1. c. XIV, 4. Sed

Sed quæritur: *cur Deus peccata non impediat, si osor & vindex eorum sit?* Respondemus, eum omnino quidem peccata impedire, sed non aliter id facere, quam per gratiam suam assistentem & quatenus hominibus occasionem peccandi subtrahit, nec non per dehortationes & comminationes; alias naturæ libere agentium hominum vim inferret, quod sine læsione sanctissimi nominis ejus non fieri potest.

Permittit igitur Deus peccata, quæ salva hominum libertate non impedire potest.

C A P U T VI.

D E

S U B J E C T O P E C C A T I.

Subjectum peccati est: *quilibet homo* ex corrupta Adami natura genitus. Cujus enim naturæ parens est, ejus etiam naturæ est filius. Qualis stirps, talis etiam ramus. Recte hinc Christus dixit: *quicquid ex carne natum est, caro est*, Joh. III, 6.

Tota scriptura S. veritatem hanc non solum probat, sed omnes etiam homines id quotidie in se experiuntur.

Præcipua *scripturæ S. testimonia* de universalitate peccati in hominibus sunt sequentia: 1 Reg. VIII, 46. & 2 Chron. VI, 36. ubi asseritur, non dari hominem, qui non peccet; Rom. III, 23. ubi Paulus testatur, nos omnes sine
discri-

discrimine esse peccatores; Rom. V, 12. ubi expresse dicuntur omnes homines peccasse; 1 Joh. I, 10. ubi redarguuntur, qui negant, se peccare; Hebr. VII, 27. ubi discimus, sacerdotem inagnum in V. T. quotidie necesse habuisse, pro propriis peccatis sacrificium facere; Iero. XIV, 4. ubi negatur, mundum inter immundos dari; Ps. XIV, 3. & Rom. III, 12. ubi perhibetur, ne unicum quidem inter homines reperiendum esse, qui justus & bonus sit; Ps. LI, 7. ubi David confitetur, se esse ex semine peccaminoso genitum & a matre in peccato conceptum; & denique Rom. VII, 18. ubi Paulus se scire fatetur, quod in se & in sua carne nil boni habitet.

Cum peccatum in *avopia* consistat, ejusmodi subjectum requiritur, quod naturam rationalem habet & libertate voluntatis gaudet. Bruta igitur & substantiæ inanimatæ non peccati se reos facere possunt, quia vel plane non, vel necessario agunt atque adeo moralitate carent.

Excipiuntur hic etiam a) *Deus*, cui per essentiam suam impossibile est peccare aut male agere, Hebr. VI, 18. 2 Chron. XIX, 7. b) *Christus*, Hebr. VII, 26. 27. quia non ex semine peccaminoso genitus est, Luc. I, 35. Matth. I, 20. c) *angeli boni*, qui in bono confirmati sunt, & d) *beatæ animæ*, quæ in morte a peccato purificatæ sunt, Rom. VI, 7. c. VII, 24.

Nec

Nec *primi parentes* ante lapsum subjectum peccati dicendi sunt. Licet enim labiles & peccabiles omnino fuerint, non tamen peccatum ipsum in se habebant, antequam animum ad peccandum inclinabant.

Pontificii ex numero peccatorum delendi etiam *B. Mariam virginem*, quia filium Dei peperit, nec non ab angelo Domini blande compellata, Luc. I, 28. 30. singularique honore a pia matrona Elifabetha excepta, Luc. I, 42. 43. nec non per sponsam Messiae dilectissimam Cant. IV, 7. repræsentata sit.

At quis non futilitatem horum argumentorum cognoscat? Nil amplius citata loca probant, quam quod *B. virgo* persona quidem præ aliis *κεχαριτωμένη*, non tamen a peccatis libera fuerit. Illa enim non modo actualiter peccavit, Luc. II, 44. Joh. II, 4. sed etiam in Filio suo, tanquam suo salvatore, æque ac alii, qui per fidem salvi fieri cupiunt, omnem spem ac fiduciam suam posuit, Luc. I, 45. 47.

In cantico Salomonis per *sponsam* ipsa ecclesia aut quivis homo in Christum credens intelligendus est.

CAPUT VII.

DE

SEDE PECCATI.

Sedem peccati nominamus *subjectum quo*, s. locum, ubi in homine fomes peccati latet ac residet.

Plurimi

de vetitæ arboris fructu edere, non etiam corpus ejus suppeditasset manus & brachia, ad fructum decerpendum, osque ad istum mandendum & deglutiendum.

Sedes itaque *peccati* est in ipso vinculo unionis inter animam & corpus quærenda. Quamdiu partes hæ in unum conspirantes conjunctæ sunt, peccatum in homine locum habet, quod, si non semper in eo dominatur, saltem in eo habitat, eumque ad malefaciendum incitat. Latet quasi ut anguis in herba & impedit hominem, salutis suæ prospicere.

Sedes hæc non prius in homine cessat, quam dissoluto animæ & corporis vinculo. Pater exinde, quam necessaria & salutaris sit *mors* peccatoris pœnitentis. Nam peccatum in homine non deletur, nisi tota peccaminosa machina diruitur. Fomes peccati tunc penitus extinguitur, radix mala eradicatur & tota massa corporea ita purificatur, ut aliquando sancta & ab omni labe libera restitui queat.

CAPUT VIII.

DE

CULPA PECCATI.

Culpa fuit ex obligatione legis & obligatio ex debito, ad legem vivendi.

Reatus

Reatus & culpa non aliter differunt, quam quod prior latius, posterior vero strictius sumatur. Prior magis statum & posterior magis actum indicat.

Culpa est læsio legis, quatenus alicui imputatur, *reatus* vero est status illius, qui in culpa versatur.

Duplex datur *reatus*, vel *reatus culpæ* vel *reatus pœnæ*. *Reatus culpæ* est status culpæ sine respectu ad pœnam, *reatus pœnæ* vero status illius, qui ad culpæ pœnam condemnatus est.

Culpa peccatoris *duplex* est, vel *originaria* s. hæreditaria, vel *actualis*. Prior oritur ex lapsu protoplastorum, posterior vero ex cujuslibet proprio peccato.

Hebraice dicitur **דָּוֶן**, 2 Chron. XXVIII, 13. Græce vero **κρίμα**, Rom. V, 16. 1 Cor. XI, 29. 34.

Reatus Græce vocatur **ἐνοχή**. In concreto hinc **ἐνοχος**, Jac. II, 10. seu **ὑπόδικος**, Rom. III, 19. dicitur quicumque alicujus criminis reus habetur.

Culpa differt a *debito*. *Debitum* est obligatio ad præstanda officia, quæ nobis incumbunt, *culpa* vero est læsio obligationis, quæ fit per actionem cum lege pugnantem. Illud non est aliquid criminosi, sed tantum hæc. Illustrari potest exemplo. Si aliquis mille thaleros mutuo accipit, debitum inde oritur, istos restituendi. Si vero hosce thaleros luxuriose dissipat,

pat, ita, ut restituere nequeat, crimen culpæ in se suscipit.

Pari modo comparatum est cum hominibus respectu Dei. Præscripsit Deus nobis legem, ad quam vivere debemus. Hoc est debitum. Cum vero hanc legem neglexerimus, in *culpam* transgressionis cecidimus.

Hanc culpam secutus est *reatus* tam culpæ quam pœnæ: *reatus culpæ*, quatenus a culpa non purgari possumus, *reatus pœnæ* vero, quatenus ad promeritam pœnam condemnati sumus.

Omnis hinc homo *culpabilis* est coram Deo, Exod. XXXIV, 7. Nah. I, 3. Rom. III, 19. licet peccata ejus ex infirmitate fiant. Causa enim hujus infirmitatis in ipsis hominibus quærenda est.

Ex culpa peccati oriuntur 1) conscientia mala, quæ accusat & damnat, Rom. II, 15. 2) metus mortis, Hebr. II, 15. & 3) ipsa pœna.

C A P U T IX.

DE

STATU PECCATI.

Status peccati duplex est, *securitatis* & *servitutis*. Prior est sine sensu dominii peccati & posterior sine viribus contra hoc dominium.

In *statu securitatis* vivitur *χωρίς νόμου* h. e. sine lege, Rom. VII, 9. Homo tunc est 1) sine legitimo legis usu, 2) sine legis sensu, 3) sine

Pars I.

B b

cura

cura æternæ salutis & 4) sine metu de æterna damnatione. Bene depingit ejusmodi homines Hiobus c. XXI, 7-15. nec non Assaph Ps. LXXIII, 3-12. item Christus, quando de temporibus Noachi & Lothi agit, Luc. XVII, 26-28.

Sécúritas hæc est vel crassior, vel subtilior. *Crassior* consistit in Epicuræismo, *subtilior* vero in salutis suæ neglectu.

In *statu servitutis* homo quidem ex lege Dei dominium peccati agnoscit, servitutemque inde ortam sentit, at in lucta tamen peccato succumbit. Peccatum in eo ita dominatur, ut pravis cupiditatibus nullo modo repugnari possit. Dehortatur homines ab hoc dominio Paulus, Rom. VI, 12. 13. nec non ipse Deus, Gen. IV, 7.

Est status miserrimus, sub dominio peccati vivere. Conscientia a stimulis legis valde anxietur & torquetur. Membra corporis sunt arma nequitiae & totus homo est mancipium diaboli & peccati.

Versatur talis homo in *triplici servitute*, scilicet *peccati*, Joh. VIII, 34. Rom. VI, 12. 20. *diaboli*, Act. XXVI, 18. 2 Tim. II, 26. & *mortis*, Hebr. II, 14. 15. Est mortuus in peccatis, Eph. II, 1. cæcus respectu intellectus, Eph. IV, 18. c. V, 8. & lapideo corde præditus respectu voluntatis, Ezech. XI, 19. c. XXXVI, 26. ψυχικὸς quidem talis homo vocari potest, non vero πνευματικὸς, 1 Cor. II, 14. Σαρκικὸς potius nominat Scriptura S. omnes ejusmodi homines in statu

statu peccati versantes, Jud. v. 19. Rom. VII, 14. c. VIII, 5. Joh. III, 6.

Status Servitutis ab ipsa *servitute* distinguendus est. Hæc enim datur etiam in statu securitatis & est voluntaria, cum e contra servitus in statu servitutis involuntaria sit.

Quæritur autem: *annon homo se a dominio peccati liberare queat?* Propriis viribus id non potest, quia iis destitutus est & hinc ad omne bonum opus impotens, Joh. XV, 5. Rom. VIII, 3. 4. potest tamen id facere viribus gratiæ divinæ, quas Spiritus S. vi meriti Christi per media gratiæ nobis largitur in statu regenerationis & renovationis, ut suo loco pluribus ostendemus.



S E C T I O II.

D E

P E C C A T O O R I G I N A L I.

C A P U T I.

D E

P E C C A T O O R I G I N A L I
I N G E N E R E.

Distinguimus *peccatum originale* a *peccato originis*.

Peccatum originis est primum protoplastorum peccatum in paradiso commissum, per quod

B b 2

pec-

peccatum in mundum venit, Rom. V, 12. *peccatum originale* vero est malum illud hæreditarium, quod per generationem peccaminosam in omnes homines transit. Nonnulli prius peccatum *originans*, posterius vero, de quo hic acturi sumus, peccatum *originatum* vocant. Illud in malo actu, hoc vero in malo habitu consistit.

Dari peccatum originale non modo ex Scriptura S. & imprimis ex Eph. II, 3. Gen. VI, 5. c. VIII, 21. Ps. LI, 7. Rom. V, 12. Hiob. XIV, 4. c. XV, 14. Joh. III, 6. Jes. XLVIII, 8. probari potest, sed etiam quodammodo ex lumine rationis innotescit, quatenus nempe cognosci licet, homines naturaliter in vetitum niti & ad omne bonum opus ineptos & tædiosos esse.

Peccatum originale varia emphatica in sacris literis habet *nomina*. Dicitur (a) *mors*, Eph. II, 1. c. V, 14. Rom. VII, 10. (b) *caro*, Rom. VII, 5. 18. c. VIII, 1. 3. 12. 13. Joh. III, 6. Gal. V, 16. 17. c. VI, 8. (c) *corpus peccati*, Rom. VI, 6. (d) *membra terrestria*, Col. III, 5. (e) *vetus homo*, Rom. VI, 6. Eph. IV, 22. (f) *peccatum κατ' ἐξοχὴν*, Rom. V, 12. c. VI, 14. (g) *peccatum inhabitans*, Rom. VII, 17. (h) *lex peccati in membris*, Rom. VII, 23. (i) *præputium carnis*, Col. II, 13. (k) *concupiscentia*, quatenus non actus, sed habitus est, Rom. VII, 7. (l) *figmentum malum*, Gen. VI, 5. (m) *fermentum vetus*, 1 Cor. V, 6. (n) *absconditum malum*, Ps. XC, 8. (o) *Φρόνημα τῆς σαρκὸς*, Rom. VIII, 6. (p) *malus thesaurus cordis*, Matth.

Matth. XII, 35. (q) *cor lapideum*, Ezech. XXXVI, 26. & (r) *inimicitia adversus Deum*, Rom. VIII, 7.

In lingua Germanica plerumque vocatur die *Erbsünde* s. *peccatum hereditarium*, sed vox hæc est tantum ecclesiastica, non vero biblica.

Negarunt peccatum originale *Pelagiani*, a Pelagio Britone sic dicti, qui sub initio Seculi V vixit, cujus castra sequuntur Anabaptistæ, Sociniani, Arminiani & Pontificii, qui propterea *Pelagiani recentiores* vocantur.

Anabaptistæ peccatum originale figmentum Augustini nominant.

Sociniani, ne Adami quidem, multo minus posterorum ejus dona naturalia, per peccatum corrumpi potuisse, asserunt.

Arminiani, homines non lapsos esse nisi per imputationem, perhibent.

Pontificii non aperte quidem corruptionem naturæ nostræ per peccatum Adami negant, docent tamen, liberum nos adhuc habere arbitrium in spiritualibus, nec non per vires naturæ nos ipsos ad gratiam præparare posse.

Quam valde autem omnes hi adversarii errent, in sequentibus satis probaturi sumus Capitibus.

FORMA PECCATI ORIGINALIS.

Peccatum originale *non est ipsa hominis substantia, nec nudum accidens.*

Prius asseruit *Matthæus Flacius*, posterius vero *Victorinus Strigelius*, qui uno eodemque tempore vixerunt & munera Professorum in Academia Jenensi obierunt.

Flacius excusatur a multis, quia Philosophiam scholasticam non satis intellexit & per vocem *accidens* seductus fuit. Nesciebat enim, dari *duplex accidens*, nempe *separabile & inseparabile*. Illustrari potest simili a lepra desumpto.

Peccatum originale cum in homine, tanquam in suo subjecto sit, Rom. VII, 17. 18. 20. Hebr. XII, 1. quomodo quæso ipsa ejus substantia esse potest? Valde itaque errant & Flaciani & Weigeliani, hoc statuentes.

Non est merum privativum quod, sed simul aliquid positivi. *Privativum quod* omnino peccatum originale est, quatenus defectum justitiæ originalis indicat, qua antea homo præditus fuit. Probatur hoc ex locis biblicis, ubi istud describitur per *avopíav* & *áðiníav*, declinationem, inutilitatem, tenebras, impuritatem, paupertatem, cæcitatem, nuditatem, impotentiam, inidoneitatem &c.

Est autem simul *aliquid positivi*, quatenus hominem ad quævis mala inclinantem reddit. Probari potest ex iis Scripturæ S. locis, ubi peccatum originale figmentum cogitationum cordis, Gen. VI, 5. cor lapideum, Ezech. XXXVI, 26. caro, Joh. III, 6. lex in membris rebellans, Rom. VII, 23. inimicitia adversus Deum, Rom. VIII, 7. & concupiscentia, Rom. VII, 7. nominatur.

Intelligitur per *malum hoc positivum* non solum proclivitas hominis ad appetendum aliquid pravi, quæ ab *appetitu sensitivo* provenit, sed etiam ipsa *voluntatis inclinatio* ad malum, quia & ipsius *intellectus temeraria pronitas* de rebus spiritualibus perverse judicandi & malas cogitationes fovendi. Unde in *Apologia Aug. Conf. art. II. p. 55. concupiscentia prava recte describitur*, quod *quærat non solum voluptates corporis, sed etiam sapientiam & justitiam carnalem, confidatque his contemnens Deum &c.*

Exinde patet, cur homo carnalis tam mortuus, quam vivus dici queat. Ob privationem vitæ spiritualis omniumque virium activarum, quæ ad actus vitales legi divinæ conformiter exercendos requiruntur, *mortui instar* est, Eph. II, 1. 5. Col. II, 13. quatenus vero facultates animæ & vires corporis ad actus motusque vitales & naturales adhibet homo, omnino *vivus & actuosus* vocatur.

Forma itaque peccati originalis consistit in *totali humanæ naturæ corruptione*, ita, ut ho-

mo naturaliter non modo ad omnia, quæ cum voluntate Dei pugnant, promptus & paratus, sed etiam ad quævis bona plenus fastidii & impotentiae sit.

Hæc corruptio cum ex amissione imaginis divinæ orta sit, multi Theologi inde occasionem sumserunt, totam peccati originalis formam in defectu imaginis divinæ ponendi, quod tamen non accurate dictum est.

Secundum *S. Augustinum* consistit hujus peccati forma in *ignorantia in mente & in concupiscentia in carne.*

Pontificii dupliciter in hac doctrina errant, docentes, 1) peccatum originale tantum in defectu imaginis divinæ, non vero in innata pravitate naturæ consistere, & 2) pravam concupiscentiam non esse peccatum, quamdiu non consensus voluntatis accedat.

Quatenus *concupiscentia* facultatem concupiscendi, s. quamcunque inclinationem naturalem indicat, neutiquam peccatum per se est, quatenus vero de habituali inclinatione ad prava facinora, & de ipsis pravis motibus usurpatur, omnino peccatum est.

Pontificii distinguunt inter *motus primo-primos* & *secundo-primos*. In prioribus non adesse voluntatis consensum, ajunt, hinc non ad peccata referunt, in posterioribus vero dari semiplenum consensum, quapropter etiam inter peccata numerant. Nos concedimus quidem, *motus primo-primos* in regenitis non esse peccatum

catum dominans, at sunt tamen respectu legis divinæ omnino verum & proprie sic dictum peccatum legi repugnans.

C A P U T III.

D E

S U B J E C T O P E C C A T I
O R I G I N A L I S.

Hoc est *omnis homo*, ut supra jam probavimus. Quod enim de peccato in genere valet, valet etiam de peccato originali in specie.

In Adamo omnes posteriores ejus peccaverunt, Rom. V, 12. Totus hinc mundus coram Deo in culpa esse dicitur, Rom. III, 19. Valet hic verbum Christi: *Quod natum est de carne, caro est*, Joh. III, 6. Si nemo, nisi qui regeneratus sit, ingredi potest in regnum Dei, v. 5. satis patet, omnes & singulos propter naturalem generationem ad regnum cœlorum ineptos esse.

Hic ne quidem *protoplasti* post lapsum, aut *Maria virgo* excipi debent.

Protoplasti amissa imagine divina omnem corruptionem in se susceperunt, quæ jam in hominibus est & peccatum originale vocatur. Probatur ex Gen. III, 7. ubi de iis narratur, quod post lapsum nudos se cognoverint & propterea faciem Dei timuerint, cum tamen antea eos non puduerit suæ nuditatis, Gen. II, 25.

Colligi potest exinde jactura justitiæ originalis, quia inordinatam & ignominiosam in se senserunt concupiscentiam, quam non ab initio habuerunt, sed tantum per lapsum sibi contraxerunt.

B. Mariam Virginem Pontificii non modo ab omnibus peccatis actualibus, sed etiam a peccato originali liberam judicant ac declarant. Imo multi ex iis asserunt, eam sine omni peccati labe conceptam esse, quod tamen monachi ex ordine Dominici in dubium vocant. Disceptatur propterea valde inter istos & cæteros monachos, inprimis illos, qui regulam Francisci sequuntur.

Hi immaculatam Mariæ Virginis conceptionem fervide defendunt. Eorum partes jam tenent fere omnes papicolæ, provocantes ad Concilium Basileense, in quo sententia hæc pro orthodoxa habita & in ecclesiam Romano-Catholicam tanquam vera introducta est.

Solus *Christus* sine peccato conceptus, ideoque a peccato originali prorsus immunis fuit, etsi veram humanam naturam in utero materno induit. Angelus Domini dixit propterea ad Mariam: *Sanctum, quod ex te nascetur, Filius Dei vocabitur*, Luc. I, 35. Jure meritoque hinc appellatur ὁσίος, ἀκακος, ἀμίαντος, κεχωρισμένος ἀπὸ τῶν ἀμαρτωλῶν, Hebr. VIII, 26. Non enim genitus est vi primæ benedictionis, Gen. I, 28. sed vi gratiosæ promissionis, Gen. III, 15.

Nec

Nec conceptus est ex femine virili, sed tantum ex muliebri, a Spiritu S. sanctificato, Luc. I, 35.

Errant *Petrus Poiret & Dippelius*, docentes, Christum peccaminosas illecebras sensisse, eas tamen feliciter vicisse, iisque nunquam indulgisse.

Quanquam omnes homines peccato infecti sint, in regenitis tamen peccatum tantum tentans, in irregenitis vero regnans est.

C A P U T IV.

D E

P E C C A T O O R I G I N A L I
I N I N T E L L E C T U.

In *Intellectus* hominis ante lapsum plenus sapientiae fuit. Non modo omnium rerum coelestium & terrestrium rectam & sufficientem habebat cognitionem, sed etiam facultatem, omnia in memoria retinendi, sobrie de iis judicandi, solide ratiocinandi & ad certum bonumque finem dirigendi. Verum per lapsum & imaginis divinae jacturam omnis haec humani intellectus virtus & perfectio perditæ est.

Intellectus hominis nunc plenus est ignorantiae, erroris, præjudiciorum & stultitiae, etsi facultas cognoscendi, recordandi, fingendi, judicandi & ratiocinandi non plane extincta sit,

fit, quia lumen aliquod rationis remansit, alias homo peior foret animali irrationali.

Facultates intellectus non modo valde debilitatæ, sed etiam de recto tramite deflexæ sunt. Homo igitur nunc in spiritualibus nec satis accurate & perfecte aliquid, nec quid bonum & salutare sit, cognoscere potest. Intellectus tantum inclinatur ad sciendum, quod vetitum est, & Deo displicet sibi que ipsi noxium, abominatur autem omnem spiritualium, salutarium & divinarum rerum cognitionem, 1 Cor. II, 14.

Scriptura S. nominat hanc intellectus corruptionem *cæcitatem*, Eph. IV, 18. Joh. IX, 41. 2 Pet. I, 9. Apoc. III, 18. Jes. XXIX, 18. c. XLII, 16. c. LIX, 9. 10. Ps. CXLVI, 8.

Cæcitatem hanc ut eo melius perspiciamus, præcipua *intellectus vitia* recensebimus. Sunt ista 1) ignorantia, 2) imbecillitas mentis, 3) proclivitas ad errandum, 4) præcipitantia, 5) stultitia, & 6) stupiditas.

Primum intellectus vitium, quod nobis per peccatum originale inhæret, est *ignorantia*. Intellectus est quasi tabula cerea, literarum vacua, aut camera obscura, cui lux deficit. Concreata quidem erat homini facultas, omnia, quæ ad cultum divinum & propriam salutem spectant, per se sciendi, Col. III, 10. sed intelligentia hæc per lapsum primorum parentum perditæ est. Plenus nunc est intellectus noster ignorantia, Hiob. VIII, 9. Quod non discimus,
nesci-

nescimus, Sir. XVIII, 19. In primis in rebus divinis & spiritualibus plane nil intelligit homo. Ethnorum tempora vocantur propterea *ævum ignorantie*, Act. XVII, 30. Hæc ignorantia istæ sunt tenebræ, quibus totus terrarum orbis ante Christi adventum obtectus dicitur, Jes. LX, 2. De hisce tenebris agitur etiam Jes. IX, 2. Matth. IV, 16. Luc. I, 79. Eph. V, 8.

Alterum intellectus vitium post lapsum est *imbecillitas mentis*. Mens h. l. idem est ac ratio s. facultas, aliquid discernendi aut dijudicandi. Hæc in homine lapso quidem remansit, alias non amplius foret animal rationale, sed tamen per jacturam imaginis divinæ ita debilitata est, ut jure meritoque magnam ei attribuere possimus imbecillitatem. Difficultas aliquid discendi, memoriæ mandandi, reminiscendi & judicandi effectus hujus imbecillitatis est, quæ in rebus spiritualibus semper major est, quam in rebus terrestribus. Huc spectant non modo querelæ Dei de facilitate hominum obliviscendi sui creatoris & ejus legis, Ps. L, 22. Jes. VII, 10. c. LI, 13. Jer. II, 32. c. XVIII, 14. Hof. IV, 6. sed etiam ejus exhortationes ad consultandum & animo infigendum id, quod per verbum suum nos docet, Ps. XCIV, 8. Jes. LI, 4.

Tertium vitium intellectus est *proclivitas ad errandum*. Defectus intelligentiæ nostræ & imbecillitas mentis non modo obstaculo nobis sunt, veritatem cognoscendi, sed impediunt etiam nos, quo minus certi esse queamus veritatis.

ritatis. Inde oritur proclivitas ad errandum & a veritatis tramite deflectendum, ad quam prava voluntas multum confert, quæ intellectum ad obsequium trahit & præjudiciis implet. Est autem intellectus magis promptus paratusque ad credendum mendaciis, quam veritati, facilioremque se præstat ad errorem, quam ad veritatem amplectendam. Necessè hinc est sibi prospicere, ne ducamur in errores, peccata & damna, quia facillime seduci possumus.

Deus propterea nos diligenter de omni seductione admonet, Jes. III, 12. Matth. XXIV, 4. 1 Cor. XV, 33. 2 Cor. XI, 3. 2 Theff. II, 3. 2 Petr. III, 17.

Quantum intellectus vitium est præcipitantia, qua homo plus sibi fidit, quam vires ejus valent. Multa ideo loquitur, judicat & agit, quorum postea poenitet illum. Actus voluntatis plerumque præcedit actum intellectus, hinc verba & facta nostra sæpissime sine consilio facimus. Oriuntur ex hac præcipitantia, ad quam quilibet homo valde propensus est, Sir. XIX, 16. multa infortunia & damna, in quæ homines se ipsos & alios præcipitant. Lente igitur festinandum & nil temere aut sine consilio faciendum est. Spectant huc sapientis morum doctoris, Siracidis, tam monita, c. VI, 13. c. VII, 40. c. XI, 7. 8. c. XIX, 16. quam preces, c. XXIII, 2. 3. nec non Salomonis admonitio de non nimium innitendo intelligentiæ suæ Prov. III, 5.

Quin-

Quintum intellectus vitium appellamus *stultitiam*. Distinguimus eam ab insipientia. Hæc est proprietas hominis stupidi, illa vero nugatoris. Oritur stultitia ex defectu iudicii, luxuriante ingenio, iudicium exsuperante. *Ingenium* ea animæ facultas est, qua ideas concipimus, quas postea per iudicium coniungimus, in ordinem redigimus & ad certum finem dirigimus. Quo minor autem in homine hæc facultas est, eo magis iste abundare solet viribus ingenii. Hæc ingenii abundantia in stultitiam vergit, hominemque reddit nugarum plenum, quia plures concipit fovetque ideas, quam per iudicii vires conjungere & ad certum finem dirigere valet. Inde veniunt nugatores. Omnis homo ad hanc inclinat stultitiam, quia facultas iudicandi & discernendi per lapsum Adami valde debilitata est, altera facultas vero, quam ingenium vocamus, ex suis cancellis erumpit. Oritur exinde communis hominum pruritus nugandi, jocandi, facetiis ludendi, risum movendi & scurriliter loquendi, quæ omnia hominem Christianum non decent. Produnt ejusmodi facetiæ plerumque cordis malitiam & pertinent ad *μωρολογίαν* & *εὐτραπείαν*, quam Paulus tanquam *ἐκ ἀνήκοντα* interdicit, Eph. V, 4. Christus vero inter verba inutilia refert,

fert, de quibus die extremo rationem reddere debemus, Matth. XII, 36.

Sextum denique intellectus *vitium* est *stupiditas*, per quam id, quod Germani die *Stummheit* seu den *Unverstand* vocant, intelligimus. Non solum defectum ingenii, sed etiam iudicii indicat. Homo secundum hanc stupiditatem non solum salutis suæ consulere nescit, sed imprudenter etiam & secure in diem vivit, ac si nec mors, nec periculum, nec iudicium extremum immineat. Datur hæc naturalis stupiditas in omnibus hominibus, qui deliciis luxuriant, mundo & Mammoni serviunt, conscientiaque morsus non metuunt. Tales insipidi homines erant Judæi, quos Christus deplorat, Luc. XIX, 42. Salomo comparat propterea homines cum piscibus & avibus, nullum periculum timentibus, Eccl. IX, 12. communique nomine כְּסִילִים h. e. *stultos* eos nominat, qui Deum non timent, nec in viis ejus ambulant. In eorum usum scripsit Proverbia sua & Ecclesiasten, qui libri adhuc in Bibliis sacris extant. Paulus ab hac insipientia homines valde dehortatur, Eph. V, 15-17.

C A P U T V.

D E

PECCATO ORIGINALI IN VOLUNTATE.

Voluntas est facultas animæ tam appetendi, quam averfandi aliquid. Objectum itaque, circa quod voluntas verfatur, duplex est, vel appetibile vel averfabile. Prius est cognitum bonum, pofterius vero cognitum malum. *Bonum* est, quod non modo per fe debitas fuas perfectiones habet, fed etiam in rem noſtram conducit, *malum* vero, quod non modo corruptum & vitioſum, fed etiam noxioſum eſt.

Omnia hæc, ut a fe invicem bene diſcernat homo, Deus ei largitus eſt *ſapientiam*, quæ proprietas eſt intellectus, qua bonum & malum, fas & nefas, utile & pernicioſum diſtinguere poteſt. Amiſſa vero intellectus perfectione ſapientia hæc evanuit. Homo nunc non modo circa voluntatis objectum errat, fed voluntas ejus ipſa etiam ita corrupta eſt, ut ne quidem cognitum bonum appetat & cognitum malum averſetur. Amiſit etiam certo modo voluntatis libertatem, quæ præcipua hujus facultatis virtus fuit. Ple-

Pars I.

Cc

rumque

rumque ista vocatur *liberum arbitrium*, de
cujus jactura infra specialiter acturi sumus.

Hic tantum de *voluntate* ipsa, quatenus
per lapsum corrupta est, aliqua dicemus.
Tota ejus corruptio in eo versatur, ut bo-
num aversetur, malum vero appetat, semper-
que nitatur in vetitum. *Triples* hoc *vitium*
pluribus exposituri sumus.

Primum voluntatis *vitium* est *aversatio a*
bono. Hæc omnibus hominibus a natura in-
genita est. Ipse Paulus in statu sanctificatio-
nis de ista conquestus est, Rom. VII, 23.
Non solum irrogenitis fastidio est, quicquid
ad cultum divinum & amorem erga Deum &
proximum spectat, sed ipsi regeneriti non sine
tædio officia christianismi præstant. Vim
sibi quasi afferunt in facienda voluntate Dei,
& quodcunque faciunt, imperfectione labo-
rat. Aversionem sentiunt in fundendis
precibus, in audiendo verbo Dei, in frequen-
tando templo, in præstanda vitæ sanctimonia,
in distribuendis eleemosynis & in omnibus
aliis christianismi officiis. Cognoscendum
hoc dant homines per oscitationem, disper-
sionem cogitationum, negligentiam attentio-
nis, facilitatem dormiendi, procrastinationem
poenitentiae & alia fastidii signa.

Alterum

Alterum corruptæ voluntatis vitium est *inclinatio ad malum*. Hæc tanta est & tam violenta, ut nullo modo refrenari queat. Impii summa cum voluptate peccata committunt & nullius periculi & damni curam habent, Jes. XXVIII, 15. Hiob. XXI, 13. Nul- lum malitiæ opus iis tam arduum ac difficile est, ut id non faciliori negotio perficiant, quam quod lex divina poscit. Ipsi regeneriti non possunt non aures & oculos libenter ar- rigere, quoties aliquid mali auscultandum & spectandum est. Captant dulcedinem ex narratione scelerum & facile se sinunt seduci scandalizarique. Jucunda quoque iis est præ- teritorum facinorum recordatio. Hæc omnia proclivitatem naturæ ad malum satis superque testantur, quam nec regeneratio, nec sancti- ficatio in hominibus delere potest, quanquam per gratiam Spiritus S. ita suppressi queat, ut non facile in actum erumpat.

Tertium voluntatis vitium est *proclivitas ad faciendum, quod prohibitum est*. Ipsi ethnici id cognoscunt teste Ovidio, qui scripsit: *Ni- timur in vetitum semper, cupimusque negata*. Observamus hoc in parvis infantibus, qui or- dinarie tendunt ad omnia quæ interdicta sunt, & e contra abhorrent ab omni, quod iis conducit, aut præceptum est. Satis hoc de-

clarat corruptionem cordis nostri. Benignissimus enim creator non potuit non nobilissimas suas creaturas ita cōdere, ut ad nil aliud inclinent, quam quod cum voluntate ejus sanctissima conveniat & sibi ipsis quovis modo commodum sit ac conducibile. Proclivitas igitur ad faciendum, quod vetitum & damnosum est, ad intermittendum vero, quod præceptum est & utilitatem præstat, certissimum signum est miseri illius lapsus, in quem ex culpa primorum parentum cecidimus.

CAPUT VI.

DE

PECCATO ORIGINALI IN
CARNE.

Per *carnem* hic intelligimus omnia, quæ ad hominis corpus spectant. Huc non modo membra & vires ejus, sed etiam cupiditates referuntur, quas alias appetitum sensitivum nominamus.

Sicut totus homo corruptionem passus est, ita quoque non datur aliquid in eo, quod non corruptionem redoleat.

Corpus erat ante lapsum immortale, gaudebatque tanta integritate & perfectione, ut non modo nullus defectus alicujus membri,
nec

nec vitium aliquod in isto daretur, sed vires etiam sensuum & facultatum nunquam diminuerentur. Nunc vero corpus nostrum innumeris morbis & imbecillitatibus obnoxium est. Ab utero materno vergit ad interitum & crescente ætate quotidie decrescunt corporis vires. Organa sensuum sensim debilitantur, usque dum denique facultates videndi, audiendi, olfaciendi, sapiendi & tangendi cessare incipiunt. Miserum hunc humanæ vitæ statum optime depingunt *Salomo*, Eccl. XII, 1 sq. *Jobus*, c. XIV, 1. 2. *David*, Ps. XXXIX, 5-8. Ps. CIII, 14-16. *Moses*, Ps. XC, 5-10. & *Siracides*, c. XL, 1-4.

Carnis cupiditates & appetitus sensitivus respectum habent ad hominis nutritionem, delectationem & propagationem. Sedem suam habent in carne animata, in qua nunc nil boni habitat, ut ipse Paulus de se testatur, Rom. VII, 18. Dicitur hoc a Paulo cupiditas, quæ in membris sese exerit adversus legem mentis, Rom. VII, 23.

Per se & originaliter cupiditates carnis & appetitus sensitivus non sunt peccata. Deus istos naturæ humanæ ingenuit in bonum finem, per corruptionem vero naturæ depravati sunt, ita, ut non modo ἀνόμως tendant ad objecta, sed etiam injusta objecta pro justis

& rectis eligant. Huc spectant *voluptates* tam *Veneris*, quam *gulæ*.

Harum principium omnino bonum est. Ingenuit enim Deus hominibus instinctum, sese per generationem propagandi, nec non corpus nutriendi. Instinctus vero hic per lapsum primorum parentum degeneravit in feritatem, ita, ut omnes jam hominis cupiditates effectus sint peccati, Rom. VII, 8.

Pari modo comparatum est cum *avaritia* & *superbia*. Sunt itidem nil aliud, quam species degenerati appetitus sensitivi. Originaliter fuerunt instinctus naturales, suam promovendi felicitatem & gloriam. Per peccatum originis autem factæ sunt turpes pravaeque cupiditates, quibus homines detruduntur in exitium & æternam damnationem, 1 Tim. VI, 9.

Requiritur hinc ab omni christiano studium mortificationis carnis & abnegationis sui ipsius, quo spectant sequentia scripturæ S. loca: Gal. V, 24. Tit. II, 12. 1 Petr. II, 11.

CAPUT VII.

DE

LIBERO ARBITRIO EJUSQUE DEFECTU IN REBUS SPIRITUALIBUS.

Vox *liberi arbitrii* in Scriptura S. non occurrit. Peripatetici istud vocabant ἐλευθερίαν & προαίρεσιν, Platonici vero αὐτεξουσίαν, quam vocem etiam Patres primitivæ ecclesiæ usurpant.

Liberum arbitrium est ea animæ rationalis, & speciatim voluntatis facultas, secundum quam homo proprio motu & sine ulla coactione agere vel non agere, itemque hoc vel illud agere potest.

Est istud præcipua voluntatis virtus, qua deficiente homo a bruto parum differt. Caveamus igitur, ne in excessu peccemus, quando defectum liberi arbitrii post lapsum nimis extollimus.

Datur enim omnino adhuc in hominibus liberum arbitrium, sed tantum respectu rerum *temporalium*, non vero respectu *spiritualium*, in quibus omni libertate prorsus destitutus est homo, Rom. VII, 15. 16. 19. imo pro mortuo habendus, Eph. II, 1. Col. II, 13.

Liberum arbitrium in spiritualibus mutatum est in *servum arbitrium*, Joh. VIII, 34. Rom. VII, 17. 20. 2 Petr. II, 19. Deficit enim hic

tam libertas contrarietatis, quam libertas contradictionis, quia voluntas non modo ad peccandum proclivis, sed etiam ad eligendum bonum inhabilis est, ut supra satis docuimus.

Distinguendum autem est inter *internos voluntatis motus* & *externos ejus actus*. Respectu priorum non datur liberum arbitrium, sed tantum respectu posteriorum. *Actus* voluntatis omnino *liberi* sunt, 1 Cor. VII, 37. Matth. XXIII, 37. non vero ejus *motus*. Motus enim voluntatis oriuntur ex commoventibus causis & rationibus intellectus, cui voluntas subjecta est. Dependent igitur a dictamine intellectus.

Exinde satis patet, cur in hominibus tantum respectu rerum temporalium, non vero spiritualium detur liberum arbitrium. Intellectus enim in spiritualibus cæcus est, quapropter etiam voluntas non ad res spirituales movetur. Dantur quidem in hominibus motus voluntatis spirituales, sed non sunt naturales. Proveniunt a Spiritu S. ejusque gratia præveniente & illuminante. Quemadmodum autem omne, quod a Spiritu S. proficiscitur, carni & naturæ nostræ fastidium creat: ita etiam impossibile est, ea, quæ Spiritus S. in nobis operatur, libere & sine lucta carnis & spiritus perficere, Gal. V, 17. Rom. VII, 23. Inde venit omnis defectus liberi arbitrii in spiritualibus.

In *rebus temporalibus* autem omnino adhuc datur liberum arbitrium, quia primi voluntatis

tis

tis motus, ad istas directi naturales sunt. Re-ferimus ad has res temporales non modo *actiones civiles*, sed etiam *ecclesiasticas & morales*. Per priores intelligimus, quæ ad vitam communem & civilem, per alteras, quæ ad externum Dei cultum, & per ultimas, quæ ad ducendam vitam honestam spectant.

Non enim negandum est, hominem irregeneratum ex libero arbitrio hoc vel illud opus civile suscipere, templum frequentare, verbum Dei legere & audire, formulas precatorias recitare, hoc vel illud malum facinus intermittere, aut officium aliquod alteri præstare posse, quia omnia hæc ex motibus naturalibus fieri queunt, Marc. VI, 20. Luc. XXIII, 8. Act. XIII, 7. sed per se non genuinum regenerationis statum constituunt.

Est vero liberum arbitrium in temporalibus neutiquam perfectum, sed valde quoque iminutum & quidem, 1) per consuetudinem peccandi, 2) per vehementiam affectuum & 3) per multifariam seductionem. Facile exinde judicare licet, virtutes irregenitorum hominum esse opera mortua s. splendida peccata. Nemo enim per se aliquid boni facere, nec legem implere, nec per opera justificari potest.

In doctrina de libero arbitrio peccatur tam in excessu, quam in defectu.

In excessu peccant *Stoici & Manichæi*, qui hominibus illud prorsus quasi abjudicant & in omnibus actionibus vel fatalem necessitatem,

vel irresistibilem determinationem statuunt ; in defectu vero Pelagiani, & qui eorum vestigiis insistant, nempe Scholastici, Pontificii, Sociniani, Arminiani & Synergistæ. Hi omnes vires liberi arbitrii nimium extollunt & ad hominis conversionem eas aliquid conferre posse contendunt.

CAPUT VIII.

D E

TENACITATE ET PROPAGABILITATE PECCATI ORIGINALIS.

Præcipuæ peccati originalis affectiones sunt *tenacitas & propagabilitas.*

Tenacitas peccati originalis ea est affectio ejus, secundum quam illud toti homini tam pertinaciter inhæret, ut non aliter quam per mortem extirpari queat. *ἑνπερίστατος* propterea a Paulo vocatur *ἀμαρτία*, h. e. firmiter inhærens & quasi undiquaque cingens, Hebr. XII, 1. Metaphora desumpta est a corona populi conferti s. turba circumfusa, unde vox *περίστασις* oritur, quæ circumstantem hominum multitudinem significat. Est itaque *ἀμαρτία ἑνπερίστατος* ejusmodi peccatum, quod undique omnes vires, membra & totum hominem occupat. Hinc non nisi cum ipso corpore exui, aut instar oneris nobis alligati deponi potest.

Indicat hoc Paulus Rom. VII, 17. 18. quando, jam conversus, fatetur, in se nil boni habitare.

tare. Totam naturam quasi domicilium peccati esse testatur, ex qua impossibile sit, hospitem hunc hæreditarium expellere. Sola mors est, quæ domicilium hoc destruit, inhabitansque malum extirpare potest, Rom. VI, 7. c. VII, 24.

Altera peccati originalis affectio est *propagabilitas*, secundum quam peccatum originale propagatur per carnalem generationem in posteris. Hoc est, quod Christus judicat dicendo: *quod natum est ex carne, caro est*, Joh. III, 5. Hisce verbis docet, quemcunque a parentibus peccaminosis genitum itidem peccaminosum esse. Hoc probant etiam verba Jobi c. XIV, 4. dicentis: *Quis inveniet mundum inter immundos? nec non verba Davidis ingemiscentis: ecce in iniquitate formatus sum & in peccato concepit me mater mea*, Ps. LI, 7. Satis clare exinde liquet, peccatum *contagium* esse, quod totam naturam hominis ita infecerit, ut nequicquam de illa proficisci queat, quod non ab ejus veneno infectum sit. Cum fermento bene comparari potest, de quo constat, quod pusillum de isto totam farinariam massam fermentet, 1 Cor. V, 6. fermentationemque hanc cum omni alia farinæ massa communicet.

Sicut igitur tam caro, quam anima hominis a peccati veneno infecta est, ita quoque peccatum in utraque propagatur & quidem per carnalem generationem. Quomodo autem anima malum hoc sibi contrahat, non monstrari

strari quidem, salva tamen fide ignorari potest. Qui vel perhibent, Deum cujuslibet hominis animam in utero materno creare, vel præexistentiam animarum statuunt, dicunt, Deum propter scedifragium a primis parentibus commissum non amplius eorum posteris justitiam originalem conferre posse.

Optima hypothesis est doctrina de propagatione animæ per *traducem*, Gen. I, 28. c. V, 3. Per istam enim inhærens pravitas in liberos naturaliter ita propagatur, ut nec causa peccati in Deum cadat, nec essentia hominis propterea alterari debeat. Tali modo corruptio naturæ diffunditur in omnes posteros, quæ quidem in iis eadem numero, non vero eadem specie est.



SECTIO III.

DE

PECCATIS ACTUALIBUS.

CAPUT I.

DE

PECCATIS ACTUALIBUS IN GENERE.

Peccata actualia sunt effectus peccati originalis. Nomen habent ab *agendo*, quia per
ea

ea *actu* fit, ad quod homines a natura corrupta incitantur. Proprie omne, quod contra legem Dei vel *agendo*, vel *non-agendo* committitur, significant.

Sunt vero omnia peccata actualia aberrationes a lege divina, quæ vel concupiscendo, vel cogitando, vel loquendo, vel faciendo aut omittendo fiunt. Plerumque describitur *peccatum actuale* per actionem, aut actionis omissionem, pugnantem cum lege Dei.

In scriptura S. peccata actualia varia habent nomina. Vocantur *mali fructus*, Matth. VII, 21. *opera carnis*, Gal. V, 19. *negotia corporis*, Rom. VIII, 13. *opera tenebrarum*, Eph. V, 14. *opera mortua*, Hebr. VI, 1. & *inquinaciones carnis & spiritus*, 2 Cor. V, 1.

Non sunt unius ejusdemque generis. Theologi vario modo illa inter se distinguunt. Dividunt enim in *peccata commissionis & omissionis*, in *peccata contra Deum, proximum & semetipsum*, in *peccata voluptatis, ambitionis & avaritiæ*, in *peccata voluntaria & involuntaria*, s. *regnantia & non-regnantia*, in *peccata cordis, oris & operis*, in *peccata malitiæ & imbecillitatis*, in *peccata clamantia & non-clamantia*, in *peccata propria & aliena*, in *peccata mortalia & venialia*, in *peccata habitualia & non-habitualia*, in *peccata aperta & occulta*, & in *peccata remissibilia & irremissibile*. De omnibus hisce peccatorum generibus infra pluribus agetur.

Omnia

Omnia peccata actualia sunt offensiones Dei, Rom. VIII, 7. Jac. IV, 4. Peccatores hinc jure meritoque dicuntur in lingua Germanica *Gottlose*, quia quasi se abalienarunt a Deo ejusque cultu. Græci *ἀσεβείς* & Hebræi *אֲשֵׁרִים* nominant, quos Latini *impios* vocant. Cunctæ hæ voces ejusmodi irreligiositatem indicant, quæ omnem communionem & amicitiam cum Deo tollit. Recte hinc Jesaias ad Judæos dixit: *iniquitates vestrae vos & Deum vestrum disjungunt*, Jef. LIX, 2.

Maximi adversarii in doctrina de peccatis actualibus sunt *Pontificii*, qui partim nimis exaggerant ea, partim nimis extenuant, ut suo loco ostendemus.

CAPUT II.

DE

CAUSIS PECCATORUM ACTUALIUM INTERNIS.

In homine *generatim* nil aliud, quam ipsa *humanae naturæ* connata *perversitas*, quæ in defectu justitiæ originalis & pravitate concupiscentiæ consistit, peccatorum actualium causa efficiens est.

Scriptura S. hanc naturalem hominis perversitatem plerumque vocat *carnem*, Gen. VI, 3. Joh. III, 6. c. VI, 63. Rom. VIII, 13. Gal. V, 17. 19. 24. c. VI, 8. nec non *cor*, quod propterea

pterea dicitur *impurum*, Prov. XX, 9. Act. XV, 9. *lapideum*, Ezech. XI, 19. *vetus*, Ezech. XXXVI, 26. & *incircumcisum*, Deut. X, 16. c. XXX, 6. Jer. IV, 4. Rom. II, 29. Alias etiam hæc perversitas a Paulo *inhabitans malum*. Rom. VII, 17. 18. & *vetus homo*, Rom. VI, 6. Eph. IV, 22. a Christo vero *malus cordis thesaurus*, Matth. XII, 35. & *mala cordis scaturigo*, Marc. VII, 21. Jer. VI, 7. nominatur.

Est autem *cor* & *caro hominis* sedes pravæ concupiscentiæ, prava *concupiscentia* vero omnium peccatorum actualium mater. Concupiscentia enim συλλαβοῦσα τίντεαι ἀμαρτίαν, h. e. cum conceperit, parit peccatum; Jac. I, 15.

Speciatim quærendæ sunt peccatorum actualium causæ internæ tam in intellectu, quam in voluntate.

In intellectu dantur ignorantia & præjudicia, quæ homines ad actualiter peccandum ducunt.

Ignorantia est causa peccatorum, quatenus excludit genuinam veritatis cognitionem, quæ actum peccandi alias impedit. Sic Paulus 1 Tim. I, 13. testatur, se persecutorem Jesu factum fuisse, cum caruisset veræ religionis cognitione. Pari modo peccata ex ignorantia commiserunt etiam Abimelech, Gen. XX, 5. 6. Loth, c. XIX, 33. 35. Juda, c. XXXVIII, 14-16. aliique.

Ignorantia alias distinguitur in vincibilem & invincibilem. Vincibilis est, quæ tolli, & invincibilis, quæ non tolli potest, licet omnis diligentia

gentia propterea adhibeatur. Hæc, etsi excuset homines coram hominibus, non tamen coram Deo excusationem invenit, quia omnis peccati ignorantia apud ipsum pro vincibili habetur, Rom. I, 19 21. Interim Deus ex singulari gratia in fidelibus ejusmodi peccata inter venialia numerat.

Est autem ignorantia peccati vel antecedens vel consequens.

Antecedens peccati ignorantia est, quæ antecedit voluntatem. Hæc duplex est. Aut qui ignorat, quod scire potest & debet, aut ignorat, quod facit, quod tamen, si sciret, æque facturus foret. Hæc ultima plerumque ignorantia concomitans appellatur.

Ignorantia peccati consequens est, quæ voluntatem sequitur, quapropter etiam voluntaria vocatur. Est vel affectata vel supina.

Ignorantia affectata est, quando ex malitia homo aliquid nescire vult, quod tamen scire posset; supina vero, quando ex negligentia aliquid nescit, quod scire posset.

Præjudicia sunt falsæ persuasiones mentis ex dominatione voluntatis super intellectum ortæ, quibus homo conscientiam suam super hoc vel illo peccato tranquillare, istudque extenuare ejusque peccaminositatem prorsus tollere studet. Vocantur præjudicia vitæ s. præjudicia practica, quia christianismo valde nocent, & non

& non modo peccatores in sua vita securos reddunt, sed etiam alios scandalizant & in eadem peccata trahunt.

Huc spectant etiam *errores*, qui ex deceptione intellectus aut sensuum circa objectum aliquod oriuntur. Ignorantia generat eos & seductio istos parit. Quia genuinam rerum causam, modum & finem non semper scimus, opus nobis est institutio aut manuductio aliqua, qua tamen pari facilitate in errores rapimur, quam in veritatem ducimur. Interim de errore idem dici potest, quod de ignorantia supra diximus. Discrimen inter ambos in eo consistit, quod homo errans id non recte noverit, quod ignorans plane nescit.

In *voluntate* sunt *prava concupiscentia* & *pravi affectus* id, quod ad causas peccatorum actualium internas refertur.

Prava concupiscentia duplicem habet significationem. Significat enim vel peccatum originale, ut supra ostendimus, vel habituales propensionem ad malum, qualis est illa, quam Jacobus vocat *ἐπιθυμίαν συλλαβῆσαν*, c. I, 15. Homo tunc plenus est motuum inordinatorum, qui eum ad quærendam occasionem, pravis suis desideriis satisfaciendi, instigant. Cupidinem peccandi hanc concupiscentiam

dicere possumus, quia semper aliquid jucundi secum fert, nosque tanta dulcedine captat, ut nullius periculi aut damni inde enascentis rationem habeamus.

Affectus sunt motus animi, qui ex repræsentatione vel imminentis vel jam præsentis boni aut mali oriuntur, nosque ad vehementius appetendum vel averfandum id, quod jam appetimus vel averfamur, impellunt.

Dicuntur *pravi*, quia non modo peccato infecti sunt, sed etiam ad peccata actualia incitant. Per se non sunt pravi, quia ipsi Deo tribuuntur, Christoque in statu exinanitionis consueti fuerunt. Attamen quia voluntatem nostram partim distrahunt, partim impediunt, quo minus ad objecta ab intellectu repræsentata tendat, nec non intellectus judicium turbant, voluntatemque ad bona temporalia trahunt, imo, si nimis vehementes sunt, suo quasi pondere voluntatem contra rationis dictamen prorsus dejiciunt, jure meritoque inter causas peccatorum actualium internas numerantur.

Ejusmodi *affectus* sunt amor, odium, ira, gaudium, tristitia, spes & metus. Hi omnes in hominibus peccaminosis degenerant in pravas commotiones, quæ excæcant intellectum

ctum, perturbant voluntatem & præcipitant nos in varia facinora, quorum nos postea valde pœnitet.

C A P U T III.

D E

CAUSIS PECCATORUM
ACTUALIUM EXTERNIS.

Extra hominem ad peccata actualia incitant *diabolus & mundus*. Vocantur propterea hostes hominum spirituales.

Primus & præcipuus hominum hostis est diabolus, magnus ille homicida, Joh. VIII, 44. de quo Petrus scripsit, quod quotidie obambulet sicut rugiens leo & devorare studeat, quem inveniat, 1 Petr. V, 8. Præstat istud præcipue per suas tentationes & incitationes ad peccandum. Nominatur propterea *ὁ πειράζων*, h. e. seductor, Matth. IV, 3. quia totum mundum seducit, Apoc. XII, 9. & magnam indignationem erga homines habet, Apoc. XII, 12. Utitur autem ob limitatam suam potentiam variis *μεθοδεῖαις* s. occultis & fraudulentis circumventionibus, Eph. VI, 11.

Quando hominem decepit & in peccata dominantia detruxit, spiritualiter eum inhabitare solet ut Judam, Luc. XXII, 3. Voca-

tur hoc *obsessio spiritualis*, de qua alibi pluribus actum est.

Duplici modo diabolus homines ad peccandum incitat, partim mediate, partim immediate. *Mediate* fit per malos homines & nostri proprii cordis pravas inclinationes, nec non per varia nos allicientia objecta aut supeditatas occasiones, *immediate* vero per malas cogitationes, quas indefinenter nobis inspirat, Joh. XIII, 2. 1 Chron. XXI, 1. Act. V, 3. nec non per malas imaginationes, aut mala somnia, quæ omnia diabolum habent auctorem.

Paulus omnes has incitationes *tela ignea* vocat, quibus Satanæ nos petere solet, Eph. VI, 16. Excoecat per ea sensus, ne nobis illucescat lumen Evangelii, 2 Cor. IV, 4. Intellectum variis præjudiciis & erroribus implet, nobisque mala consilia inspirat, actiones vero vetitas commendat & excusat, utque eas committamus, suadet. Verbum Dei de corde sumit, ut oblivioni id demus, Luc. VIII, 12. affectus animi & cupiditates carnis excitat, divinas veritates dubias reddit & Deum ipsum apud nos calumniatur.

Hoc experiuntur & pii & impii; *pii*, quatenus eos Deus ex certa eaque sapientissima causa tentationibus diabolicis submittit, 1 Cor. X, 13.

X, 13. Matth. VI, 13. Jac. I, 13. Apoc. II, 10. *impii* vero, quatenus se ipsos petulanter in laqueos & retia Satanæ immittunt. Illi ex viribus gratiæ divinæ repugnant, hi vero desideriis diaboli, sui patris, obsequium præstant, Joh. VIII, 44. Dicitur propterea diabolus efficaciter agere in filiis incredulitatis, Eph. II, 2. quod tamen non mirandum est, quia tales homines diaboli mancipia sunt, 1 Joh. III, 8.

Neutiquam vero diabolus homines ad obsequium cogere potest. Ei enim resistere possumus, 1 Petr. V, 9 Eph. VI, 13. 16. Jac. IV, 7. Homines ipsi in culpa sunt, si mancipia diaboli evadunt. Principiis non obstant, quando a Satana ad peccandum irritantur. Semel si consenserunt & iugo ejus collum suum subjecerunt, facile in deteriora delabuntur ac velut captivi ad ejus voluntatem circumducuntur, 2 Tim. II, 26.

Alter hostis hominum spiritualis, qui eos externe ad peccata actualia incitat, est mundus.

Vox hæc vel omnium rerum terrestrium complexum, quibus homines abuti solent, vel malos homines significat.

In priori sensu *mundus* dici potest *instrumentum diaboli*, in posteriori vero *sponsa diaboli*.

Res mundi præbent hominibus varia objecta, quæ malas propensiones & commotiones ani-

mi excitant. Sunt ista vel decora, vel utilia vel jucunda, quæ omnia ambitioni, avaritiæ & voluptati pastum suppeditant. Admone-
mur propterea, mundo hoc non abuti, 1 Cor. VII, 31. nec ea, quæ in mundo sunt, nimium diligere, quia in eo, qui mundum, h. e. res mundanas, nimium diligit, non dilectio Pa-
tris cœlestis est, 1 Joh. II, 15. Vocatur vero id, quod præcipue ex mundi amore in ho-
mine nascitur, *cupiditas carnis, libido oculorum & fastus vite*, 1 Joh. II, 16.

Mali homines collective *mundus* dicuntur, quia de mundo sunt, mundoque abutuntur, Joh. III, 16. c. XVI, 20. Rom. XII, 2. 1 Cor. VI, 2. 1 Joh. III, 13. Pertinent ad causas peccatorum externas, quatenus partim suadendo, Prov. I, 10. 1 Reg. XI, 3. partim terrendo, Matth. XXVI, 69 - 74. c. X, 28. partim mala exem-
pla præbendo, Sap. IV, 12. 1 Cor. XV, 33. ho-
mines ad peccata incitant.

Mala exempla alias appellantur *scandala*, quæ in *data* & *accepta* distinguuntur.

Scandala data sunt ipsa peccata, quatenus proximo nostro occasionem peccandi dant. Per illa vel a bono abstrahitur proximus, vel ad malum instigatur. Christus *væ!* exclamat super omnes, qui scandalum præbent, Matth. XVIII, 7.

Scandala accepta sunt actiones innocentes, quæ ab hominibus vel insipientibus, vel perversis male intelliguntur & iis propterea offendiculo sunt. Hac ratione Judæi ab ipso Christo scandalum acceperunt, Matth. XIII, 57. Jes. LII, 14. 1 Petr. II, 8. 1 Cor. I, 23. Matth. XI, 6.

C A P U T IV.

D E

SUBJECTO PECCATORUM
ACTUALIUM.

Subjectum peccatorum actualium est quilibet homo, 1 Reg. VIII, 46. Eccl. VII, 21. 1 Joh. I, 8. Rom. III, 23. Ps. XIV, 3. Ps. CXLIII, 2. Prov. XX, 9. Nemo hic excipitur, nisi solus Christus, 1 Petr. II, 22. Joh. VIII, 46. Hebr. VII, 26. 27.

Ipsi *regenti* peccata actualia committunt, Hiob. IV, 18. c. XV, 15. 1 Joh. I, 8. Nec *Maria virgo* ab iis libera fuit, ut ex Luc. II, 44. & Joh. II, 4. patet.

Plura de hac materia diximus in *Libro VI. cap. VI.* ubi de peccati *subjecto in genere* egimus. Hic tantum addimus, quæ adhuc de peccatorum actualium *subjecto quo dicenda* sunt.

Subjectum quo sunt non modo omnes facultates animæ, sed etiam omnia corporis membra & organa.

Facultates animæ plerumque sub nomine *cordis* intelliguntur. Sicut enim cor principium est

est circulationis sanguinis, in qua hominis vita naturalis consistit, Lev. XVII, 14. ita etiam quasi sedes est animæ & omnium ejus facultatum, nec non spirituum vitalium.

Hac de causa *cor* in sacris literis non modo fons omnium peccatorum actualium vocatur, Matth. XII, 34. c. XV, 19. sed ei etiam omnes malæ cupiditates & cogitationes adscribuntur, Ps. XXVIII, 3. Ps. LXII, 11. Prov. XI, 20. c. XVI, 5. Hof. XIII, 6. Luc. XXI, 34. 1 Cor. IV, 5.

Qui igitur a pravis cupiditatibus & cogitationibus, quæ inter actualia omnino peccata numerantur, liber esse vult, Deum rogare debet, ut novum cor ei creet, Ps. LI, 12. Ezech. XXXVI, 26. aut lapideum cor in carneum mutet, Ezech. XI, 19. aut impurum cor purificet per fidem, Act. XV, 9.

Si Deus ab homine postulat, ut sibi cor det, Prov. XXIII, 26. nil aliud desiderat, quam quod homo suas animæ facultates ita sanctificet, ut nec cupiditatibus, nec cogitationibus, nec ratiociniis aut præjudiciis suis contra eum peccet.

Ad *subjectum* quo pertinent etiam respectu peccatorum actualium *organa* & *membra corporis* nostri. Huc spectant non modo manus, pedes, labia & alia membra corporis externa, sed etiam organa sensuum, e. g. oculi, aures, lingua, gula & quæ intra corpus dantur viscera. Hæc omnia sunt quasi instrumenta, quibus actualia peccata tam verbis quam factis committuntur.

Admo-

Admonemur propterea, membra nostra non dare in arma nequitiae, Rom. VI, 12. 1 Cor. VI, 15. sed ea potius quovis modo refrenare & ad præstanda officia Christianismi adhibere. Paulus, qui hoc nominat *sacrificium spirituale*, Rom. XII, 1. in hoc nobis exemplo est, quando fatetur, se corpus suum *ὑποπιάζειν* & *δεδραγωγῆν*, h. e. valde affligere & in servitutem redigere, 1 Cor. IX, 27.

CAPUT V.

DE

DISCRIMINE PECCATORUM
ACTUALIUM.

Peccata actualia varia modo distinguuntur.

Respectu *causæ efficientis* dividuntur in *peccata voluntaria* & *involuntaria*. Priora, quæ vel *regnantia* vel *non regnantia* sunt, vocantur etiam *proæretica*, nec non peccata malitiæ, quia sponte & voluntarie aut ex dominante consuetudine committuntur, posteriora vero ea sunt, quæ non libenter, sed ex ignorantia, infirmitate & præcipitantia patrantur.

Respectu *causæ materialis* dividuntur in *peccata commissionis* & *omissionis*. Illa consistunt in actibus positivis, hæc vero in neglectione aut omissione officiorum. Plerumque in omni peccato actuali omissio & commissio conjunctæ sunt. Malum enim agendo semper bonum

omittitur: hinc nuda boni omissio jure meritoque inter peccata numeratur, Jac. IV, 17. Interim fit a potiori denominatio.

Respectu *objecti* dividuntur in *peccata contra Deum, contra proximum & contra semet ipsum*.

Priora sunt, quibus Deus directe & immediate offenditur, posteriora vero, quæ vel contra proximum vel semetipsum homo committit, cujus generis sunt scortatio, 1 Cor. VI, 18. ebrietas & *αὐτοχρεια*.

Respectu *gravitatis* dividuntur in *peccata clamantia & non - clamantia*. Peccata clamantia sunt, quæ tacentibus hominibus ipsam quasi implorant Dei vindictam & propterea a Deo plerumque etiam in hac vita puniuntur. Huc spectant 1) effusio innocentis sanguinis, Gen. IV, 10. 2) oppressio miserarum personarum, Exod. III, 7 sq. c. XXII, 22 - 27. 3) denegatio mercedis promeritæ, Jac. V, 4. & 4) scelera Sodomitica, Gen. XVIII, 20. quæ ob turpitudinem *muta* vocantur *peccata*, Sap. XIV, 26. quia sine pudore nec nominari nec describi possunt. Continentur omnia hæc peccata in hisce verbis:

*Clamitat ad cælum vox sanguinis & Sodomorum,
Vox oppressorum, merces detenta laborum.*

Respectu *gradus* dividuntur in *peccata cordis, oris & operis*, quorum priora cupiditatibus & cogitationibus, altera verbis & ultima factis committuntur, Matth. XV, 19.

Re-

Respectu effectus dividuntur in peccata mortalia & venialia. Mortalia sunt, quæ Deus hominibus imputat & morte æterna punire vult, venialia vero, quæ Deus ex singulari gratia fidelibus, ut infra docebimus, non imputat, sed eorum veniam dat. Per se omnia peccata remissibilia sunt poenitentibus peccatoribus, excepto solo peccato in Spiritum S. de quo infra agetur.

Respectu subjecti dividuntur in peccata propria & aliena, quæ ultima ea sunt, in quibus homo tanquam causa moralis concurrit. Dicuntur alias peccata participationis, 1 Tim. V, 22. 2 Joh. v. 11. Fiunt vel agendo, vel omittendo. Agendo fiunt secundum versum hunc:

Consulo, precipio, consentio, provooco, laudo.

Omittendo vero committuntur secundum hocce versus:

Non retego culpam, non punio, non reprehendo,

Non obsto, sed contribuo & defendo aliena.

Pontificii distinguunt peccata, in ea, quæ sunt contra legem, & ea, quæ sunt præter legem. Posteriora habent pro peccatis venialibus. Sed distinctio hæc nullo nititur fundamento, quia forma omnis peccati in transgressione legis consistit.

GRADIBUS PECCATORUM
ACTUALIUM.

Peccata actualia non sunt equalia, sed se invicem gravitate antecedunt, Matth. VII, 3-5. Joh. XIX, 11.

Gravitas peccati dependet non solum a qualitate ipsius peccati, respectu ἀνομίας & ἀποστασίας, sed etiam a qualitate tam subjecti, quam objecti, nec non a circumstantiis & causis, quæ peccati qualitatem variant, ejusque gravitatem modo augment, modo minuunt.

Minori gradu peccat, qui de voluntate Dei parum novit, aut majorem peccandi instinctum & occasionem habet, minorique resistendi gratia gaudet, quam qui voluntatem Dei bene novit, ad peccandum non instigatur & gratia Dei ad resistendum largiter præditus est. Cui enim multum datum est, ab eo etiam multum postulatur, Luc. XII, 47. 48.

Augetur etiam gravitas peccati, si per istud simul aliis scandalum datur, quia sic plures in eadem peccata ruunt, Matth. XVIII, 6.

Generatio peccatorum actualium secundum Jacobum c. I, 14. 15. per sequentes fieri solet gradus.

Radix est ἰδία ἐπιθυμία s. ipsa prava concupiscentia, alias πάθος dicta, unde παθήματα oriuntur.

Con-

Concupiscentiam hanc sequitur 1) τὸ πειράζειν, s. primum incitamentum ad malum, 2) τὸ δολεάζειν, quando illecebris carnis dictamen rationis obturatur, 3) τὸ ἐξελεκεῖν, quando voluntas captiva ducitur, 4) τὸ συλλαμβάνειν, quando malum proponitur, & 5) τὸ τίκτειν, quando malum peragitur.

Ex peractione mali operis plerumque oritur peccandi consuetudo, inde venit peccati excusatio, hinc ejus defensio, postea peccatoris obstinatio, tunc peccati gloriatio, deinde sensus reprobus & tandem cordis obduratio, quæ summus peccati actualis gradus est.

C A P U T VII.

D E

P E C C A T I S M O R T A L I B U S
E T V E N I A L I B U S.

Peccata mortalia nomen habent a morte, quæ peccati ordinaria pœna est, Rom. V, 12. c. VI, 23.

Comprehendit autem vox hæc omne malum, quod Deus tanquam pœnam peccatoribus imposuit. Exinde patet, peccatum mortale ejusmodi peccatum esse, quod pœnam Dei importat. Quicquid igitur ab homine irrogenito & extra statum gratiæ vivente contra legem Dei vel concupiscitur, vel cogitatur, vel dicitur, vel peragitur, peccatum mortale est, seu ejusmodi

modi peccatum, quod hominem morte æterna dignum reddit, Rom. VIII, 13. Gal. VI, 8. Joh. VIII, 24.

Huc referenda sunt non modo peccata clamantia & regnantia, quæ *manifesta opera carnis*, Gal. V, 19. & *opera diaboli*, 1 Joh. III, 8. Eph. II, 2. Joh. VIII, 44. nuncupantur, sed generatim omnia peccata voluntaria & quicquid libenter & studiose contra legem Dei committitur. Ipsa peccata omissionis inter mortalia numerantur, Jer. XLVIII, 10. Neque hic excluduntur errores extantiores circa fundamentum fidei & ordinem salutis, Gal. V, 4. 1 Tim. IV, 1. 2 Tim. II, 18.

Subjectum peccatorum mortalium proprie sunt omnes impii & irrogeniti, qui non in statu gratiæ vivunt. Omnis enim transgressio legis divinæ iis est peccatum mortale, Rom. XIV, 23. 1 Joh. III, 8. 9.

Committunt impii interdum quidem etiam peccata involuntaria. Quia vero sub dominio peccati sunt, omnes eorum actiones malæ, etsi non semper cum pleno voluntatis consensu fiant, inter peccata mortalia referuntur.

Pii & regeniti quotidie etiam in periculo sunt, in peccata mortalia ruendi, si non in statu renovationis & in quotidiana poenitentia vivunt.

Peccata venialia proprie sunt ea peccata, quæ Deus regenitis, qua talibus, non imputat. Nomen habent a *venia*, quia Deus eorum veniam dat.

Per

Per se non datur peccatum veniale, sed propter meritum Christi fide apprehensum ea peccata sic nominantur, quæ ex imbecillitate carnis committuntur ab iis, qui in statu gratiæ & quotidiana poenitentia vivunt, Rom. VIII, 1.

Pontificii varia peccata per se venialia esse contendunt, & quidem 1) verba otiosa, 2) quicquid ex præcipitania committitur, 3) motus peccati secundo-primi, & 4) furta rerum nimis exiguarum, e. g. unius oboli, acidulæ &c. Sed ex 1 Joh. III, 4. c. V, 17. Matth. V, 18. c. XII, 36. Gal. III, 10. Ps. XIX, 13. facile refutari possunt Pontificii.

Nec ignorantia invincibilis, nec somnus peccata nostra reddere potest venialia, nisi in statu gratiæ versamur. Coram Deo enim omnis ἀνομία damnabilis est.

Calviniani distinguunt inter peccata electorum & reproborum. Illa omnia nominant venialia, hæc vero mortalia, quod autem cum divina veritate & sanctitate valde pugnat.

Certa peccata Deus quidem ad tempus tolerat, quæ tamen non propterea venialia dicenda sunt. Ex occulta sapientia id facit. Sic Deus Act. XVII, 30. ὑπερὶ πάντων τῆς χρόνης τῆς ἀγνοίας, s. dissimulans dicitur, quasi non videat tempora ignorantiae.

STATU EXCOECATIONIS
ET INDURATIONIS.

E*xcœcatio & induratio* sunt consequens peccatorum actualium. Prior ad intellectum & posterior ad voluntatem spectat. A naturali cœcitate & duritie cordis distingui debent, quæ ad proprietates peccati originalis pertinent.

Excœcatio & induratio plerumque secum conjunctæ sunt. Oriuntur ex dominio peccati contemptis gratiæ mediis & Spiritus S. admonitionibus internis. In iis itaque hominibus dantur, qui quidem in ecclesia vivunt & veritatis divinæ cognitione gaudent, sed ob scelerosam vitam sui ipsius omniumque officiorum & quæ sibi saluti sint, obliviscuntur.

Intellectus ejusmodi hominis amittit sensum veri & falsi, cœcusque quasi redditur ad cognoscendum & credendum, quæ verbum Dei docet, *voluntas* vero ejus in tantam perversitatem ducitur, ut prudens sciensque ad interitum ruat & suæ salutis nullam curam habeat. Cor ita indurefcit, ut non amplius exhortationi locum det. Exemplo sunt Judæi temporibus Christi, Luc. XIX, 42. 44. c. VII, 30. Act. XIII, 46. Tribuit scriptura ejusmodi hominibus frontem æneam, cervicem ferream & faciem

faciem lapideam, Jes. XLVIII, 4. Jer. V, 3. Ezech. III, 7.

Talis *induratio* cordi adscribitur, Ezech. XI, 19. *excœcatio* vero animo, cui propterea oculi tribuuntur, Eph. I, 18. Pf. XIII, 4. Constituunt statum, qui homines ad peccatum in Spiritum S. ducit.

Causa hujus miseri status proxima est ipse homo, Gen. VI, 3. Pf. XCV, 8. Mich. VI, 8. Hof. XIII, 9. Prov. I, 24. 25. remotior vero diabolus, 2 Cor. IV, 4. neutiquam vero Deus, etsi interdum dicatur cor hominis indurare, Jes. VI, 10. 11. Exod. IV, 21. Rom. IX, 18. quod tamen non ad luendam pœnam æternam, sed tantum temporalem fit, ut suo loco pluribus ostendemus.

Concurrit autem Deus ad statum excœcationis & indurationis non aliter, quam judex, & quidem 1) per justam permissionem, quæ vocatur traditio in sensum reprobum, Rom. I, 28. & in pravas cupiditates, v. 24. 26. & 2) per subtractionem gratiæ resipiscendi, Pf. LXIX, 28. Sap. I, 5. Theologi ansam inde sumserunt, de Deo dicendi, quod peccata peccatis puniat, ut ex 2 Thess. II, 10-12. Ezech. XIV, 9. Jes. X, 5. 6. probatur.

Effectus excœcationis & obdurationis sunt, quod talis homo 1) apertis oculis non videat & apertis auribus non auscultet, Matth. XIII, 14. 2) divinis promissionibus aut commina-

tionibus non credat, sed utrasque ludibrio habeat, Jes. LIII, 1. Joh. XII, 37. Jer. V, 11-13. c. XX, 8. 3) perversa judicia de rebus spiritualibus ferat, Act. XVII, 32. 1 Sam. II, 17. 4) veritatis hostem se præbeat, Matth. XXIII, 34. Joh. XV, 20. c. XVI, 2. & 5) in suam propriam perniciem currat, Jes. XIX, 13. 14. Hiob. XII, 24. 25.

CAPUT IX.

DE

PECCATO IN SPIRITUM S.

Multum de hoc peccato inter Theologos disputatum est, quia ejus irremissibilitas cum gratia Dei universali pugnare videtur.

Loca Scripturæ S. præcipua, quæ de peccato in Spiritum S. agunt, sunt: Matth. XII, 31. 32. Marc. III, 29. & Luc. XII, 10. Hisce addi possunt: Hebr. VI, 4-6. 1 Joh. V, 16.

Ex his locis patet, 1) quod peccatum hoc contra Spiritum S. committatur, 2) quod in blasphemia consistat, 3) quod pejus sit crimen, quam blasphemia Filii Dei, 4) quod blasphemia Phariseorum propter expulsionem mali dæmonis occasionem dederit Christo, de peccato in Spiritum S. loquendi, 5) quod inter omnia peccata unicum sit, quod non remittatur, & denique 6) quod sit peccatum summe

summe mortale, pro quo non deprecari debeamus.

Optimam clavem ad cognoscendum genuinum sensum verborum Christi, de peccato in Spiritum S. loquentis, suppeditat locus ad Hebr. VI, 4-6. ubi de iis, qui semel illuminati sunt, & dona cœlestia gustaverunt, nec non participes facti sunt Spiritus S. & gratiosum Dei verbum facultatesque futuri seculi gustaverunt, docetur, quod, si iterum prolabantur in peccata proæretica & Filium Dei de novo crucifigant ignominiaque exponant, impossibile iis sit, ad pœnitentiam reduci.

Dictum hoc biblicum de peccato in Spiritum S. omnino agere, nemo negabit, qui perpendit, quod præter hoc peccatum non detur aliud, quod irremissibile sit, Matth. XII, 31. Marc. III, 28. Cum igitur in hoc loco asseratur, peccatores malitiose relapsos & merito Christi repugnantes non ad agendam pœnitentiam iterum excitari posse, satis patet, causam irremissibilitatis non in Deo, sed in peccati indole, quatenus illud gratiæ Dei convertenti & mediis ejus per se contrarium est, quærendam esse.

Committitur enim peccatum hoc contra officium Spiritus S. quod circa media gratiæ & conversionis versatur, & quidem ex malitia, non vero ex infirmitate.

Qui abnegat agnitam fidem salvificam, aut coram magistratu deliberato animo perjurium

facit, peccato quidem in Spiritum S. proximus est, non tamen reipsa istud per ejusmodi facinora committit. Possunt enim illa crimina ex metu periculi & cum proposito resipiscendi fieri, quapropter iis, qui taliter peccant, non per se præcluditur via ad pœnitentiam.

Cum Pharisæis aliter comparatum erat. Hi enim Spiritus S. opera miraculosa, quibus ad fidem salvificam perducere debebant, diabolo ejusque operationi adscribebant, Marc. III, 30. Hoc modo se ipsos destituebant occasione, verum Messiam, sine quo non datur salus æterna, cognoscendi & in eum credendi.

Jure meritoque hinc Christus eorum blasphemiam in Spiritum S. *peccatum irremissibile* dicere poterat, cum cordium eorum naturam & indurationem optime cognosceret, Joh. II, 25. Matth. IX, 4.

Hac cognitione vero cum nemo gaudeat, de nullo quoque peccatore judicare possumus, eum contra Spiritum S. peccasse, etsi quilibet sibi sollicitè cavere debeat, ne in ejusmodi horribile ruat crimen, in quod multi pro dolor! jam delapsi sunt, de quibus nemo id judicavit.

Finalis incredulitas neutiquam ad proprietates hujus peccati pertinet, alias omne peccatum, cujus remissio per veram pœnitentiam non ante mortem impetratur, peccatum in Spiritum S. dicendum foret. Finalis incredulitas igitur non ad formam hujus peccati pertinet, sed tantum

tantum consequens ejus est. Propter hoc consequens autem peccatum in Spiritum S. non ab aliis peccatis, quatenus irremissibile dicitur, differt, sed quia per se & per naturam suam irremissibile est.

Hæc *irremissibilitas* vero non ex parte Dei, sed tantum ex parte hominis huic peccato tribuitur. Non enim pœnitentiam agere & gratiam Dei meritumque Christi sibi applicare potest homo, qui istud committit.

Optime igitur describi potest peccatum hoc, quod in totali Spiritus S. omniumque ejus in convertendis hominibus operationum, quas jam sensimus, abnegatione consistat & propterea per se irremissibile fit.



LIBER VII.

D E

CHRISTO.

Doctrina de Christo est præcipua inter omnes, quas Evangelium docet, quia Christus non modo nucleus totius Scripturæ S. est, Act. X, 43. sed etiam unicum fundamentum fidei & salutis, Act. IV, 12. Joh. XVII, 3. c. XX, 31.

Rectissime hinc doctrina hæc vocatur ὁμολογουμένως μέγα μυστήριον τῆς εὐσεβείας, h. e. ejusmodi christianæ religionis mysterium, cu-

jus magnitudo apud omnes homines in confesso est, 1 Tim. III, 16. Plena enim est tota hæc doctrina rerum arcanarum & intellectum humanum superantium, continetque fundamentum totius christianæ religionis. Ipsi angeli ad istud intelligendum παρακύψαι, h. e. incurvare se & proclinato quasi capite in istud intropicere dicuntur, 1 Petr. I, 12.

Hominibus non nisi per revelationem divinam innotescit, Matth. XVI, 17. Necessitas quidem mediatoris inter Deum & hominem facile cognosci potest ab omni, qui corruptionem naturæ humanæ intelligit, sed qualis is esse debeat, quis fuerit, & quomodo officio suo mediatorio satisfecerit, in æternum absconditum mansisset, nisi Deus per verbum suum id nobis revelasset.

Quicquid igitur de doctrina hac in ecclesia docetur & discitur, ex Scriptura S. hauriendum est, quæ fons est omnis divinæ veritatis.

Potest autem hæc doctrina commodissime dispesci in *quatuor Sectiones*, quarum *prima* de *Persona*, *altera* de *duplici statu*, *tertia* de *triplici officio* & *quarta* de *ipsa redemptione Christi* agit.



SECTIO



S E C T I O I.

D E

P E R S O N A C H R I S T I.

C A P U T I.

D E

P E R S O N A C H R I S T I I N G E N E R E
E T E J U S M I S S I O N E.

Christus vera quidem, sed prorsus *singularis* persona est. Non modo enim est verus homo, sed etiam Dei filius & consequenter verus Deus ipse, 1 Joh. V, 20.

Non ab æterno fuit Christus, qua talis, etsi respectu divinæ naturæ omnino *æternus* dicendus sit, Joh. I, 1. 2. 1 Joh. I, 1. 2. Missus potius est a Patre in tempore, Gal. IV, 4. Jes. XLVIII, 16. c. LXI, 1. Rom. VIII, 3. secundum promissionem, quæ statim post lapsum hominum in paradiso facta est, Gen. III, 15.

Commovit autem Deum ad hanc missionem Filii sui 1) miseriæ humanæ consideratio, Luc. I, 78. Ezech. XVI, 5. 6. Jer. XI, 20. Ps. XLIX, 8. 9. b) inexhausta Dei dilectio, Joh. III, 16. Rom. V, 8. & c) divinæ gloriæ manifestatio, Joh. XVII, 6. 2 Tim. I, 10. Joh. I, 18.

Missio Christi non separationem a Patre involvit. Mansit enim secundum divinam naturam in cœlo & in sinu Patris, sicut ante incarnationem ibi fuit, Joh. I, 1. 18. c. III, 13. Nec per incarnationem inferior factus est Patre suo, quia non modo ultro & libenter, Ps. XL, 8. sed etiam ad certum tempus Joh. XIII, 1. missionem hanc in se suscepit.

In media vero mundi ætate mitti voluit, ut significaret, efficaciam redemptionis tam super præterita, quam futura tempora æquali virtute se extendere.

Missionem sequitur *adventus*. Hinc Christus in mundum & in carnem venisse dicitur, 1 Joh. IV, 2. 3. 1 Tim. I, 15. Ipse de se fatetur: *Exii a Patre & veni in mundum*, Joh. XVI, 28. Vocabatur propterea ὁ ἐρχόμενος, i. e. qui venturus erat, Matth. XI, 3.

Triplex adventus tribuitur Christo. *Primus* factus est *in carnem & mundum*, de quo h. l. agitur, *alter* fit *in cor hominum* & est spiritualis, Joh. XIV, 23. & *tertius* fiet *ad judicium*, scilicet die extremo, Luc. XXI, 27. Act. I, 11. Apoc. XXII, 12.

Primus & præcipuus Christi adventus est *eius manifestatio in carne*. Facta est non ex alia ratione, quam ut nos redimeret & salvaret, Matth. XVIII, 11. 1 Tim. I, 15. Gal. IV, 4. Jes. LXI, 1 sq.

Hunc ut pertingeret finem, necesse erat, ut duas in sua persona conjungeret naturas, seque
exina-

exinaniret & omne id præstaret, quod officium mediatorium requirebat.

Maximum mysterium est *unio duarum diversarum naturarum* in ejus persona. Hoc ut contra hostes evangelicæ veritatis eo melius defendere possimus, pluribus de hac unione personali in sequentibus capitibus acturi sumus, si antea demonstravimus, quod Jesus Nazarenus omnino verus fuerit Christus.

C A P U T II.

D E

JESU NAZARENO, QUOD VERUS FUERIT MESSIAS S. CHRISTUS.

Christum in persona *Jesu Nazareni* vere venisse in mundum, nemo magis negat, quam gens cæca Judæorum, cui tamen non modo specialiter a Deo promissus, sed etiam ex ejus regia stirpe progenitus, nec non in ejusdem salutem præcipue missus est.

Omnes de Christo promissiones, quæ in V. T. factæ sunt, quadrant in personam Jesu, qui non modo secundum genealogiam Matthæi c. I & Lucæ c. III, ex lumbis patriarcharum & regum Israeliticorum ortus est, sed etiam promissiones V. T. de matre, patria & tempore Christi implevit.

Sunt autem *promissiones de Christo* ita factæ, ut quasi per gradus manifestent circumstantias de ejus persona. Horum graduum sunt *sedecim*, qui in tot promissionibus continentur.

Prima promissio est protevangelium in paradiso, Gen. III, 15. ubi generaliter redemptor generis humani promittitur. *Altera* occurrit Gen. V, 29. ubi indicatur, quod Christus venturus sit ex stirpe Noachi. *Tertia* est promissio de femine Abrahami, Gen. XII, 3. Isaaci, c. XVIII, 18. c. XXVI, 4. & Jacobi, c. XXVIII, 14. *Quarta* est promissio de Schilo ex femine Judæ, Gen. XLIX, 10. *quinta* agit de femine Davidis, 2 Sam. VII, 12. Jes. XI, 1. Jer. XXIII, 5. *sexta* de matre Christi, Jes. VII, 14. Jer. XXXI, 22. *septima* de ejus patria, Mich. V, 1. *octava* de nativitate ejus, Jes. XI, 6. *nona* de tempore adventus ejus, Dan. IX, 24. *decima* de gloria secundi templi, Hagg. II, 8. *undecima* de ejus præcurfore, Jes. XL, 3. Mal. III, 1. *duodecima* de ejus unctione, Ps. XLV, 8. Jes. LXI, 1. *decima tertia* de ejus officio & quidem a) prophetico, Deut. XVIII, 18. 19. Jes. LXI, 1. 2. b) sacerdotali, Ps. CX, 4. Zach. VI, 12. 13. & c) regio, 2 Sam. VII, 13. Jes. IX, 7. Jer. XXIII, 5. 6. Zach. IX, 9. *decima quarta* de ejus passione & morte, Ps. XXII, 7-9. 13-19. Jes. LIII, 4-12. *decima quinta* de ejus resurrectione, Ps. XVI, 10. Jon. II, 1. coll. Matth. XII, 39. 40. & *decima sexta* de adscensione ejus
in

in cœlos & sessione ad dextram Patris, Psalm. XLVII, 6. Ps. CX, 1.

Omnes has promissiones Jesus implevit, uti ex scriptis N. T. satis cognosci potest. Inprimis Johannes evangelium suum in eum finem scripsit, ut credamus, Jesum fuisse Christum, Filium Dei, & quod per fidem in nomine ejus vitam æternam habeamus, Joh. XX, 31.

Christum autem vere venisse in mundum contra hodiernos Judæos exinde probatur, quod 1) sceptrum de Juda jam dudum ablatum sit, Gen. XLIX, 10. 2) LXX hebdomades Danielis c. IX, 24. completæ sint, 3) templum secundum Hagg. II, 8. jam dudum destructum sit, 4) urbs Bethlehem Mich. V, 1. non amplius extet, 5) tribus Israelis non amplius distinctæ & genealogiæ totius populi perditæ sint, & 6) sacerdotium & sacrificia jam prorsus cessaverint, Dan. IX, 27.

C A P U T III.

D E

CHRISTI DUPLICI NATURA IN
GENERE.

N*atura* vox a *nascendo* originem habet. Significat principium activum, substantiæ essentialiter inhærens.

Qualibet substantia suam habet naturam, s. principium activum, sibi essentialiter inhærens, quod

quod omnium ejus motuum & operationum, ei convenientium, causa est. Hac ratione non solum omne animal & omnis planta, sed etiam omnis homo suam *naturam* habet.

Certo modo etiam *Deo* tribuitur natura, quatenus in ipso datur principium operandi, ad essentiam ejus imperscrutabilem pertinens.

Res itaque summe miraculosa & omnem humanum intellectum transcendens est, quod *Christus* ex duabus constet naturis, infinite diversis. Datur ex hac causa duplex in eo quasi principium activum operandi, per se quidem infinite diversum, in una tamen substantia harmonice operans.

Occasionem hoc dedit *Nestorio* & *Eutychi*, quorum uterque Seculo V. vixit, doctrinam de persona Christi ejusque duplici natura valde corrumpendi. Prior negavit, Mariam dici posse Θεοτόκον, & posterior docuit, humanam Christi naturam a divinitate ejus absorptam esse. Orta exinde est in ecclesia duplex hæresis, quæ adhuc sub nomine *Nestorianismi* & *Eutychianismi* in terris Asiaticis grassatur. Secundum *Nestorianismum* docetur, Christum ex duabus constare personis, & secundum *Eutychianismum*, in ipso unam duntaxat dari naturam.

Operæ igitur pretium est, de naturis Christi pluribus agere, ne istas inter se confundamus.

Persona & *natura* valde inter se differunt. *Persona* est ens per se subsistens, propriamque individualitatem habens, *natura* autem est principium

cipium activum, personæ s. substantiæ inhærens.

Patres ecclesiæ Græcæ οὐσίαν, Φύσιν & μορφήν pro synonymis habuerunt, sed non satis accurate, etsi ex sacris literis eorum synonymia quodammodo pateat. Φύσις enim indicat proprietates naturales & essentielles, μορφή vero accidentia, naturam sequentia. Non igitur hæ voces de divinitate Christi commode usurpari possunt.

Christum ex una tantum persona constare, ex 1 Tim. II, 5. Eph. V, 5. & 1 Cor. VIII, 6. satis probari potest.

Si autem dicimus, Christi *personam* duas habere *naturas*, divinam & humanam, idem est, ac si dicamus, in Christo duo esse diversa principia activa, scilicet divinum & humanum, quæ tamen arctissime inter se conjuncta sunt, ita, ut ad unum scopum harmonice tendant, conjunctimque unicum tantum individuum constituent. Cognosci id licet ex duplici voluntate Christi, quam in agonia sua, Luc. XXII, 42. Joh. XII, 27. demonstravit.

Humana Christi natura non per se est persona, sed quatenus conjuncta est cum divina natura, qua de causa non completam, sed incompletam substantiam habet. Illustrari potest simili, ab anima vel corpore hominis desumpto.

Aliter autem comparatum est cum *divina Christi natura*. Hæc propriam suam substantiam & personalitatem habet, & quidem sine respectu

respectu ad humanam ejus naturam. Secundum divinam enim naturam Christus Filius Dei est, & consequenter secunda SS. Trinitatis persona. Interim recte humanitas Christi in persona τοῦ λόγου subsistere dicitur.

De Christi *divina natura* non opus est, hic multa proferre, cum hoc jam supra *Lib. II c. VI.* satis probatum sit, Jesum fuisse filium Dei, atque adeo verum Deum, quapropter hic tantum de ejus incarnatione & duarum naturarum communione & communicatione acturi sumus, postquam de humana Christi natura adhuc aliqua in specie dixerimus.

CAPUT IV.

DE

CHRISTI HUMANA NATURA IN SPECIE.

Christum verum esse hominem, *Marcionita* & *Schematici* olim negarunt, docentes, eum non verum humanum corpus habuisse, sed tantum schema s. *Φάντασμα*. Neutiquam autem iis patrocinantur loca Rom. VIII, 3. & Phil. II, 7. quia in istis non ad ipsam carnem s. corpus, sed ad accidentia ejus s. infirmitates respicitur.

Requirebatur omnino ad salvandos homines ejusmodi redemptor, qui non modo legi divinæ obnoxius esse, eique satisfacere, sed etiam
peccata

peccata hominum in se suscipere, pro iis pati & mori, nec non sanguinem effundere queat. Si igitur Christus non verus fuisset homo, nequiquam quoque nos salvare aut redimere potuisset.

Sunt autem multo pauciores, qui Christi humanitatem in dubium vocant, quam qui ejus divinitatem negant. Tota enim Scriptura S. plena est testimoniorum de *vera Christi humanitate*. Legimus enim in ea, quod ex semine mulieris genitus, Gen. III, 15. Matth. I, 18. 20. Luc. I, 42. & tanquam tenerrimus infans in lucem editus, Luc. II, 7. 12. octavoque post nativitatem die circumcissus, Luc. II, 21. & a parentibus postea educatus sit, Luc. II, 40. 51. 52. Legimus porro, quod ederet & hiberit, Matth. XI, 19. nec non dormiverit, c. VIII, 24. Legimus, eum esurivisse, Matth. IV, 2. Marc. XI, 12. sitivisse, Joh. IV, 7. c. XIX, 28. & lacrymasse, Luc. XIX, 41. Joh. XI, 35. nec non itineribus fatigatum, Joh. IV, 6. & super instantem suam mortem contristatum esse, c. XII, 12. imo dolores sensisse, Jes. LIII, 4. c. XLIII, 44. Ps. XL, 13. sanguinem effudisse, Matth. XXVI, 28. Joh. XIX, 34. & denique animam emisisse, Luc. XXIII, 46. quæ omnia sunt signa veræ humanitatis.

Huc spectat etiam ejus *genealogia*, Matth. I, 1-16. & Luc. III, 23-38. cujus harmoniam multi Theologi satis demonstraverunt. Ortus hinc dicitur ex patribus secundum carnem, Rom.

Rom. IX, 5. numeraturque inter posteros Adami, Luc. III, 38. in cujus lumbis latuit a tempore primæ promissionis, Gen. III, 15. Vocatur etiam propterea *semen Abrahamæ*, Gal. III, 16. *virga de stirpe Isai & surculus ex ejus radice*, Jes. XI, 1. nec non *germen Davidis*, Jer. XXXIII, 15. ejusdemque *filius*, Luc. I, 32. Matth. XII, 23.

Sicut omnis homo ex corpore organico & anima constat, ita etiam Christus utroque præditus fuit. *Corpus ejus organicum* supra satis descriptum est. Christus ipse comparavit istud cum templo destructibili, Joh. II, 19. 21. Habebat carnem & sanguinem, Hebr. II, 14. ossa, Joh. XIX, 33. Luc. XXIV, 39. Ps. XXII, 18. manus, pedes, os, oculos, aures, caput & omnia alia humani corporis membra & organa.

Habebat etiam veram *humanam animam*. Matth. XXVI, 38. Luc. XXIII, 46. quapropter ei tam intellectus humanus, Luc. II, 52. quam voluntas humana, Matth. XXVI, 39. Luc. XXII, 42. tribuitur. Erat quoque non sine affectibus humanis, e. g. ira, Marc. III, 5. lætitia, Luc. X, 21. tristitia, Joh. XII, 27. Matth. XXVI, 38. zelo, Luc. XIX, 45. 46. indignatione, Joh. XI, 33. 38. inclinatione, Joh. XI, 3. 36. c. XXI, 20. & cupiditate animi, Luc. XXII, 15.

Errarunt igitur olim *Apollinaristæ*, animam Christi negantes & divinitatem in ejus locum substituentes, quapropter *Ἀψυχῆς* vocati sunt.

Quæri-

Quæritur autem: unde anima Christi originem suam traxerit? Cl. CARPOVIUS in *Theol. Rev. Dogm. T. II. p. 128 sq.* omnem lapidem movet, ut evincat, animam Christi immediate a Deo, cum stamina corporis ejus miraculose produxerit, creatam esse. Provocat ad Jer. XXXI, 22. ubi de conceptione Christi dicatur, quod novum creaturus sit Deus in terra, dum mulier circumdatura foret virum. At nil aliud ex loco hoc probari potest, quam quod miraculose Christus in utero materno conceptus sit.

Certus *Anglus* in sua *Dissert. Theologica & Critica*, an. 1739. edita ex Joh. VI, 62. c. VIII, 58. c. XVII, 5. Phil. II, 6. 7. demonstrare voluit, animam Christi ante creationem terræ in cœlo præ-existisse, postea vero in corpus ejus, quod ex virgine Maria assumerit, de cœlo descendisse, eamque in principio fuisse puram intelligentiam & gloriosum spiritum, natura angelica ea-que excellentissima præditum. Vide *Supplementa ad Nova Acta Erudit. T. V. p. 259 sq.* Sed ex allegatis locis biblicis nil amplius probatur, quam quod Christus respectu divinæ naturæ ante conditum mundum jam extiterit.

Omnes orthodoxi ecclesiæ nostræ Theologi docent, animam Christi per *traducem* in Maria Virgine productam esse eo momento, quo caro s. corpus conceptum est. Quod enim Christus non assumpsit, non redemit, Hebr. II, 16-18.

Interim Christi humana natura non modo in genere certis proprietatibus & prærogativis

prædita erat, sed etiam tam respectu animæ quam corporis singulari gaudebat excellentia.

Prærogativæ humanæ Christi naturæ sunt ἀναμαρτησία & ἐνυποστασία.

Ἀναμαρτησία est ea humanæ Christi naturæ proprietas & prærogativa, secundum quam omnis peccati expers fuit, Jes. LIII, 9. Hebr. VII, 26. 2 Cor. V, 21. 1 Petr. II, 22. Joh. VIII, 46. Dan. IX, 24. Luc. I, 35. Duplex autem datur *ἀναμαρτησία*, nempe inhæfiva & imputativa. Prior in Christum competit, non vero posterior, Joh. I, 29. Ps. XL, 13. Jes. LIII, 6. 2 Cor. V, 21.

Ἐνυποστασία illa est proprietas & prærogativa naturæ Christi humanæ, secundum quam in altera hypostasi, scilicet ἐν τῷ λόγῳ, subsistit, Joh. I, 14. Illustrari potest simili a furculo desumpto, qui arbori alius generis implantatur. Etsi ambæ arbores alias per se subsistant, per implantationem tamen amittit una ex iis propriam suam individualitatem.

Gaudebat quoque Christi humana natura *singulari excellentia*, tam respectu animæ quam corporis.

Animæ Christi excellentia consistebat in habituali perfectione facultatum suarum, s. in excellentissimis qualitatibus intellectus & voluntatis, Luc. II, 40. 47. 52. Matth. XIII, 54. Ad excellentiam vero corporis ejus pertinebant, 1) *summa εὐχρεασία*, secundum quam optimum & nobilissimum habebat temperamentum naturæ.

turæque complexionem, 2) ἀθανασία, s. *immortalitas*, secundum quam non in se habebat principium mortalitatis: hinc non nisi voluntarie se ad moriendum commisit, Joh. X, 18. & 3) *formæ elegantia*, virum gravem & honestum decente, Pl. XLV, 3. Hanc pulchritudinem hostes ejus tempore passionis & mortis ipsius valde inquinaverunt & polluerunt, Jes. LIII, 2.

Non autem propterea destitutus esse voluit *infirmis* humanis, quæ vel fructus sunt lapsus Adamitici, e. g. esurire, sitire, fatigari, contristari &c. vel non fructus ejus sunt, e. g. edere, bibere, dormire &c. Assumfit Christus eas, 1) ut pati & mori posset pro peccatis nostris, & 2) ut intelligeret miserum hominum statum, quo magis nostrum misereri queat, Hebr. II, 17. 18. c. IV, 15. Excipiuntur autem infirmitates tam personales, e. g. morbi & vitia corporis, quam peccaminosæ, e. g. stimuli carnis.

CAPUT V.

DE

UNIONE DUARUM CHRISTI
NATURARUM.

Utraque *natura*, divina scilicet & humana, ita sunt secum unitæ, ut unicam tantum personam constituent, quæ propterea Θεὸς ὁ ὁμοῦς dicitur. Hic est unicus ille mediator inter

Ff 2 Deum

Deum & homines, de quo Paulus agit, 1 Tim. II, 5.

Est hæc *unio* non naturalis, sed prorsus singularis, quia circa maximum versatur fidei mysterium, 1 Tim. III, 16. Necesse igitur est, ut ita eam describamus, ne in errores Euty-chianorum, Nestorianorum & Calvinianorum incidamus.

Unio sequitur *unionem*. Hæc vero est *actus*, qui præcedit *unionem*, quæ in *statu* consistit.

Unitio naturarum in Christo est *actus* ille divinus, quo divinitas Filii se conjunxit cum humanitate ex Mariæ semine producta.

Divinitas itaque Filii Dei s. τῆ λόγῃ & *humanitas* ex semine Mariæ virginis sanctificato producta, in unam personam coaluerunt.

Hæc *unitio* s. *conjunctio* facta est in ipso incarnationis Christi momento, s. in ipso conceptionis actu.

Tribuitur autem jure meritoque *Deo*, quia opus est ad extra transiens personale, omnibus tribus Deitatis personis commune, hac tamen ratione, ut *Pater* & *Spiritus S.* productam humanitatem cum Filii hypostasi, *Filius* vero cum sui ipsius hypostasi univerint.

Filius igitur Dei s. λόγος ὑποστατικός in infinitam suam hypostasim assumpsit *humanam naturam*, ita, ut hæc propterea nec αὐθυπόστατος s. per se subsistens, nec ἀνυπόστατος, h. e. omni subsistentia cærens, sed ἐνυπόστατος h. e. in alterius hypostasi subsistens, dici queat. Si autem hu-
mana

mana natura in hypostasin τῷ λόγῳ recepta est, ea quoque in consortium sanctissimæ Trinitatis venit.

Actum unionis sequitur *unionis status*, qui in tempore cœpit, & in æternum durat, Hebr. VII, 3. nunquam vero, & ne quidem in morte Christi, cessavit.

Unio hæc dicitur *personalis*, quia non ad Filii Dei essentiam, sed ad ejus personalitatem respectum habet.

Consistit hæc *unio personalis* in arctissima duarum naturarum conjunctione, quæ tamen nullam naturarum commixtionem & confusionem, nec unius in alterius conversionem aut mutationem, nec absorptionem involvit.

Neutiquam igitur *unio naturarum* in Christo dicenda est 1) *essentialis*, quia non in unam essentiam coalescunt, nec 2) *naturalis*, qualis est inter animam & corpus, nec 3) *accidentalis*, qualis est inter corpus & vestem, nec 4) *parastatica*, qualis fuit in V. T. quando Filius Dei formam hominis ad tempus assumpsit, nec denique 5) *moralis*, qualis olim fuit inter Deum & Prophetas.

Exploduntur hinc Nestoriana παραστάσις, Eutychiana σύγχυσις, Monotheletica κεῖσις, Vorstianus influxus, Calvinistica & Jesuitica assistentia & denique ipsa communicatio idiomatum, quatenus pro unionis forma habetur.

Neque hic approbanda est *duplex illa naturarum Christi unio*, quam GEORGIUS SOHNIVS,

Theologus Heidelberg. excogitavit, scil. *mediata & immediata*. Illam descripsit per *unionem personæ τῆς λόγῃ* cum humana natura, hanc vero per *unionem naturæ τῆς λόγῃ* cum humana natura.

Operæ pretium est hic aliqua de Nestorianismo & Eutychianismo addere, quia præcipuæ in hac doctrina hæreses sunt. Uterque originem cepit Seculo V.

Nestorianismus a NESTORIO, Episcopo Constantinopolitano, nomen habet. Hic non quidem aperte & expressis verbis docuit, Christum ex duabus constare personis, at talem tamen fovit doctrinam, ex qua per consequentiam id elici potuit. Mariam non Θεοτόκην vocare voluit, & duas in Christo naturas tantum per παραίτασιν, i. e. per *assistentiam* & quasi per *gestationem humanæ naturæ* unitas esse statuit. Non Deum, sed hominem crucifixum esse docuit. Christum non Deum, sed Θεοφύρον nominavit. Deum tantum in Christo, non Christum ipsum, adorandum esse perhibuit, & carnem Christi, virtutem miracula patrandi, habuisse, negavit. Per ejusmodi locutiones personam Christi divisit, & duas quasi de Christo personas statuit. Refutatus & cum doctrina sua damnatus est Nestorius in Concilio Oecumenico III. quod Imp. Theodosius jun. Ephesi habuit.

Maximus ejus adversarius fuit CYRILLUS ALEXANDRINUS. Hæresis hæc in Orientali ecclesia adhuc floret, in Occidentali vero exspiravit, nisi quod Calviniani & Jesuitæ se aliquo

aliquo modo ejus participes faciunt per *assistentiam* suam, qua naturas Christi unitas esse perhibent.

Eutychianismus nomen habet ab EUTYCHE, Archimandrita Constantinopolitano, qui eodem tempore vixit. Ejusmodi verba in sermonibus & scriptis suis usurpavit, ut Patribus ecclesiæ orthodoxis, unam tantum naturam Christi statuere, visus fuerit. Concedebat quidem, Christum ex duabus naturis genitum esse, sed utramque naturam in unicam quasi ita coaluisse judicabat, ut divinum ejus corpus non nobis consubstantiale, nec nostri generis proprietatibus præditum fuerit. Statuit enim Eutyches, Christum non in duabus, sed ex duabus naturis subsistere, descripsitque unionem naturarum per commixtionem & conversionem. Refutatus & damnatus est Eutyches cum sua doctrina in Concilio Chalcedonensi s. Oecumenico IV. ab Imp. Martino circa medium Seculi V. habito, in quo præcipuus ejus adversarius THEODORETUS, Cyri Episcopus, fuit. Eutychianismum postea amplexi sunt *Monophysitæ, Theopaschitæ & Acephali*. In orientali ecclesia apud *Jacobitas & Armenios* adhuc floret, in occidentali ecclesia vero ex cineribus quasi eum resuscitarunt *Schwenckfeldiani*.

Huc pertinet etiam *Monothelismus*, qui Christo unam tantum voluntatem tribuit. Est iste in Concilio Constantinopolitano III. s. oecumenico VI. condemnatus.

Ad profligandos hosce errores Patres primitivæ ecclesiæ Græcæ olim docuerunt, duas *naturas in Christo unitas* esse, 1) ἀσυχύτως s. *inconfuse*, ut rejiciatur unio per mixtionem, qua, quæ uniuntur, id, quod fuerunt, esse desinunt, dum tertium, quod mixtum vocatur, inde oritur; 2) ἀτρέπτως s. *inconvertibiliter*, ut distinguatur ab ea unione, qua alterutrum uniendorum absorbetur aut in alterum convertitur, & 3) ἀδιαίρετως καὶ ἀχωρίως s. *inseparabiliter* tam respectu temporis, quam respectu loci, ita, ut unio ista arctissima & indissolubilis maneat in æternum, quia nec Deus unquam illam destruere vult, nec aliud quicquam istam destruere potest.

Addimus, Christum secundum utramque naturam *Filium Dei naturalem* dicendum esse. Secundum divinam naturam filius Dei dicendus est naturaliter, secundum humanam vero personaliter. Errant igitur FELIX ORGELLANUS & ELIPANDUS TOLETANUS, qui Christum secundum humanam naturam non naturalem, sed adoptivum Dei filium nominaverunt.

CAPUT VI.

DE

COMMUNICATIONE ET COMMUNIONE NATURARUM IN CHRISTO.

Communicatio & communio naturarum inter se differunt. Illa significat actum, hæc statum.

tum. Illa non est reciproca, hæc vero reciproca. Illa unionem, hæc vero unionem supponit.

Communicatio naturarum in Christo est actus ille divinus, quo factum est, ut humana natura sit Filii Dei & divina natura sit filii hominis natura, Hebr. II, 14. Col. II, 9.

Appellari etiam potest *participatio naturarum*, quæ includit & mutuam possessionem & mutuam usurpationem, ita, ut dici queat Deus incarnatus & caro deificata esse.

Per hanc communicationem naturarum Christus in statum communionis naturarum venit, ita, ut quælibet natura in Christo in æternum particeps facta sit proprietatum alterius naturæ.

Caro Christi itaque divinis gaudet attributis, ita, ut omnipotens, omnipræfens &c. nominari possit.

Hac de causa etiam Christus in miraculis suis plerumque usus est membris corporis sui, e. g. manibus, oculis, digito, saliva &c. Voluit per ejusmodi circumstantias humanitatem suam coram hominibus adorabilem reddere, alias absque iis etiam se miraculosum præstare potuisset.

Theologi ad describendam hanc naturarum Christi communionem adhibent vocem ΠΕΡΙΧΩΡΗΣΙΣ, quæ *penetrationem* aut unius rei in alteram ingressionem significat. De divina natura *active* & de humana *passive* usurpant hanc

vocem, ita, ut *divina natura* penetret & permeet, *humana* vero penetretur & permeetur. Illustratur hæc permeatio simili, ab igne desumpto, quod ferrum penetrat.

Hæc tamen *περιχώρησις* s. permeatio & penetratio non *successive*, nec *extensive* fit. Est spiritualis & indivisibilis, hinc uno actu totam humanam naturam implet, ita, ut divina natura sit non solum tota in tota humana natura, sed etiam tota in qualibet ejus parte. Probat hoc ex Col. II, 9. Quando enim h. l. *πᾶν τὸ πλήρωμα τῆς Θεότητος*, s. *omnis plenitudo Deitatis*, *σωματικῶς* s. *corporaliter in Christo habitare* dicitur, idem est, ac si dicatur, divinam naturam cum omnibus suis perfectionibus ita esse in natura humana, ut hanc nulla parte expertem sui esse permittat, adeoque intime penetret, ut B. BAIERUS in *Compend. Theol. Posit.* p. 464. loquitur.

Περιχώρησις s. permeationem duarum naturarum sumunt Theologi vel *positive* vel *relative*. Si sumunt *positive*, divina natura permeat humanam, non vero reciproce. Si vero hanc vocem *relative* sumunt Theologi, permeatio est reciproca. Divina natura hac ratione humanam profundissime penetrat, sibi que non modo carnem, sed etiam omnia, quæ sunt humanæ naturæ, appropriat, hæc vero ab altera ita inhabitatur, ut ejusdem etiam cum omni plenitudine divinitatis particeps sit, unde recte dici-

dicitur humana natura in κοινωνίαν Θεότητος .f. communionem Deitatis assumpta & recepta esse.

Facit quidem unaquæque Christi natura id, quod suum est, ita tamen, ut altera natura propter unionis vinculum semper participet, sibi-que appropriet ea, quæ alterius naturæ sunt, Matth. IX, 6.

Maximi adversarii in hac doctrina sunt Calviniani, qui non quidem cum Samosatēnianis naturas Christi incommunicabiles nominant, at- tamen de eorum communione ita loquuntur, ut exinde satis cognosci liceat, eos deificationem humanæ Christi naturæ prorsus negare. Et sane propter hos doctrina de communica- tione idiomatum, de qua nunc agemus, præci- pue in ecclesia orta est.

CAPUT VII.

D E

COMMUNICATIONE IDIOMATUM.

Idioma hic omne id significat, quod alterutri naturæ Christi per se proprium est ac in eam competit. Involvit igitur tam attributa, quam accidentia, probaturque ex Col. II, 9. Joh. I, 14.

Communicatio est actus, quo pluribus aliquid commune redditur. Sumitur hic magis pro statu, quam pro actu, quia actus divini ad in- tra

tra nunquam cessant, actusque & status in Deo unum idemque sunt.

Communicatio idiomatum simul cum unitione naturarum facta est, *communio* eorum autem sequitur ex unione naturarum.

Non *communicatio idiomatum* in Christo reciproca est, sed *communio*, quæ tamen nec *exæquativa*, nec *multiplicativa*, nec *transfusiva* dici debet.

Communicatio idiomatum illustrari potest simili, ab *anima* desumpto, quæ suas proprietates communicat cum corpore. Huc spectat etiam *ignis*, vim lucendi & urendi cum ferro communicantis, item *magnes*, qui virtutem, ad polum arcticum se convertendi, lingulæ ferreæ, cui affricatur, communicat, nec non *moschus*, odorem suum cum rebus appositis communicantis.

DAMASCENUS auctor est doctrinæ de communicatione idiomatum, qui *Libr. II. orthod. fid. c. 15.* scripsit: *proprias glorificationes Divinitas cum corpore communicat.*

Impugnant hanc doctrinam *Calviniani*, omnipræsentiam carnis Christi negantes. Opponunt enim, personam esse incommunicabilem. Sed respondemus, 1) personam quidem incommunicabilem esse alteri personæ, non autem alteri naturæ, 2) incommunicabilem esse κατὰ μέθεξιν, non vero κατ' ἐνωσιν, & 3) incommunicabilem esse concrete, quatenus ὑφίστα-
μενον

μενον est, non vero abstractive, quatenus subsistentia est.

Tota hæc doctrina propter *locutiones* de Christo *biblicas & ecclesiasticas* necessaria est, ne istas ita interpretemur, ut Nestorianismus, aut Eutychianismus, aut Calvinianismus, aut alia hæresis inde resultet.

Dictæ locutiones in scholis Theologorum plerumque *propositiones personales* nominantur. Dicuntur alias *prædicationes inusitatæ*, quia non aliud præter hoc datur ens in toto mundo, in quo duo disparata in casu recto proprie de se invicem prædicentur, aut citra manifestam falsitatem de se prædicari possint. Inde non accurate appellantur *accidentales*, quales sunt propositiones *denominativæ*, quæ semper realiter & essentialiter inter se differunt.

Has propositiones in Scriptura S. non quidem totidem verbis expressas legimus, at ex verbis tamen biblicis elici possunt.

Vocantur autem *propositiones personales* eæ, in quibus concretum unius naturæ de concreto alterius naturæ prædicatur.

Concreta naturæ sunt voces, quæ personam Christi secundum alterutram naturam concrete indicant, e. g. Deus, Homo, Filius Dei, Filius hominis, Dominus &c. Harum *abstracta* sunt Divinitas & Humanitas.

Distinguenda sunt concreta naturæ a concretis personæ.

Concreta personæ sunt voces, quæ personam Christi secundum utramque naturam concrete indicant, e. g. Christus, Immanuel, Jesus &c. Horum abstracta sunt *Concreta naturarum*: v. g. Deus, homo, λόγος, filius Mariæ.

Dantur *propositiones*, in quibus de concreto personæ prædicatur concretum alterius aut utriusque naturæ, e. g. *Christus est Deus*, aut *Filius Dei*, item: *Christus est homo* aut *Filius hominis*, nec non: *Christus est Θεάνθρωπος*, h. e. Deus & homo simul.

Hæ propositiones huc quidem referri possunt, sed tamen a *personalibus* recte distinguuntur. B. MENZERUS propterea *Tom. V. Dispp. Giess. Disp. IX. p. 205 & 206.* ita scripsit: *Quando dicitur: Christus est Deus, vel, Christus est homo, non est illa propositio, si exquisitè loquaris, personalis, describens ipsam unionem, sed est descriptio totius personæ compositæ ab altera naturarum.*

Propositiones personales non sunt mere nominales, nec tropicæ & figuratæ, nec paronymicæ, nec mere verbales, nec synonymicæ, aut identicæ, sed reales & propriæ dicendæ. Neutiquam quoque per ἀλλοίωσιν, qualem sermo Bileami Num. XXIII, 10. continet, interpretandæ sunt.

Cum omnia, quæ de Christo prædicari possunt, ad tria referri queant, nempe *ιδιώματα*, s. proprietates, *αὐχήματα* s. dona divina, & *ἀποτελέσματα*, s. actiones officii mediatorii, tria etiam dantur *communicationis idiomatum genera*.

nera. Primum genus agit de *communicatione naturarum*, alterum de *communicatione majestatis divinae* & tertium de *communicatione operationum*.

De singulis hisce generibus nunc plura dicemus.

C A P U T VIII.

D E

PRIMO COMMUNICATIONIS
IDIOMATUM GENERE.

Veteres Theologi hoc genus absolute & κατ' ἐξοχήν *communicationem idiomatum* vocaverunt. Ortis vero controversiis cum Calvinianis, Osiandro, Stancaro, aliisque, plura communicationis genera ad eos refutandos facta sunt.

Primum idiomatum genus est illud, quando ea, quæ Deo ejusque naturæ propria sunt, Christo, qua homini, & quæ homini ejusque naturæ propria sunt, Christo, qua Deo, propter unionem personalem tribuuntur.

Subiectum itaque est concretum alterutrius naturæ Christi & *prædicatum* idioma s. proprium alterius naturæ, determinative, non vero abstractivè sumtum.

Patres Græci primum hoc genus ἀντιδόσιν & τρόπον ἀντιδόσεως appellare solebant, quia omnes huc spectantes propositiones idiomaticæ in hanc unicam, quæ reciproca est, resolvuntur.

solvi possunt: *Deus* (scilicet in Christo) *est homo & homo est Deus.*

Duae autem sunt idiomaticarum primi generis propositionum *species*. Prior est, in quibus *subjectum* concretum divinæ naturæ & *prædicatum* idioma humanæ naturæ, & *posterior*, in quibus *subjectum* concretum humanæ naturæ, & *prædicatum* idioma divinæ naturæ est. Prior proprie ἰδιωματικῆς, posterior vero ἀντανακλάσας τῶν θεῶν vocatur, ubi tamen observandum est, quod propositiones posterioris classis ad alterum communicationis idiomatum genus referri possunt.

Ad priorem Classem idiomaticarum propositionum sequentia referuntur dicta biblica:

Filius Dei natus est ex semine Davidis secundum carnem, Rom. I, 3.

Filius Dei natus est ex Maria virgine, Luc. I, 35.

Deus proprio sanguine redemit ecclesiam, Act. XX, 28.

Filius Dei tradidit semet ipsum pro me, Gal. II, 20.

Filius Dei proprius pro nobis omnibus traditus est, Rom. VIII, 32.

Filius Dei natus est ex muliere, Gal. IV, 4.

Verbum Dei factum est caro, Joh. I, 14.

Verbum vitæ, oculis conspectum, manibus est contractatum, 1 Joh. I, 1. 2.

Filius

Filius Dei mortuus est, Rom. V, 10.

Dominus gloriæ crucifixus est, 1 Cor. II, 8.

Auctor vitæ interfectus est, Act. III, 15.

Filius Dei didicit, in quibus passus est, obedientiam, Hebr. V, 8.

Ad posteriorem verò Classsem pertinent:

Filius hominis sedet ad dextram potentiae, Matth. XXVI, 64.

Filius hominis veniet ad iudicandum vivos & mortuos, Matth. XXV, 31 sq. Luc. XXI, 27.

Filius hominis in cælo est, Joh. III, 13.

Filius hominis adscendet eo, ubi erat, Joh. VI, 62.

Huc referuntur etiam istæ propositiones idiomaticæ, quæ alias *reductive* tales vocantur. Subjectum in iis est concretum personæ, de quo vel idioma divinæ naturæ vel idioma humanæ naturæ prædicatur. Hujus generis sunt sequentes locutiones biblicæ:

Christus est splendor gloriæ Patris & imago essentiae ejus, Hebr. I, 3.

Ego fui, antequam Abraham erat, Joh. VIII, 58.

Christus mortuus & resuscitatus sedet ad dextram Dei, Rom. VIII, 34.

Christus natus est in urbe David, Luc. II, 11.

Christus surrexit a mortuis, 2 Tim. II, 8.

Immanuel vocabitur s. erit, qui a virgine nascetur, Jes. VII, 14.

Interdum particulae diacriticæ e. g. *κατά* & *ἐκ* adduntur propositionibus idiomaticis, tam

Pars I.

G g

simpli-

simpliciter quam reductive talibus, ad significandum, cui naturæ idioma tribuatur per se.

Huc pertinent sequentes propositiones biblicæ:

Filius Dei est genitus ex semine David κατὰ σάρκα, Rom. I, 3.

Christus est ex patribus κατὰ σάρκα, Rom. IX, 5.

Christus est ex fructu lumborum Davidis κατὰ σάρκα, Act. II, 30.

Christus crucifixus est ἐξ ἀθανείας, sed vivit ἐκ δυνάμεως Θεοῦ, 2 Cor. XIII, 4.

Christus pro peccatis passus est θανάτω εἰς μὴ σαρὴν, ζῶντων εἰς δὲ τῷ πνεύματι, 1 Petr. III, 18.

Christus passus est pro nobis σαρὴν, 1 Petr. IV, 1.

Et quamvis in aliis locis non addita legitur restrictio, e. g. Joh. III, 13. Act. III, 15. 1 Petr. II, 21. semper tamen ista subintelligenda est.

Rejicitur hic Zwinglii ἀλλοίωσις, qua unum pro altero ponitur & accipitur, e. g. quando Bileam dixit: *anima mea moriatur morte justorum*, Num. XXIII, 10. Per ejusmodi ἀλλοίωσιν etiam Zwinglii affecclæ s. Calviniani interpretantur idiomata divinæ naturæ, quæ Christi carni & humanæ naturæ tribuuntur. Ex eorum hypothesis non realiter, sed tantum verbaliter Dominus gloriæ crucifixus & Filius Dei incarnatus est.

CAPUT IX.

DE

SECUNDO COMMUNICATIONIS
IDIOMATUM GENERE.

Secundum genus communicationis idiomatum est, quando de Christi humana natura, abstractivè & intra unionem personalem spectata, aliquid prædicatur, quod divinum & gloriosum est, & quidem concretivè spectatum, e. g. humana Christi natura s. humanitas Christi est omnipotens, omnipræfens, adoranda &c.

Rectè igitur hoc genus vocatur *majestaticum*, nec non ὑπερύψωσις Phil. II, 9. δόξασις Joh. XVII, 5. & μετάδοσις Matth. XI, 27.

Theologi plerumque ἈΡΧΗΜΑΤΑ appellant, quæ secundum hoc communicationis genus de humanitate Christi prædicantur. Intelligunt per ea omnes divinas perfectiones, quarum humana Christi natura per communicationem idiomatum s. unctionem Spiritus S. extraordinariam, Ps. XLV, 8. Joh. III, 34. particeps facta est. Paulus nominat illa πᾶν τὸ πλήρωμα τῆς θεότητος, s. omnem plenitudinem Deitatis, h. e. totum complexum divinorum attributorum, & testatur, τὸ πλήρωμα istud σωματικῶς s. corporaliter in Christo & ejus humana natura habitare, Col. II, 9.

Competunt itaque in humanam Christi naturam 1) divina attributa, 2) divina opera &

G g 2

3)

3) divina gloria, & quidem non ad solam denominationem, sed etiam ad possessionem, & exercitium.

Divina attributa sunt vel ενεργητικά f. operativa, vel ἀνεργητικά f. quiescentia. Hæc sunt e. g. æternitas, simplicitas, immensitas &c. illa vero omnipotentia, omnipræsentia, omniscientia &c. Utriusque generis attributa cum humana Christi natura communicata sunt, hoc tamen cum discrimine, ut attributa quiescentia non nisi mediante alio quodam attributo operativo de humana Christi natura prædicari possint, e. g. humanitas Christi æternam & immensam habet omnipotentiam, omnipræsentiam & omniscientiam. Contradictio in adjecto foret, si de humana natura prædicarem absolute aliquid, quod per se cum ista pugnat. Sicut de ferro ignito dicere quidem possum, quod candeat, aut luceat, non vero, quod leve sit, etsi levitas ignis simul cum calore & luce ignis communicata sit ferro: ita etiam comparatum est cum humana natura Christi, quatenus de ista absolute dicere velim, eam per se æque æternam esse ac ipsum Deum.

Aliter autem se res habet cum attributis operativis, quorum præcipua sunt omnipotentia, omnipræsentia & omniscientia. De singulis aliqua dicemus.

I. Humana Christi natura est omnipotens, Joh. V, 19. Matth. XXVIII, 18. Dan. VII, 14. Joh. XVII, 2. Apoc. V, 12. Ps. VIII, 7. 8. 1 Cor. XV,

XV, 27. Effectus hujus omnipotentiae sunt *miracula*, quæ a Christo in diebus carnis suæ facta sunt. Potuit enim coecos reddere videntes, claudos ambulantes, leprosos mundos, ægrotos sanos, surdos audientes, mutos loquentes & mortuos vivos, Matth. XI, 5. c. IV, 24. c. IX, 35. c. XV, 30. Marc. VII, 37. Luc. VII, 22.

Huc spectant etiam miraculosæ actiones ejus, cum 1) non modo quinque, sed etiam septem millia hominum in deserto cum paucis panibus & aliquot pisciculis cibaverit, Marc. VIII, 6-8. Joh. VI, 5-13. 2) æstuans & procellosum mare sedaverit, Matth. VIII, 26. 27. 3) super aqua ambulaverit, Matth. XIV, 25-31. 4) piscaturæ Petri ita benedixerit, ut uno piscatu multa millia piscium caperentur, Luc. V, 4-9. 5) se invisibilem reddiderit, Joh. VIII, 59. c. X, 39. & 6) malos spiritus ex obsessis potenter expulerit, Luc. XI, 14. 20. Matth. VIII, 28-32. Act. X, 38.

Erat autem humana Christi natura in miraculis patrandis *instrumentum cooperativum*, at unum tamen, non separatum, cum e contra prophetae & apostoli fuerunt instrumentum cooperativum separatum.

Largiebatur etiam suam virtutem *ἰασηται* apostolis, cum non modo Spiritum suum super eos effuderit, Act. I, 8. c. II, 4. sed istos etiam jussit, omnia facta in nomine ejus

facere, Matth. X, 7. 8. Luc. X, 17. Act. III, 12 sq. c. VIII, 7. c. XVI, 18.

Ad quæstionem Calvinianorum: *cur Christus in diebus carnis suæ opem Patris implaraverit?* respondemus, quod fecerit hoc, 1) ut honoret Patrem, qui miserat eum, Joh. VII, 18. c. VIII, 49. 2) ut testetur coram hostibus, se non agere contra Deum, 3) ut fratribus suis, quibus per omnia similis fieri voluit, Hebr. II, 17. bonum exemplum præbeat, & 4) ut ostendat, se abdicasse omni usu secum communicatæ majestatis & potentiae divinæ eo tempore, quo pro nobis Deo satisfaceret obedientia & passione sua.

Virtutem Christi *ἁγνότητα* eludere solent hostes humanæ ejus naturæ ex Marc. VI, 56. ubi de fimbria Christi perhibetur, quod omnis, qui eam attigerit, sanatus sit. Sed Christus Luc. VIII, 46. expresse fatetur, vim sanandi de sua carne exiisse.

Calviniani tribuunt humanæ Christi naturæ tantum potentiam mediam, quæ minor est infinita Dei potentia, major vero qualibet creaturarum potentia.

II. *Humana Christi natura est etiam omnipræsens*, Matth. XVIII, 20. c. XXVIII, 20.

Calviniani hanc omnipræsentiam, quam *ubiquitatem* vocant, negant. Concedunt, personam Christi quidem omnipræsentem esse, sed non carnem ejus s. humanam naturam, in persona Filii Dei subsistentem.

Calix-

Calixtini humanam Christi naturam multipræsentem quidem, sed non omnipræsentem nominaverunt. Alii dicunt, Christum quidem secundum humanam naturam ubique præsentem esse, at non substantiali præsentia, sed tantum potentia & providentia sua.

Disputatum olim quoque est inter Theologos Helmstadienses & Tubingenses: *num omnipræsentia humanæ Christi naturæ absoluta dici queat?* Priores id negabant, & *limitatam* tantum eam appellabant, docebantque Christum secundum illam ubique, quo velit, esse posse. Sed rejecta est hæc propositio a sanioribus nostræ ecclesiæ Theologis.

III. *Humana Christi natura est denique omniscia.* Duplex datur in Christo *scientia*, nempe *infinita* & *habitualis* s. *experimentalis*. Prior propter unionem personalem ei tribuitur. Hæc est illa omniscientia, secundum quam Christus in statu summæ exinanitionis omnia scire poterat. Noverat non modo omnes homines, & eorum corda, Joh. II, 24. 25. c. VI, 64. nec non fidem, & cogitationes hominum, Matth. IX, 2. 4. sed sciebat quoque, quæ in occulto fiebant, Joh. I, 48. c. IV, 29. c. XIII, 11. Marc. V, 30. Matth. XVII, 27. & quæ sibi ipsi imminebant, Luc. XVIII, 32. 33. quæque futura erant, Matth. XXIII, 34. 38. c. XXIV, 2. Luc. XIX, 43. 44. c. XXI, 25 - 27.

Scientia habitualis s. *experimentalis* Christo tribuitur, quatenus homo per se fuit. Secundum

eam in infantia profecisse, Luc. II, 52. & cum doctoribus anno ætatis suæ duodecimo, disputasse dicitur, Luc. II, 46, 47. Secundum eandem dabatur quoque in eo aliqua ignorantia, quæ tamen non pravæ dispositionis, sed puræ negationis fuit. Huc etiam referri possunt, quæ de Christo narrantur Matth. XXI, 19. Marc. XI, 13. & Marc. XIII, 32.

Calviniani summam quidem, sed tantum finitam humanæ Christi naturæ tribuunt scientiam & sapientiam, quam quidem æque ac nos infinitam nominant, at tantum respectu objecti. Vocant istam etiam incomprehensibilem, quæ tamen non sit vere & simpliciter infinita. Distinguunt propterea inter *scientiam intelligentiæ* & *simplicis visionis*. Hanc quidem, non vero illam tribuunt Christo secundum humanam naturam. Verum ex Col. II, 3. satis patet, omnem divinam sapientiam & scientiam in Christo *ἡ καθ' ἑαυτὴν* habitasse.

CAPUT X.

DE

TERTIO COMMUNICATIONIS
IDIOMATUM GENERE.

Tertium genus communicationis idiomatum est, quando de Christo concretive considerato aliquid prædicatur, quod ad officii ejus mediatorii actus, utrique naturæ communes, spectat. Non

Non accurate hic vox *idioma* usurpatur, quia loco ejus potius vox *opus* s. *actus* adhiberi debet.

Accipitur igitur hæc vox h. l. latius & comprehendit opera officii, quæ aliquid, utrique naturæ proprium, complectuntur.

Dicitur ab aliis hoc idiomatum genus κοινοποιία aut κοινοποίησις, s. communicatio aut communio operationum, & quidem ejusmodi operationum, quæ ex utraque natura proficiuntur.

Theologi plerumque operationes istas nominant ΑΠΟΤΕΛΕΣΜΑΤΑ a voce ἀποτελεῖν, h. e. perficere. Respectum igitur habent ad triplex Christi officium, cujus functiones utramque requirebant naturam. Vocantur propterea etiam opera Θεαυδρικά s. *Dei virilia*, quia per divinæ & humanæ naturæ concursum perficiuntur.

Apotelesma ab *idiomate* ita differt, ut prius ambabus naturis simul, posterius vero uni soli naturæ tribuatur.

Omne apotelesma duo comprehendit ἐνεργήματα, scilicet divinum & humanum. Differunt ab ἐνεργεία, ut principiatum a principio. Habet autem quælibet Christi natura sua singularia ἐνεργήματα, quia quælibet natura singulariter id, quod suum est, facit, sed tamen in communione cum altera.

DAMASCENUS propterea *Lib. III. de orthodoxa fide c. 19.* ita scripsit: *Nec divisas esse dicimus*

operationes, neque divisim operari naturas, sed conjunctim utramque cum alterius communicatione agere, quod ei proprium est.

Cognoscitur utraque naturarum operatio in qualibet miraculosa Christi actione. Cum e. g. cæco homini visum restitueret Joh. IX, 6 sqq. humana natura suum ad istud opus contulit per actum exspuendi in terram, faciendi lutum ex sputo & illinendo hoc lutum super oculos cæci, dicendoque ad eum: *vade, lava te in piscina Silos*; divina vero natura suum contulit largiendo virtutem divinam ad effectum istum supernaturalem producendum.

Omnes triplicis officii Christi actus & functiones sunt apotelesmata s. operationes per concursum utriusque naturæ peractæ.

Actus officii sacerdotalis sunt apotelesmata necessaria, quia sine concursu duarum naturarum prorsus non perfici potuerunt, *actus vero officii prophetici & regii* sunt apotelesmata voluntaria, quia sine illo concursu perfici potuerunt.

Huc igitur pertinent omnes propositiones, quarum subjectum persona Christi, prædicatum vero operatio aliqua ad officium Christi mediatorium spectans est. Sunt ita comparatæ, ut maxima ex parte simul ad primum communicationis idiomatum genus referri possint.

Talis propositio e. g. est: *Christus mortuus est pro peccatis nostris*, 1 Cor. XV, 3. Subjectum h. l. est *Christus*, prædicatum vero *mortuus est pro peccatis nostris*, quod ad officium ejus mediatorium

rium spectat, ubi *mortuum esse ad ἐνεργήματα* humanæ naturæ & *pro peccatis nostris mortuum esse ad ἐνεργήματα* divinæ naturæ pertinet.

Hujus generis sunt etiam propositiones, quæ Gal. I, 4. & Eph. I, 2. occurrunt.

Non dici potest, Christum secundum divinam naturam passum & mortuum esse, etsi verè & realiter passus & mortuus sit, & quidem 1) ὑποστατικῶς, quatenus caro, in qua passus est, in ipsa Filii Dei hypostasi subsistit, & unam eandemque cum eo hypostasin s. personam constituit, & 2) ἰδιοποιητικῶς, quatenus Filius Dei appropriando sibi carnem sibi quoque appropriavit carnis passionem.



SECTIO II.

D E

DUPLICI STATU CHRISTI.

C A P U T I.

D E

DIVERSO CHRISTI STATU IN GENERE.

Christus secundum humanam naturam non in uno eodemque *statu* mansit, etsi cum hac natura omnis divina majestas in unione perso-

personali communicata sit. Ad perficiendum enim opus redemptionis necesse erat, ut se aliquamdiu abdicaret usu plenario attributorum divinatorum, unde factum est, ut Christus primum *exinanitus*, deinde *exaltatus* esse dicatur.

Locus palmarius, unde *duplex* hic *status Christi* probatur, est Phil. II, 6-11. ubi expresse de Christo verba hæc occurrunt: *ἐαυτὸν ἐκένωσε*, h. e. *se ipsum exinanivit*, aut potius: *evacuavit*, v. 7. &: *ὁ Θεὸς αὐτὸν ὑπερύψωσε*, h. e. *Deus eum valde exaltavit*, v. 9.

Duplex hic status non secundum utramque naturam, ut Calviniani docent, sed tantum secundum humanam naturam locum habet, quia divina natura nulli mutationi obnoxia esse potuit, Ps. CII, 28. Hebr. I, 12. Jac. I, 17.

Certi Calviniani *triplicem* statuunt *statum Christi*, nempe 1) *statum dignitatis*, 2) *statum exinanitionis* & 3) *statum exaltationis*. *Primum* a tempore nativitatis Christi usque ad ejus captivitatem, & *alterum* a captivitate Christi usque ad ejus resurrectionem duravisse, *tertium* vero adhuc durare & in æternum duraturum esse dicunt. Verum tota hæc status Christi partitio non accurata est, nec convenit cum ordine salutis & sacris literis.

Duplex tantum datur *status Christi*, scilicet *status exinanitionis* & *status exaltationis*. De utroque nunc non modo generaliter, sed etiam specialiter acturi sumus.

CAPUT II.

DE

STATU EXINANITIONIS CHRISTI IN GENERE.

Status Christi Exinanitionis non in κένωσει, s. occultatione, sed in vera κενώσει s. evacuatione ordinarii usus divinæ majestatis constitit. Expresse enim Paulus de Christo scripsit: οὐχ ἁρπαγμὸν ᾗγήσατο τὸ εἶναι ἴσα Θεῷ, (scilicet τὰ ἑαυτοῦ), ἀλλ' ἑαυτὸν ἐκένωσε, h. e. non rem raptantem esse existimavit Christus, quod esset similis Deo, Phil. II, 6. 7. Idem hoc est, ac si dixerit Paulus: Non egit ut victores, qui spolia ab hostibus capta & rapta cum pompa ostentare solent, sed semet ipsum exinanivit. Alibi dicitur Christus πτωχεύσασθαι, h. e. pauper factus esse, 2 Cor. VIII, 9.

Theologi Tubingenses olim & in primis THEODORUS THUMMIUS, docuerunt, Christi statum exinanitionis non in vera κενώσει, sed tantum in κένωσει constituisse. Maluerunt igitur vocem ταπείνωσις, quam κένωσις usurpare. Provocarunt ad confirmandam suam sententiam 1) ad ἀδιασάσιαν, Nestorianis oppositam, qui negarunt, duas in Christo naturas ἀδιασάτως unitas esse; 2) ad Joh. V, 17. ubi Christus dixit, se sicut Patrem huc usque operari; & 3) ad miracula Christi, in diebus carnis ab ipso patrata. Sed respondemus ad 1) distinguendo inter ἀδιασάσιαν, quæ est inter carnem & λόγον,

γόν, & ἀδιασώϊαν, quæ est inter carnem & creaturas: prior, non vero posterior Nestorianis opponitur. Ad 2) respondemus, Christum non per humanam naturam, sed secundum divinam naturam in humana operatum esse; & ad 3) distinguimus inter divinæ majestatis usum universalem & particularem: hic in statu exinanitionis locum habuit, non vero ille, ut infra pluribus ostendemus.

Distinguunt alias Theologi respectu attributorum divinorum inter κτήσις & χεῖσις, h. e. possessionem & usum. Κτήσις Christus semper habuit, non vero χεῖσις.

Κένωσις s. *evacuatio* differt ab *exinanitione*, quæ generalior est, quam illa & minus proprie significat, qualem status exinanitionis habuerit rationem.

Id, quod Christus in hoc statu deposuit, fuit *μορφῇ Θεοῦ*, Phil. II, 6. quæ idem est ac status Dei gloriæ.

Fuit autem *abdicationis* ejus vera quidem & libera, sed tamen non plenaria, quia interdum radios divinæ gloriæ de se dedit, quando se omniscientem & omnipotentem præbuit ad monstrandum, se esse verum Messiam, Joh. I, 14. c. XX, 31. Major gloriæ divinæ gradus non modo ab oculis mortalium non tolerari potuisset, Matth. XVII, 2-6. sed etiam opus redemptionis impedivisset, Joh. XVIII, 6.

Pertinent ad statum exinanitionis Christi sequentes *septem actus*, scilicet 1) ejus *incarnatio*,

2)

2) *conceptio*, 3) *nativitas*, 4) *educatio vitæque cursus*, 5) *passio*, 6) *mors*, & 7) *sepultura*.

De singulis acturi sumus, si antea aliqua de ejus statu exaltationis præmisimus.

CAPUT III.

DE

STATU EXALTATIONIS CHRISTI IN GENERE.

Status Exaltationis Christi is est, in quo Christus secundum humanam naturam infirmitates carnis deposuit & plenarium divinæ majestatis usum suscepit. Probatur ex Jes. LII, 13. Act. II, 33. Eph. I, 20-22. Phil. II, 9-11.

Facta est hæc exaltatio quasi per gradus. Initium fiebat per ejus *reviviscentiam*, quam *descensus ad inferos*, *resurrectio* & *adscensio in cælos* fecutæ sunt. Complementum denique dedit *sessio ad dextram Patris*. De omnibus hisce speciatim agemus, quando singulos actus status exinanitionis descripsimus.

Non facta est exaltatio Christi per ipsius gloriæ divinæ recuperationem, utpote quam in statu exinanitionis nunquam deposuit, sed per divinæ gloriæ plenarii usus aliquāndiu depositi reassumptionem, quia jam in statu exinanitionis divinis interdum attributis usus est.

Causa efficiens exaltationis Christi est tota sacrosancta Trinitas, quapropter etiam Christus
secun-

secundum divinam naturam sui ipsius exaltationis causa efficiens dici potest. Hæc est *gloria illa Patris*, per quam Christus a mortuis resuscitatus esse dicitur, Rom. VI, 4.

Incepit autem exaltatio Christi, postquam *μορφὴν δούλου* s. formam servi, Phil. II, 7. nec non *ὁμοίωμα καὶ ὁρμήματα τῶν ἀνθρώπων*, h.e. similitudinem & externam hominum speciem deposuit. Hæc vero similitudo & forma servi neutiquam ipsam ejus constituit naturam humanam. Hanc enim in æternum retinuit, etsi per exaltationem valde istam glorificaverit.

Est vero exaltatio hæc certo modo adhuc coram hominibus occulta, manifestabitur autem in *reditu* ejus *ad judicandum vivos & mortuos*, Col. III, 4. Refertur propterea reditus hic in symbolo apostolico ad actus exaltationis Christi, qui tamen magis *actus exaltati Christi* nuncupandus est, quales etiam fuerunt apparitiones ejus post resurrectionem.

Status exaltationis Christi apud *Socinianos* nil aliud est, quam regressus ex statu non-existentiæ in statum existentiae. Dicunt etiam, Christum per exinanitionem & inortem sibi exaltationem acquisivisse.

CAPUT IV.

DE

INCARNATIONE CHRISTI.

Vox Ἐνσάρκωσις s. *incarnatio* sumpta est ex Joh. I, 14. ubi de λόγῳ ὑποστατικῷ dicitur: σὰρξ ἐγένετο, h. e. *caro factus est*. Hoc non idem significat ac: *in carnem mutatus est*, sed: *carnem assumpsit*, Hebr. II, 16. Consistit itaque incarnatio Filii Dei in assumptione humanæ naturæ, qua natura hæc in hypostasim Filii Dei ita recepta est, ut exinde quidem unio duarum naturarum, non vero duplex persona orta sit.

Tria hic perpendenda sunt, 1) *persona*, quæ carnem assumpsit, 2) *caro*, quæ assumpta est & 3) *incarnatio* ipsa.

Subiectum s. *persona*, quæ carnem assumpsit, est altera Deitatis persona. Hæc ad opus redemptionis electa esse videtur, 1) quia est *imago & character ὑποστάσεως Dei*, Hebr. I, 3. nos vero ad imaginem Dei restituendi eramus, & 2) quia est *Filius Dei*, nos vero, qui filii iræ eramus, iterum in filios Dei recipi debebamus.

Incarnatus autem est *Filius Dei* secundum totam divinam naturam, non vero totaliter secundum totam Deitatem, quia prima & tertia Deitatis persona incarnationem non participarunt, quanquam utraque essentialiter cum secunda persona unita est. Interim recte dicitur *Deus manifestatus esse in carne*, 1 Tim. III, 16. etsi soli

Pars I.

Hh

Filio

Filio Dei descensus de cœlo tribui debeat, Joh. III, 13. c. VI, 33. 50. Jes. LXIV, 1.

Id, quod Filius Dei assumpsit, *caro* vocatur, per quam nil aliud, quam humana natura intelligitur, Rom. IX, 5. 1 Petr. III, 18. c. IV, 1. 1 Joh. IV, 2. 3. Hebr. II, 14.

Caro alias subjectum corruptionis est, Joh. III, 6. c. VI, 63. 1 Cor. XV, 50. & sedes peccati, Rom. VII, 18. 25. c. VIII, 3. Quia vero Christus condemnare debebat peccatum in carne sua per peccatum s. oblationem pro peccato, propterea missus dicitur ἐν ὁμοιώματι σαρκὸς ἀμαρτίας, Rom. VIII, 3. natura ejus humana jure meritoque *caro* nominatur.

Fuit autem caro hæc *sancta*, etsi de corpore peccaminoso sumta sit, Luc. I, 35. Quæritur vero: num per se a prima origine *sancta* dici possit, an vero in actu conceptionis denuo a Spiritu S. *sanctificata* fuerit? Posteriores sententiam multi priori præferunt, quia Christus non vi benedictionis universalis, Gen. I, 28. sed vi promissionis singularis, Gen. III, 15. ex patribus descendit, Rom. IX, 5. Verum non video, cur caro Christi non per se *sancta* dici queat, etsi carnis & sanguinis particeps factus sit, sicut pueri nostri, Hebr. II, 14. fructusque ventris Mariæ nuncupetur, Luc. I, 42. neque negari possit, ipsum de semine mulieris peccaminosæ genitum esse, & quidem vi promissionis paradisiacæ.

Non

Non vero aliam hic intelligere debemus *car-*
nem, quam *animatam*, quia Christus cum carne
totam humanam naturam, ex corpore & anima
constantem, assumpsit.

Fuit autem *vera caro*. *Marcionitæ* & *Schema-*
tici olim docuerunt, Christum non veram hu-
manam carnem, sed tantum schema s. *Φάν-*
τασμα assumpsisse.

Patrocinantur iis neutiquam loca, Rom.
VIII, 3. Phil. II, 7. quia non ad ipsam carnem s.
corpus Christi, sed ad accidentia ejus, scilicet
infirmities, respectum habent.

Valentiniani & *Peterseniani* perhibent, Chri-
stum carnem suam de cœlo attulisse, eamque
quasi in utero Mariæ per canalem transisse.
Sed quod Christus ex nobis non assumpsit, eti-
am non redemit. Sunt, qui cum BARCLAJO,
POIRETO & aliis Christo *duplex corpus* s. *duplicem*
carnem tribuunt, unam de cœlo allatam
ante secula mundi & alteram in Maria virgine
in tempore assumptam. Provocant ad Joh. VI.
ubi tamen non de Christi humana, sed divina
natura agitur.

Ab hac sententia parum distant ex nostrati-
bus Theologis B. JOHANNES OLEARIUS & B.
BALTHASAR MEISNERUS. Prior inter ipsam car-
nem & vivificam ejus qualitatem distinguit,
a qua caro circumdata, efformata & animata
quasi fuerit; hanc qualitatem esse panem de
cœlo datum & ab alia carne terrena distinctam.
Refutavit sententiam hanc modeste B. VAL.

ERN. LOESCHERUS in *Relat. Innocuis A. 1711.*
p. 250 sq.

Posterior, nempe BALTHASAR MEISNERUS,
massam, ex qua corpus Christi formatum est,
vel de cœlo delatam, vel aliunde sumtam, &
postea in utero Mariæ elaboratam esse autumat
in *Christologia sua* p. 29.

CAPUT V.

DE

CONCEPTIONE CHRISTI.

Conceptio Christi primus quasi gradus est sta-
tus exinanitionis ejus, ad quem tamen a
Cel. Jo. ERNESTO SCHÜBERTO in *Instit. Theol.*
Dogm. p. 386, non refertur.

Est mysteriosissimus actus, cujus descriptio
occurrit Luc. II, 31. 35. ubi angelus Domini
primum generaliter, postea vero specialiter de
hoc mysterio agit.

Quatuor hic perpendenda sunt momenta 1)
subjectum conceptionis, 2) *causa efficiens ejus*, 3)
actus conceptionis ipse & 4) *effectus illius*, s. in-
fans, qui conceptus est.

Subjectum conceptionis fuit *Mariæ*, desponsata
virgo, de stirpe quidem regia Davidis, sed per-
sona imæ fortis.

Erat de stirpe regia Davidis, ut impleren-
tur vaticinia de Christo, tanquam filio Davidis,
Jes. XI, 1. Jer. XXIII, 5. Luc. I, 32. Apoc. V, 5.
pro

pro quo etiam Messias ab omnibus Judæis olim habebatur, Matth. XXI, 9. c. XXII, 42. Sicut vero David ad posteros Patriarcharum pertinuit, ita etiam Christus secundum carnem recte ex patribus descendisse dicitur, Rom. IX, 5. & quidem de tribu Judæ, Gen. XLIX, 9. 10. Mich. V, 1. Hebr. VII, 14. Apoc. V, 5. & ex stirpe Isai s. Jesse, Jes. XI, 1. qui pater fuit regis Davidis, Ruth. IV, 22.

Sociniani negant, Christum ex tribu Judæ ortum esse. Matrem ejus potius de tribu Levi fuisse asserunt. Provocant ad propinquitatem ejus cum Elisabetha, uxore sacerdotis Zachariæ, Luc. I, 36. & ad Genealogiam Christi, in qua non Mariæ, sed tantum ejus sponsi, nempe Josephi, mentio fiat, Matth. I, 16. Luc. III, 23.

Verum respondemus ad objectionem de propinquitate Mariæ cum Elisabetha, hanc matronam omnino quidem fuisse de tribu Levi, Luc. I, 5. sed tantum respectu patris. Cum enim lex Num. XXXVI, 7 - 9. foeminis, quæ bona hæreditaria non possederunt, permiserit, extra suam tribum nubere, mater aut avia Elisabethæ facile potuit esse de tribu Judæ, cujus regio Zachariæ patria fuit, Luc. I, 39. Dantur in Scriptura S. plura exempla virorum, qui ex alteris tribubus uxores duxerunt, e. g. Exod. VI, 23. 1 Sam. XVIII, 27. 1 Reg. III, 1. 2 Chron. XXII, 11. Jud. XXI, 21 - 23. Inprimis familia regia & sacerdotalis conjugis mutuis se conjungere solebant.

Quod ad *Genealogiam Christi* attinet, *Matthæus* *Josephi*, & *Lucas* *Mariæ* origines descripsit, quorum utriusque primordia in regis Davidis filiis, *Salomone* & *Nathane* *Matth. I, 6.* & *Luc. III, 31.* quærenda sunt. Quod autem *Lucas* loco *Mariæ* nominaverit *Josephum*, factum est secundum morem *Hebræorum*, qui mulierum *genealogiam* non recensere solebant. Erat etiam *Judæis* tunc temporis satis cognitum, quis fuerit pater *Mariæ*; & si particula τῆς, *Luc. III, 23.* adjicitur verbis: υἱὸς Ἰωσήφ, textus ita sonat: ὡν, ὡς ἐνομίζετο υἱὸς Ἰωσήφ, τῆς τῆς Ἠλὶ, i. e. *is, qui habebatur filius Josephi, τῆς (h. e. filia) Eli, (nomine Mariæ,) filius est.*

Nomen *Maria* apud *Hebræos* *Mirjam* pronunciabatur. Idem significat ac *excelsam* a radice מִרְיָם, h. e. *altus & elevatus fuit.* Alii a מַר, h. e. *amarus & acerbus fuit,* derivant. Erat per se peccatrix, etsi semen ejus, ex quo Christi humana natura in utero ejus formata est, ab omni peccato purificatum sit. Εὐλογημένη ἐν γυναιξίν ab angelo quidem vocatur, *Luc. I, 28.* sed non propterea adorabilis redditur, nec pro impeccabili declaratur, ut Pontificii perhibent. Alibi satis probavimus, eam non modo in peccato conceptam, sed etiam actualibus peccatis infectam fuisse.

Veram autem *virginem* fuisse, ex *Jes. VII, 14.* *Matth. I, 23.* *Luc. I, 27.* satis liquet. Voluit Deus virginem in matrem Christi eligere, ne is haberetur pro nudo homine de semine virili genito.

genito. Quod vero desponsata fuerit, factum esse videtur, ut cognoscamus statum conjugii Deo haud minus placere quam statum virginitatis. Nec debebat Christus ab infidelibus pro illegitime genito, nec mater ejus pro meretrice, aut adultera haberi, quod fieri potuisset, si non desponsata fuisset.

Causa efficiens conceptionis Christi non in patre naturali, sed in ipso Deo quaerenda est. Angelus Domini enim miraculosam Christi generationem expresse tribuit Spiritui S. & virtuti Altissimi, Luc. I, 35.

Spiritus S. non σπέρματικῶς f. seminaliter, sed δυνάμει f. operative Mariam gravidam reddidit. Sicut in prima creatione Gen. I, 2. ita in hac altera, Jer. XXXI, 22. singulari sua operatione id, quod procreandum erat, procreavit. Particula ἐκ Matth. I, 18. 20. non materiam, sed causam efficientem denotat. Neutiquam tamen propterea Spiritus S. Christi pater nominari debet, quia non ex ejus hypostasi aut substantia in utero materno conceptus est.

Tribuitur etiam conceptio Christi virtuti Altissimi, per quam plerumque intelligitur omnipotentia divina, tribus Deitatis personis communis, etsi alias ipse Spiritus S. Luc. XXIV, 49. ita appelletur, cui quoque conceptio Christi proprie adscribitur.

Sunt autem nonnulli, qui cum BALTH. MEISNERO in Christol. p. 26. & JAC. CARPOVIO in Theol. Rev. Dogm. T. II. p. 188. per δύναμιν τῆς ὑψίστης

ipsum *Filium Dei* intelligunt, provocantes ad 1 Cor. I, 24. 30. & Jes. IX, 6. coll. Gen. XLIX, 3. Dicunt enim, *Filium Dei* ad personam Mariæ ita appropinquasse, ut assumendo hominis naturam uterum ejus divina sua majestate tanquam templum Salomonis, 1 Reg. VIII, 11. & tabernaculum Moſis, Exod. XL, 34. impleverit.

Actus conceptionis Christi per Ἐπιλεῦσιν Spiritus S. & ἐπισκίασµὸν Virtutis Altissimi describitur.

Ad Spiritûs S. ΕΠΙΛΕΤΣΙΝ, qua super Mariam superventurus dicitur, pertinet 1) virginalis uteri fœcundatio, 2) massæ seminis ejus, ex qua corpus Christi formandum erat, sanctificatio, 3) animæ ejusdem per traducem propagatio, & 4) successiva corporis sanctissimi formatio.

ΕΠΙΣΚΙΑΣΜΟΣ f. *obumbratio Mariæ* indicat miraculosum λόγος æterni descensum in uterum virginis ad conservandam ejus peccaminosam substantiam, ne a Deitate tanquam igne consumeretur.

Infans, qui per conceptionem hanc miraculosam formatus est, erat quidem verus embryon, antequam nasceretur, sed qui simul a primo conceptionis momento divinæ naturæ particeps & ab omni peccato immunis fuit, Hebr. VII, 26. Dicebatur propterea τὸ ἅγιον f. *Sanctum*, Luc. I, 35.

Errant, qui conceptionem Christi ita describunt, quasi stamen corporis Christi in ovulo materno Mariæ immediate a Deo productum crea-

creatumque sit. Nam sic Christus non descenderet a patribus secundum carnem, nec fructus ventris Mariæ dici posset. Vide CARPOVIT Theolog. Revel. Dogm. T. II. p. 118.

C A P U T VI.

D E

NATIVITATE CHRISTI.

Christi *nativitas* cum singularibus quidem circumstantiis, sed non tamen in consuetum more facta est.

Mater fuit & mansit quidem in pariendo filio suo vera virgo, edidit tamen illum non aliter in lucem, quam aliæ mulieres, quia alias non potuisset lex de prima ruptura matricis ad eam applicari, Luc. II, 22, 23.

Non sine *doloribus* consuetis & *mater* peperit & *Christus* natus est. Illa enim erat non sine peccato, ob quod mulieribus dolores partus a Deo impositi sunt, Gen. III, 16. hic vero ad nostros dolores portandos in mundum venit, Jes. LIII, 4.

An *Maria* post *nativitatem Christi* cum *Josepha*, marito suo, concubuerit, quæstio est, quæ non ad salutis nostræ fundamentum pertinet, ideoque tacente Scriptura S. salva nostra salute & affirmari & negari potest. Satiùs tamen est, istam negare, Christus quidem *primogenitus* dicitur, Matth. I, 25. Luc. II, 7. at non respectu fratrum

suorum, Matth. XII, 47. 48. qui matris suæ privigni erant, sed respectu juris primogenituræ, quod apud Israëlitas magnas prærogativas habebat. Particula *ἕως* autem Matth. I, 25. non terminum fixum, sed continuum indicat.

Præcipuæ circumstantiæ, quæ nativitatem Christi memoratu dignam faciunt, spectant ad tempus, locum & angelicum cantum.

Quod ad *tempus* attinet, chronologi sacri computarunt, quod nativitas Christi facta sit anno mundi 4000. qui annus incidit in annum ab urbe condita 750. Specialiter notari meretur, salutiferam Christi nativitatem factam esse 1) sub imperio Augusti, 2) ultimis temporibus Reipublicæ Judaicæ, 3) sexto mense post nativitatem Johannis Baptistæ, 4) tempore autumnii & 5) vesperscente die.

Sub *imperio Augusti* natus est Christus, ut impleatur vaticinium patriarchæ Jacobi, Gen. XLIX, 10. secundum quod sceptrum s. regnum de populo Judaico ablatum esse debebat, quando *Schilo* s. Messias venerit. Hoc satis cognosci poterat ex censu Augusti, qui non modo super universum orbem Romanum, Luc. II, 1. sed etiam super terram Israëliticam se extendebat, v. 3. 4. Hoc non fieri potuisset, nisi Romani terram hanc sub suam rede gissent potestatem.

Nasci debebat Christus *ultimis temporibus Reipublicæ Judaicæ* secundum vaticinium Danielis, qui prædixerat, extirpato Christo urbem & sanctuarium subversum & devastatum iri, Dan. IX,

24-27. Populus Israëliticus cum sua republica & statu ecclesiastico typus fuit Christi ejusque regni gratiæ. Hoc cum initium ceperit adveniente Christo, respublica Judaica tunc non potuit non ad interitum vergere, eo magis, cum gens Judaica ad luendam Dei poenam ob suam incredulitatem & commissa crimina non diutius florere potuerit. Daniel determinavit tempus per septuaginta suas hebdomades, quarum explicatio Philologis sacris magnam parit difficultatem.

Christus nascebatur *sexto mense post natiuitatem Johannis baptistæ*, Luc. I, 26. 36. 56.

Hic ejus præcursor erat, qui sicut aurora ortum solis justitiæ & diem salutis indicaret.

Secundum promissionem divinam esse debebat *vox clamantis in deserto*, Jes. XL, 3. 4. Joh. I, 23. & *angelus viam sternens* angelo fœderis, Mal. III, 1. nec non *alter Elias*, Mal. IV, 5. Luc. I, 17. c. XVII, 11. 12. Agitur prolixè de ejus conceptione, Luc. I, 5 - 25. 41. natiuitate, Luc. I, 57 - 80. officio, Matth. III, 1 - 13. c. XI, 24 - 29. Marc. I, 1 - 9. Joh. I, 19 - 36. & martyrio, Matth. XIV, 3 - 12.

Nascebatur Christus *tempore autumnii* circa festum tabernaculorum, quod secundum computum Hebraicum tempore æquinoctii autumnalis in recordationem itineris ex Ægypto in terram Canaan, in quo sub tentoriis habitabat populus, nec non in gratiarum actionem pro feliciter finita messe quotannis celebrabatur.

Fie-

Fiebat nativitas Christi hoc tempore, 1) quia mundus, quem Christus quasi spiritualiter renovare voluit, 2 Cor. V, 19. Act. III, 20. 2a Eph. I, 10. Col. I, 19. hoc tempore conditus est; 2) quia habitatio in tabernaculis typus fuit habitationis Christi inter nos, Joh. I, 14. & 3) quia nativitas Christi nobis largam fructuum messem dedit, Jes. IX, 3. Quod vero Festum nativitatis Christi die 25 Decembris a nobis celebretur, ab Epocha Dionysiana dependet, quam ecclesia christiana in concilio Nicæno usu recepit.

Nascebatur denique Christus *vesperascente die*. Non perspicue quidem hoc ex Scriptura S. liquet, ex circumstantiis tamen id satis conjici potest. Plerumque creditur, nativitatem Christi noctu factam esse, quia tempore noctis angeli apparuerunt pastoribus Bethlehemiticis, Luc. II, 8. At vero cum angelorum apparitio non simul cum Christi nativitate, sed post eam secundum v. 11. 12. facta esse legatur, satis inde patet, Christum circa vesperam, cum caupona secundum v. 7. adhuc plena hominum fuerit, natum esse.

Vespera in rebus fidei olim fuit tempus mysticum. Non modo poena peccati, propter quam Christus in mundum venit, eo tempore primis parentibus, irrogabatur, Gen. III, 8. sed eodem quoque tempore agnus paschalis, tanquam typus Christi, qui itidem hoc tempore mortuus & sepultus est, Marc. XV, 34-37. Matth.

Matth. XXVII, 57. Luc. XXIII, 54. mactabatur, Exod. XII, 6. Num. IX, 5. Cur igitur non etiam Christus vespere natus fuisset, cum ad tollendam peccati poenam, vesperscente die a Deo irrogatam, præcipue in mundum venerit? Circumstantiæ nativitatis ejus id saltem sufficienter indicant.

Locus nativitatis Christi tam respectu urbis, quam respectu domus notatu dignus est.

Urbs vocabatur *Bethlehem*, quæ sita erat in regione ad tribum Judæ spectante, haud procul ab Hierosolyma. Temporibus Christi inter exiguos numerabatur vicos, qui olim tamen urbs fuit haud incelebris. Volebat Deus filium suum hoc loco nasci, ad significandum, quod Christus ex gente regis Davidis, cujus patria hæc urbs fuit, 1 Sam. XVI, 1 sq. descenderet, Luc. II, 4. & ad implendum vaticinium Michæ, Mich. V, 1. Matth. II, 6. Erat autem respectu Jesu locus peregrinus, quia parentes ejus in Galilæa habitabant & tantum occasione census, ab Imperatore Augusto indicti, Bethlehemum profecti erant, Luc. II, 6. Sapienter Deus nobis exinde cognoscendum dat, Christum non de mundo esse, nec ad mundum pertinere, Joh. VIII, 23. c. XVII, 16. c. XVIII, 36.

Hoc liquet etiam ex *domo*, in qua natus est Christus. Erat caupona s. hospitium, ad quod divertebantur peregrinatores, Luc. II, 7. Cognoscitur exinde summa Christi paupertas, de qua infra agemus.

Acci-

Accidebat hinc non sine Dei consilio, ut mater nec fasciis, quibus involveret infantem, nec cunis, in quibus eum poneret, instructa fuerit, Luc. II, 7. 12. Quod vero locus nativitatis, uti plerumque creditur, bovine aut ovine fuisset, non satis ex præsepe colligitur, quia *Φάτνη* quodvis vas significat, in quo pecudi pabulum datur, atque adeo etiam extra stabulum locum habere potuit.

Ad memorabiles nativitatis Christi circumstantias pertinet denique *cantus angelicus*, qui sequebatur nuncium angelicum, Luc. II, 9 - 14. Cœlestes spiritus per istum non modo exemplum dant hominibus prædicandi opera Dei, sed etiam suam propriam lætitiā super hominum consortio per Christum restituto indicant. Magnificam quoque & gloriosam reddere volebant cantu suo nativitatem Christi, in oculis hominum alias valde exilem.

CAPUT VII.

DE

CHRISTI EDUCATIONE ET VITÆ CURSU.

Christus omnes hominis ætates pervixit. Fuit infans, puer, adolescens & vir. Non modo experiri voluit statum omnis humanæ vitæ, sed etiam pro cujuslibet ætatis peccatis satisfacere, nec non in omnibus cujuscunque æta-

ætatis hominibus exemplum dare, 2 Petr. II, 21.
Joh. XIII, 14, 15.

Erat autem tota ejus vita per omnes ætates speculum non modo sanctitatis, sed etiam humanæ miseriæ.

Antequam ejus curriculum perlustramus, aliqua præmittemus de ejus *incremento dorum animæ & corporis*.

Erant istæ quidem excellentissimæ, sed Jesus non nisi gradatim ad earum perfectionem perveniebat. Lucas ideo expresse testatur, eum sapientia & ætate increvisse, Luc. II, 40. 52. In hoc aliis hominibus non dissimilis fuit, quorum dotes animæ & corporis non aliter, quam per experientiam, informationem & exercitium suam adipiscuntur maturitatem.

Crescebat itaque Christus in juventute respectu *corporis* externa forma, statura & robore, respectu *animæ* vero intellectu, judicio, sapientia, experientia & affabilitate. Per harum dorum incrementum sibi singularem non modo apud Deum, sed etiam apud homines comparavit gratiam, Luc. II, 52.

Tota vita *Christi* magnæ inopiæ & vario periculo, nec non summis contumeliis & molestiis exposita erat.

Inopia & paupertas ejus jam animadvertebatur, cum adhuc in cunis jaceret, ut supra ostendimus, & quanquam a Magis larga acciperet dona, Matth. II, 11. ea tamen in longo itinere & diuturno exilio Ægyptiaco consumpta sunt.

Ado-

Adolescentiam suam transgebat in domo parentum, Matth. II, 23. Luc. II, 51. qui ærumnosam vitam agebant, ut ex agnatis & cognatis Mariæ, Joh. II, 3. Matth. IV, 21. c. XIII, 55. & ex laborioso opificio Josephi aliisque circumstantiis conjici potest.

In paupertate posthæc omnem vitam consumsit. Ipse confessus est, se nil habere peculii in mundo, Matth. VIII, 20. Vivebat enim cum discipulis suis maxima ex parte de benevolorum hominum stipe, Joh. XII, 6. & hospitio, Luc. X, 38. Matth. XXVI, 6. 18. Joh. XII, 2. c. XVIII, 2. Jure meritoque hinc dicere potuit: *pauper sum & miser*, Ps. XL, 18.

In ejusmodi paupertate mansit usque ad mortem. Omnia sua secum portabat, ut ex distributione vestium suarum patebat, Matth. XXVII, 35. Joh. XIX, 23. 24. Interim discipuli ejus in istius consortio necessariorum ad victum non defectum passi sunt, Luc. XXIII, 35.

Suscepit autem in se Christus paupertatem ultro, ut pauperes homines cœlestibus bonis locupletaret, 2 Cor. VIII, 9.

Erat insuper vita Christi continuis *periculis* exposita. Statim in infantia rex Herodes M. ejus vitæ insidiabatur, Matth. II, 13. 16. Quot & quantis postea periculis obnoxius fuit in longo periculosoque itinere, cum ex Judæa in
Ægy-

Ægyptum fugeret & inde rediret, nec non, cum aliquot annos in hac peregrina regione commoraretur, facile conjecturari licet. Quam sæpe non Judæi quærebant eum capere, Joh. VII, 30. 44. Matth. XXI, 46. Marc. XII, 12. & interficere! Joh. V, 16. c. VII, 1. 25. c. VIII, 59. c. X, 31. Luc. XIII, 31. Quotidie versabatur in vitæ discrimine & nisi singulari præsidio Dei gavisus esset, multoties occubuisset. Huc spectat etiam periculum vitæ in mari Galilæo, Matth. VIII, 24. 25.

Vita Christi summo quoque *despectui* obnoxia erat. Incedebat in forma servi, Phil. II, 7. Matth. XX, 28. Parentum tenuitas, Matth. XIII, 54. 55. 56. Nazarethi, ubi educatus est, obscuritas, Joh. I, 46. & regionis Galilææ, (quæ ejus patria esse credebatur) vilitas, Joh. VII, 41. nec non conversatio cum telonariis & peccatoribus, Matth. XI, 19. Luc. XV, 2. c. XIX, 7. defectus studiorum academicorum, Matth. XIII, 54. 56. Luc. IV, 22. & hujus generis plures vitæ circumstantiæ, apud Judæos Christo contemptum pariebant, ita, ut ipse beatum eum prædicaret, qui non scandalum ab ipso sumat, Matth. XI, 6.

Poterat denique vita Christi etiam *molestissima* dici, quia in continuo itinere munus doctoris obibat. Conficiebat autem itinera sua pedibus, & quidem in æstuosis & pulverulentis viis & inter quotidianas capitis insidias perpetuasque contumelias. Peregrinabatur de urbe in

urbem & de regione in regionem, Aet. X, 38. Pererrabat modo Galilæam, modo Judæam, modo Samaritanam regionem. Excurrebat interdum in fines Tyri & Sidonis, Matth. XV, 21. nec non in terram Gergesenorum & Gadarenorum, Matth. VIII, 28. Luc. VIII, 26. Sæpe etiam transibat Jordanum & mare Genesareth. Ubicunque vero commorabatur, non otiosus erat, sed docendo, disputando & benefaciendo se toto die occupatum præbebat. Per tot itinera & occupationes valde defatigabatur, Joh. IV, 6. & modo esuriens, Matth. XXI, 18. modo sitiens, Joh. IV, 7. modo somniculosus, Matth. VIII, 24. reddebatur.

CAPUT VIII.

DE

PASSIONE CHRISTI.

Ad redimendum genus humanum requirebatur *passio omnium malorum* animæ & corporis, quia alias peccati pœna ad satisfaciendum justitiæ divinæ non sufficiens fuisset. Pœna enim sine doloribus non vera pœna est.

Facile exinde colligi licet, cur Christus tot & tantis doloribus & contumeliis affectus sit. Necessaria enim erat ejus multifaria malorum passio ad luendam peccatorum pœnam.

Hoc ut eo melius cognoscamus, contemplaturi sumus tam *hostes*, qui Christum variis malis affecerunt, quam *dolores*, quos sustinuit.

Hostes,

Hostes, qui Christum variis malis affecerunt, erant tam spirituales quam corporales. *Spirituales* erant *Deus* & *diabolus*, diverso tamen respectu; *Deus*, tanquam iustissimus iudex, qui Christum propter peccata mundi in se suscepta gravissime punivit, Jes. LIII, 4. 5. 10. Psalm. LXIX, 27. *diabolus* vero tanquam insensissimus Dei & hominum hostis, Joh. VIII, 44. qui in temporarium & æternum exitium Christum detrudere studuit, Matth. IV, 3. 5. 6. 8. 9. Joh. XIV, 30.

Hostes Christi corporales fuerunt homines impii & quidem tam de gente populari, quam peregrina. Gens popularis erant *Judæi*, ex quibus Christus secundum carnem descendit, Rom. IX, 5. Joh. IV, 22. Hi non modo despiciebant eum, Joh. I, 11. nolebantque in illum credere, Joh. VII, 5. 48. sed infidiabantur quoque vitæ ejus, Matth. XII, 14. Joh. XI, 53. simulac per proditionem Judæ Ischariothis, discipuli sui in eorum manus traditus fuit, omnibus plagis & contumeliis afficiebatur & per ipsum sacerdotum principem ad mortem condemnabatur, Joh. XI, 50. Matth. XXVI, 65. 66.

Non autem *Judæi* tantum, sed etiam *ethnici* ad vexandum & interficiendum Christum manus suas suppeditabant. Erant de gente peregrina & quidem Romana, quorum caput Pontius Pilatus fuit, qui tunc temporis Judaicæ regionis præfectus erat. Huic a *Judæis* ex in-

vidia, Matth. XXVII, 18. & siti sanguinis tradebatur ad supplicium, Matth. XXVII, 1. 2. 20. 22. 25. Joh. XIX, 6. 7. Christus ipse hoc discipulis suis prædixit, Luc. XVIII, 32.

Omnes hosce crudeles hostes David in persona Messiae mugientes boves, rugientes leones & rabidos canes nominat, a quibus circumcinctum se fuisse deplorat, Ps. XXII, 13. 14. 17. 21. 22. Interim per multitudinem & varietatem hostium Christi, qui generaliter *peccatores* vocantur, Matth. XXVI, 45. haud obscure significatur, omnes homines se mortis ejus noxios fecisse.

Dolores, quos Christus perpeffus est, spectant non modo ad omnia membra corporis ejus & organa sensuum, sed etiam ad ipsam ejus animam, Jes. LIII, 11.

Anima Christi sensit *dolores*, cum afficeretur terrore mortis, tristitia animi, anxietate cordis, ictibus conscientiae, ira Dei, telis convitiatorum & omnibus aliis malis perturbatae & afflictæ mentis, ut ex ejus querelis, Ps. XXII, LXIX. summaque trepidatione & tristitia, Matth. XXVI, 37. 38. Marc. XIV, 33. Joh. XII, 27. c. XIII, 21. nec non ex tota passionis ejus historia patet. Sensit anima ejus ipsos *inferni dolores*, cum in monte olivarum ita angeretur, ut præ anxietate sanguinem per poros emitteret & confortatione angeli opus haberet, Luc. XXII, 43. 44.

Corpus

Corpus Christi acerbissimos dolores per omnia membra & organa sensit. *Caput* spinis & contusionibus afficiebatur, *facies* alapis & sputo deformabatur, *manus* & *pedes* clavibus perfodiebantur, *dorsum* & *pectus* flagellorum & virgarum ictibus dilacerabantur, *latus* lancea discindebatur & *totum corpus* non modo vestimentis destituebatur, sed etiam nudum cruci affigebatur, atque adeo asperitati aeris & aestui solis, nec non opprobrio hominum exponebatur. De hisce corporis plagis & afflictionibus ipse jam in V. T. valde conquestus est, Jes. L, 6. Ps. XXII, 15-18. Ps. CIX, 22-25.

Omnes *externi sensus* poenam peccati experti sunt. Videbat turpissima scelera, audiebat scandalosissima verba, gustabat acerbissimum potum, olfaciebat foetorem sputi & attrectabatur manibus impurissimis, cædebaturque multis verberibus.

Jure meritoque igitur vocatur *אִישׁ מְכַאֲבוֹת*, h. e. *vir dolorum*, Jes. LIII, 3. Poterat ad omnes prætereuntes id, quod destructa Hierosolyma dixisse fertur, dicere: *Aspicite & videte, num dolor aliquis major esse queat meo dolore: Dominus enim in die iræ suæ savissime malorum plenum me fecit*, Thren. I, 12.

MORTE CHRISTI.

Mors Christi ad redimendum genus humanum summe necessaria fuit, quia Deus ex justissima pœna hominibus ob transgressionem legis mortem imposuerat, Gen. II, 17. Rom. V, 12. c. VI, 23. Hæc igitur mortis pœna ut auferretur, Christum mori oportebat, Luc. XXIV, 26. Jes. LIII, 10. Hebr. II, 14. 15. Jes. XXV, 8. Rom. XIV, 9. 2 Cor. I, 10. c. V, 15.

Vere autem mortuum esse Christum, satis ex Luc. XXIII, 46. patet, ubi, spiritu manibus patris sui demandato, *expirasse* dicitur. *ἐκπνέειν* h. l. idem significat ac spiritum dimittere aut tradere. Priorem dictionem usurpat Matthæus c. XXVII, 50. & posteriorem Johannes c. XIX, 30. Utraque nos docet, vinculum animæ & corporis Christi in cruce vere disruptum esse. Et in hac disruptione consistit etiam genuina mortis forma, 1 Reg. XIX, 4. Luc. XII, 20. Phil. I, 23. Non meritoria fuisset mors Christi, si non re vera facta fuisset.

Quæritur autem: *an Christus in morte verus homo dici potuit, cum partes hominis essentielles, in quarum conjunctione substantia hominis consistit, sese separaverint?* Affirmamus hoc. Nam hominis personalitas non interit, etsi partes ejus essentielles disjungantur in morte. Cognosci
hoc

hoc licet ex historia pauperis Lazari & divitis helluonis, de quibus Christus tanquam veris personis agit, etsi uterque defunctus fuerit, Luc. XVI, 22. 23.

Nec anima moritur, nec corpus defunctum annihilatur, etsi hoc in cineres redigatur. Stamina enim corporis semper permanent, Ps. XXXIV, 21. De Christo eo magis dicere possumus, post mortem verum mansisse hominem, cum non personam, sed tantum naturam & personalitatem hominis assumerit. Has vero mors non tollit, sed tantum personam, quatenus per operationes animæ & corporis reciprocas se vivam præstat.

Christus non persona nudi hominis, sed Θεάνθρωπος fuit, nec in ejus morte vinculum duarum naturarum, sed tantum vinculum animæ & corporis solutum est. Hinc mansit ejus persona Θεάνθρωπος, etsi vere mortuus sit. Mansit etiam corpus ejus post mortem integrum & imputridum, quia putrefactio non ad formam, sed ad effectus mortis pertinet.

Erat autem mors Christi *liberrima*, quia nemo eum ad moriendum coëgit, nec ipse ex temeritate se in mortem dedit. Ex amore potius erga homines, Joh. XV, 13. 1 Joh. III, 16. se submitit consilio Dei de redimendo genere humano, Luc. XXII, 22. Act. II, 23. omnemque ex liberrima voluntate Patri suo præstitit obedientiam, Ps. XL, 8. 9. Jes. L, 5. Phil. II, 8.

Non mors Christi per se ad nostram salutem requirebatur, sed ejusmodi *mors*, quæ esset 1) violenta, 2) contumeliosa, 3) dolorosa, 4) cruenta, 5) in cruce facta & 6) aliquid gloriosi in se habens.

Violentam oportebat esse *mortem* Christi, quia non modo pœnam malefici hominis, Joh. XVIII, 30. qui criminis blasphemiae, Matth. XXVI, 65. 66. Joh. XIX, 7. & læsæ majestatis, Luc. XXIII, 2. Joh. XIX, 12. reus sit, luere debebat, quapropter etiam inter maleficos numeratur, Jes. LIII, 12. Luc. XXII, 37. & in mediis latronibus cruci affixus est; sed etiam quia antitypus victimarum erat, quæ crudelissima morte in V. T. mactabantur, Jes. LIII, 7. 1 Cor. V, 7.

Contumeliosam oportebat esse *mortem* Christi, quia superbiæ pœnam pro hominibus, qui se super Deum insolenter extulerant, Gen. III, 5. non modo sustinere, sed etiam ignominiam totius generis humani per peccata contractam ferre debebat, Psalm. LXIX, 10. Rom. XV, 3. Hac de causa non modo ante mortem in domo summi sacerdotis, Luc. XXII, 63-65. & in curia Herodis, Luc. XXIII, 17-19. sed etiam in morte ipsa, Matth. XXVII, 39-44. & post eam c. XXVII, 63. 64. summis contumeliis & convitiis afficiebatur. Ipsum mortis genus contumeliosissimum erat, quia non aliis quam sceleratissimis servis & hominibus infimæ sortis istud inferebatur, Hebr. VI, 6. c. XII, 2.
ex

ex qua causa etiam Judæi tanto fervore a Pilato postulabant, ut Jesus crucifigeretur, Luc. XXIII, 23. Locus mortis, nempe mons Golgatha, erat etiam locus valde ignominiosus, quia in eo omnes malefici supplicio occidebantur. Jacebat hic locus extra urbem, ut impleretur typus Num. XIX, 3. Exod. XXIX, 44. Hebr. XIII, 11-13.

Dolorosam oportebat esse *mortem* Christi, quia vera poena esse debebat, quæ non sine doloribus esse potest. Pluribus in superiori cap. VIII tam de magnitudine quam de multitudine dolorum, quos Christus non solum ante mortem, sed etiam in morte passus est, egimus. Genus mortis præ cæteris erat dolorosum. Vivebant malefici in cruce interdum usque ad diem tertium, & quia idem de latronibus, ad latus Christi crucifixis, judicabatur, ossa eorum ad maturandam mortem frangebantur, Joh. XIX, 31-33. Dolorum suorum sensum Christus satis superque testatus est per ejulatum suum in cruce, Matth. XXVII, 50. Marc. XV, 37. Hebr. V, 7.

Cruentam oportebat esse *mortem* Christi, quia sanguinis effusio ad placandum Deum requirebatur, Hebr. IX, 12. 22. sine sanguinis enim effusione non fiebat placatio, Lev. XVII, 11. Hebr. IX, 22. Adumbrabatur hæc Christi effusio sanguinis per sacrificia V. T. quæ fere omnia cruenta erant. Victimarum enim sanguis & effundi & circumspergi debebat, antequam

Deo immolabantur. Haud mirum igitur est, Christum tam multifarie sanguinem suum effuisse, e. g. in flagellatione, coronatione, crucifixione & cum latus ejus lancea perforaretur, Joh. XIX, 34. Erat enim sanguis foederis, Zach. IX, 11. Matth. XXVI, 28. quem Moses praefiguravit, cum populum Israëliticum sanguine sacrificiali aspergeret ad confirmandum foedus, cum Deo initum, Exod. XX, 8. *Sanguis Christi* dicitur hinc non modo λύτρον pro peccatis nostris, Rom. III, 25. Eph. I, 7. Col. I, 14. 1 Petr. I, 19. Hebr. IX, 12. nec non medium purificationis nostrae spiritualis, 1 Joh. I, 7. sed etiam bibendum datur in sacramento coenae ad confirmationem remissionis peccatorum, Matth. XXVI, 27. 28. Joh. VI, 53 - 56.

Crucis morte Christum mori oportebat, quia fieri debebat pro nobis κατάρα s. *maledictio* ad redimendum nos a maledictione legis, Gal. III, 13. Sicut enim suspensus ex arbore olim coram Deo maledictus erat, Deut. XXI, 23. ita etiam Christus ex arbore suspendendus erat, ut maledictionem nostram in se susciperet & morte sua tolleret. Adumbrabatur propterea ejus crucifixio per maclatum agnum paschalem. Sicut iste veru ligneo infigebatur haud infractis ossibus, succensoque igne torrebatur, Exod. XII, 9. 46. ita etiam Christus affixus est cruci, ut igne irae divinae, quae super eum exarserat, Nah. I, 6. quasi assaretur & quidem haud infractis ossibus, Joh. XIX, 34. Per crucifixio-

nem

nem expansis manibus in altum elevabatur instar serpentis ænei in deserto, Joh. III, 14. ut nos omnes quasi ad se traheret, Joh. XII, 32. Pendebat cruci affixus inter cœlum & terram, ut mediatorem sese sisteret ad reconciliandum sibi omnia in cœlis & terris, Col. I, 20.

Gloriosam denique etiam certo modo oportebat esse *mortem* Christi, ne tanquam merus homo mortuus esse crederetur. Hac de causa non solum specimen omnipotentiae suae dedit, cum hostes manus suas in eum inferrent, Joh. XVIII, 6. Luc. XXII, 51. sed impius etiam ejus proditor, Matth. XXVII, 4. nec non injustus judex innocentiam ejus plus vice simplici declaraverunt, Matth. XXVII, 24. Luc. XXIII, 14. 15. 22. Huc spectant etiam prodigia, quæ tempore mortis ejus divinitus facta sunt in sole, aulæo templi, terræ solo, petris & sepulchris, Matth. XXVII, 45. 51. 52. Tantum ea incutiebant hominibus terrorem, ut multi exinde cognoscerent, Jesum crucifixum vere fuisse Christum, Filium Dei, Matth. XXVII, 54. Luc. XXIII, 48. Huc quoque referenda est inscriptio crucis, Joh. XIX, 19-22. & solennis Christi sepultura, Marc. XV, 46. 47. Joh. XIX, 39-42. quæ haud minus mortem salvatoris nostri gloriosam reddiderunt, quam cæteræ circumstantiæ.

SEPULTURA CHRISTI.

Christum *sepultum esse*, ex quadruplici historia passionis ejus satis patet, 1 Cor. XV, 4.

Sepultura mortem sequitur, quia id, quod de terra sumtum est, terræ iterum mandari debet, Gen. III, 19.

Christus vere mortuus est in cruce, hinc etiam sepeliendus erat.

Quæritur autem: *num sepultura Christi ad opus redemptionis ejus pertineat?* Per se & primario ad istud non pertinuit, sed per accidens & secundario.

Finis primarius nostræ sepulturæ apud Christum cessat. Non enim corpus ejus putredini obnoxium erat, Ps. XVI, 10. Act. II, 27. quia morte sua poenam peccati quidem luere, non vero venenum ejus, quo destitutus erat, in se tollere debebat, quod alias per putrefactionem fit, qua omnes homines, etsi eorum funera efficacissimis aromatibus condirentur, obnoxii sunt.

Christus voluit sepeliri, ut 1) veritatem mortis suæ confirmaret, Act. II, 29. 2) ut hominum sepulchra sancta & nobis grata redderet ad reficiendum se ab omnibus laboribus & ærumnis, Hiob. III, 17. Jes. LVII, 2. Apoc. XIV, 13. & 3) ut majori splendore & magnificentia
tertia

tertia die resurgeret, Matth. XXVIII, 2-4.
11 sq.

Ex divino consilio factum est, ut sepulchrum Christi fuerit, 1) *novum*, in quo nondum corpus aliquod defunctum jacuerat, Joh. XIX, 41. vi cuius Christus resurrexisse credatur, uti olim in Elisæi sepulchro factum fuit, 2 Reg. XIII, 21.

Fuit sepulchrum Christi 2) *in petra excisum*, Matth. XXVII, 60. ne in suspicionem venirent discipuli ejus, quasi corpus istius abstulerint, Matth. XXVII, 64.

Fuit 3) *custoditum & tam lapide angulari, quam sigillo munitum*, Matth. XXVII, 64-66. ut non modo eo tutius in isto quiesceret, sed etiam custodes, lapis devolutus & infractum sigillum testes sint resurrectionis ejus, Matth. XXVIII, 11.

Fuit denique 4) *in horto situm*, Joh. XIX, 41. ut peccatum, quod in horto in mundum venerat, Gen. III. in horto iterum quasi defoderetur, Rom. VI, 4. Col. II, 12.

C A P U T X I.

D E

REVIVISCENTIA CHRISTI.

Reviviscentia Christi primus exaltationis ejus gradus est, quia nemo propria virtute reviviscere potest. Per reviviscentiam plenissime

sime uti incepit gloria divina, qua in statu exinanitionis respectu plenarii usus destitutus fuit.

Differt *reviviscentia* a *resurrectione*, ut antecedens & consequens. Comparari potest cum expergefactione ex somno. Homo, qui e somno evigilat, non statim e lecto surgit, nec surgere aliquis potest, antequam evigilavit.

Consistit *reviviscentia Christi* in reassumptione vitæ, Joh. X, 17. 18. Erat autem *reviviscentia Christi* summe necessaria, quia alias redemptio hominum non perfecta fuisset. In morte enim si mansisset, non vitam nobis acquisivisset, nec mortis potentiam demisset, 2 Tim. I, 10.

Deus quidem ex morte expergefaceret potuisset homines; sed quia pœnam mortis luere debebant, sine læsione justitiæ suæ id non facere potuit. Non perfecta enim fuisset pœna pro peccatis, si Deus ipse peccatorem iterum ab ea liberasset. Talis gratia non locum habere potuit, antequam justitiæ divinæ satisfactum fuit.

Hanc ob causam Christus, qui potestatem habuit, vitam & amittendi & iterum recuperandi, Joh. X, 17. 18. opus mediatorium in se suscepit, ut non modo pro omnibus hominibus mortis pœnam ferret, sed etiam propria virtute revivisceret. Hac ratione omnibus, in eum credentibus, tam vitam spiritualem s. gratiam divinam, quam vitam æternam acquisivit, 2 Tim. I, 10. Sic ex morte in vitam pervenimus, 1 Joh. III, 14. Joh. XIV, 6. in
eam

eam scilicet vitam, quam in Filio Dei habemus, Joh. V, 11. 12.

Quæritur autem: *num Christus propria virtute revixerit?* Scriptura S. expresse testatur, Christum a Deo expergefatum esse, Act. II, 24. c. III, 15. c. V, 30. c. X, 40. Rom. IV, 25. c. VI, 9. 1 Cor. VI, 14. 2 Cor. IV, 14. At non aliter hoc factum est, quam per divinam Christi naturam.

Probare hoc possumus ex quatuor hisce Scripturæ S. locis: Rom. VI, 4. c. VIII, 11. Joh. II, 19. 21. & c. X, 17. 18.

Ex Rom. VI, 4. cognoscimus, Christum expergefatum esse per *gloriam Patris*. Hæc gloria vero est ipsa divinitas Christi, quam a Patre per æternam generationem accepit. Vocatur iste propterea splendor gloriæ Patris & imago essentiae ejus, Hebr. I, 3.

Ex Rom. VIII, 11. liquet, Christum expergefatum esse per *Spiritum S.* Hic Spiritus est Spiritus Christi, Rom. VIII, 9. Gal. IV, 6. 1 Joh. IV, 13. qui ab æterno ab eo procedit.

Ex Joh. II, 19. 21. discimus, Christum corpus suum defunctum tanquam destructum templum propria virtute erexisse.

Ex Joh. X, 17. 18. patet, expergefactionem Christi factam esse ex ejus potestate divina, secundum quam propriæ suæ vitæ dominus est.

Quis non ex hisce locis intelligat, Christum vi divinæ suæ naturæ, atque adeo propria virtute revixisse?

DESCENSU CHRISTI AD INFEROS.

D*escensum Christi ad inferos multifariam interpretantur Theologi. Modo proprie, modo improprie illum intelligunt.*

Silentio præteriri posset salva orthodoxia hic descensus ad inferos, si non primi confessores evangelicæ veritatis ex 1 Petr. III, 18-20. occasionem sumfissent, eum symbolo apostolico inferendi & tanquam articulum fidei in systema Theologicum introducendi.

Sunt, qui negant, descensum Christi ad inferos in prioribus post C. N. seculis in *symbolo apostolico* lectum esse. Attamen cum symbolum hoc cum mentione hujus descensus inferum sit libris symbolicis ecclesiæ nostræ, non possumus non eum quovismodo defendere, etsi in *symbolo Nicæno* omissus sit.

Interim cum in *Formula Concordiæ* p. 613. nil certi de hac doctrina doceatur, nemo hæreseos arguendus est, qui descensum Christi ad inferos improprie intelligat. Ipse B. LUTHERUS primum negavit *proprium descensum Christi*. in quo eum Flacius & alii secuti sunt. Postea vero in concione Torgæ habita A. 1533 proprium descensum quidem professus est, sed ita tamen explicuit, ut simul omnes inutiles & curiosas

riofas quæstiones præciderit atque ad piam fidei simplicitatem Christianos adhortatus sit. In hujus B. viri sententia *Formula Concordiæ* c. l. acquiescit, ita scribens: *Satis nobis esse debet, si sciamus, Christum ad inferos descendisse, infernum omnibus credentibus destruxisse, nosque per ipsum a potestate mortis & Satanae, ab æterna damnatione atque adeo e faucibus inferni ereptos. Quo autem modo hæc effecta fuerint, non curiose scrutemur, sed hujus rei agnitionem alteri seculo reservemus.*

Quomodo olim inter nostrates Theologos super hoc Christi descensu ad inferos disceptatum fuerit, ipsa *Formula Concordiæ* c. l. exponit. Quæsitum enim est: num iste descensus ante vel post Christi mortem factus sit; num quoad animam tantum aut sola divinitate, an vero quoad animam & corpus simul Christus descenderit; itemque: num spiritualiter, an vero corporaliter ejus descensus factus; nec non: utrum ad statum exinanitionis, an exaltationis referendus sit? At non consultum esse judicat *Formula Concordiæ*, hac de re disputare, sed potius simplicissime articulum nunc credere & docere.

Calviniani proprium descensum Christi ad inferos prorsus negant. At datur quidem *improprius*, cum Christus infernales cruciatus nostri causa senserit, de quibus queritur Ps. XVIII, 5. 6. Ps. LXIX, 15. 16. sed *improprius* descensus proprium non tollit. Ille ad ejus statum exinanitionis, hic vero ad statum exaltationis pertinet.

Primarius locus, ex quo proprius & localis Christi descensus ad inferos probari solet, est 1 Petr. III, 18 - 20. ubi Christus ζωονομῶντας in spiritu abiisse & spiritibus in custodia, qui olim credere noluerunt Deo in diebus Noë, prædicasse dicitur.

Huc etiam trahere possumus loca Eph. IV, 8 - 10. & Col. II, 15. in quibus docetur, Christum in infima terræ loca s. ad inferos descendisse & de hostibus infernalibus triumphum egisse.

Ex hisce locis liquet, descensum Christi ad inferos pertinere ad statum exaltationis, factumque esse, simulac vitam ex morte receperit. Inferis s. damnatis spiritibus, qui quasi catenis tenebrarum victi supremum iudicium expectant, 2 Petr. II, 4. Jud. v. 6. Christus se tanquam victorem gloriosum, & qui nunc omnem potestatem in cœlis & terris super vivos & mortuos, nec non claves inferni & mortis habeat, Apoc. I, 18. sistebat. Hæc autem gloriosa manifestatio inprimis fiebat iis, qui temporibus Noë per diluvium interierant, cum Spiritui S. non obedierint, comminationes divinas neglexerint, & verbo Dei non crediderint, Gen. VI, 3 - 5.

Hos itaque ut in statu damnationis de veritate divina convinceret Christus, se iis post
mor-

mortem tanquam gloriosum & felicem generis humani redemptorem & salvatorem monstravit, & qua ratione caput serpentis infernalis contriverit, operaque diaboli dissolverit, ostendit. Vergebat hoc in glorificationem tam nominis divini, quam humanæ Christi naturæ.

Pontificii falso perhibent, Christum descendisse ad inferos, ut animas eorum, qui ante ejus nativitatem beate defuncti fuerint, e limbo patrum educeret. Provocant ad Zach. IX, II. ubi autem de redemptione Christi in genere agitur.

C A P U T XIII.

D E

RESURRECTIONE CHRISTI.

Quomodo *resurrectio* Christi ab ejus *reviviscencia* differat, supra jam ostendimus.

Consistit illa in ejus reditu ex morte in vitam ad manifestandum se in terra.

Sumitur vox *resurrectionis* modo late, modo stricte. In sensu latiori, uti in symbolo apostolico fit, comprehendit simul *reviviscenciam* ejus, in sensu strictiori vero distinguitur ab eadem. Non negandum autem est, uno momento utramque simul cum descensu ad inferos factam esse.

Hic considerabimus *resurrectionem Christi*, quatenus a reviviscentia distinguitur.

Id, quod resurrexit, fuit *corpus Christi* redivivum, s. cum anima reunitum. Spectat itaque resurrectio magis ad corpus, quam ad animam. Anima enim spiritus est, qui nec moritur, nec se de loco in locum circumscriptive confert.

Corpus autem materiale & per se immobile est. Hinc semper certum locum circumscriptive replet & non nisi per animam inhabitantem se movere potest, quod tamen non aliter fit, quam de loco in locum.

Resurrectio itaque est certa species, sese de loco in locum movendi. Hinc non potest non corpori tribui, quatenus iterum cum anima unitum est.

Hoc factum est in Christo, cum revocaret quasi animam suam ex manibus Patris & cum corpore suo, ab omnibus infirmitatibus carnis liberato & glorificato, iterum uniret.

Dicitur propterea *corpus Christi*, quod resurrexit, *σῶμα τῆς δόξης*, h. e. *corpus gloriosum*, Phil. III, 21.

Hoc non aliud quidem fuit corpus, quam quod antea in cruce mortuum & postea sepultum est. Verum cum omnes ejus infirmitates, quas in incarnatione assumerat,

Hebr. II, 14. in reviviscentia exuisset, omnino vocari poterat corpus gloriosum. Antemortem corpus hominis, σκῆνος & σκηνώμα, h. e. *tentorium destructibile* est, quod in morte deponitur, 2 Cor. V, 1, 2 Petr. I, 14. in resurrectione vero mutatur in corpus gloriosum.

Hæc *glorificatio* corporis humani, quæ fit in resurrectione, optime depingitur 1 Cor. XV, 42. 43. 44. ubi corpus, quod ante mortem corruptibile, ignominiosum, infirmum & naturale est, in resurrectione fieri dicitur incorruptibile, gloriosum, firmum & spirituale.

Easdem corporis proprietates etiam Christus in resurrectione induit, & quidem in sensu excellentissimo, quia ipse autor & causa efficiens fuit omnis nostræ resurrectionis. Ejus enim corpori glorificato assimilabuntur corpora fidelium, Phil. III, 21.

Assumfit itaque Christus respectu corporis in resurrectione spirituales proprietates, 1 Cor. XV, 44. secundum quas clausas portas penetrare, Joh. XX, 19. 26. & se invisibilem reddere, Luc. XXIV, 31. potuit.

Interim recte describitur *resurrectio Christi* per reditum ex morte in vitam, ad manifestandum se in terra. Hoc autem non spiritualiter, ut Spinoza docuit, factum est, sed corporaliter & realiter.

Ante mortem in vita versabatur. Ad eandem iterum redire debebat, si non ab hominibus perditus haberetur. Redibat igitur ex morte, in quam antea se dederat.

Interest vero hominum, de resurrectione hac certos esse, quia per eam redemptio Christi ad suam perfectionem pervenit, fidesque nostra maximum fulcimentum accepit, 1 Cor. XV, 17.

Facta autem est ea cum *multis singularibus circumstantiis*, ut eo certior & gloriosior coram hominibus redderetur. Prolixe narrantur istæ circumstantiæ ab evangelistis, quas hic repetere supervacaneum duco.

Præcipue sunt 1) descensus angeli ad recludendum sepulchrum, Matth. XXVIII, 2. 2) vacuitas loci, ubi Christi corpus sepultum jacuit, Marc. XVI, 6. 3) præsentia angelorum, resurrectionem Christi annunciantium, Matth. XXVIII, 5-7. Marc. XVI, 6. 7. Luc. XXIV, 4-7. Joh. XX, 12. 13. 4) apparitio defunctorum, qui cum Christo surrexerunt, Matth. XXVII, 52. 53. & 5) manifestatio ipsius Christi redivivi, quæ multifariam & per quadraginta dies facta est, Luc. XXIV, 15. 36. Joh. XX, 14-17. 19 sq. 26 sq. c. XXI, 1 sq. Act. I, 3. 1 Cor. XV, 5-8.

Annotabimus hic paucula circa hæc circumstantias.

Fiebat

Fiebat resurrectio Christi *die tertio* post ejus mortem, non ex necessitate valoris, sed ex necessitate eventus, ut typus Jonæ in faucibus piscis per tres dies hærentis, Jon. II, 1. Matth. XII, 40. nec non prædictiones Christi, Luc. XVIII, 33. Joh. II, 19. implerentur. Sunt autem hi *tres dies* h. l. non ut perfecti dies considerandi, qui ex viginti quatuor horis constant, nec aliter, quam secundum computum Hebræorum, intelligendi, qui dies suos hora sexta vespertina incipiebant. Secundum hunc computum *primus* sepulti Christi *dies* incepit circa horam quartam aut quintam vespertinam diei veneris & duravit usque ad horam sextam ejusdem diei, qua dies Sabbathi, qui erat *alter dies*, incepit; & *tertius* denique *dies* initium cepit eadem hora vespertina hujus diei & duravit usque ad diem solis, quo Christus matutino tempore ante solis ortum surrexit. Recte hinc Salvator tertio die a mortuis surrexisse dicitur.

Sepulchrum Christi ab angelo non aperiebatur, Matth. XXVIII, 2. ut per ostium ejus prodire queat, sed ut quilibet in istud intraret & vacuum locum, in quo jacuerat Jesus, cerneret. Nam corpus Christi ita glorificatum erat, ut clausis januis domos intrare posset, Joh. XX, 19. quidni per clausum sepulchrum pe-

netrasset, cum sua maiestate & potentia omnia impleret?

Defuncti, qui cum Christo surrexerunt, fuerant testes salutiferi effectus resurrectionis eius. Hinc non aliorum, quam sanctorum hominum corpora e sepulchris exiisse dicuntur, Matth. XXVII, 52. Per sepulturam Christi clausa hominum sepulchra ita quasi conquassabantur & recludebantur, ut postea per eius resurrectionem corpora, in iis sepulta, in vitam redire potuerint. Christus quasi diruptor fuit portarum mortis, vi cuius omnes mortui aliquando in vitam redibunt, Mich. II, 13.

CAPUT XIV.

DE

ADSCENSIONE CHRISTI IN COELOS.

A*dsensio* Christi in cœlos non propter semet ipsum, sed propter nos homines facta est. Christus enim in statu exaltationis ubique suum habet cœlum s. gloriam cœlestem, Joh. III, 13. Matth. XXVIII, 20. quid igitur opus ei fuisset adscensione in cœlos?

Potuisset locum ad dextram Patris occupare, s. incipere, plenarie uti divina sua gloria, licet post resurrectionem a mortuis nunquam se hominum oculis monstrasset; at quia discipuli &
alii

alii fideles de resurrectionis ejus veritate certi fieri debebant, omnino necessarium fuit, ut se iis vivum ostenderet; & ut scirent, quo se Dominus contulerit, in eorum *conspectu ad cælum* adscendere voluit.

Est itaque *adscensio Christi in cælos* plena solaminis pro fidelibus in hac vita. Sciunt enim nunc 1) quod regnum ejus non sit de hoc mundo, Joh. XVIII, 36. 2) quod omnia consummaverit, quæ ad redemptionem generis humani requirebantur, Joh. XIX, 30. Luc. XXIV, 26. 3) quod mortalibus oculis non prius se visibilem redditurus sit, quam die novissimo, quo redire vult ad judicium, Act. I, 11. 4) quod nusquam alibi quærendus sit, quam in cælo s. ad dextram Patris, Col. III, 1. 2. 5) quod pro nobis habitationes in cælo paraverit, Joh. XIV, 1-3. c. XII, 26. 6) quod in mundo non simus domi, Hebr. XIII, 14. Phil. III, 10. & 7) quod porta cæli nobis nunc pateat, Act. VII, 56. 2 Petr. I, 11.

Adscensio Christi in cælos erat 1) *visibilis*. Fiebat Bethaniæ haud procul ab urbe Hierosolyma, Luc. XXIV, 50. & quidem in monte olivarum, Act. I, 12. præsentibus discipulis suis, Act. I, 9. 10. qui testes ejus esse debebant.

Erat 2) *miraculosa*, quia propria virtute divina, cum humana ejus natura communicata, (quod per dextram Dei factum esse dicitur, Act. II, 33. c. V, 31.) corpus suum sensim in altum elevabat, usque dum per nubem conspectui hominum subducebatur, Marc. XVI, 19.

LUC. XXIV, 51. ACT. I, 9, 10. Supra omnes cœlos adscendisse dicitur, Eph. IV, 10.

Erat denique 3) *gloriosa*, quia ipsum non modo invisibiliter comitabantur sancti, qui cum eo prodierant ex sepulchris, sed iste etiam cum jubilo & plausu excipiebatur ab omnibus angelis, obviam ei quasi euntibus, Ps. XLVII, 6, 7. Duo ex iis apparebant discipulis ejus, ut certiores eos redderent de reditu ejus, ACT. I, 10, 11. Et quid gloriosius de eo dici potuit, quam quod ad Patrem cœlestem ejusque dextram se per suam adscensionem extulerit? Joh. XX, 18.

Cum Christus semel tantum in cœlos adscenderit, Hebr. IX, 12. *Sociniani* errant, quando ex Joh. III, 13. plures adscensiones in cœlos fingunt.

Nec deposuit Christus in adscensione corpus suum, nec novum spirituale assumpsit, quia humanam naturam & corpus semel assumptum in æternum retinet, ACT. I, 11. Apoc. I, 7. coll. Joh. XIX, 37.

CAPUT XV,

DE

SESSIONE CHRISTI AD DEX- TRAM PATRIS.

Sedere ad dextram Patris est dictio metapho-rica, desumpta ab antiquo usu orientalium regum, qui ad suam dextram eos sedere jube-
bant,

bant, quos præ aliis honorare volebant, 1 Reg. II, 9. In consortium regni talis persona quasi recipiebatur, quia sceptrum in dextra regis medium locum habet, si aliquis ad eam sedet, Ps. XLVII, 9. Matth. XX, 21.

Adscribitur Deo in Scriptura S. *thronus* s. *sella*, per quam divinum ejus dominium & imperium super omnes ejus creaturas intelligitur, Ps. XI, 5. Ps. XLV, 7. 9. Ps. CIII, 19. Jes. LXVI, 1. Matth. V, 34. c. XXV, 31. In hoc throno igitur sedere, idem est ac divino dominio & imperio frui.

Sessio itaque *ad dextram patris* nil aliud significat, quam participationem plenarii usus omnis potestatis, domini & regiminis, quo Pater cœlestis ab æterno gaudet.

Dextra Dei non est certus aliquis locus, sed ipsa omnipotentis Dei virtus, quæ cœlum & terram replet, Exod. XV, 6. Ps. XX, 7. Ps. LXIII, 9. Ps. LXXVII, 11. Ps. CXVIII, 16. Jes. XLI, 10. Ad eam igitur evectum esse, idem est ac divinæ majestatis & imperii participem factum esse, quod de Christo asseritur Ps. CX, 1. Matth. XXII, 44. Act. II, 34. 35. Hebr. I, 3. 13. Marc. XVI, 19. Rom. VIII, 34. Matth. XXVI, 64. Act. VII, 56. Col. III, 1. Eph. I, 20. Hebr. XII, 2.

Jure meritoque hinc dicere potuit Christus: *mibi data est omnis potestas in cœlis & terris*, Matth. XXVIII, 18.

Regit enim totum terrarum orbem & imprimis ecclesiam, Eph. I, 21. 22. 1 Cor. XV, 25. Act.

Act. X, 36. dominaturque omnibus suis hostibus, Ps. CX, 2.

Vocatur autem hoc *sessio ad dextram Patris*, quia respectum habet ad Filium Dei, cui soli tribuitur hæc sessio, & quidem non secundum divinam, sed tantum secundum humanam naturam, quæ ad summum divinæ gloriæ fastigium evehenda erat consummato redemptionis opere, Phil. II, 9-11.

Maximum ex hac sessione fideles in suis calamitatibus & afflictionibus capiunt solatium. Dum enim sciunt, Christum, in quo omnem fiduciam ponunt, ad dextram omnipotentis Dei sedere, non dubitant, quin quoque pro iis intercedat, Rom. VIII, 34. 1 Joh. II, 1. & omne auxilium iis præstet, Act. VII, 56.

Erigunt igitur animum diligenter ad eum, qui sedet ad dextram Dei & quævis bona inde sperant, Col. III, 1. Hebr. XII, 2.

Errant hic omnes, qui per sessionem Christi ad dextram Patris proximum a Deo gloriæ gradum aut honoratiorem cœlestis beatitudinis locum intelligunt, nec non qui cum VALENTINO WEIGELIO asserunt, sessionem Christi ad dextram Dei statim in ejus incarnatione factam esse.

Probe etiam distinguenda est sessio hæc Christi ab ea sessione in throno ejus, quam suis fidelibus promittit, Apoc. III, 21. Nil aliud

aliud hæc significat, quam participationem gloriæ Christi, quam in inferiori gradu impetrabunt omnes, qui usque ad finem vitæ in eum credunt.



SECTION III.

D E

TRIPLICI OFFICIO CHRISTI.

CAPUT I.

D E

OFFICIO CHRISTI IN GENERE.

Christus in mundum venit, ut certas obiret functiones, quæ ad conciliandam inter Deum & homines pacem spectabant. Hæ functiones constituunt munus aut officium aliquod, quod in genere *mediatorium* dici solet, quia mediator factus est Christus inter Deum & homines, 1 Tim. II, 5. Hebr. IX, 15.

Munus hoc Christus obibat non tantum secundum divinam naturam, ut *Osiandristæ* perhibent; nec tantum secundum humanam naturam, ut *Stancaristæ* cum certis *Pontificiis* docent, sed secundum utramque naturam. Conjunxit pro-

propterea in sua persona divinam & humanam naturam, ut quasi medius sit inter Deum & homines.

Inter ambos conciliavit pacem, Eph. II, 14. Col. I, 20. hominesque Deo placavit, 2 Cor. V, 19. Eph. II, 16. Col. I, 19.

Christus est solus & unicus *mediator*, nec præter illum alii statuendi sunt, 1 Tim. II, 5.

Valde hic errant *Pontificii*, qui *plures mediatores* constituunt inter Deum & homines. Non modo B. Maria virgo tanquam *mediatrix* multum apud eos valet sua auctoritate, sed confugiunt etiam in suis calamitatibus ad defunctos sanctos, ut per eos gratiam auxiliumque Dei impetrent.

Ante aliquot annos JUSTUS MART. GLÆSENERUS, Theologus Hildesienfis, quæstionem movit: *num Pontificii præter Christum plures venerentur mediatores?* Ipse in eorum favorem id negavit, alii autem istud satis evidenter probaverunt.

Distinguunt quidem *Pontificii* inter *mediatorem redemptionis* & *intercessionis*, nec non inter *mediatorem primum* & *secundarium*, vocantque solum Christum *mediatorem redemptionis*, nec non *mediatorem primum*, cujus respectu Maria virgo & defuncti sancti tantum *mediatores secundarii* & ab eo dependentes sint, qui pro vivis tantum apud Deum intercedant.

Verum, ut taceam, voces *intercessionis* & *mediationis* unius ejusdemque fere significationis esse, ex sacris literis satis patet, neminem aliqua
apud

apud Deum auctoritate valere posse, quam qui propria virtute divinam gratiam sibi conciliavit, quod solus Christus fecit, Rom. V, 15. 18. 19. 2 Cor. V, 21.

Hic enim est, qui redemptione sua non modo totius generis humani mediator, sed etiam solus ejus intercessor apud Deum factus est, ut suo loco docebimus. Orare quidem debemus pro aliis ad Deum & Christum, sed non præter Christum alios invocare, ut pro nobis intercedant.

Intercessio hæc ad solius Christi officium mediatorium pertinet. Sicut ille opus redemptionis sine ullius adjumento perfecit, Ps. XXII, 12. Jes. LXIII, 3. Ps. LXIX, 9. 21. Luc. IV, 23. Matth. XXVI, 56. ita etiam solus vult esse noster intercessor apud Deum.

Officium Christi mediatorium tantæ dignitatis & auctoritatis est, ut ad istud singulari modo unctus sit. Fert propterea nomen *Christi* h. e. *uncti*, uti jam pluribus audiemus.

Debebat autem Christus respectu sui officii mediatorii 1) partes dissidentes, scilicet Deum & homines, sibi invicem reconciliare, 2) factam reconciliationem parti offendentem, scilicet hominibus, annunciare & 3) reconciliatos homines in acquisita bona introducere. *Triplex* hinc est ejus *officium mediatorium*. Primum & primarium est *sacerdotale*, alterum *propheticum* & tertium *regium*, Jes. XXXIII, 22. Apoc. I, 5. 6.

De singulis in certis capitibus agemus, si antea aliqua de unctione Christi præmisimus.

CAPUT

UNCTIONE CHRISTI.

U*nctio Christi* non proprie, sed metaphoricè intelligenda est. Ejus typus fuit illa unctio, qua in V. T. reges, prophetæ & sacerdotes ad officia sua recens accepta inaugurabantur. Fiebat certo oleo in pharmacopoliis arte præparato, Exod. XXX, 25.

Sic uncti sunt oleo hoc sancto *sacerdotes*, Exod. XXX, 30. c. XL, 13. 15. Lev. IV, 3. *reges*, 1 Sam. X, 1. 1 Reg. I, 39. 2 Reg. IX, 6. & *prophetæ*, 1 Reg. XIX, 16. Ps. LV, 15. Per hanc unctionem quasi segregabantur ab aliis hominibus.

Oleum unguentarium ex præstantissimis aromatibus, quæ suavissimum odorem exspirabant, compositum erat. Ejus odor penetrabat totum corpus & dabat de dignitate officii, ad quod per istud dicti homines consecrabantur, luculentum testimonium. Egregie per oleum hoc deplunguntur dona Spiritus S. quorum in unctione reges, sacerdotes & prophetæ participes reddebantur, ut eo fidelius & efficacius officiis suis fungerentur. Penetrant hæc dona æque ac præstantissimum oleum unguentarium totum hominem, replentque eum simul suavissimo odore coram Deo & hominibus.

Unctio hæc typus fuit *collationis donorum Spiritus S.* quæ Christo facta est ad rite obeun-

obeundum officium suum mediatorium, *Jesaiæ* XI, 2.

Vocatur *unctio*, ut inde pateat typus V. T. Ita enim *Dávid* cecinit: *unxit te, o Deus, Deus tuus oleo lætitiæ præ sociis tuis*, *Psal.* XLV, 8. *Hebr.* I, 9.

Exinde cognoscitur 1) quod *Deus* Christum unxerit, 2) quod unctio *oleo lætitiæ* facta sit, & 3) quod ista aliorum unctionem præstantia sua multum antecedit.

Dum *Deo* unctio Christi tribuitur, ista non potest non facta esse secundum humanam ejus naturam. Secundum divinam naturam profus non fieri potuit, 1) quia Christus secundum eam ipse fuit unctor, & 2) quia unctio non ab æterno, sed in tempore facta est, *Dan.* IX, 24.

Per *oleum lætitiæ* nil aliud intelligi potest, quam *Spiritus S.* *Act.* X, 38. *Jes.* LXI, 1. *Luc.* IV, 1. 18. 19. *Jes.* XLII, 1. *Matth.* III, 16. *Joh.* I, 32. 33. & quidem respectu *donorum* ejus administrantium & sanctificantium, quæ homines plenos reddunt *lætitiæ* h. e. *παρρησία*, auctoritate & tranquillitate animi, *Rom.* XIV, 17. *Luc.* X, 21. 22. *Pf.* LXXXIV, 3. *Jes.* XXV, 9. *c.* LXI, 10. *Hab.* IV, 18.

Socii Christi h. l. sunt sacerdotes, reges & prophetae V. T. qui una eademque cum ipso obierunt officia, hac tamen cum distinctione, ut Christus tantum spiritualiter & cum multo majori auctoritate & dignitate iisdem functus sit,

quam illi. Unctus igitur dicitur *præ sociis suis* quia 1) non ab hominibus, sed ab ipso Deo, 2) non oleo naturali & externo, sed spirituali & interno, 3) non in ætate adulta, sed jam in utero materno, 4) non modice, sed immodice, & 5) non ad obeunda tantum temporalia, sed simul æterna officia unctus est.

Distinguenda autem est unctio Christi a *communicatione idiomatum*. In *unctione* humana ejus natura tantum dona Spiritus S. administrantia & sanctificantia & quidem in summo gradu, in *communicatione vero idiomatum* utraque ejus natura alterius naturæ idiomata & proprietates accepit.

Ex unctioe ortum est nomen *Messias* & *Christus*, quod nomen officii mediatorii est. Sub hoc nomine venerabantur omnes fideles V.T. eum, qui venturus erat in mundum, 2 Sam. XXIII, 1. Dan. IX, 25. 26. Joh. I, 41. c. IV, 25. Luc. II, 11.

Est hoc adhuc in N. T. commune nomen Salvatoris nostri. Ipsi homines, qui castra ejus sequuntur, inde nomen *christianorum* acceperunt, Act. XI, 26. Nomen hoc istos non modo personæ Christi & ejus meriti, sed etiam suæ propriæ unctionis spiritualis constanter memores reddere potest.

CAPUT III.

DE

OFFICIO CHRISTI PROPHETICO
IN GENERE.

Officium hoc nomen suum habet a *prophetis*, qui in V. T. interpretes voluntatis divinæ fuerunt. Vocabantur primum **רְאִי**, 1 Sam. IX, 9. nec non **רָאָה**, 2 Chron. XXXIII, 18. h. e. *videntes*, quia futura per visiones cognoscebant. Postea appellati sunt **נְבִיאִים**, h. e. *vates & vaticinatores* a **נָבָא**, vaticinatus est. Significantur igitur homines, qui arcana Dei noscunt eaque revelant.

Primus, qui nomen hoc in scriptura S. tulit, fuit *Abraham*, Gen. XX, 7. Dicitur propterea *amicus Dei*, Jac. II, 23. coll. Sap. VII, 27. quia arcana alicujus nosse, signum singularis amicitiae est. Alii nomen **נְבִיאִים** derivant a **נָבָא**, *eloqui*, Prov. X, 31. Zach. IX, 17. quia quasi, præcones & oratores sint. Significatio hæc ad officium eorum non male quadrat.

Commune nomen est *propheta* s. **προφήτης**, a **προφητεύειν** descendens, quæ vox non modo idem significat, ac vaticinari s. futura prædicere, Matth. XV, 7. Joh. IV, 19. c. XI, 57. sed etiam a) res sacras & verbum Dei publice exponere, 1 Cor. XIV, 1. 3. 4. 5. 24. 31. Exod. VII, 1. 2. b) cantica ad laudem Dei, & quidem instinctu Spiritus S. recitare, Luc. I, 67.

Ll a

ad

ad exemplum regis Sauli, 1 Sam. X, 5. 6. 10. & c) vocem suam concentibus publicis immiscere, 1 Cor. X, 4. 5. Exod. XV, 20. 21.

Ex omnibus hisce patet, quod in sensu strictiori *propheta* fuerit amicus Dei, cui arcana voluntatis divinæ in eum finem revelata fuerunt, ut hominibus, ad quos missus fuit, ista ad divini nominis gloriam & eorum salutem ac solatium exponeret, Amos. III, 7. Ps. XXV, 14. Prov. III, 32. Ut vero talis propheta, fidem faceret verbis suis, Deus eum simul instruxit dono, miracula patrandi, Joh. IV, 48. Exod. IV, 1 sq. 17. Jes. VII, 11. Joh. XX, 31.

Omnes prophetæ fuerunt *typus Christi*, summi nostri prophetæ, ad nos a Deo ad revelanda arcana voluntatis suæ missi, ut per suam revelationem Patris sui cœlestis gloriam nostramque salutem temporalem & æternam promoveat, Joh. I, 18. Luc. X, 22.

Hic est ille *magnus propheta*, quem *Moses* tanquam sui similem ob familiarissimum cum Deo consortium singularemque *Θαυματουργίαν*, & quod simul dux populi fuerit, prænunciavit, Deut. XVIII, 18. 19. Act. III, 22. 23. c. VII, 37. & qui inter Judæos magno desiderio expectatus est, Joh. VI, 14. Luc. VII, 16.

De summa ejus dexteritate, fidelitate & aliis excellentibus *qualitatibus*, quæ magnum prophetam decent, multa in sacris literis leguntur testimonia, quorum præcipua Ezech. XXXIV, 11 - 16. Jes. L, 4. c. LXI, 1 - 3. c. XLII, 1 - 4. 6. 7.

6. 7. Joh. III, 2. Act. X, 38. & Matth. XXII, 16. occurrunt.

Inter nomina, quæ respectu hujus officii Christo in sacris literis dantur, præcipua sunt: *Rabbi* h. e. *magister*, Matth. XXIII, 8. Joh. XI, 28. *apostolus*, Hebr. III, 1. *doctor*, Joh. III, 2. *via & veritas*, Joh. XIV, 6. *fidus & verax testis*, Apoc. I, 5. c. III, 15. *sapientia*, Matth. XI, 19. *consiliarius*, Jes. IX, 6. *bonus pastor*, Joh. X, 12. ΑΡΧΙΠΟΙΜΗΝ f. *pastorum princeps*, 1 Petr. V, 4. *episcopus animarum*, 1 Petr. V, 25. *lux mundi*, Joh. I, 9. c. VIII, 12. *stella lucida & matutina*, Apoc. XXII, 16. & *sol justitiæ*, Mal. IV, 2.

Inter omnia hæc nomina præcipuum est nomen *pastoris*, quod quidem simul respectum habet ad cætera Christi officia, maxime tamen munus propheticum indicat, ut ex Ezech. XXXIV, 11-16. patet. Non modo se ipsum ita nuncupavit Joh. X, 12. sed etiam a prophetis V. T. & apostolis N. T. ita vocatus est, imo ii ipsi, per quos officium suum propheticum administrat, nomen *pastorum* acceperunt tam in V. T. Jer. III, 15. Ezech. XXXIV, 2. 10. quam in N. T. Eph. IV, 11.

Operæ pretium autem est, specialiter nunc agere 1) de administratione hujus officii, 2) de doctrina, quam Christus in munere hoc docuit, & 3) de miraculis, quibus veritatem doctrinæ suæ confirmavit.

ADMINISTRATIONE OFFICII
PROPHETICI.

Hæc duplex est, *mediata* & *immediata*. *Mediata* fiebat per prophetas in V. T. & per apostolos in N. T. continuaturque usque ad diem extremum per verbi divini ministros, qui expresse propterea *prophetae* nuncupantur, Matth. XXIII, 34. Act. XV, 32. *Immediata* vero *administratio* facta est per eum ipsum, cum in terra ambularet.

Christi officio prophetico acceptam referre debemus omnem Dei nostræque salutis notitiam, & quicquid hominibus de rebus divinis & spiritualibus scitu necessarium est. Quod autem non ipse immediate ad tempus docuit, id mediate per alios docere iussit.

In V. T. factum hoc est per *prophetas*, per quos non solum extraordinarie missi præcones verbi divini, quales *Moses*, *Samuel*, *Elias*, *Eliſæus*, *Jesaias*, *Jeremias*, *Jonas* &c. fuerunt, sed etiam alii homines intelliguntur, quibus donum prophetandi datum erat, inter quos etiam certæ mulieres e. g. *Mirjam*, Exod. XV, 20. *Debora*, Jud. IV, 4. *Hulda*, I Reg. XXII, 14. *Noadia*, Neh. VI, 14. *Hanna*, Luc. II, 36. numerantur.

In primis huc referendi sunt *patriarchæ*, Gen. XX, 7. c. XXI, 33. & sancti isti viri, qui impulsu Spiritus S. locuti sunt, 2 Petr. I, 21. 2 Sam. XXIII, 2. e. g. *Hiob, David, Salomon, Daniel* &c. nec non omnes, qui in interpretanda lege & voluntate divina occupati fuerunt, 1 Sam. X, 10. 1 Reg. XVIII, 4. c. XXII, 6. Jer. XXIII, 16-38. Ps. LXVIII, 12.

Ex his nonnulli verbum Dei literis mandabant, qui propterea סופרים, h. e. *scribæ* vocabantur, Jer. VIII, 8. 9. Temporibus Christi tales verbi divini ministri dicebantur νομικοί, γραμματεῖς & νομοδιδάσκαλοι, h. e. *legis periti & legis doctores*, qui in Mosis cathedra sedebant, & propterea audiendi erant, Matth. XXIII, 2. 3.

His omnibus concredidit Christus in V. T. verbum suum per visiones, somnia, inspirationes & oracula, ut illud partim ore doceant, Ps. LXXIV, 9. Jer. XXII, 29. c. XXIII, 28. c. XXXII, 33. Luc. I, 76. partim literis consignent ad legendum istud, Jer. VIII, 8. 9. 2 Tim. III, 16. Joh. V, 39. Posuit igitur non modo verbum suum in ore eorum, Jer. I, 9. & V, 14. Jes. LI, 16. 1 Reg. XVII, 24. sed ipse quoque per eosdem locutus est, Ps. XL, 8-10. Jes. L, 4. c. LX, 1. Ezech. III, 17 sq. c. XXXIV, 11. 12. imo Moyses ab ipso in monte Sinai legem accepisse dicitur, Act. VII, 38.

Jure meritoque hinc Christus vocatur 1) *verbum Dei* ἢ λόγος ὑπεστατικός, Ps. XXXIII, 6.

Joh. I, 1-3, 14. quia inter divinas personas munus interpretis apud homines obiiit, & 2) *angelus Dei*, quia legationem divinam ad homines reconciliandos in se suscepit, Mal. III, 1. quapropter etiam plerumque sub hoc nomine in scriptura V. T. intelligendus est, e. g. Gen. XVI, 7 sq. c. XIX, 1. 24. c. XXXII, 24 sq. coll. c. XLVIII, 16, it. Exod. III, 2. c. XIV, 19. c. XXIII, 20-22. coll. 1 Cor. X, 4. it. Hiob. XXXIII, 23. Act. VII, 38.

Si itaque Christus jam in V. T. officio prophetico functus est, multo magis eo fungitur in N. T. & quidem tam mediate, quam immediate.

Hi, per quos *mediate* officium suum propheticum in N. T. administrat, sunt *ministri verbi divini*, inter quos primi fuerunt *apostoli*, Luc. VI, 13, *apostolicique viri*, quos Christus non solum immediate vocavit, Matth. IV, 18-21, Joh. I, 43 sq. Matth. IX, 9. c. X, 1-4. Luc. X, 1. 17. Act. I, 24-26. c. IX, 4-6, 15. 16. sed etiam immediate misit ad prædicandum verbum suum, & quidem primum ad Judæos, Matth. X, 5-8. postea vero etiam ad omnes gentes, Matth. XXVIII, 19. Marc. XVI, 15. Luc. XXIV, 47. Act. XIII, 46. Cæteri *ecclesie doctores* non aliter quam mediate ad munus sacrum vocantur & ordinantur, Act. VI, 3-6, 1 Cor. XII, 28. Eph. IV, 11.

Hi omnes officio suo funguntur in nomine *Christi*, qui princeps pastorum & episcopus animarum

marum est, 1 Petr. V, 4. Eorum curæ demandavit gregem suum s. ecclesiam, Act. XX, 28. 1 Petr. V, 2. & quidem cum hac declaratione, quod omnes, qui eos audiant, ipsum audiant, Luc. X, 16.

Plura de ministerio verbi divini suo loco dicentur. Hoc adhuc hic attulisse juvat, quod *Johannes Baptista* princeps fuerit prophetarum s. ministrorum ecclesiæ in N. T. Matth. XI, 9-11. Luc. VII, 28. Erat Christi præcurfor, qui corda hominum ad fidem in eum præparavit, Joh. I, 6-8. 26-37. Jes. XL, 3-5. Matth. XI, 10. 12. 13. Luc. I, 15-17. 76. 77. Prænuntiabatur in V. T. tanquam *alter Elias*, Mal. IV, 5. Matth. XI, 14. e. XVII, 12. Marc. IX, 13. Luc. I, 17. & *angelus, Dominum præcedens*, Mal. III, 1. Matth. XI, 10. Marc. I, 2. Luc. VII, 27. nec non tanquam *vox clamantis in deserto*, Jes. XL, 3. Matth. III, 3. Marc. I, 3. 4. Luc. III, 4. Joh. I, 23. Fuit quasi *aurora*, quæ ortum solis justitiæ & diluculum diei salutis annuntiavit, Joh. I, 8. 9. Fecit hoc Johannes non modo per prædicationem evangelii, Matth. III, 1. 2. Joh. I, 8. 15-18. & manifestationem Christi inter homines versantis, Joh. I, 26. 27. 29-36. sed etiam per baptismum, initiationis sacramentum, Marc. I, 4. 5. Joh. I, 25. 26. 28. 33.

Non solum autem mediate, sed etiam *immediate* Christus officium propheticum obiit. Inaugurabatur ad istud per visibilem Spiritus S.

super eum descensum, ut significaretur, quod vere ad officium hoc unctus sit, Matth. III, 16. 17. Joh. I, 32. 33. Aggrediebaturque fungendum hoc munus suum per tentationem in deserto, Matth. IV, 1 - 11. qua finita incipiebat docere in Galilæa, Matth. IV, 12 - 17. Luc. IV, 14. 15. Joh. II, 1 - 11. Act. X, 36. 37. idque continuabat per cæteras regiones Judaicas.

Præstitit autem se verum prophetam non modo docendo, & miracula patrando, sed etiam vaticinando. *Vaticinatus enim est* non modo de se ipso & sua passione, morte & resurrectione, Luc. XVIII, 32. 33. Joh. II, 19. Matth. XII, 40. sed etiam de fatis apostolorum, Matth. X, 17. 18. Joh. XVI, 2 - 4. Luc. XXI, 12. 13. de interitu reipublicæ Judaicæ urbisque Hierosolymæ, Luc. XIX, 41 - 44. c. XXI, 6. 20. 24. Matth. XXIII, 38. c. XXIV, 15 sqq. & de interitu mundi, iudicioque extremo, Luc. XXI, 25 sq. Matth. XXIV, 29 sq. c. XXV, 31 sq.

Per quatuor fere annos officio propheticoungebatur, at non tamen in certo loco, sed, uti jam audivimus, per totam Judæorum terram cis & trans Jordanum. Constabat tunc terra hæc ex diversis provinciis, scilicet Judæa, Galilæa, Samaritana regione & Peræa s. Trachonitide. Omnes has regiones peragrabat, Act. X, 38. Potissimum autem docebat in Galilæa, Marc. I, 39. Matth. IV, 23. Joh. VII, 1. contemptissima tunc apud Judæos regione,

gione, Joh. I, 46. c. VII, 41. 52. In Judæam vero veniebat tantum tempore festi paschatos, quod Hierosolymæ celebrabatur. Frequentabat tunc quotidie templum & docebat in ejus atriis populum, noctu vero commorabatur Bethaniæ ad radicem montis olivarum, Luc. XXI, 37. Joh. VIII, 1. 2.

Egit semper prudenter, intrepide, efficaciter, eloquenter & studiose. Non habebat respectum personarum, Matth. XXII, 16. Amabat methodum parabolicam, Matth. XIII, 34. 35. Loquebatur summa cum auctoritate & efficacia, Matth. VII, 29. Marc. I, 22. Luc. IV, 32. Antecedebat eloquentia omnes legis doctores, Matth. VII, 28. Joh. VII, 46. & monstrabat tantam sapientiam, ut super ea quilibet obstupesceret, Matth. XIII, 54 - 56. Merebatur propterea præ omnibus titulum *magistri*, Matth. XXIII, 8. Joh. XIII, 13.

Fungebatur autem officio suo prophetico non solum docendo & vaticinando, sed etiam miracula faciendo, Joh. III, 2. c. X, 25. 38. c. XIV, 11. Matth. XI, 2 - 5. Per hæc confirmabat doctrinæ suæ veritatem, quod etiam fecit per vitæ suæ sanctimoniam, Joh. VIII, 46. & suum martyrium, Jes. LIII, 10 - 12.

Jure meritoque hinc dici poterat *propheta potens opere & sermone coram Deo & omni populo*, Luc. XXIV, 19. Ipse JOSEPHUS appellavit Jesum propter ejus miracula in *Antiq. Jud. Lib. XVIII. c. 4. παραδόξων ἔργων ποιητὴν*, h. e. *mirabilium operum effectorem*.

DOCTRINA CHRISTI, SUMMI
PROPHETÆ.

Judæi mirabantur ejus doctrinam, & cum bene noverint, ipsum in scholis doctorum istam non didicisse, nesciebant; unde sapientiam suam mirificam petierit, Matth. XIII, 54. Sed ipse satis clare iis id indicabat dicendo: *doctrina, quam doceo, non mea est, sed mei Patris, qui me misit*, Joh. VII, 16. c. XIV, 24.

Didicit eam in sinu Patris cœlestis, h. e. particeps factus est ejus per communicationem divinorum idiomatum, Joh. I, 18. c. VIII, 38. Matth. XI, 27. Testatur propterea, se non aliter loqui, quam a Patre doctus sit, Joh. VIII, 28. c. XII, 50. Erat etiam doctrina ejus ita comparata, ut facile pro divina haberi potuerit, Joh. VII, 17. Verba enim, quæ proferebat, erant *πνεῦμα καὶ ζωὴ*, h. e. *plena divinae virtutis & vite*, Joh. VI, 63. 69.

Habebatur doctrina ejus a Judæis pro *nova*, Marc. I, 27. quia a communi doctrina Pharisæorum & legisperitorum differebat 1) *methodo*, 2) *perspicuitate*, 3) *applicatione*, 4) *argumentatione*, 5) *rerum sublimitate* & 6) *miraculorum demonstratione*. Per se autem nil novi erat, quod Christus docebat. Prophetæ in V. T. idem docuerunt, quapropter etiam
Christus

Christus Moſem & prophetas audire iuſſit omnes, qui vitam æternam conſequi volebant, Luc. XVI, 29.

Nova temporum facies in implendis vaticiniis de promiſſo Meſſia occaſionem dabat, verbum Dei & explicandi & proponendi. Nova hæc temporum facies plerumque *tempus viſitationis divinæ* vocatur, Luc. XIX, 44. c. I, 68. 78. c. VII, 16. Marc. I, 15. 2 Cor. VI, 2. Requirebat illa aliam doctrinæ divinæ propoſitionem, quam in V. T. in quo de Meſſia venturo, per varios typos præfigurato, agebatur. Nunc vero, cum Meſſias veniſſet, lex ceremonialis tollebatur, Rom. X, 4. & omne, quod de ipſo vaticinati erant prophetæ, implebatur.

Conſtabat autem omnis Chriſti doctrina ex *lege & evangelio*, quæ ſumma ſunt totius Scripturæ S.

Evangelium, quod in V. T. itidem ut in N. T. doctum fuit, hominibus nunc multo clarius prædicabatur, Matth. IV, 22. Marc. I, 14. 15. Luc. IV, 43. Cum enim evangelium de Chriſto redemptore agat, in cujus merito, fide apprehenſo, omnis remiſſio peccatorum, Act. X, 43. Eph. I, 7. atque adeo etiam omnis noſtra ſalus æterna, Act. IV, 12. c. XV, 11. ponenda eſt, non potuit non doctrina evangelii

gelii temporibus Christi omnis sacri sermonis præcipua materia esse, quia Christus jam non modo in mundo erat, sed ipse etiam magnum doctorem agebat. Pertinebat largior evangelii prædicatio ad ipsa signa adventus Messia, Matth. XI, 5. Hoc autem nunc non amplius fiebat per typos & obscura vaticinia, sed verbis clarissimis, sicut interpretem Dei apud homines decet.

Legem vero non propterea neglexit Christus, sed diligenter quoque docuit, uti imprimis ex ejus concione montana, Matth. V. & ex verbis patet, quibus impœnitentibus & incredulis hominibus gravitatem iræ poenæque divinæ indixit, Matth. XXIII. Luc. XIX, 41 - 46.

Quæritur vero: *num Christus etiam novas leges dederit?* A Socinianis & Arminianis, nec non Photinianis hoc quidem affirmatur, ab omnibus orthodoxis Theologis autem negatur. *Legislator* quidem dicendus est, quatenus non solum Mosi ex suis manibus in monte Sinai legem divinam dedit, Act. VII, 38. sed quatenus etiam ipse rex & caput ecclesiæ est, in quem auctoritas legislatoris competit. Attamen non propterea *novus legislator* fuit. Legis Mosaicæ doctrinam quidem explicavit, & a corruptelis Phariseorum vindi-

vindicavit, verumque a Deo intentum sensum indicavit & ad statum Christianismi accommodavit, Matth. V, 17-48. c. XXII, 36-40. Luc. X, 25-37. c. XIV, 3-5. Marc. III, 2-4. Matth. XII, 1-8. imo novum obligationis fundamentum per meritum suum posuit, Job. XIII, 34. c. XV, 12. conf. 1 Joh. II, 7. sed non tamen propterea novas leges morales, per quas legem Mosaicam suppleret, aut ei alium sensum daret, tulit. Lex enim Mosaica non novis additionibus indiget, quia satis perfecta est, Deut. IV, 2. c. XII, 32. Opponitur *gratie Christi*, Joh. I, 17. quæ *jugum facile* dicitur, Matth. XI, 30. cum e contra *lex* appelletur *jugum grave*, Act. XV, 10.

Promissiones Christi de remissione peccatorum, vita æterna & Spiritus S. operationibus inter novas quidem doctrinas referre volunt Sociniani: sed nonne etiam de remissione peccatorum, Exod. XXXIV, 6. 7. Ps. XXXII, 5. Mich. VII, 18. de vita æterna, Lev. XVIII, 5. Hab. II, 4. & de Spiritus S. operationibus, Ps. LI, 13. 14. Ps. CXLIII, 10. satis clare agitur?

Quid de *consiliis evangelicis Pontificiorum* judicandum sit, alibi indicabimus. Ex parte quidem ista ex 1 Cor. VII, 6. 7. assumimus, quate-

quatenus scilicet ad res indifferentes spectant & πρὸς τὸ συμφέρον faciunt, at non tamen inter veras leges referri debent, nec aliquam vim obligandi habent.

CAPUT VI.

DE

MIRACULIS CHRISTI.

Miracula sunt operationes Dei, quæ extra ordinem naturæ in regno ejus potentia fiunt. Effectus sunt divinæ omnipotentia & pertinent per se ad regnum potentia, respectu efficaciam vero ad regnum gratia. Confirmant enim veritatem Dei ejusque verbi, nec non missionis prophetarum & apostolorum ejus.

Soli Deo adscribenda sunt, Ps. LXXII, 18. Exod. XV, 6. Ps. LXXVII, 15. Dan. VI, 27. Facit autem ista vel mediate vel immediate.

Mediate fiebant olim miracula per *prophetas* & *apostolos* ad confirmandam suam extraordinariam missionem & verbi sui prædicationem. Quia vero nostris temporibus nemo extraordinarie a Deo ad prædicandum verbum ejus mittitur, talia miracula prorsus cessarunt. Hinc etiam B. Lutherus non miracula

cula fecit, quia nec ejus vocatio, nec ejus verbum aliquid novi fuit.

Omnia autem miracula, quæ Moses, Elias, Elisæus & alii prophetæ, nec non apostoli fecerunt, non nisi virtute divina facta sunt. Deus erat causa efficiens & homines causa ministerialis, etsi iis omnino etiam nomen *Θαυματούργων* datum sit.

Interdum Deus donum miraculorum etiam *malis hominibus* largitus est, Marc. IX, 38. 39. inter quos Judas Ischarioth singulare exemplum præbuit, Matth. X, 1. 4.

Probe distingui debent vera Dei miracula a *miraculis Antichristi*, 2 Thess. II, 9. & *falsorum prophetarum*, Deut. XIII, 1. Matth. XXIV, 24. Magis *Θαυμάσια*, s. *mirabilia*, ea nominare possumus, quam *Θαύματα* s. *miracula*. Omnis enim res, cujus causa nos fugit, in prodigium a nobis trahi solet, Joh. III, 7-10.

Diabolo in aëre regnanti, Eph. II, 2. facile est, varios mirabiles in regno naturæ effectus producere, qui nobis videntur esse vera miracula. Deus ejusmodi miraculosas operationes ad nos tentandum sapienter permittit, Deut. XIII, 3. Hiob. I, 16. 19. Exod. VII, 11. 12. 22. c. VIII, 7. 18. Caveamus autem nobis, ne in errorem per istas inducamur. Deus

Paræ I.

Mm

propterea

propterea nos fideliter de iis admonet, & jubet, spiritus bene probare, 1 Joh. IV, 1. Deut. XIII, 2. 3.

Nemo majora fecit miracula, quam *Christus*. Fecit illa non modo virtute propria, tanquam ipse Deus, sed etiam respectu communicationis divinorum idiomatum, atque adeo secundum utramque naturam.

Erat *donum miraculorum* signum non modo omnis veri prophetæ, sed etiam, & quidem speciatim, Messiae, magni illius prophetæ, qui in mundum venturus erat, Jes. XXXV, 5. 6. Matth. XI, 3-5. Joh. VII, 31. c. VI, 14. Luc. VII, 16.

Finis miraculorum apud Christum fuit, a) ut manifestet gloriam suam, tanquam Filii Dei, Joh. I, 14. c. II, 11. c. XX, 31. b) ut significet, se esse verum Messiam, Matth. XI, 3 sq. Joh. V, 36. c. VII, 31. c. X, 25. c) ut confirmet veritatem suæ doctrinæ, Joh. X, 38. c. XIV, 10. 11. d) ut glorificet nomen Patris sui, Joh. VIII, 49. c. IX, 3. c. XI, 4. 41. 42. Marc. VII, 34. & e) ut homines ad se alliciat ad audiendum verbum suum, Joh. VI, 2. Luc. V, 1. c. VIII, 4. Matth. IV, 25.

Singularia, quæ in Christi miraculis animadvertantur, erant 1) quod cum certis circumstantiis fecerit, 2) quod de iis loqui interdixit.

terdixerit, 3) quod fere omnia hominibus salutifera fuerint, & 4) quod interdum ad ea se invalidum ostenderit.

Singulares omnino erant circumstantiae quibus miracula sua patrabat Christus. Non enim solo verbo, nec uno quasi ictu ea committebat, sed utebatur in iis variis gestibus, manuum tactu, saliva & aliis visibilibus circumstantiis.

Fiebat hoc sine dubio, 1) ut significaret, cum humana sua natura etiam communicatam esse vim *Θαυματουργικὴν*, 2) ut hanc naturam eo magis adorabilem redderet, 3) ut homines eo attentiores ad spectanda ista faceret, & 4) ut de veritate eorum homines eo certiores redderet.

Interdicebat Christus commisso miraculo plerumque hominibus, de eo multa loqui, Marc. V, 43. c. VII, 36. Luc. V, 14. c. VIII, 56. Faciebat hoc 1) ut declinaret accusationem iactantiae, 2) ut extolleret praestantiam operum suorum, 3) ut exemplum modestiae daret hominibus *ὕπερ Φρονῆσι*, h. e. plus, quam par est, sapientibus, Rom. XII, 3. & 4) ut eo magis impediret occasionem blasphemandi opera sua. Cæterum omnino volebat, ut post resurrectionem suam ubivis terrarum celebraretur nomen ejus & de operibus ipsius loquerentur omnes, qui testes eorum fuerant oculati, Matth. XVII, 9. Luc. I, 2. 1 Joh. I, 1.

Miracula ejus fere omnia *in salutem hominum* fiebant. Hujus respectu valde differunt a Mo-

sis & aliorum prophetarum miraculis, quorum multa in hominum perniciem vergebant. Indoles vero miraculorum Christi semper erat salutifera. Curabat ægros, cibabat esurientes, sanabat δαίμονιζομένους, vivificabat mortuos, & ubicunque virtutem suam θαυματουργίαν præstabat, simul prospiciebat animabus hominum.

Interim Christus interdum videbatur ad committenda miracula *impotens* esse. Expresse enim de ipso Marc. VI, 5. narratur, quod in patria sua ne unicum facere potuerit miraculum. Verum hujus impotentiae non alia dabatur causa, quam defectus fidei hominum, qui nolebant ægros suos ad eum ducere. Quod autem Phariseis & Sadducæis recusaverit, desideratum prodigium dare, Matth. XVI, 1-4. ex indignatione super eorum malitia fiebat. Novit enim Christus non modo eorum malum finem, sed etiam, quod satis bene cognoscerent, miracula ejus ita comparata esse, ut nemo sine Deo eadem committere queat, Joh. III, 2.

Huc neutiquam quoque adduci debent verba Judæorum, illudentium crucifixioni ejus, quasi impotens sit, de crucis morte se liberare, Matth. XXVII, 42: 43.

Satis superque enim erga hostes suos, cum captivus duceretur, declaravit, Scripturam S. de meritoria ejus morte vaticinantem implendam esse, Matth. XXVI, 53. 54.

CAPUT VII.

DE

OFFICIO CHRISTI SACERDOTALI IN GENERE.

Officio hoc nomen habet a *sacerdotio*, quod ante diluvium jam inter homines in usu fuit, Gen. IV, 3. 4. Consistit in administratione istius cultus divini, quem Deus in V. T. ab hominibus postulavit, Gen. VIII, 20.

Ante promulgationem legis Leviticæ sacerdotes erant *patres familias*, Gen. VIII, 20. c. XII, 8. c. XXII, 13. c. XXXI, 54. c. XLVI, 1. & *principes populi*, Gen. XIV, 18. c. XLI, 45. c. XLIX, 3. Exod. II, 16. c. XVIII, 1. 12. Jud. XVII, 10.

Cum vero Deus cultum Leviticum institueret, sola *stirps Aaronis* ad publice obeundum munus sacerdotale eligebatur, Exod. XXVIII. Lev. VIII.

Interim manebat privata sacrorum administratio in manibus patris familias & cui ex præcipuis ejus domesticis ea demandabatur. Legimus ideo de Rege *Davide*, quod non solum suos sacerdotes domesticos habuerit, 1 Sam. XX, 26. 2 Sam. VIII, 17. 18. sed ipse etiam sacerdotio functus sit, 2 Sam. VI, 14. 17. 18. 1 Sam. XXX, 7. 8. Interdictum tantummodo a Deo erat, ne in loco publico, quem Deus ad sacra sua obeunda elegerat, alius quis ad sacrificandum Domino accederet, quam qui de tribu

Levi & imprimis de stirpe Aaronis fit, Num. III, 9 - 10. Deut. XII, 5. 6. 13. 14.

Præcipue functiones muneris sacerdotalis consistebant 1) in *præstandis sacrificiis*, Lev. c. I-VII. & 2) in *fundendis precibus* tam pro semetipsis, Hebr. VII, 27. quam pro aliis & toto populo.

Ab hoc sacerdotio Israëlítico ethnici occasionem sumserunt, pari modo sacerdotes constituendi ad colendos suos falsos deos, quales fuerunt sacerdotes Baal, 2 Reg. XI, 18.

Erat autem apud Israëlitas *magna* inter sacerdotes *differentia*. quia ex diversis ordinibus constabant, 1 Chron. XXV, 4 - 19. Princeps eorum erat *summus sacerdos*, qui singulares præ cæteris habebat prærogativas. Succedebat antecessori suo plerumque jure primogenituræ, si modo non habebat aliquem corporis nævum, Luc. XXI, 17 sq. Ejus præcipuum officium erat, populum quotannis sacrificio & precibus placare.

Omne sacerdotium Israëliticum typus fuit Christi, magni nostri reconciliatoris, qui propterea ἀρχιερεὺς noster s. *summus sacerdos* & *pontifex* nominatur, Hebr. II, 17. c. III, 1. Fit hoc in primis in Epistola ad Hebræos, in qua Paulus valde occupatus est in comparando Christo cum summo sacerdote V. T. Ipsum tamen simul ab hoc distinguit, dum ἀρχιερεὺς futurorum bonorum, Hebr. IX, 11. & qui magnus, c. IV, 14. æternus, c. V, 6. c. VI, 20. c. VII, 17. 21. sanctus, innocens, immaculatus & a pec-

a peccatoribus separatus sit, c. VII, 26. Christum nominat.

Erat autem Christus sacerdos *secundum ordinem Melchisedec*, Ps. CX, 4. Hebr. V, 10. c. VI, 20. c. VII, 1 - 25.

Melchisedek fuit rex & sacerdos simul. Natus erat non ex genere sacerdotali, nec ætatis determinationem in sacris literis habebat. Hac de causa comparatur Hebr. VII, 2. 3. cum Christo, qui itidem rex & sacerdos noster simul est, æternitate gaudet, nec a patre nec a matre ex genere Aaronis descendit.

Operæ pretium est, de Christi officio sacerdotali nunc paulo specialius agere. In eo istud consistit, ut pro hominibus cum Deo reconciliandis sacrificium & preces obtulerit. Ex duabus igitur partibus illud constat, scilicet *sacrificio & intercessione*, de quibus singulatim nunc acturi sumus.

C A P U T VIII.

D E

SACRIFICIO CHRISTI.

S*acrificium Christi* adumbrabatur per *sacrificia* cruenta & expiatoria V. T. quæ istius typus fuerunt, Hebr. VIII, 5. c. IX, 9. 23. 24. c. X, 1. Per se non habebant reconciliandi virtutem, Hebr. X, 4. sed per sacrificium Christi eam acceperunt, Hebr. X, 4 - 10. 12. 14.

Mm 4

Non

Non autem omnia *sacrificia V. T.* fuerunt typus sacrificii Christi. Erant enim varii generis. Dabantur sacrificia cruenta & incruenta, holocausta & non holocausta, quotidiana & annua. Quædam offerebantur de animalibus, quædam vero de variis fructibus & cibariis. Nonnulla tantum summus sacerdos offerebat, cætera vero quilibet alius sacerdos.

Statim post lapsum primorum parentum auctore Deo initium ceperunt sacrificia, Gen. IV, 3. 4.

Deinde a Patriarchis post diluvium continuabantur, Gen. VIII, 20. c. XII, 7. 8. c. XXII, 9. 13. c. XXVI, 25. c. XXXI, 54. c. XXXIII, 20. c. XXXV, 3. 7. c. XLVI, 1. usque dum cultus sacrificialis a Deo per Mosem in ordinem reductus est. Ab Hebræis transiit usus sacrificiorum ad omnes gentes, verum Dei cultum in sua idololatria imitantes.

Quadruplicem habuerunt sacrificia finem, 1) ut Christi mors meritoria ad conservandam in fidelibus V. T. fidem vario modo adumbretur, 2) ut ex crudelissima occisione tot animalium non modo sævissima Dei ira super peccatores, sed etiam atrocitas peccati, quæ non sine sanguinis effusione & morte violenta expiari potuit, cognoscatur, 3) ut aliquid, quod in sensus cadat, homines in cultu divino habeant, ne idololatriæ locum dent, & 4) ut exinde *sacrificia spiritualia* discantur, quæ sunt preces, Hof. XIV, 3. Hebr. XIII, 15. Ps. L, 14. mortificatio
carnis,

carnis, Ps. LI, 19. eleemosynæ, Hebr. XIII, 16. & sanctimonia vitæ, Rom. XII, 1. Ad hunc finem imprimis spectant sacrificia incruenta & oblationes fructuum, nec non libamina, decimæ & sic dicta sacrificia pacifica.

Præcipuus finis sacrificiorum erat adumbratio mortis Christi meritoriae. Hæc enim non aliter nobis in sacris literis describitur, quam sacrificium expiatorium, e. g. Jes. LIII, 4 - 11. Matth. XX, 28. Rom. III, 24. 25. c. V, 8. 9. 1 Cor. V, 7. 2 Cor. V, 15. 19. 21. Gal. III, 13. Eph. V, 2. 1 Petr. I, 18. 19. c. III, 18. 1 Joh. II, 2. Hebr. V, 7. c. IX, 24 - 26. c. X, 10. 12. 14. Apoc. V, 9.

In primis huc referenda sunt duo hæc loca Hebr. IX, 12. & 1 Petr. II, 24. ex quibus cognoscitur 1) *sacerdos*, qui sacrificium perfecit, nempe Christus, & 2) *victima*, quæ itidem fuit Christus, & quidem secundum humanam naturam, quapropter etiam *corpus* ejus præcipue id erat, ex quo sacrificium factum est, Eph. II, 16. Col. I, 22. Christus ideo vocatur *agnus Dei* pro nobis mactatus, Joh. I, 29. 1 Petr. I, 19. 1 Cor. V, 7. Apoc. V, 12.

Patet etiam ex supra allegatis dictis 3) *ara sacrificii*, quæ fuit lignum crucis, in quo affixus est Christus non modo ad implendum typum de agno paschali in ligneo veru assato, Exod. XII, 9. 1 Cor. V, 7. & de serpente æneo in deserto erecto, Num. XXI, 8. 9. Joh. III, 14. sed

etiam ad tollendam maledictionem hominum, Deut. XXI, 23. Gal. III, 13. quapropter etiam se tam obsequiosum præstitit ad luendam crucis pœnam, Phil. II, 8. Hebr. XII, 2. Jes. LIII, 7.

Patet ex iisdem locis 4) *causa sacrificii*, quæ fuerunt peccata totius generis humani, Rom. V, 18. Joh. I, 29. 2 Cor. V, 15. 5) *finis sacrificii*, qui fuit placatio irati Dei ad redimendum nos ab omni culpa & pœna peccati, & denique 6) *forma sacrificii*, quæ consistit non modo in effusione sanguinis & vera Christi morte, quæ violenta & cruenta esse debuit, sed etiam in ejusdem oblatione & consecratione, cum semet ipsum tanquam victimam Deo traderet in odorem bonæ fragrantiae, Eph. V, 2. Joh. XVII, 19.

CAPUT IX.

DE

INTERCESSIONE CHRISTI.

Hæc alteram officii Christi sacerdotalis partem & functionem constituit, quæ in fundendis precibus pro salute hominum consistit.

Typus ejus Leviticus olim fuit suffitus coram Deo, Lev. XVI, 12. 13. Ps. CCLI, 2. Apoc. V, 8. qui vim expiandi habebat, Num. XVI, 46. 47. & quotidie in templo a sacerdotibus fiebat, 2 Chron. II, 4. qui simul preces fundebant pro populo, extra sanctuarium

rium stante, & una cum ipsis orante, Luc. I, 9. 10. Exod. XXX, 7. 8.

Hoc inprimis faciebat *summus sacerdos* die annuæ expiationis, Lev. XVI. qui propterea in *pectoralis & aureo frontali* nomina populi quotidie in conspectum Dei ferebat & eorum simul coram ipso in precibus suis mentionem faciebat, Exod. XXVIII, 29. 30. 36.

Huc spectat etiam *benedictio sacerdotalis*, quæ itidem ad officium sacerdotum pertinebat, Lev. IX, 22. Num. VI, 23 - 27. Gen. XIV, 19. & precum sacrarum species est, non autem cum B. JOACHIMO LANGIO & B. RAMBACHIO pro singulari functione officii sacerdotalis haberi debet.

In omnibus hisce se Christus sacerdotem præstitit.

Diligentissime enim *orabat* in diebus carnis, Luc. XI, 1. Marc. VI, 46. Ps. XL, 14. Matth. XXVI, 36. non solum pro semet ipso, Matth. XXVI, 39. 42. Hebr. V, 7. sed etiam pro hominibus, & quidem tam pro fidelibus & piis, Joh. XVII, 9 - 26. quam pro impiis & ipsis suis crucifixoribus, Luc. XXIII, 34. Jes. LIII, 12. Testatur quidem Christus Joh. XVII, 9. se non orare pro mundo. Verum hoc non simpliciter, sed secundum quid intelligendum est, quia non una eademque beneficia cuilibet homini conferri possunt.

Plerumque Christus orare dicitur pro piis, ut in fide & gratia divina conserventur & corroborentur, pro impiis vero ut convertantur.

Benedicebat etiam Christus hominibus in diebus carnis, Marc. X, 16. Luc. XXIV, 50. Act. III, 26. sicut prædictum erat, Gen. XII, 3. c. XXII, 18. Ps. LXXII, 17. Jer. IV, 2. Jes. XLIV, 3. Gal. III, 14. Consistebat autem ejus benedictio in donatione bonorum spiritualium, quæ per suam satisfactionem acquisivit, Eph. I, 3.

Non finem fecit Christus intercessioni in statu exaltationis, sed quotidie adhuc eam pro nobis continuat apud Deum, 1 Joh. II, 1. Rom. VIII, 34. Hebr. VII, 25. c. IX, 24. Jure meritoque hinc sacerdotium Christi vocatur *ἀναγὰς* *βασιλ* *ἱ* *perpetuum*, Hebr. VII, 24.

Differt autem modus intercessionis Christi in statu exaltationis ab eo, quo usus est in statu exinanitionis. In hoc enim fiebat intercessio humili & servili modo, Hebr. V, 7. Marc. VII, 34. Joh. XI, 41. Matth. XXVI, 39. in illo vero fit gloriose, quia sedet ad dextram Dei, Rom. VIII, 34. Hebr. VIII, 1. c. IX, 24. In statu exinanitionis fiebat expressis verbis, quod in statu exaltationis non fit, Joh. XVI, 26. In hoc enim tantum mente, non voce, fieri solet. Inde venit distinctio inter *intercessionem verba-lem* & *mentalem*. Hæc consistit in desiderio pro salute hominum interno ad Deum directo & durat in cœlis sine fine, illa vera fiebat ex-
pressis

pressis verbis & definebat in statu exinanitionis ejus.

Propter hanc intercessionem Christus dicitur *noſter παράκλητος* coram Patre, 1 Joh. II, 1. quia 1) advocatum agit, qui accusationes declinat, Rom. VIII, 34. 2) meritum suum pro peccatis nostris Patri cœlesti objicit, 1 Joh. II, 1. 3) gratiam divinam & salutem æternam constanter ab eo nobis exorat, Joh. XVII. & 4) exauditionis precum nostrarum, in nomine ejus factarum, Joh. XVI, 23. autor est.

Pontificii & Calviniani propriam Christi intercessionem negant, quia in sola repræsentatione stigmatum & vulnerum ejus consistere statuunt, quam quidem in ipsa intercessione non prorsus excludimus, Hebr. IX, 24.

Sociniani per intercessionem Christi nil aliud intelligunt, quam potestatem super creaturas a Patre cœlesti precario impetratam.

Est autem *Christi intercessio* apud Deum non frustanea, sed *efficacissima*, quia semper exauditur, Joh. XI, 42. ipseque solus est, qui justitia gaudet, apud Deum valente, 1 Joh. II, 1. Jes. LIII, 12. Rom. V, 15.

Valde igitur errant *Pontificii*, qui precibus suis non ad solum Christum, sed potius ad B. *Virginem Mariam* & alios *defunctos sanctos* confugiunt, ut pro se apud Deum intercedant, cum tamen illi neque eorum preces percipere queant, Jes.

Jes. LXIII, 16. nec coram Deo aliquid cum sua intercessione valeant, Joh. XIV, 13. 14. c. XVI, 23. c. II, 3. 4. Sunt enim ii ipsi non nisi ex gratia divina ad gloriam æternam evecti, Act. XV, 11. Rom. III, 24. Eph. II, 8.

Accedit, quod talis sanctorum invocatio species idololatriæ sit, quia solus Deus adorandus est, Matth. IV, 10. Apoc. XXII, 9.

Ad quæstionem autem: *num differentia sit inter intercessionem Christi & Spiritûs Sancti?* respondemus affirmando. *Spiritus S.* dicitur quidem æque ac Christus, noster *παράκλητος*, Joh. XIV, 16. 26. c. XV, 26. c. XVI, 7. sed non in eodem sensu, in quo *Christus* sic appellatur, 1 Joh. II, 1. Hic solus est noster advocatus coram Deo in cœlis, quatenus causam nostram ibidem agit, ac defendit, *Spiritus S.* vero noster advocatus est in mundo, quatenus non modo causam Dei apud nos agit, Joh. XVI, 8 - 11. Jes. LXIII, 10. Gen. VI, 3. sed etiam sublevando nos virtute sua in omnibus infirmitatibus salutem nostram quovis modo promovet, Rom. VIII, 26. it. v. 11. 16. 1 Cor. XII, 13. Gal. IV, 6. Ezech. XXXVI, 27. Eph. IV, 30.

CAPUT X.

DE

OFFICIO CHRISTI REGIO.

Christus unctus etiam est ad *officium regium*,
Pf. XLV, 8.

Generatim per istud intelligitur potestas ejus
super omnes creaturas & hominum status in
cœlo & terra, in tempore & æternitate, quam
secundum humanam naturam propter unionem
personalem impetravit.

Agitur propterea de eo in sacris literis non
aliter, quam de *vero Rege*, Pf. XXIV, 7-10. Pf.
XLV. XCIII. XCV. XCVI. XCVII. XCIX. CX.
1 Sam. II, 10. promittebaturque etiam a Deo
tanquam *Rex*, Pf. II, 6. Jes. IX, 7. Jer. XXII, 5.
Luc. I, 33.

Omnes reges Judæorum, inprimis *David* &
Salomon, nec non omnes Judices & Duces V.
T. inprimis *Josua*, *Gideon*, *Simson* & *Melchisedech*
erant typus ejus, quapropter etiam regnum
ejus in sensu metaphorico *regnum Davidicum*,
Jes. IX, 7. Ezech. XXXIV, 24. Jer. XXX, 9.
Luc. I, 32. *regnum Israëliticum*, Jer. XXIII, 5.
Luc. XXIV, 21. Act. I, 6. Luc. I, 34. Mich. V, 1.
Joh. XII, 13. c. I, 49. & *regnum Sioniticum*, Pf.
II, 6. Zach. IX, 9. Matth. XXI, 5. Mich. IV, 7.
appellatur, persona ejus vero cum *Melchisedeco*,
qui rex & sacerdos simul fuit, comparatur,
Hebr. VII, 3.

In

In N. T. Christus non modo ipse fatetur, se esse regem, Joh. XVIII, 37. sed etiam a Judæis tanquam rex expectabatur, Matth. II, 2. 4. Joh. I, 49. c. VI, 15. imo in cruce pendens regis titulo gaudebat, Matth. XXVII, 37.

Jure meritoque hinc ei tribuuntur *unctio*, Pf. XLV, 8. *coronatio*, Hebr. II, 9. *thronus*, Apoc. III, 21. Hebr. I, 8. *sceptrum*, Pf. XLV, 7. Pf. CX, 2. Hebr. I, 8. *leges*, Hebr. VIII, 10. & *jura regalia*, e. g. missio legatorum, 2 Cor. V, 20. potestas judicium habendi, Joh. V, 22. 23. & remissio peccatorum, Marc. II, 10.

Non modo autem *secundum divinam naturam* rex dicendus est, Mal. I, 14. 1 Tim. I, 17. sed etiam *secundum humanam naturam*. Secundum divinam naturam per æternam generationem & opus creationis & conservationis, secundum humanam vero naturam per unionem personalem & per pactum cum Patre ad redimendum homines ex potestate Satanae initum, Col. I, 13. Luc. I, 68 sq. rex factus est.

Distinguendum vero est inter *jus ad regnum* & *hujus juris exercitium*. Prius habuit Christus statim a conceptionis tempore, quapropter etiam dicitur *τεχθεὶς βασιλεὺς*, Matth. II, 2. Luc. I, 33. c. II, 10. posterius vero proprie incepit post ejus reviviscentiam in statu exaltationis, Matth. XXVIII, 18. Interim non intermisit Christus, de regia sua potestate in statu exinanitionis specimina dare, e. g. cum procellas

cellas maris sedaret, Matth. VIII, 26. 27. ut exinde pro vero Israëlitarum rege cognosceretur, Joh. I, 49. Luc. XIX, 38. Joh. VI, 15.

Sociniani ex Act. II, 33 - 35. docent, Christum tunc demum, cum in cœlum adscenderit, regem factum esse, sed locus hic biblicus tantum de solenni Christi regis inthronisatione agit.

Est autem Christus non tantum Dei vicarius in regimine mundi & ecclesiæ, sed simul ipse cum Patre verus super omnia dominator, Apoc. XVII, 14. c. X, 36. Rom. X, 12. Matth. XXVIII, 18. etsi secundum humanam naturam Deo subiectus esse dicatur 1 Cor. XI, 3. c. XV, 27. 28.

Regnum Christi æternum est & nunquam finem habebit, Jes. IX, 7. Luc. I, 33. Dan. IV, 31. c. VII, 14.

Negant hoc ex 1 Cor. XV, 24. *Sociniani*, docentes, regnum Christi in die extremo cessaturum esse. Sed distinguendum est inter regnum Christi ipsum & ejus modum.

Regnum omnino est æternum, modus vero regnandi variæ mutationi obnoxius est. In fine mundi præsens regni forma desinet & prorsus alia incipiet. Et de hac mutata regni forma c. loc. sermo est.

Regnum Christi respectu diversitatis subditorum & regiminis *triplex* est, uti nunc pluribus percipiemus.

TRIPLICI REGNO CHRISTI.

T*riplex regnum Christi est, regnum potentiae, regnum gratiae & regnum gloriae.*

Per se non nisi unum datur regnum, quod autem pro diversitate subditorum diversimode administratur.

Primum regnum est regnum potentiae. Secundum istud Christus toti terrarum orbi potenter dominatur, eumque conservat & providentissime gubernat, Hebr. I, 3. Col. I, 17. Melius vocari potest *regnum naturæ*, quam regnum potentiae, quia potentia etiam in regno gratiae & gloriae locum habet.

Huc spectat *πᾶσα ἐξουσία* s. potestas, quæ Christo, tanquam Regi omnia gubernaturo in cœlo & in terra, data dicitur, Matth. XXVIII, 18. Ps. VIII, 7. I Cor. XV, 27. Eph. I, 21. 22. Joh. III, 36. Matth. XI, 27.

Subditi ejus in hoc regno non modo sunt omnes homines & gentes, Dan. VII, 14. nec non omnia animantia, & quæ Deus in terra creavit, Ps. VIII, 7-9. sed etiam omnes spiritus, Col. I, 16. Eph. I, 21. tam boni, Hebr. I, 6.

I, 6. quam mali, Marc. I, 27. Luc. XI, 14 sq. c. X, 17. quorum ultimi catenis vincti expectant ultimum iudicium, 2 Petr. II, 4. Huc etiam referre possumus hostes Christi, quos sub pedibus suis tenet in medio illorum regnans, Ps. CX, 2. Hebr. I, 13.

Distinguitur inter *dominium* & *regimen*. Sub illo versantur omnes creaturæ rationales & irrationales, animatæ & inanimatæ, sub hoc vero tantum creaturæ rationales, scilicet homines & spiritus.

Ministri in hoc regno sunt a) *angeli*, Ps. CIII, 20. 21. Hebr. I, 14. Jes. XXXVII, 36. Dan. III, 28. c. VI, 22. b) *homines* tam *pii*, quam *impii*, qui non modo executores divinorum iudiciorum sunt, sed etiam instrumenta, quibus beneficia largitur Deus, & c) *omnes* aliæ creaturæ, Ps. CXLVIII, 8.

Alterum regnum Christi est *regnum gratiæ*, secundum quod Christus ecclesiæ suæ, per verbum & sacramenta collectæ, ita dominatur, ut eam conservet, protegat, bonis spiritualibus cumulet & ad præstanda debita officia dirigat.

Est hoc inter regna Christi præcipuum, ad cuius foundationem inprimis ille in mundum venit & unctus est, Zach. IX, 9. I Tim.

I, 15. Joh. III, 17. Tit. II, 11. Jer. XXIII, 5.
c. XXX, 15. 16.

Omnes V. T. promissiones de regno & regia dignitate Christi ad istud respectum habent, perperam autem a Judæis intelligebatur, quia Messiam talem regem fore credebant, qui instar mundani principis temporali pompa ac maiestate indutus regnaturus esset super populum Israëliticum, & quidem cum tanta gloria & potentia, ut non modo omnes gentes sub suam potestatem redigeret, sed etiam populo suo felicissima tempora redderet. Hac de causa rejiciebant Jesum, quia in forma servi incedebat, & magis verbo divino quam externo splendore homines ad suum regnum trahebat.

Vocatur hoc regnum Christi jure meritoque *regnum gratiæ*, quia nil nisi gratia in eo distribuitur, Joh. I, 14. 16. 17. Rom. III, 24. 2 Cor. VIII, 9. 2 Tim. I, 9. Tit. III, 7. Hebr. IV, 16.

Nominatur etiam *ecclesia*, Matth. XVI, 18. Eph. I, 22. c. V, 23 - 27. & quidem *militans*, quatenus opponitur regno gloriæ, quod est ecclesia triumphans. Nomen istud sumtum est ex Apoc. XII, 7. & 2 Tim II, 3. ubi sub signo Christi militare dicuntur, qui ad ejus regnum pertinent.

Ple-

Plerumque in sensu eminentiori appellatur *regnum celorum*, Matth. III, 2. c. IV. 17. c. X, 8. c. XI, 12. c. XIII, 31. 33. 44. 45. 47. 52. c. XX, 1. c. XXII, 2. c. XXIII, 13. item *regnum Dei*, Matth. VI, 33. c. XXI, 43. Marc. I, 15. c. X, 15. Joh. III, 5. Describitur tanquam *spirituale*, quod non veniat *μετὰ παρρησίᾳς* s. cum splendore, sed intra nos sit, Luc. XVII, 20. 21. nec consistat in cibo & potu, sed in iustitia, pace & lætitia, a Spiritu S. proficiscente, Rom. XIV, 17.

Tribuitur hoc regnum *Filio Dei*, Luc. XXII, 29. Col. I, 13. Eph. I, 22. qui de eo testatur, quod non sit de hoc mundo, Joh. XVIII, 36. etsi super omnia regna elatum & in æternum duraturum sit, Matth. XVI, 18. Fit quidem Christi abdicationis hujus regni mentio, I Cor. XV, 24. Verum non de ipsa ejus dignitate h. l. sermo est, sed tantum de modo regnandi, ut supra monstravimus.

Subditi in hoc regno sunt omnes homines, qui in Christum baptizati sunt, Joh. III, 5. Gal. III, 27. & ecclesiam militantem constituunt. Christi peculium castrense quasi facti sunt, cum sanguine suo istos redemerit, Eph. I, 14. 2 Petr. II, 1. I Cor. VII, 23. Apoc. V, 9. 2 Thess. II, 14. I Petr. II, 9. Act. XX, 28.

Militant sub ejus vexillo, 2 Tim. II, 3. eorum vero arma militiæ non sunt carnalia, 2 Cor. X, 4. sed spiritualia, Eph. VI, 11-17.

Actus regii in regno gratiæ sunt 1) missio & instructio doctorum ecclesiæ, Matth. XXVIII, 18-20. Eph. IV, 11, 12. quæ unctio certo modo etiam ad officium Christi propheticum referri potest; 2) collectio ecclesiæ ex omnibus gentibus, Ps. CX, 2. Jes. LX, 3-5. Matth. XXVIII, 19. Marc. XVI, 15, 16. 3) gubernatio ecclesiæ per verbum & sacramenta, 4) exornatio ecclesiæ variis donis spiritualibus, 1 Cor. XII, 7-11. Rom. XII, 3, 6. Eph. IV, 7. & 5) defensio ecclesiæ contra hostes spirituales.

Vicario in hoc regno Christus non indiget, quia solus vult esse caput ecclesiæ suæ, Eph. I, 22. c. V, 23. Ejus vero *administri* sunt 1) ministri verbi divini in statu ecclesiastico, 1 Cor. III, 5-9. 2) magistratus in statu politico, Rom. XIII, 3, 4. & 3) parentes, nec non heri & heræ in statu œconomico.

Tertium denique *regnum* vocatur *regnum gloriæ*, sub quo intelligitur beatitudo æterna. Dicitur *regnum*, quia Christus in eo tanquam rex gloriose dominatur electis, eosque summa æternaque felicitate cumulat. Expresse propterea

pterea Christus non modo nominatur *rex gloria*, Ps. XXIV, 8. & *rex æternus*, Mich. IV, 7. 1 Tim. I, 17. sed ejus etiam tanquam regis mentio fit in descriptione judicii extremi, Matth. XXV, 34. 40. Jure hinc status beatitudinis *regnum* vocatur, Dan. VII, 18. Matth. XXV, 34. Act. XIV, 22. Gal. V, 21. nec non *regnum cæleste*, 2 Tim. III, 18. & *regnum Christi*, Apoc. XII, 10.

Subditi in hoc regno sunt omnes *electi*, tam *homines* beate mortui, Apoc. XIV, 13. Matth. XXV, 34. quam *angeli*, Matth. XVIII, 20. Dan. VII, 10. Matth. XXV, 31. c. XXII, 30. Luc. XV, 7. 10. qui respectu lapsorum spirituum etiam *electi* dicuntur, 1 Tim. V, 21.

Electi homines jure quasi hæreditario in regnum gloriæ introibunt, Matth. XXV, 34. quia per Christum facti sunt filii Dei, Joh. I, 12. adeoque etiam ejus hæredes, Rom. VIII, 17.

CARPOVIUS in *Theol. Rev. Dogm. T. II p. 400* diabolos & damnatos respectu æternæ damnationis ad regnum Christi gloriæ refert, sed non accurate, quia hujus regni non confortes sunt, alias etiam infernus ad regnum gloriæ pertineret.





SECTIO IV.

DE

REDEMPTIONE CHRISTI.

CAPUT I.

DE

REDEMPTIONE HOMINUM IN
GENERE.

Redemptio ejusmodi actionem indicat, quia quis soluto emtionis pretio aliquid ex alterius potestate in suum peculium recipit.

Jure meritoque talis actio *Christo*, Salvatori nostro, adscribitur, quia salus, quam nobis acquisivit, λύτρον & meritum requirebat, nec non in liberatione ex potestate hostium spiritualium & in receptione in ejus peculium consistit.

Redemptio est opus θρανθρικόν, quia in secundam tantum Deitatis personam, in humana natura subsistentem, competit.

Vocatur propterea Christus ὁ γοῦλ, *Goël*, h. e. *redemptor*, Hiob. XIX, 25. Jes. LIX, 20. nec non מוֹשִׁיעַ, & σωτήρ, h. e. *servator* & *salvator*, Jes. XLIII,

XLIII, 3. 11. Luc. II, 11. Act. V, 31. 1 Tim. IV, 10.

Huc spectat etiam nomen *Jesus*, quod Christus secundum annunciationem angeli, Luc. I, 31. Matth. I, 21. in circumcissione accepit, Luc. II, 21.

Nomen hoc Hebraicum est & descendit a radice *יָשַׁע*, h. e. *salvavit*, quapropter etiam angelus Domini, cum injungeret Josepho impositionem hujus nominis, interpretationem hanc addidit: *nam populum suum salvum faciet a peccatis suis*, Matth. I, 21.

Nomen *Jesus* itaque soli Christo proprium est. Dantur quidem in V. T. nonnulli, qui nomina ejusdem significationis & etymologiæ habuerunt, e. g. Moyses, Josua, Hosea &c. (quæ etiam LXX. interpretes & ex eorum versione sacri N. T. scriptores Act. VII, 45. Hebr. IV, 8. Græce per *ἰησοῦς* interpretati sunt), sed nemo unquam proprie nomen *יְהוֹשֻׁעַ* tulit, quam Salvator noster, quippe qui solus est, qui significationem hujus nominis perfectissime implevit, cum genus humanum sua redemptione & satisfactione salvificaverit, Act. IV, 12.

Redemptio Christi igitur est opus illud Filii Dei, quo in assumpta hominum carne irato Deo de hominum peccatis per obedientiam & mortem suam ita satisfecit, ut nobis reconciliatus omnia, quæ sua satisfactione meruit, nobis, qui in eum

credimus, imputet, nosque sic, ab omni peccati culpa, pœna & dominatione liberatos, in suos filios & vitæ æternæ hæredes recipiat.

Tria itaque vox *redemptionis*, si de Christo usurpatur, continet, 1) liberationem, 2) emtionem & 3) reconciliationem.

Continet vox hæc 1) *liberationem*. Huc spectant dicta biblica, in quibus Christus nos liberasse dicitur ex potestate hostium spiritualium, Luc. I, 71, 74. Hos. XIII, 14. 2 Cor. I, 10. Hebr. II, 14, 15. & ab omni malo, Gal. III, 13, 1 Thess. I, 10. Tit. II, 14.

Continet 2) *emtionem*. Hac de causa usurpantur non modo voces λυτροῦν, λυτροῦσθαι & ἀπολυτροῦσθαι, Rom. III, 24. Tit. II, 14. 1 Petr. I, 18, 19. Hebr. IX, 12. sed etiam voces ἀγοράζειν & ἔξαγοράζειν, 1 Cor. VI, 20. c. VII, 23. Gal. III, 13. c. IV, 5. 2 Petr. II, 1.

Continet 3) *reconciliationem*. Huc pertinent loca, in quibus Christus nos Deo reconciliasse dicitur, e. g. Ps. XLIX, 8, 9. 2 Cor. V, 19. Eph. II, 16. Col. I, 19. 1 Joh. II, 2.



C A P U T II.

D E

SUBJECTO REDEMPTIONIS
CHRISTI.

Subjectum redemptionis Christi sunt omnes homines, qui ab Adamo vi primæ benedictionis Gen. I, 28. nascuntur & peccato infecti sunt, Rom. V, 12, 17-19.

Excipiuntur itaque hic 1) *angeli*, qui quidem ex parte etiam peccaverunt, sed non redempti sunt, 2 Petr. II, 4. Jud. v. 6. quia Christus noluit per assumptionem angelicæ naturæ eorum misereri, Hebr. II, 16.

Excipitur 2) *Christus*, qui ab Adamo quidem descendit; at non vi primæ, sed secundæ benedictionis, Gen. III, 15. & cum non ex semine peccaminoso genitus sit, Luc. I, 35. Hebr. VII, 26. non necesse habuit, pro semet ipso & suis peccatis sacrificium præstare, v. 27.

Excipiuntur denique 3) *omnes irrationales creature*, in quas quidem per lapsum hominum, in quorum emolumentum & oblectamentum præcipue conditæ sunt, divina maledictio, Gen. III, 14. 17. 18. 23. ira & pœna, Gen. VI, 7. c. VII, 23. c. VIII, 21. venit, at non tamen ipsæ peccarunt, nec ob defectum rationis & liberi

liberi arbitrii peccare potuerunt. Interim homines iisdem in suis peccatis valde abutuntur, Rom. VIII, 19-22.

Quod Christus non assumpsit, nec redemit. Dicitur quidem Christus omnia in cœlo & terra per sanguinem in cruce effusum reconciliasse, Col. I, 20. sed verba hæc nil aliud indicant, quam universalitatem redemptionis respectu generis humani, & quod per eam simul dolor Dei super creatione hujus universi Gen. VI, 6. 7. nunc sublatus sit.

Id, quod hominum redemptionem requirebat, erat *peccatum*, utpote quod nos non solum reddiderat impotentes ad serviendum Deo & vivendum secundum ejus voluntatem, sed nos etiam obnoxios fecerat omnis divinæ poenæ & æternæ damnationis.

Probatur autem, omnes ac singulos homines per Christum redemptos esse, ex hisce Scripturæ S. locis: Joh. I, 29. c. III, 16. 17. c. IV, 42. c. XII, 32. 33. 47. ubi per *mundum universum* totum genus humanum intelligitur; nec non ex Jes. LIII, 6. Rom. V, 18. c. VIII, 32. 1 Cor. XV, 22. 2 Cor. V, 14. 15. 19. Col. I, 20. 1 Tim. II, 6. c. IV, 10. 1 Joh. II, 2. Hebr. II, 9. Ipsi pereuntes inter hos redemptos locum habent, uti ex 1 Cor. VIII, 11. 2 Petr. II, 1. Rom. XIV, 15. Hebr. X, 29. patet.

Benigna

Benigna quidem Dei voluntas eo directa est, ut cuncti homines salvi fiant, attamen sub hac conditione, ut veram pœnitentiam agant, Jes. LV, 7. Ezech. XVIII, 21. 23. c. XXXIII, 11. & vera fide in Christum credant, 1 Tim. II, 5. Marc. XVI, 16. Joh. I, 12. c. III, 16. c. VI, 47. Act. X, 47. Rom. I, 16.

Calviniani negant, Christum pro omnibus hominibus mortuum esse, quia ad solos credentes redemptionem ejus restringunt, abutentes locis Matth. XV, 24. Joh. X, 15. Obiiciunt nobis vocem *multi*, Jes. LIII, 12. Matth. XX, 28. & c. XXVI, 28. sed per *multos* h. l. omnes intelligendos esse homines, probatur ex Jes. LIII, 6. Dan. XII, 2. Rom. V, 18. 19.

Distinguunt *Calviniani* inter *sufficere* & *efficacem esse* redemptionem Christi pro omnibus hominibus. Prius concedunt, posterius vero negant. Intelligunt autem non sufficientiam actua-lem, sed potentialem & hypotheticam; posse scilicet meritum Christi sufficiens esse, si Deus voluisset.

Weigeliani, Christum solam ecclesiam redemisse, docent, simulque redemptionem ad solam animam & tempora N. T. restringunt, quod ultimum etiam *Sociniani* faciunt.

FORMA REDEMPTIONIS CHRISTI S. SATISFACTIONE.

Satisfactio vox est, quæ proprie in foro humano usurpatur. In Scriptura S. non quidem secundum expressam literam occurrit, satis tamen secundum rem significatam per alia verba & phrasas in ea exprimitur, in primis Rom. V, 6. 18. ubi vox δικαίωμα legitur, quam SCHÖTTGENIUS in Novo Lexico Græco-Latino in N. T. p. 158. expresse per justificationem interpretatur.

Defendit hanc significationem certus Anonymus in *Continuata collectione nov-antiquarum rerum Theologicarum* An. 1745 pag. 967. provocans ad ARISTOTELIS *Librum V Ethic. ad Nicom. c. VII.* ubi hic Philosophus ita scripsit: δικαίωμα καλεῖται τὸ ἐπ' ἀνόρθωμα τοῦ ἀδικήματος; quæ verba GUSSETIUS in *Lexico Hebraico* p. 882. ita transtulit: ΔΙΚΑΙΩΜΑ vocatur correctio facti injusti. Addit simul: verbum istud in citato loco Pauli nil aliud significare, quam satisfactionem judicialem.

In suspenso quidem relinquimus pliam hanc interpretationem, non tamen negamus, satisfactionem Christi in citato loco omnino fundatam

datam esse. Phrasis quidem, τὸ ἱκανὸν ποιῆσαι, Marc. XV, 15. idem, ac *satisfacere*, & τὸ ἱκανόν, Act. XVII, 9. *satisfactionem* denotat, non tamen loca hæc de ipsa satisfactione Christi agunt.

Significat autem *satisfactio* actionem illam, qua quis læsæ personæ præstat, quod ad tranquillandum ejus animum sufficiens habetur.

Optime hæc descriptio quadrat in *redemptionem Christi*. Præstitit enim in illa omne, quod ad tranquillandum irati Dei animum sufficiens fuit. Recte hinc *satisfactio Christi* dici potest *redemptionis forma*. Quatenus enim Deo pro nobis satisfecit Christus, eatenus etiam nos redemit.

Est autem *Christi satisfactio* non propria, sed *vicaria* vocanda. Non enim pro se Deo aliquid præstare debebat, Hebr. VII, 27. sed tantum pro hominibus.

Jam in V. T. Christus pro hominibus *spondit*, Hiob. XXXIII, 23. Hof. II, 19. 20. Jer. XXX, 21. Pf. XL, 7-14. Psalm. CX, 4. qua sponfione fideles V. T. valde gavisi sunt, e. g. rex *Hiskias*, dicens עֲרַבְנִי, h. e. *sponde pro me*, Jes. XXXVIII, 14. item *David*, Psalm. CXIX, 132.

Satisfactio ipsa vere pro nobis facta est, cum Christus in terra ambularet & mortem
oppe-

oppeteret. Valor istius se extendit super omnia tempora & omnes homines, tam vivos quam mortuos. In V. T. typice ea fiebat per varias purificationes & varia sacrificia, quibus id, quod in N. T. factum est, adumbrabatur.

Effectus satisfactionis est meritum, de quo infra agetur.

Requirebatur autem ad satisfactionem pro hominibus ejusmodi *persona*, quæ jus in suam propriam vitam haberet, alias mors ejus non sufficientem habuisset expiandi virtutem. Hæc de causa Christus, noster redemptor, verus Deus esse debebat, qui sui ipsius & simul humanæ vitæ dominus foret, Joh. X, 18.

Nititur satisfactio Christi non in solo favore & acceptione Dei, sed fuit etiam per se sufficiens, Col. I, 20.

Hæc sufficientia & valor non ex sola dignitate personæ, Hebr. II, 9. 10. uti multa Calviniani & Pontificii faciunt, sed etiam ex ipsa passionis magnitudine æstimari debet, Ps. XL, 13. Jes. LIII, 3-5.

Infensissimi satisfactionis Christi hostes sunt *Sociniani*, qui negant, læsæ justitiæ divinæ pro

pro nobis satisfactum esse, perhibentes; Christum sibi tantum acquisivisse id, quod ad suum statum exaltationis spectaverit.

Objiciunt nobis, 1) satisfactionis vocem non occurrere in sacris literis, nisi Marc. XV, 15. ubi autem non de Christo usurpetur; sed respondemus, satisfactionem in scriptura sacra, si non secundum literas occurrat, tamen secundum ejus naturam & formam in ea, satis fundatam esse.

Objiciunt 2) peccatum nil nisi transgressionem voluntatis divinæ esse, hinc, sine Dei voluntate peccatum non foret peccatum; sed respondemus, voluntatem Dei simplicem a modificata hic bene distinguendam esse.

Objiciunt denique 3) nos gratis & per misericordiam Dei salvari & justificari, Rom. III, 24. Tit. III, 5. sed addimus: salva justitia Dei. Certi *Arminiani* in hac sententia cum Socinianis conveniunt, omnes vero satisfactionem Christi suspectam & dubiam reddunt.

Pontificii plenam satisfactionem Christi pro hominibus valde infringunt, docentes, Christum pœnas infernales pro nostris peccatis non sustinuisse, nec ei peccata nostra

imputata esse. Afferunt etiam, Christum mediatorem nostrum tantum secundum humanam naturam esse, eumque sibi ipsi passionem & mortem suam gloriam æternam acquisivisse. Docent porro, Christum quidem pro morte peccatorum æterna Deo satisfacisse, sed super hominibus obligationem ad suffrendas poenas temporales mansisse, quæ per varias satisfactiones & intercessiones in hac vita auferri & expiari debeant.

Hinc orta sunt eorum dogmata de sacrificio missatico, de purgatorio, de meritis & invocatione sanctorum, de cultu reliquiarum & imaginum religioso, de indulgentiis, de satisfactionibus pro peccatis, de merito bonorum operum, de re monastica &c.

Nos omnia hæc rejicimus, docendo, Christum perfectissime & sufficientissime pro nobis obedientia & morte sua irato Deo satisfacisse, eumque sua satisfactione placavisse.

Duo ad satisfactionem Christi pertinent, nempe 1) obedientia ejus & 2) mors ejus.

Theologi inde occasionem sumserunt, *duplicem satisfactionem Christi statuendi, activam & passivam.* De utraque nunc singulatim acturi sumus.

CAPUT IV.

DE

SATISFACTIONE CHRISTI
ACTIVA.

Christus pro nobis Deo satisfecit *agendo*, cum voluntatem divinam in omnibus perfecit, Ps. XL, 9. Hebr. X, 7. Joh. IV, 34. atque adeo Deo perfectissimam obedientiam præstiterit, Phil. II, 8. Rom. V, 19.

Quia autem Deus voluntatem suam in promulgata lege præscripsit, *legi* etiam subjiciendus erat Christus, Gal. IV, 4. Rom. VIII, 3. ut impleat istam, Matth. V, 17. Ps. XL, 9. Rom. X, 4.

Lex Dei triplex fuit, ceremonialis, forensis & moralis. *Ceremonialis* versabatur circa cultum Dei Leviticum, *forensis* circa administrandam rem publicam & *moralis* circa mores & actiones hominum.

Omnem hanc triplicem legem Christus implevit, eique obedientia sua satisfecit.

Legi ceremoniali satisfecit, cum 1) obedienter præstiterit omnia, quæ secundum illam cuique Israëliti ad colendum Deum incubuerunt, 2) cum typos cultus Levitici per officium suum mediatorium impleverit, uti

Paulus in *Epistola ad Hebræos* satis demonstravit, qui etiam Christum propterea *legis finem* nuncupavit, Rom. X, 4.

Quod ad *prius* speciatim attinet, Christus non solum die ætatis octavo circumcidi, finitoque matris suæ puerperio Deo in templo præsentari voluit, Luc. II, 21. 22. sed etiam quotannis Hierosolymam profectus est ad celebranda festa, Luc. II, 41. 42. Joh. II, 13. c. V, 1. ibique agnum paschalem comedit, Matth. XXVI, 17 - 20.

Legi forensi satisfecit Christus, cum se omni mundanæ potestati submissum præbuerit, idoque non modo obsequium præstiterit parentibus suis, Luc. II, 51. sed etiam magistratui politico, Marc. XV, 1. Luc. XXIII, 7. Joh. XIX, 10. 11. Libenter etiam tributum suum solvebat, Matth. XVII, 24. 25. 27. Cæsarique debitum dare non improbabat, Matth. XXII, 21. Nec legimus in historia evangelica, Christum unquam contra rem publicam ejusque administrationem aliqua dixisse, aut statum politicum carpisse. Probavit potius suo exemplo, omnem magistratum honorandum eique ex necessitate obediendum esse, Rom. XIII, 1 - 7. Accusabatur quidem a Judæis rebellionis crimine, Luc. XXIII, 2. sed
ejus

ejus non convincere potuerunt eum, quapropter etiam a Pilato absolvebatur, Luc. XXIII, 14. 15.

Legi morali satisfecit, cum nunquam aliquid mali cogitaverit, 1 Joh. III, 5. nec dixerit, 1 Petr. II, 22. nec commiserit, Jes. LIII, 9. Hebr. VII, 26. 27. 1 Petr. II, 22. Publice hinc ad Judæos dicere potuit: *Quis ex vobis me alicujus peccati arguet?* Joh. VIII, 46. Tota ejus vita Deo hominumque saluti consecrata erat. Honorabat Patrem suum cœlestem, Joh. VII, 18. c. VIII, 49. obediebat parentibus suis, Luc. II, 51. & amabat omnes homines ex animo & toto corde usque ad mortem, Eph. V, 3. Joh. XIII, 1. c. XV, 9. Gal. II, 20. imo ipsos suos inimicos, quibus beneficia præstitit, Luc. XXII, 51. & pro iis apud Deum intercessit, Luc. XXIII, 34. Tentationes diaboli firmiter vincebat, Matth. IV, 1 - II. & afflictiones summa patientia tolerabat. Miserebatur omnium miserorum, iisque opem ferebat sine ulla remuneratione, Matth. VIII, 16. 17. Imo cunctæ ejus actiones dici poterant beneficia & bona opera, Marc. VII, 37. Act. X, 38. Joh. X, 32. Objurgabant quidem eum Judæi de transgressione sabbathi, Matth. XII, 1. 2. 10. Marc. II, 23. 24.

Luc. VI, 27. sed injuriam ei faciebant, quia se suosque discipulos de hac accusatione ita defendere sciebat, ut Judæi obmutescerent, Matth. XIII, 3-13. Luc. VI, 3-11. c. XIV, 3-6.

Hac ratione Christus benefaciendo sanctissimeque vivendo legi morali in omnibus satisfecit, atque adeo perfectam coram Deo justitiam præstitit, quæ nobis per gratiam Dei fide apprehensam ita nunc imputatur, ut propterea justi habeamur, Rom. IV, 5. c. V, 1. c. VIII, 33. c. X, 4. 2 Cor. V, 21. nec ullius damnationis ulterius apud Deum locus detur, Rom. VIII, 1.

Non solum autem per suam obedientiam nostram inobedientiam compensare, Rom. V, 19. sed etiam exemplum imitationis nobis præbere voluit, 1 Petr. II, 21. Inprimis dedit nobis exemplum humilitatis, mansuetudinis, patientiæ & benevolentiae, Matth. XI, 29. Joh. XIII, 14. 15. 2 Petr. II, 22. quia hisce virtutibus minime omnium studemus.

Jure meritoque hinc *Christus* per suam satisfactionem activam a Deo *nobis factus* esse dicitur *sapientia, justitia & sanctimonia*, 1 Cor. I, 30.

CAPUT V.

DE

SATISFACTIONE CHRISTI
PASSIVA.

Christus pro nobis Deo etiam satisfecit *pati-
endo*, cum pœnam peccati dependerit.

Deus ei propterea omnium hominum peccata imposuit, Jes. LIII, 6, 2 Cor. V, 21. Rom. VIII, 3. quæ etiam libenter in se suscepit & sustinuit, Jes. LIII, 11. 12. Joh. I, 29.

Et si autem Christus pro nobis factus esse dicatur *peccatum*, 2 Cor. V, 21. non tamen propterea *filius diaboli* appellari debet, nec sanctitati ejus aliquid derogatur. Non enim inhæfive, sed *imputative* ei peccatum tribuitur.

Pœna peccati est *mors*, Rom. V, 12. c. VI, 23. Gen. II, 17. sub qua omne malum, quod per peccatum super homines qua corpus, & qua animam venit, intelligitur.

Ut vero hæc pœna, quam Deus hominibus propter eorum peccata irrogaverat, non modo dependeretur, sed etiam tolleretur, Filius ejus *ἐν ὁμοιώματι σαρκὸς ἁμαρτίας*, h. e. in similitudine *peccaminosæ carnis* mittebatur in mundum, Rom. VIII, 3. quapropter etiam *agnus Dei*, *αἰὼν τὴν ἁμαρτίαν τοῦ κόσμου*, h. e. qui portat & tollit peccatum mundi, dictus est, Joh. I, 29.

Hoc aliter non fieri potuit, quam quod moriatur morte violenta & cruenta, Hebr. IX, 22-28. Luc. XXIV, 26. 46. Act. II, 23. Luc. XVIII, 31. Joh. III, 14. Rom. V, 10.

Quæritur autem: *num Christus jure se pro hominibus morti tradere potuerit?* Respondemus affirmando, quia sui ipsius vitæ dominus fuit, Joh. X, 18.

Quæritur porro: *num Deus salva sua justitia & bonitate innocentissimum pro peccatoribus punire potuerit?* Affirmamus id etiam, quia volenti non fit injuria. Locus Ezech. XVIII, 20. agit de regula ordinaria stricti juris, quæ ad Christum Θεὸς ὁ Θεωπρότος non applicari potest.

Mors triplex est, naturalis, spiritualis & æterna.

Mors naturalis consistit in separatione animæ a corpore, 1 Reg. XVII, 21. 22. c. XIX, 4. Jon. IV, 3. Act. XX, 10. *mors spiritualis* in Dei ira & maledictione, Luc. XV, 24. Jes. LIX, 2. Ezech. XVIII, 23. Hos. IX, 12. 1 Joh. III, 14. Eph. IV, 18. & *mors æterna* in æterna damnatione, Matth. X, 28. 2 Thess. I, 9. Apoc. XX, 14. c. XXI, 8.

Omnem hanc mortem homines sibi tanquam poenam peccati contraxerant, Gen. II, 17. Ab ea autem ut liberentur, Christus eandem subiit.

Subiit

Subiit & mortem naturalem, & mortem spiritualem & mortem æternam.

Mortem naturalem cum omnibus ærumnis & corporis doloribus, Jes. LIII, 4. 5. subiit Christus, cum cruci affixus animam efflaverit, Matth. XXVII, 50. Marc. XV, 37. Luc. XXIII, 46. Joh. XIX, 30.

Mortem spiritualem subiit Christus, cum se a Deo derelictum conquestus sit, Ps. XXII, 2. 3. Matth. XXVII, 46. Marc. XV, 34. iramque Dei gustaverit, Jes. LIII, 4. 7. 10. c. LXIII, 3-5. Matth. XXVII, 37. 38. nec non divinam maledictionem in se suscepit, Gal. III, 13. Rom. VIII, 3. 2 Cor. V, 21.

Mortem æternam quoque subiit, cum dolores infernales perceperit in monte olivarum Luc. XXIII, 43. 44. de quibus jam in V. T. conquestus est, Ps. XVIII, 5. 6.

Quæstio inter Theologos orta est: *num Christus dici queat, revera mortem spirituales & æternam sustinuisse?*

Respondemus distinguendo inter *mortis sensum & statum*.

Mortis sensus proprie peccati poena est, non vero mortis status. Hunc potius consequens peccati nominare possumus, in quem omnes peccatores proæretici delabuntur, qui

propterea in sacris literis *mortui* vocantur, Eph. II, 1. 5. Col. II, 13. I Tim. V, 6. Rom. VIII, 6. 13. Joh. VIII, 21. 24.

Ad ejusmodi peccatores *Christus* non referri debet, quia proprii peccati expers fuit & non nisi aliena peccata in se suscepit. Ad horum pœnam luendam *mortis sensus* sufficiebat, quem *Christus* non modo respectu mortis naturalis, sed etiam respectu mortis spiritualis & æternæ subiit. Mortem naturalem autem non aliter sentire potuit, quam efflando animam, alias non vere mortuus esset. Mortem spirituales & æternam vero sensit tolerando utriusque dolores, ad quos perferendos neutiquam in statum duplicis hujus mortis delabi debuit. Sensit itaque *Christus* tam dolores infernales, ut supra audivimus, quam etiam anxietates & terrores conscientiae, de quibus conqueri solent peccatores, qui magnitudinem peccatorum suorum & iram divinam sibi contractam agnoscere incipiunt, ut exemplo nobis est David Ps. VI, 2 - 5. 7. 8. Ps. XXXII, 3. 4. Ps. XXXVIII, 2 - 11. Ps. CII, 4 - 11. Ps. CXLIII, 4. qui tamen neutiquam propterea in desperationem cecidit.

Non autem sufficiebat ad hominum salutem, *Christum* tantum morte sua Deo satisfacisse

fecisse, sed necesse etiam erat, ut virtute sua *mortem vinceret*. Hinc ad destruendam & abolendam istam non solum in mundum venisse, sed in illo etiam mortuus esse dicitur, 2 Tim. I, 10. Hebr. II, 14. 15. 1 Cor. XV, 55. Jes. XXV, 8. Hof. XIII, 14. Col. II, 15.

Hoc modo & *mortem vicit* & de eadem *triumphavit*.

Vicit 1) *mortem naturalem*, cum propria virtute revixerit, Rom. XIV, 9. Joh. X, 18.

Vicit 2) *mortem spiritualem*, cum Deum placaverit, Col. I, 19.

Vicit denique 3) *mortem eternam*, cum infernum sub suam potestatem redegerit, Hof. XIII, 14. 1 Cor. XV, 55. Apoc. I, 18.

Cum victoria conjunctus est *triumphus*. Hunc etiam Christus egit de triplici morte.

Triumphavit 1) *de morte naturali*, cum resurrexerit, 1 Cor. XV, 54-56.

Triumphavit 2) *de morte spirituali*, cum in cœlos adscenderit & sedem ad dextram Dei occupaverit, Marc. XVI, 19. Hebr. I, 2. 3. Eph. I, 20-22.

Triumphavit denique 3) *de morte eterna*, cum ad inferos descenderit, Eph. IV, 8. 9. 10.

Per hanc triplicem victoriam & triumphum Christus nobis factus est ἀπολύτρωσις f. *redem-*

redemptio, 1 Cor. I, 30. quatenus nempe meritum ejus fide apprehendimus, uti jam pluribus ostendemus.

CAPUT VI.

DE

MERITO CHRISTI S. EFFECTU
REDEMPTIONIS.

M*eritum* vocatur, quodcunque opera nostra acquiritur.

Nos indigebamus *bonis cœlestibus*. Hæc cum non opera nostra propter virium debilitatem & gratiæ divinæ defectum acquirere possemus, necesse erat, ut alius, cui nec gratia Dei nec vires deficerent, in locum nostri succederet & id præstaret, quod ad impetranda bona divina & cœlestia requirebatur.

Hic non alius esse potuit, quam *Christus*, qui non solum sufficientes vires, sed etiam omnem gratiam apud Deum, Matth. III, 17. c. XVII, 5. habuit.

Hic omnia perfectissime præstitit pro nobis ad acquirendum, quodcunque in tempore & æternitate nobis saluti esse & nos beatos reddere potest. Sic *meruit* gratiam Dei & vitam æternam.

Hoc *meritum* fide apprehendere debemus, si nobis salutare esse volumus. Alibi de hac

fide

fide plura docebimus. Hic tantum de merito Christi ipso agimus, de quo aliqua adhuc prolaturi sumus.

Meritum Christi comprehendit omne, quod Christus redemptione sua nobis acquisivit. Ipse nominat istud ζῶν καὶ περισσόν, h. e. *vitam & abundantiam*, Joh. X, 10. Huc spectant etiam loca Joh. XX, 31. 2 Tim. I, 10. Joh. XIV, 19. r Joh. IV, 4.

Sicut *mors* omne malum, quod per peccatum nobis contraximus, indicat, ita etiam *vita* significat omne bonum, quod Christus nobis promeruit, Rom. VIII, 6.

Promeruit autem nobis Christus 1) *vitam naturalem*, cum nos non quidem a morte naturali penitus liberaverit, at ejus tamen acerbitatem ita demserit, ut *mors* fidelibus non porro sit vera poena, sed potius a) *quietus somnus*, 1 Cor. XV, 20. 51. Matth. XXVII, 52. Joh. XI, 11. Act. XVII, 60. 1 Theff. IV, 13. b) *medium purificationis a peccato*, Rom. VI, 7. & c) *transitus ad vitam eternam*, Luc. XVI, 22. Apoc. XIV, 13.

Fideles igitur mortem pro magno lucro habent, Phil. I, 20. eamque sibi exoptant, Phil. I, 23.

Promeruit nobis Christus 2) *vitam spiritua-*
lem, secundum quam non solum in gratiam Dei reducti sumus, Joh. I, 16. 17. Rom. III, 24. c. V, 2. 1 Petr. II, 10. sed etiam *justitiam*, Rom.
III,

III, 22. 25. 26. c. IV, 5. c. V, 18. c. VIII, 33. 1 Cor. VI, 11. *remissionem peccatorum*, Act. X, 43. Eph. I, 7. *pacem*, Luc. XXIV, 36. Act. X, 36. Rom. V, 1. Col. I, 20. *Spiritus Sancti inhabitationem*, Tit. III, 6. Rom. VIII, 9. 11. 14. 16. 26. 1 Cor. III, 10. 2 Cor. V, 5. Gal. IV, 6. 1 Joh. III, 24. & *omnia alia bona spiritualia*, Rom. XV, 27. *impetravimus*.

Gratia Dei est quasi fons omnis salutis & benedictionis. Hanc si consecuti sumus, nos cum Christo *ἐν κοινωνίᾳ* s. communione versari dicimur, 1 Cor. I, 9. 1 Joh. III, 24. c. IV, 13. Et hæc communio est *vita* illa, quam *spiritualem* nominare solemus, de qua gloriatur Paulus, Gal. II, 20. Ipse Christus propterea se vocat vitam fidelium, Joh. XI, 25. c. XIV, 6. quia fideles in communione cum eo Deo *ἐν κοινωνίᾳ* vivunt, 2 Thess. I, 11. Deique amoris, gratiæ & gloriæ per totam vitam certi sunt, Rom. VIII, 38. 39. atque adeo nullum malum, Ps. III, 7. Ps. XXVII, 1. Ps. XLVI, 3. Ps. CXXI, 7. 8. Jes. XLI, 10. nec ipsam mortem timent, Prov. XIV, 32. Rom. XIV, 8. Phil. I, 21. Joh. XI, 25. 26.

Promeruit nobis etiam Christus 3) *vitam æternam*. Ad hanc quidem creati sumus, Sap. II, 23. per lapsum Adami vero ejusdem jacturam fecimus, Rom. V, 18. Ut autem eam recuperemus, Filius Dei in assumpta humana natura acerbissimam mortem sustinuit. Per hanc
feda-

sedavit iram Dei & nos ab æterna damnatione liberavit, nec non januam cœli nobis aperuit. Quicumque igitur in eum credit, ad æternam vitam evehitur, Joh. III, 16. 36. c. V, 24. c. VI, 40. 47. 54. c. X, 28. c. XX, 21. Rom. VI, 23. 1 Joh. V, 11. 1 Petr. V, 10. & quidem jure quasi hæreditario, Tit. III, 7. Matth. XXV, 34. 1 Cor. XV, 50. quia per Christum filii Dei, Joh. I, 12. Gal. III, 26. 1 Joh. III, 1. Col. I, 12. ideoque ejus hæredes facti sumus, Rom. VIII, 17. Gal. IV, 7. Apoc. XXI, 7.

Ad meritum Christi etiam pertinet *liberatio a diabolo*. Cum enim homines per lapsum primorum parentum in ejus potestatem pervernerint, requirebatur aliquis, qui potentior sit diabolo, Luc. XI, 22. ut ex ejus vinculis nos eriperet & crudelem hunc hostem vinceret.

Hoc factum est per Christum, qui propterea in mundum venit, ut opera diaboli destrueret, 1 Joh. III, 8. Præstitit hoc non modo per fortissimam suam resistantiam Satanæ in magna sua tentatione, Matth. IV, 1-11. sed etiam per multifariam suam expulsionem malorum spirituum, Matth. VIII, 16. Luc. X, 17. c. XI, 20. Act. X, 38. utpote qui ex mandato suo semper debebant cedere de hominibus, Matth. VIII, 29-32.

Plenam *victoriam* Christus super diabolum reportavit per opus suum redemptionis, cum
divina

divina virtute vinceret mortem, Hebr. II, 14.
Col. II, 15. Apoc. XII, 9.

Liberati propterea dicimur ex potestate
tenebrarum, Col. II, 13. ita ramen, ut dia-
bolus adhuc quidem obambulet sicut rugiens
leo, & quærat, quem devoret, 1 Petr. V, 8.
cui vero armis spiritualibus resistere possumus,
Eph. VI, 10-12. Jac. IV, 7. 1 Petr. V, 9. 2 Cor.
X, 4. Vincit est catenis caliginis, 2 Petr.
II, 4. & sine nostro consensu nos non redi-
gere potest sub suam potestatem, Luc. XI,
24-26. imo, ne quidem sine permissione Dei
aggredi, Hiob. I, 12. c. II, 6.
Matth. VIII, 31.

SOLI DEO GLORIA.



ERRATA TYPOGRAPHICA

ab ipso B. L. corrigenda.

- Pag. 34 lin. 27 *lege*: inversio textus rerumque
35 l. 8 l. aliquid
58 l. 2 l. suamet virtute
61 l. 24 l. fuerunt
68 l. 21 l. frustra
72 l. 20 l. queritur
75 l. 9 l. *pro attinentia*: accommodatio
105 l. 14 *dele*: istos
188 l. 8 *lege* initium
198 l. 23 l. quod tamen non tuto asseri potest,
222 l. 8 *dele*: bonas
262 l. 10 *dele*: vel
264 l. 29 *lege*: accessisset
297 l. 8 *dele*: econtrario vero
409 l. 19 *lege*: imminutum

ALLIANCE

1910

THE ALLIANCE OF THE

PEOPLE

OF THE UNITED STATES

AND THE

PEOPLE

OF THE

WESTERN

HEMISPHERE

AND

THE

PEOPLE

OF THE

WESTERN

HEMISPHERE

AND

THE

PEOPLE

OF THE

WESTERN

HEMISPHERE

AND

THE

PEOPLE

OF THE

WESTERN

HEMISPHERE

AND

THE

PEOPLE

OF THE

WESTERN

HEMISPHERE

AND

THE

PEOPLE

OF THE

WESTERN

HEMISPHERE

AND

THE



